

传家集

司马光

文硕阁

wenshuoge.com

目录

关于我们	5
提要	7
卷一	8
卷二	10
卷三	21
卷四	33
卷五	44
卷六	54
卷七	68
卷八	79
卷九	90
卷十	103
卷十一	113
卷十二	123
卷十三	132
卷十四	140
卷十五	149
卷十六	156
卷十七	165
卷十八	177
卷十九	183
卷二十	189
卷二十一	194
卷二十二	199
卷二十三	204
卷二十四	209
卷二十五	215
卷二十六	220
卷二十七	225
卷二十八	230
卷二十九	235
卷三十	239
卷三十一	245
卷三十二	250
卷三十三	254
卷三十四	259

卷三十五	264
卷三十六	269
卷三十七	274
卷三十八	279
卷三十九	284
卷四十	289
卷四十一	293
卷四十二	298
卷四十三	305
卷四十四	310
卷四十五	314
卷四十六	322
卷四十七	329
卷四十八	334
卷四十九	339
卷五十	344
卷五十一	349
卷五十二	352
卷五十三	355
卷五十四	359
卷五十五	362
卷五十六	366
卷五十七	370
卷五十八	374
卷五十九	380
卷六十	385
卷六十一	392
卷六十二	400
卷六十三	410
卷六十四	418
卷六十五	423
卷六十六	429
卷六十七	436
卷六十八	444
卷六十九	449
卷七十	453
卷七十一	456
卷七十二	461

卷七十三		465
卷七十四		472
卷七十五		479
卷七十六		485
卷七十七		492
卷七十八		498
卷七十九		506
卷八十		511

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案传家集八十卷宋司马光撰凡赋一卷诗十四卷襍文五十七卷题跋疑孟史劄记共一卷迺书一卷壶觞策问乐词共一卷志三卷碑行状墓表哀辞共一卷祭文一卷光大儒名臣固不以文重然即以文论亦所谓辞有体要者邵伯温闻见录记王安石推其文类西汉不诬也伯温又称光除知制诰自言不善为四六神宗许其用古文体今按集中制诏亦有俚体者但语自质实不以骈丽为工耳邵博闻见後录谓光辞枢密副使疏传家集不载博独记之熙宁中光尝论西夏事其疏亦不传惟畧见于元城语录中又论张载私諡一书载张子全书之首称其真迹在杨时家本集不载则亦颇有散佚矣光所作疑孟今载集中元白珉湛渊静语谓为王安石而发考孟子之表章为经实自王安石始或意见相激务与相反亦事理之所有疑珉必有所受之亦可存以备一说也乾隆四十四年五月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

传家集卷一 宋 司马光 撰古赋

交趾献奇兽赋【嘉佑三年八月二十七日上】

皇帝御天下三十有六载化洽於人德通於神迹无不協远无不臻粵有交趾来献麒麟其为状也熊颈而鸟喙豨首而牛身犀则无角象而有鳞其力甚武其心则驯盖遐方异气之产故图谍靡得而询於是降輶车之使发旁县之民除涂於林岭之隘引舟於江淮之滨旷时月而涉万里然後得入覲于中宸与夫雕题卉服之士南金象齿之珍款紫闥而呈入充彤庭而并陈於是羣公卿士百僚庶尹俨然垂绅荐笏旅进而称曰陛下功冠邃古化侔仪极恭承神只严奉宗稷纯孝烝烝小心翼翼出入起居不忘於训典进退周旋必咨於轨则体文王之卑服遵大禹之菲食宫室观台无砬刻之华輿马器用无珠玉之饰游必备於法驾燕不废於朝夕此皆帝王所不能为而陛下行之尚不忘於忧惕是以方内乂宁黎民滋殖垂髫之童耳皆习於诗礼戴白之叟目不睹夫金革至於根着浮流跋行喙息无不翔舞太和涵濡茂泽此殊俗所以响臻灵兽所以来格虽汉室之初黑鵄贡於絶徼周家之隆白雉通於重译殆不足方也臣等谓宜命協律播之声歌诏太史编之简策以发挥不世之鸿休张大无伦之丕绩不亦伟乎皇帝乃穆然深思愀然不怡曰吾闻古圣人之治天下也正心以为本修身以为基闺门睦而四海率服朝衆和而羣生悦随故务其近不务其远急其大不急其微今邦虽康未能复汉唐之宇俗虽阜未能追尧舜之时况物尚疵疢而民犹怨咨朕何敢以未治而忘乱未安而忘危享四方之献当三灵之厘且是兽也生岭峤之外出沮泽之湄得其来吾德不为之大纵其去吾德不为之亏柰何贪其琛寶之美悦其鳞介之奇容其欺诒之语听其谄谀之辞以惑远近之望以为蛮夷之嗤不若以迎兽之劳为迎士之用养兽之费为养贤之资使功烈烜赫声明葳蕤废耳目一日之玩为子孙万世之规岂不美欤於是羣臣拜手稽首咸曰此盛德之事臣等愚戇所不及陛下诚有意於此臣等敢不同心竭力对扬而行之皇帝於是御棫朴之篇观大畜之繇延黄髮之儒显岩穴之秀善有可旌无间於幽远言有可采不弃於微陋位匪德而不升官无能而不授使稷契居左臯夔立右伊吕在前周召侍後相与讲经艺之渊源览皇王之步骤求大化之所未孚访惠泽之所未究兴民之利若夫饥渴除民之害若忧夫疾疚赐予简而功无所遗刑罚清而奸无所漏浮费省而物不屈於求须苛役蠲而农不妨於耘耨使之夏有葛而冬有裘居有仓而行有糗丝纰之饶足以养其老甘脆之余足以慈其幼地不加广而百姓足赋不加多而县官富道涂之人耻争而喜让闾閭之俗弃漓而归厚户知礼义之方人享期颐之壽然後旃裘之长顿颡而警服祝发之渠回面而奔走靡不投利兵而袭冠带焚僭服而请印绶於是三光澄清万灵敷佑风雨时若百稼丰茂休气充塞殊祥辐辏甘露霖於林薄醴泉觴沸於嵌窞华茎罗植於堦阼朱草丛生於庭溜凤凰长离骈枝而结巢黄龙驺虞羣友而为畜由是观之则彼裔夷之凡禽瘴海之怪兽皮不足以备车甲肉不足以登

俎豆夫又何足以耗水衡之刍而污百里之囿者哉

稷下赋

齐王乐五帝之遐风嘉三王之茂烈致千里之奇士总百家之伟说於是筑钜馆临康衢盛处士之游壮学者之居美矣哉高门横闼夏屋长檐罍罍明洁几杖清严尔乃杂佩华缨净冠素履端居危坐规行矩止相与奋髯横议投袂高谈下论孔墨上述羲炎树同拔异辨是分非荣誉樵株为之蓊蔚訾毁理美化为瑕疵譬若兰芷蒿莎布濩於云梦之沕鸿鹄 鴈鼓舞於渤澥之涯於是齐王沛然来游欣然自喜谓稷下之富尽海内之美慨乎有自得之志矣祭酒荀卿进而称曰吾王辟仁义之涂殖诗书之林安人之虑广致治之意深然而诸侯未服四邻交侵士有行役之怨民有愁痛之音意者臣等道术之浅薄未足以称王之用心故也王曰先生之责寡人深矣愿卒闻之对曰臣闻之珉珎乱玉鱼目间珠泥沙涨者其泉恩莠莠茂者其穀芜网者弃纲而失叙行者多歧而丧涂今是非一槩邪正同区异端角进大道羈孤何以齐踪於夏商继轸於唐虞诚能拨去浮末敦明本初修先王之典礼践大圣之规模德被品物威加海隅忠正修列谗邪放踈行其言不必饱其腹用其道不必煖其肤使臣饭粱啗肥而餐骄君之禄不若荷鋤秉耒而为尧舜之徒惜夫美食华衣高堂闲室凤藻鸚义豹文麋质诵无用之言费难得之日民未治不与其忧国将危不知其失臣窃以大王为徒慕养贤之名而未覩用贤之实也已

灵物赋【元丰元年六月二十七日作】

有物於此制之则留纵之则去卷之则小舒之则钜守之有主用之有度习之有常养之有素誉之不喜毁之不怒诱之不迁胁之不惧吾不知其何物聊志之於兹赋

传家集卷一

卷二

钦定四库全书

传家集卷二 宋 司马光 撰古诗一

赠邵兴宗

穷达有常分得丧难豫言古今浩茫茫倚伏安可原轩裳彼自荣举俗同崩奔锱铢校重轻水火殊凉温君子固无愧立身明本根度矩苟不愆宠辱徒喧喧有如清济流横贯长河浑景公马千驷南面雄东藩陶青刘舍徒位为丞相尊当时非不显磨灭何足论顔回在陋巷藜藿甘盘飧原宪结弊衣蓬蒿塞其门当时岂不穷至今荣名存况君齿方壮德业素所敦安知搨翅归不作凌云翻要之白首期壮烈施元元为君画善策洒扫清前轩长舒四五榻客来辄开樽群愁喜伺人稍醒必烦冤拒之亦无佗体中常昏昏

邵兴宗南园草盛不翦仆过而爱之为诗以赠

君家在何许远与南城邻车马不甚繁门前无俗尘有园废鉏治绕舍皆荆榛入夏益滋蔓髣髴高没人岂无旧桃李芜杂与之均谓言彼草木於我奚疎亲於间置取舍岂得完天真不若任其然同受雨露仁物性且不违人心何缙磷闭户不迎客箕踞无冠巾苟忘轩冕心何异巢居民

送文慧师归眉山【应符】

至人心如云去住唯所适飘飏涉四海岂复校喧寂竭来王城游红尘暖晨夕忽思还故峯不可留宿昔离合皆自然於何寄驩戚从兹坐林下白首傲泉石山鸟集掌中巴猿侍瓶锡寺前烟蔓深何处求行迹

出都日涂中成【请告归陕及之汾陰省兄时所为】

贱生习山野愚陋出於骨虽为冠带拘性非樊笼物扬鞭出都门旷若解徽纆是时天风恶灵沼波荡汨龙鬣互蹇腾鸥羣远浮没川原踈豁烟火稍萧瑟草木虽未荣春态先髣髴桑稀林已斜柳弱条可屈蛛冒晴阳鼠土壅新窟徐驱款段马放辔不呵咄与尔同逍遥红尘免蓬勃

重经车辋谷

昔年道经车辋谷直上七里盐南坡今年行役复到此方春流汗如翻波中涂太息坐盘石涕

泗不觉双滂沱我生微尚在丘壑强若麋鹿婴虞罗人踰三十只有老後时过此知如何云泉佳处须速去登山筋力行蹉跎

送崔尉【尧封】之官巢县

弱岁家淮南常爱风土美悠然送君行思逐高秋起巢湖映微寒照眼正清泚低昂蹙荷芡明灭紫葭苇银花鱸肥鱼玉粒炊香米居人自丰乐不与侂乡比况得良吏来倍复蒙嘉祉君为太学生气格已英伟登科如拾遗举步歛千里毋嫌位尚微观政此为始尊公久场屋上国困泥滓岂不重相离念子勉为理当令佳誉新??满人耳高堂虽在远闻之足为喜何必羞三牲然後称甘旨

酬宋次道初登朝呈同舍

林葩积浮脆烟雾矜春姿山桂结芳坚冰霰横秋枝夫君名卿嗣华实双葳蕤如何仕不偶通籍鬓生丝岂非秋桂类不足烦嗟咨我今三十余汨没无佗奇正恐食浮人敢言位犹卑同登天子廷自视诚非宜清朝正求治谏路方坦夷太平可立致此任非君谁

奉同范景仁宋次道太常致斋韩廷评【维】见过阁人不时内韩去乃知为诗谢之

端居太常署寒日淡孤清取酒呼诸友谈笑方纵横韩君士林秀四海依高名家袭鍾鼎贵身无簪组紫逍遥风尘外万物秋毫轻未尝妄过人所过以为荣如何枉玉趾及门失相迎主人岂傲客事有迷悞并追延既不及相视徒嗟惊威凤顾修梧不下还孤征景星歛呈彩旋有流云生灵物固难覩俗眼真不明投谢有何物珉石从双琼

送守哲归庐山

哲公金陵来神韵自孤秀京华三十春高节愈幽茂烜赫公卿门道俗日奔走自非趣尚合一息不相就慷慨贤豪士波溢千金富蔬饭苟有余秋毫未尝受齟呬不可变坚白如琼琇居然尚愁寂终厌尘土臭忽思香炉云苍蔚冠孤岫振衣寻昔游烟霞宛如旧络木藤蔓长攫石松根瘦瀑泉响夜壑乳管添春窠茅茨?方丈宴坐度清昼几席雨奇花阶除驯猛兽方知物外乐回视人寰陋慎勿露声光愚迷将辐凑

清明後二日同邻几景仁次道中道兴宗元明秉国如晦公踈饮赵道士东轩以日暮天无云春风扇微和为韵得和字

寂寥清明後余春已无多闲轩富佳致不惜载酒过水木晚尤秀风烟晴更和临樽不尽醉奈此芳菲何晋康陈生【庸】家世以孝悌闻有异木连理生其庭郡欲旌表其门不果王禹玉为之求诗於朝之士大夫以纪之

灵珠蟠泥沙积水不能掩贤人畜美德久矣自标检陈生世同财百口共丰俭远居岭海间天质非陶染邦人慕其行鬪辨日衰减祥木并殊柯童童植轩檻或欲揭其门令人识仪范愚公私不然外獎由内歉已能孝悌着默致神灵感何必赐牛酒然後明褒贬况兹诗咏末琐琐事铅槩才薄不敢辩适能为污点

送邵兴宗之丹阳

赤日裂后土万家如烘炉君行何事役似为贫所驱埃尘稍去眼云景日萧疎扁舟乘长风倏忽变三吴六年羈旅倦一旦谁扫除慎勿忘回首浩荡江山娛

瘦盆

瘦盆生以丑自鬻突兀当轩耸羣目海黿鬪怒腹干张老蛟蟠蛰鳞髻秃昔时仙客浮孤槎波?渍朽成凹洼蜀都买卜置之去尔来流落严遵家谁逢好事得宝蓄裁供盥濯真可辱况为饮具承欢娛未必蟠根胜珠玉不若刳为太古尊满?明水羞百神?桴苇龠荐忠信坐使风俗还深淳

送张兵部【中庸字元常】知遂州

劒岭横天古栈微相如重驾传车归双亲倚门望已久千骑踏雪行如飞人间富贵非不有似君荣耀真亦稀闻道西州遗画像使我涕泪空沾衣【先人知小溪县正板籍均赋役闻邑人至今诵之画像犹存】

同舍会饮金明沼上书事

日华骀荡金明春波光净緑生鱼鳞烟深草青游人少道路苦无车马尘石渠诸君职事简载酒撷花畏花晚浮舟逐胜任所之箕踞狂歌叩舷板眼花耳热气愈豪掷杯击案声嗷嗷惊沙飒飒绕洲渚鱼龙迁去避我曹人生大料无百岁贵贱贤愚同一致在家穀菽余几何一日风光不宜弃

新迁书斋颇为清旷偶书呈全董二秀才并示侄良富

长夏暑候浊云火高漓岏岂徒肌骨烦木卷川流乾新居得南斋檻檻稍虚寛森罗对草树晓暮清陰寒汛扫布几簟气体粗可安图书虽非多亦足备览观圣贤述事业细大无不完高出万古表远穷四海端於中苟得趣自可忘寝餐况今有道世穀禄正可干勗哉二三子及时张羽翰力学致显位拖玉簪华冠毋为玩博弈趣取一笑欢壮年不再来急景如流丸

奉同何济川迎吏未至秋暑方剧呈同舍

釋金避老火暑勢尤骄盈朱光烁厚地万叶焦无声夫子久倦游得郡为亲荣束装待驺吏归期殊未成埃沙塞广陌蓬蒿拥前楹出处两不愜孤坐心烦縈何时惊飈来扫荡天地清郊墟草树踈千骑从双旌飄颻若神仙阜盖西南征离羣诂几时岂不怀友生有意肯相过不妨巾屨并官舍稍虚凉愧无殽酒迎

晚食菊羹

朝来趋府庭饮啄厌腥羶况临敲扑喧愤愤成中烦归来褫冠带杖屨行东园菊畦濯新雨綠秀何其繁平时苦目痼滋味性所便采撷授厨人烹?调甘酸母令姜桂多失彼眞味完貯之鄱阳瓿荐以白木盘餽啜有余味芬馥逾秋兰神明顿飒爽毛发皆萧然乃知愜口腹不必矜肥鲜尝闻南阳山有菊环清泉居人饮其流孙息皆华颠嗟予素荒浪强为簪綬牵何当葺弊庐脱略区中缘南阳勾嘉种蒔彼数亩田抱瓮亲灌溉烂漫供晨餐浩然养恬漠庶足延颓年

和吴冲卿崇文宿直睹壁上题名见寄并寄邵不疑【冲卿诗序仆与不疑三人同登进士同自太学官入校集贤书又尝同直一室今不疑谪南方仆佐东平冲卿因宿直观壁上题名为诗代书】

白袍昔纷纷相与会东堂帝梧碧萧瑟翔集皆鸾凰伊予素空疎滥吹翰墨场不为羣僇遗出处聯簪裳尔来凡六闰转轂飞炎凉同歌太学下共醉金马旁修竹压牕寒夭桃倚户芳金盘剖卢橘玉壶分蔗浆惊呼局上急嘲笑杯间狂神情一契会形迹两俱忘欢余叹薄宦离合何能常濡毫纪岁时挥霍素壁光去秋随相车沿牒来东方城中未徧辞不疑逐南荒奔波走郊外取别何苍黄举觴未及尽亟归还束装行行到官下日积簿领忙文书拥笔端胥史森如墙况当三伏深沾汗尤淋浪细蝇绕眉睫驱赫不可攘涔涔头目昏始觉冠带妨诚知才智微吏治非所长惧貽知己羞敢不益自强因思瓯闽远南走侵溟涨炎蒸异中县从古无雪霜终朝坐茅屋盐茗征行商謹譁费口舌解囊收毫芒不疑性高介此困安可当山川几千里问讯谁能将冲卿居京邑青云正腾骧寓直紫台上风露澄东厢清夜不成寐缓步聊彷徨拂此壁上尘远怀同舍郎英辞欵感发高义纷激昂泠泠宫殿虚讽咏何琅琅手书成两通貯之古锦囊一往泉山南一致汶水阳坚重金璧体光寒矛劒鉞乃知贤隲心浅俗未易量何尝用荣枯遽尔分否臧居然激衰薄更使清风扬

昔别贈宋复古张景淳

昔别如飞蓬飄荡随所适那知十六载卮酒对今夕渺然思旧游间不容一息百年诂几何会合难屡得复古素悒悒志行重金锡皎如百鍊精不为燥湿易景淳气高逸浩荡谁与敌下笔惊雷霆龙蛇走屋壁居然器业美但有富贵逼佗时绾金印羈束愈愁寂须穷今日懽快意浮大白勿辭簪弁倾颓然倒樽席

初见白髮慨然感怀

万物壮必老性理之自然我年垂四十安得无华颠所悲道业寡汨没无佗贤深惧岁月颓宿心空弃捐视此足自傲拔之迺违天留为监中铭晨夕思乾乾

谢胡文学【九龄】惠水牛图二卷

牛生天地间益物用最大其功配坤元象爻参衆卦血毛类上帝胙鬯景福介宗庙及宾客百礼无不在引耒刺中田粒食烝民赖服箱走四方竭力任重载昔闻戴叟笔图写穷纖芥胡君继其妙差肩立异代公卿仰名声一观不可勾如何散贱者遽有双图賚所嗟性顛愚雅不晓佳画有如歌九韶钟鼓乐聳瞶得之乃虚器无异居大蔡神物恐化去立召风雨怪双图虽卷还重贶敢不拜

王书记以近诗三篇相示各摭其意以诗賡之感遇

白鹄出江渚刷羽何鲜新志陵青霞端欲饮天汉津清飈未我与陂泽聊逡巡偶为虞罗获远趣无由伸樊笼厌局促野性那能驯庭除数惊顾惨惨常畏人皓素不入俗衆目谁为珍稻粱不充腹日与鷄鶩邻举头畏太高俛啄空愁辛萧萧敛六翮憔悴伤精神男儿五十不如意青衫华发游埃尘擢为盐官北如晋今为幕吏西适秦慨然遂欲抛手板拂衣高蹈锦水滨长竿短艇入烟雨放歌酣饮欹乌巾方今圣朝清似水林空谷静无隐沦吾君梦卜偶未到勿学君平与子真

投梅圣俞

圣俞精为诗坚重比白玉至宝识之希未必谐衆目应辰仰高风跂竚自西蜀平生未相识歉歉不自足薄游困京师旅食止脱粟得官当入秦行李未结束先求圣俞门执贄请所欲九衢季冬月风沙正惨黥羸马憚远行毛鬣寒瑟缩旅拒不肯前一步九刺蹙饥童?拥口手足尽皸瘃论诗久未出窃骂怨满腹归来面扬扬气若饫粱肉累累数十字踈淡不满幅自谓获至珍呼儿谨藏蓄长安十五驿重复问川陆置诗怀?间勸懣辄披读高吟桑野阔目瞑即投宿自可忘羈愁行瞻灞陵曲

呈范景仁

劒山中断融为川清江双流鬱回旋沟塍阡陌粲如绣香秔紫芋皆良田地灵物秀气淑美由来衮衮生英贤朝家文明所及远於今台阁尤蝉聯猎纓鸣佩走声望出入金马如云烟柰何应辰独壙坎华发未得离宾筵璵璠悬黎已为宝结緑岂得偏弃捐愿君弹冠自重惜邑人行诵子虚篇

酬胡侍讲先生【瑗字翼之】见寄

后王命天官考绩弊群吏属曹省闕阅专职米盐事贱生偶承乏窃禄聊自庇才力困不逮惨

惨日忧惴赖依僚友贤剗裂沛余地自知虽寄名不足系轩轻先生喜诱掖贻诗极褒贲谁云
岁杪寒面热汗沾渍非不悦子道弩钝力难致常恐负吹嘘终为重言累

同张圣民过杨之美听琵琶女奴弹啄木曲观诸公所赠歌明日投此为谢

坐曹据案心目疲出门上马行何之阙然久不见之美率意共往初无期正逢揽辔欲有适为
我却解连环羁闲轩适足容数客夏木初繁有佳色呼儿取次具杯盘青眼相逢喜无极檀槽
锦带小青娥妙质何须夸绮罗按弦运拨惊四座当今老手谁能过弹为幽鸟啄寒木园林飒
飒风雨和喙长爪短跃更上丁丁取蠹何其多曲终拂羽忽飞去不觉酒尽朱颜酡已闻啄木
曲又观啄木歌雄文更复值絶艺有如天际倾长河今朝壮观诚极乐去此将奈寂寞何归来
解带豁胷腹坐踞胡牀仰看屋从今三日不洗耳耳内泠泠有残曲人间何物号富贵纡紫怀
金尽虚器如君自处真得策身外百愁都掷置太学餐钱月几何客来取酒同醒醉

晚归书室呈钱君倚

簿领日沈迷事役等胥靡得归无所为未免阅书史一种劳精神胷中异忧喜人生无苦乐适
意即为美迺知抱关人不必要青紫

偶成

於陵薄三公桔槔亲灌园伯成轻南面执耒耕丘樊渊明耻为令乞食倚人门贤人乐遂志荣
辱安足言鄙哉夸毗子结驷乘朱轩

同钱君倚过梅圣俞

王畿天下枢簿领日填积自非奉朝请九衢未尝识今兹到东城胥靡暂逃役近指圣俞居安
能不往觐一室静萧然昏碑帖古壁叩阶读新诗迷闇得指撚笑言殊未足黯然日将夕呼马
涉归涂灯火已历历又知几何时更有重来迹

梅圣俞惠诗复以二章为谢

我得圣俞诗於身亦何有名字托文编佗年知不朽我得圣俞诗於家果何如留为子孙宝胜
有千年珠

和钱君倚藤牀十二韵

嗟予仕京府谋禄非谋身岂徒劳百骸消铄侵天真所畏旷官诛敢辞从事勤朝讯狱中囚暮
省案前文虽有八尺牀初无偃息痕比归暂解带日没轩窗昏援枕未及就扑面愁飞蚊未能
习律令何暇闚皇坟夫君天才秀明颢排纠纷右曹况清简剗裂奚足云未遇且坚卧逢时将

致君行当起经济膏沐醒吾人

旬虑十七韵呈同舍

府官无旬休虑问迺游息诏书禁从诣还舍始朝食缓带对藜羹下筯免促迫门前吏卒散却扫谢来客北轩有藤牀今晨始拂拭蓬髮乱宜梳霜髭闲可摘开囊晒药物发笥出书册菊畦亲灌浸茶器自?滌於时孟秋末天晴色绀碧林叶虽未零风声已淅沥神明还九藏清气袭百脉征夫解甲胄疲马脱羈勒蜚鸟开樊笼跳鱼出鼎鬲形骸尽我有不复为物役虽非久安逸幸得少顷适讼庭止敲扑咫尺异喧寂明朝不能然顾盼愁月夕

夜坐

春阳气未胜重为陰所乘涔涔积雨閤惨惨余寒增流云郁不开烈风尚凭陵夜阑闭户牖青暈生昏灯僮仆悉已眠书几久欹凭涉猎阅旧闻暫使心魂澄有如行役归丘园恍重登又如远别离邂逅逢友朋嗟嗟宦游子何异鱼入?夺其性所乐强以所不能人生本不劳苦被外物绳坐愁清旦出文墨来相仍吏徒纷四集仆仆如秋蝇烦中剧沸鼎入骨真可憎安得插六翮适意高飞騰

二月中旬虑问过景灵宫门始见花卉呈钱君倚

贱生参府僚勉强踰半岁终非性所好出入意如醉讼庭敲扑喧衆草絶生意不知有青春倏忽已改燧周章连日忙烂漫数宵睡轩?岌飞举风雨颇恣睢谓言芳菲物狼藉应扫地今晨呼马出历狱问囚系窈窕清宫深仓琅朱门闭广殿肃层陰虚庭蔼佳气长杨委嫩緑老柏净新翠薜荔垂宛延奇石立矗矗豁然愁愤开精神四面至事役难少留马去尚回睇亦足慰无聊年华不都弃

和始平公梦中有怀归之念作诗始得两句而寤因足成一章

元宰抚洪钧四海可熏灼至人养天真视此犹婴缚出入金鼓威寤寐琴樽乐迺知伊吕心未始忘丘壑

和江邻几六月十一日省宿书事

长夏金正伏火意尤骄盈夫子寓官舍无术逃烦蒸轩窗豁四开灭去壁上灯紵衣不可亲羽扇安能胜濯泉泉已温抚簟簟可憎万叶悄无风但有飞蚊鸣六府燥不濡喉舌烟尘生掇衣起徐步四顾天正晴云汉浅欲涸箕毕徒纵横忽思终南巔秀出秦云青上有长松林蔽日深杳冥下有万仞壑含蓄太古冰安得蹑轻屐杖策缘峥嵘挂冠芙蓉阙结屋高崖棱回视万鍾禄影撇如飞蝇

和张仲通学士苦暑思长安幕中望终南秋雪呈江邻几

秋云覆秦川小雨野未湿谁言终南顶已有霰雪集返景开新晴孱颜照都邑初疑江津阔远浪横风急又疑龙蛻骨逶迤委原隰词客登高楼四望清兴入当时应百篇遗散不复拾今兹宦帝城大暑困郁悒红尘满九衢出入冠带袞家居宾旅来俯俛烦拜揖回思幕中趣引领安可及江翁养文采正如玄豹蛰君往犯其严腾起谁敢縈嗟予素恒怯旁睨毛髮立强复綴此章庶几勇可习

和张仲通追赋陪资政侍郎吴公临虚亭燕集寄呈陕府祖择之学士

吾家陕之北陕事吾能说孤亭占城隅形胜最殊絶云消天宇空极目鸟飞灭大河西北来汹涌地脉裂万里卷流沙长驱走溟碣羣山势离合披靡随曲折林薄带村墟郊原如绣纈祠宫望神禹闲田指虞芮高丘想巫咸空岩怀传说圣贤迹已远缥渺见风烈吴公昔为守治行莹冰雪君从丰镐来华馆息尘辙主人喜佳客置酒升巉岨清欢浩无涯烛至樽未撤谁知捧手辞遽有幽明诀至今犹堕泪遗爱满耆耄择之新下车条教悉施設依然典刑在先後如符节嗟予仕京邑苟禄自羈縲丘垄翳荒松三年洒扫缺求归未能得朝莫肠百结得君临虚诗髣髴见里阙何时往登临旷若目去?忧来复长吟益使寸心折

次韵和吴冲卿秋意四首

槐花满庭除籍籍不可扫稍踈召平瓜渐熟王阳枣失时团扇弃新进袷衣好日暮益愁思寒蛩起幽草忽闻秋兴篇叹赏几絶倒

端居倦烦暑园圃久不窥雨余秋气新红叶生紫梨形骸得萧散不知环堵卑何能效流俗把酒须菊枝登高已可醉四野青云垂

纵棹下清溪波静地仍偏日夕水风凉萧洒成安眠兀兀但高枕悠悠还进船中流忽惊寤渔父歌扣舷山川非曩时回首云霞边

弱植生川泽托根北堂後昔时青春姿扶疎映轩牖风霜日消落憔悴复何有蠹穿枯节断雨渍虚心朽幸不夭天年犹得胜凡柳

和邵不疑校理蒲州十诗【必】

饮亭【亭有流盃渠】

飞盖名僚集临流芳宴开紫紵漱文石次第传清盃回波亦多意并泛落花来

涌泉石【枢密学士蒋公知府事得片石大如席上有数十窍莫知所施公问石工对曰此盖

涌泉石也乃於饮亭下凿地为埒置石其上夏日从旁激水灌之跃高数尺以清暑气】

苍然片石寒百道飞泉吐高堂忽萧飒坐失炎蒸苦蛟龙卧欲飞仰噉秋空雨

翠楼

条山翠气横隐嶙秋空窄危楼雨初度卷幌延佳色扑扑满前轩岚光真可摘

碧楼

烟瓦叠琉璃危楼半空倚歌钟奉高宴声来碧云里日暮天四垂黯澹如秋水

静斋

【逸二句】 聊窥碧甃缺寒草生历历时闻山鸟呼未得全幽寂

槐轩

【逸二字】 轩已幽况复植宫槐檐外陰沉綠南山雨气来逍遥不知久惊此黄花开

凉【逸一字】

【逸二句】 清风满四境岂独华榰下不若楚台人披襟独萧洒

芙蕖轩

荷花烂漫红不见方塘水嵒嵒结飞阁苒惹清香里露重忽欹侧翩然翠禽起

惜花亭

春意复蹉蛇园林日愁寂枝边綠陰重砌下红英积兹亭花最繁飘零尤可惜

竹轩

茂密正当轩欹垂欲侵案风枝忽交戛月影争凌乱诚嘉君子心匪直林亭玩

和昌言官舍十题

石榴花

灵根逐汉臣远自河源至流离徧中壤今兹尽苗裔畏日助殷红冻雨涤浓翠宜?避暑客花下纵横醉

薏苡

佳实产南州流传却山瘴如何马伏波坐取丘山谤夫君道义白复为神明相厉气与流言安能逞无状

石兰

楚人歌紫兰华禁无传久循名意兹是谁得明真否天怜菊性孤秀发秋风後固令芳物生聊作黄花友

萱草

叶濯宿露翠花迎朝日黄昔谁封殖此俨列侍高堂達生隐於吏孰为行与藏逍遥玩永日自无忧可忘

蜀葵

白若缁初断红如顔欲 坐疑僊驾严幢节纷骈罗物性有常妍人情轻所多菖蒲悦日秀弃掷不吾过

畦蔬

隙土惜荒弃翦治成春畦讲雩时泽洽葵荏高参差酺渠若贯脉疏塍如画碁为吾谢来客桔槔毋语机

水红

梦想水乡游阶庭植笼古宛如江外行高帆落寒浦烟枝静踈秀风穗闲低举於今看未好漠漠宜秋雨

甘菊

野菊细琐物篱间私自全徒因气味殊不为庖人捐采升白玉堂荐以黄金盘愿若南阳守永扶君子年

兰

贤者非无心园夫自临课
莳植日繁滋芬芳时入座
青葱春茹擢皎洁秋英墮
正苦郢中人逸唱高难和

病竹

园竹久不治芜没真可吊
岂无枯槁容萧疎自殊调
至人爱高节命斧除藜藿
何用报至恩清陰与长啸

谢兴宗惠草虫扇

吴僧画团扇点缀成微虫
秋毫宛皆具独窃天地功
细者及蛛蝥大者才阜螽
枯枝拥寒蛸黄蘂粘飞蜂
翩然得生意上下相迫从
徒观飞动姿莫睹笔墨踪
儿曹取真物细校无不同
恐其遂跃去亟取藏箱中
乃知艺无小意精神可通
不与误图蝇能惑紫髯翁
子猷状蝉雀藏宝传江东
不知古何如此画今为雄
人墓木已拱其徒颇能工
旧法存百一要足超凡庸
友人幸为赐物薄意何隆
玩之不替手爱重心无穷
常如对君子穆穆来清风

传家集卷二

卷三

钦定四库全书

传家集卷三 宋 司马光 撰古诗二

和王胜之雪霁借马入局偶书

胜之家本公侯贵弱冠英才已惊世雒阳多士谁敢伦千古比肩唯贾谊昔遭绹灌深切齿奔走十年为下吏近方擦拭出泥涂稍学和光匿锋锐会计之官岂足为龟勉簿书聊自庇王城九衢腊月尾风雪数朝穷恣睢枵腹款段疲且病借马於人亦疲曳扬鞭掣轡趋省廷刺蹙不前泥没鼻慨然遂有劳者歌满纸雄文欵轩轻人生荣遇有早晚视此锱铢勿关意况君卓犖高出羣异日青云终自致鲜车大盖拥骅骝莫忘今朝乘小驷

齐山诗呈王学士【哲字微之】

江上有奇山羣峯矗如翦昔闻齐刺史置酒升絶巘其人有惠政嘉名自兹远君来踵其迹词牒日清简骊驹时入谷胜地穷搜选问俗复怀人非徒事游衍

吹箫

古人吹箫者以和虞韶声後世不复贵给丧仍卖饧

和始平公见寄

向来从後车雍容镇藩垣政成簿书简终日侍清樽今兹备言职不得登朱门违离讵几时风色变寒温忽聆吉甫什穆如承话言安得六翮生随意远飞翻垂耳倦新羈蹠足思华轩谅无伯乐顾疲劳安敢论

又和并寄杨乐道

圣主乐忠諫曲从如转圜玉色粹阳春至仁生自然所慙羣臣愚无以称开延贱生何为者侧足青规前顽石不可链安能补高天狂简昧大体所依官长贤有如骖之靳左右随周旋庶几助山甫袞职无尤愆?思老成人阻亲函丈筵岂不寸心劳动为纒徽牵何当执寿卮跪起得差肩相顾藐无期瞻望徒悁悁

朝鸡赠王乐道

小鸡距短双翅垂广场勇鬪无所施清晓长鸣独先衆朝者恃此能知时星河满天月光白东望扶桑悄无色一声高举耳目醒四远羣陰俱辟易陋巷人踈烟火稀永夜沈沈钟鼓微闻之徐起就盥栉颠倒不复忧裳衣君家迴居北城曲阿阁嵯嶢日鸣玉萧萧风雨得司晨不使无功啄君粟

谢始平公以近诗一卷赐示

皇家骏命承苍穹烝民之杰生维嵩圣贤会合若符契坐致四海登熙隆三阶清平九鼎重指麾拱揖安华戎人情谁不乐将相往往皓首忘疲癯北平饮乳尚怀印千秋乘车犹入宫唯公致政年甫至耳目明利志气充幡然脱去万鍾禄羽仪高远如翔鸿灵台不复絀尘务至德恬淡含黄中英华纯粹积不发事业转为文字工大篇短韵间金石远追吉甫流清风刻雕衆物非用意默与元化参神功应刘鲍谢事奇巧琐细岂足夸才雄裸圭夷玉清庙器肯与环玦争玲珑绦帐生徒东阁客微官拘繫如樊笼言诗何敢望商赐幸得诵咏祛童蒙昏花病目不自惜服膺盥手书一通千金之产不可易子孙宝蓄传无穷

早春戲作呈范景仁

闰余春意早卉木先有思嚶嚶羣鸟翔东西各求类伊予忝諫垣动息抱忧悸袞职旷不补言责真可畏况复禁过从陋巷若囚系茅茨庇风雨偏隘无余地时於坏垣隙历历生新荠君侯乃比邻跬步难自致常思去岁初西轩学歌吹座客皆故人欢笑无拘忌平生不喜酒是日成烂醉岂言长揖归良会难再值东风忽复来时华一何驶丛竹固无恙夭桃作花异朝廷正清明詎肯容窃位何当遂废放欢饮还自恣

夏夜

溽暑郁不开轟轟云万叠长风卷地来冻雨不濡叶虽无润物功凉冷得所愜须臾号怒息清月照壁颊小冠簪短髮衣裾轻猎猎欹倾依曲几暂尔苏疲茶坐久不思眠草间微露浥

和范景仁西圻野老

西郊广路浮壤黄上天雨泣寒云苍鸾旗闐戟纷晦霭扈从威神归帝乡田家老父眉睫白杖藜匍匐泣路傍且云生逢至仁主蠲租罢役岁为常蠶收百箔桑蔽野麻麦极望无边疆去年翠华出赛雨锦绣绵络墟里光拜迎六马负缣帛孙扶妪接归扬扬自分讴歌毕余景一朝缟素安可防哀声湏洞彻四极草木惨淡顔色伤蝼蚁衰龄不足赎泪如飞雪空沾裳河紫洛贯嵩峯足泉底寰瀛日月长羡门已闭属车返轭上空瞻金凤凰

种竹

种竹南墙陰竹生皆北向苟非阳在北竹性安可强乃知就阳意草木皆有情园葵最柔弱独

取倾心名

和王介甫巫山高

巫山高巫山之高高不极寒江西来曳练长羣峰森罗十二戟清猱悲号裂翠崖老蛟怒鬬摧丹壁轻生重利三巴客一叶直冲高浪白船头吟啸坐自如仰视长天不盈尺丛祠象设俨山椒巫祝纷纷非一朝云是高唐神女之所处至今暮雨常萧萧我闻神理明且直兴亡唯观恶与德安肯来从楚国君凭依梦寐为淫昏襄王之心自荒惑引领日望阳台云独不思怀王西行不复返甲光照地屯秦军蠶食黔中下荆门陵园宗庙皆烧焚社稷飘零不复存嗟嗟若敖蚡冒时筰路蓝缕皆辛勤

昔予尝权宰韦城今重过之二十五年矣慨然有怀

二十五年南北走遗爱寂然民记否昔日婴儿今壮夫昔日壮夫今老叟

秋怀呈范景仁二首

草木正蕃庑孰知天地秋况兹宿雨余景气益和柔消摇愧簪绂梦想怀林丘兹志久未果素髮今已稠仰视白日光浩荡浮云流安得黄鹤羽陵风千里游

畴昔共登仕尔来三十秋常曦丝绳直窃耻鸱夷柔蹄涔学钜海螳垤依崇丘行之不自疑亲寡憎怨稠於今不亟去沦胥恐同流努力买良田远追沮溺游

赠道士陈景元酒

篱根委余菊堦角拥残叶清言久不悞何以慰疲茶朋樽涵太和高兴雅所惬谁云居室远风味自可接范景仁召饮东园呈陈彦升宋次道李才元苏子容

去冬辱嘉招寒风方颺颺今秋侍高宴晴日正澄丽虽无花醺繁且有丘樊思虽无山泉乐慙违尘土气仆休散城邑马纵脱羈轡讙呼笑言适散诞冠带弃殊胜禁掖严进止有常地

虞帝

虞帝老倦勤荐禹为天子岂有复南巡迢迢渡湘水至德远无象异论纷纷起意疑大圣人奸儉亦如已乃知中下士何由逃谤毁

聂着作三舅谪官长沙作耐辱亭书来索诗

少连善降志无恤能忍诟兹亭名耐辱缔构自吾舅樽前湘水清席下湘山秀於焉忘荣枯终

日醉醇酎攻愁若攻敌避喧如避寇困久理须通非徒保无咎

走索

伎儿欲夸衆喜占衢路交系组不厌长缚竿不厌高空中纷往来巧捷如飞猱却行欠肤寸倒
絪连秋毫参差有万一蠶粉安可逃钱刀不盈掬身世轻鸿毛徒资旁观好曹偶相称褒岂知
从事者处之危且劳

邵不疑厅薛荔及竹

修竹非俗物薛荔亦嘉草树之君子庭人来见逾好侵堦鹤胫细缘壁龙鳞老纷披两踈翠烟
色宜秋早主人日封植清风庶长保

和公達过潘楼观七夕市

织女虽七襄不能成报章无巧可乞汝世人空自狂帝城秋色新满市翠帘张伪物踰百种烂
漫侵数坊谁家油壁车金碧照面光土偶长尺余买之珠一囊安知杼轴劳何物为蚕桑纷华
不足悦浮侈眞可伤

酬江邻几问不饮栽菊【邻几诗曰君实不饮酒庭下多栽菊不知黄花开奈此杯中緑凌晨
烟露滋後日风霜促欲表君苦心宜种子猷竹】

黄菊本天物先随元化生酒醴迺人功後因仪狄成酒客强亲菊菊酒初无情种之荒阶侧何
尝妨独醒修竹气萧洒自合生君庭

次韵和邵不疑假书江邻几知方酣寝为诗通意

江翁顺天和心迹两夷简虽如边韶寝且异宰予懒平居无时闲经史自课限高歌慕翰林鸣
琴写中散翛然物外人强为章绶馆官舍苦秋霖瞬息聊休眼勤勤已有余宴安何愧赧借书
谁敢惊欹枕尚未暖不疑神骥才垂耳困阜栈碌碌随吾侪拜揖把手版毋嫌朱墨倦腾举已
为晚慎勿思山林山林付愚孱

八月十七日夜省直纪事呈同舍

穷秋直省舍大雨吁可畏九河翻层空入夜愈恣睢置牀东壁根时有涂墜坠飒飒势将摧恍
惕不成寐中宵抱衾立呼烛久方至徙之近西偏裊帐不能备飞蚊胡不仁忍此加啄噬避烦
只深藏悒悒面蒙被须臾漏转剧枕褥亦沾渍虽起欲何之室中无燥地展转遂達旦耿耿负
忧悸因思间井民餬口仰执技束手已连旬妻儿日憔悴囊钱与盎米薪木同时匱败衣不足
准搏手坐相视予今幸已多敢不自知愧无谋忝肉食念尔但增欷

送雷太简

南山有白云应物任所适歛来非有心倏去还无迹甘泽望沾浹嘉生待苏息无为遽收卷复入岩间石

和王介甫烘蝨

天生万物名品夥嗟尔为生至么麽依人自活反食人性喜覆藏便垢浣晨朝生子暮生孙不日蕃滋踰万个透疎缘隙巧百端通夕爬搔不能卧我归彼出疲奔命备北惊南厌搜逻所擒至少所失多舍置薰烧无术奈加之炭上犹晏然相顾未知亡族祸大者洋洋迷所适奔走未停身已堕细者懦怯但深潜乾死缝中谁复课黑者抱髮亦忧疑逃入幬头默相贺腥烟腾起远袭人袖拥鼻端时一唾初虽快意终自咎致尔殲夷非尔过吾家篋笥本自贫况复为人苦慵惰体生鳞甲未能浴衣不离身成脆破朽繒坏絮为渊藪如麦如麻寢肥大虚腸不免须侵人肯学夷齐甘死饿醯酸螭聚理固然尔辈披攘我当坐但思努力自洁清群蝨皆当远迺播

和吴冲卿三哀诗【江邻几梅圣俞韩钦圣】

天生千万人中有一隼杰奈何丧三贤前後才朞月邻几任天资浮饰耻澡刷朝市等山林衣冠同布褐外无涇渭分内有淄澠别逢时敢危言慷慨谁能夺圣俞诗七千历历尽精絶初无追琢勤气质稟清洁负兹惊世才未尝自标揭鞠躬随衆後侧足畏蹉跌钦圣渥洼驹初生已汗血虽有絶尘踪不失和鸾节宜为清庙器严雅应钟律衆论诚共然非从友朋出羣才方大来輒軋扶帝室谁云指顾间聯翩化异物吊纓哭未已病枕气已竭同为地下游携手不相失绅绂顿萧条相逢但嗟咄诵君三哀诗终篇涕如雪眉目尚昭晰笑言犹髣髴肃然来悲风四望气萧瑟

和邵不疑送虜使还道中闻江邻几梅圣俞长逝作诗哭之

昨夕邮吏来叩门致书函呼奴取以入就火开其緘不疑赋长篇发自燕之南痛伤江与梅继踵良人殲噫嗟知其二尚未知其三请从北轅後覩缕为君谈邻几虽久病始不妨朝参饮歡寢衰少厥逆生虚痰逮於易箴辰皮骨余崕嵌遗书属清俭终始真无慙圣俞食寒冰外以风邪兼愚医暴下之结轡候愈添惛惛气上走不复容鍼砭自言从良友地下心亦甘钦圣体素强药石性所谙平居察举措敢以不寿占一朝薨归卧簿领不废签讎来衆皆愕未信犹闚覩兴言念三子举袂涕已沾英贤能几何逝者迹相衔君疑天上才难得帝所贪我疑人间美多取神所嫌茫茫幽明际蓍蔡难穷探忧来不可忘终日心厌厌

和梅圣俞咏昌言五物

括苍石屏

主人小石屏得之括苍山括苍道里远致此良亦难层嵒万仞余腾出浮云端吴儿采石时萝蔓愁攀缘石文状松雪毫髮皆天然置之坐席旁清风常在顏愿君善藏蓄永日供余闲慎勿示要人坐致求者繁将使括苍民吁嗟山谷间

淡树石屏

昔行巩洛间马瘦天复陰寒烟淡不收一拂横长林当时无画工负此清赏心今朝石上迹历历皆可寻轻素已纷泊老干仍萧森坐令高兴还野气生衣襟丹青不耐久风日易消侵何如造化真更彼岁月深昌言家素贫购此糜百金请镌好事名千古无消沈

白鹞图

白鹞日边来一息万里遥横飞碧海晴六翮寒萧萧轻如朔雪花迴与长风飘倾身叠绀爪吟啸何哮哮瞥来疾惊电欵起先扶摇遂令狐与狸不敢矜凶妖爵罗不可取灭影还云霄世人莫得见粉绘图轻绡凜然堂牖间霜气生春朝风雨夜如墨古木无鸣梟

怀素书

上人工书世所稀於今散落无复遗君从何处获数幅败绢苍苍不成轴云流电走何纵横昏醉视之双目明烈火烧林虎豹栗疾雷裂地龙蛇惊须臾挂壁未收卷陰风飒飒来吹面祗疑神物在闇中宝秘不令关俗眼嗟余平生不识书但爱意气豪有余欲求数字置座侧安得满斗千金珠

缚虎图

孙生非画师趣尚颇奇伟为人少谐合不肯畜妻子时时入深山信足动百里萧然坐盘石终日曾不起精心忽有得纵笔何恢诡万象皆自然神工相表里流传落人间万金易寸纸君家缚虎图用意尤精致虽云锁纽牢观者犹披靡昔闻刘纲妻制虎如犬豕系之牀脚间垂头受鞭箠孙生傥未见画此亦何理明知非世人羽化实不死愿君佗日归置之成都市必有乘槎人庶几能辨此

独乐园七咏

读书堂

吾爱董仲舒穷经守幽独所居虽有园三年不游目邪说远去耳圣言饱充腹发策登汉庭百家始消伏

钓鱼庵

吾爱严子陵羊裘钓石濞万乘虽故人访求失所在三公岂非贵不足易其介奈何夸毗子斗？
穷百态

采药圃

吾爱韩伯休采药卖都市有心安可欺所以价不二如何彼女子已复知姓字惊逃入穷山深
畏名为累

见山台

吾爱陶渊明拂衣遂长往手辞梁主命牺牛憚金鞅爱君心岂忘居山神可养轻举向千龄高
风犹尚想

弄水轩

吾爱杜牧之气调本高逸结亭侵水际挥弄消永日洗砚可抄诗泛觴宜促膝莫取濯冠缨红
尘污清质

种竹斋

吾爱王子猷借宅亦种竹一日不可无萧洒常在目雪霜徒自白柯叶不改绿殊胜石季伦珊
瑚满金谷

浇花亭

吾爱白乐天退身家履道酿酒酒初熟浇花花正好作诗邀宾朋栏边长醉倒至今传画图风
流称九老

和利州鲜于转运【仇字子骏】公居八咏

桐轩

朝阳升东隅照此庭下桐萼萼复萋萋居然古人风疎柯青玉笋密叶翠羽蒙午景凝余清夕
照当残红雨响薨栋外风生户牖中主人政多暇步赏常从容终当致威凤覽德鸣嚶嚶又将
施五弦解慍歌帝宫

竹轩

兹轩最洒落历历种琅玕正昼簿书稀萧萧风雨寒翠陰凉宴坐疎韵承清欢锦箴裁夏扇玉

笋供春盘晴蜗潜叶底暝雀投林端幽兴遇物惬高怀随处安且免一日无何须千亩宽

柏轩

凜然凌霜色本自生丘壑徙之君子庭栽培固不薄静夜声飏飏清昼陰漠漠秀气逼檐楹翠影通帘箔知君梁栋材大匠偶未度但守岁寒心闲轩亦不恶

巽堂

华堂选形胜地直巽之隅主人心洁齐公闲此燕居西来故乡客东过朝大夫时逢志所惬下榻同欢娱琴碁间壶觞赋咏杂歌呼民间既羲皇席上宜华胥每思就一醉幸无官守拘奈何三千里风埃与泥涂

山斋

幽蹊入桃李危栈蟠林麓行行忽虚敞高斋出山腹园圃近指掌郊郭纷盈目春老酴醾香夏浅篴簫綠条横喜冒衣笋迸乍穿屋秋江澄可卷冬岭翠如扑烟间渔艇小塞外村居独烧转望畬田响答聆伐木惊麕挺走险鸣禽嚶出谷物华时变更兴趣日相续谁知使者尊常着野人服肯以驷马荣区区诧乡族

闲燕亭

吏治正倥偬夫君何燕闲蚩蚩既云寡符移皆可删【子骏奏减役钱几半朝廷是之】印封从事散蹑屐升东山放杖坐危亭清啸出云间无私席宾少忘机林鸟还野人瞻翠微稽首双眉斑

会景亭

景物浩无穷兹为一都会之人心若监万状尽相对乔林拥砌底修岭倚牕背流云过席上去鸟出天外徐徐杖屨征蔼蔼郊原晦来往亦何为逍遥真乐内

宝峯亭

孤亭冠山椒下视物不隔六合纵心赏万家穷目力髻鬟乌奴翠衣带嘉陵碧霞生白水尾日没九陇脊烟凝朝夕市尘飞往来驿虽复对纷纭何尝改岑寂实兼观风远非徒选胜适巴峡少平田每苦天宇窄及兹伏枥檻坐瞰南北极先君昔乘轺名题古寺壁侍行尚垂髫孤露今戴白读君登临诗旧游皆历历永无膝下欢终篇涕沾臆【光天圣中侍先君为利州路转运使题名诸寺子骏皆为之刻石】

游寿安诗十首

喷玉泉

苍崖双起秋云齐乱峯进出如攢犀石棱涩不容马蹄下马步入荆榛蹊瀑泉沃雪拖白霓落潭横引成清溪老木长藤咫尺迷兴阑欲出忘东西

神林谷二首

石下泉声蔓草深石上露浓苍藓徧山禽惊起飞且鸣叶坠空林人不见

鸡幘奇峯云外横青壁千寻不可上却羨樵儿轻险巖腰绳操斧常来往

游神林谷寄邵尧夫

山人有山未尝游俗客远来仍久留白云满眼望不见可惜宜阳一片秋

灵山寺流泉

去寺犹一里隔林闻水声安知客乘兴山下远相迎

且游

游人恋山水日晏澹忘归但爱云烟好那知仆马饥

永济渡二首

洛水寒可涉长汀柳飞叶节物先无期自与幽怀惬清波见白鸥静林闻啄木泉细入平沙云闲出幽谷

灵山寺

神林兴尽谋早归草间露裊行径微忽思灵山去不远马首欲东还向西垂鞭纵辔寻山足洛水逶迤过数曲渐闻林下飞泉鸣未到已觉神骨清入门拂去衣上土先爱娑罗陰满庭庭下双渠走清澈罗縠成纹日光彻寒声淅沥入肝髓乱影影萧动毛发寺僧引我观泉源堂东周回百步寬碧颇梨色湛无底想象必有虬龙蟠泉南高山名凤翅宛转抱泉张远势岸旁修竹踰万竿飒飒长含风雨气寺门下望情豁然桑柘纷披满一川嵩高女几列左右王屋太行来掌前昔为孔氏悬泉庄岩洞犹存荆棘荒到今其下多怪石熊蹲豹攫争轩昂嗟予归来苦不早汨没朝市行欲老扪萝蹑屣须数游筋力支离难自保

藏珠石【叠石溪东山下有坠石衔九径二尺余其崖上脱处犹存】

水啮东山根土色渥如丹危峯忽摧脱半崖衔石丸陰阳昔融结神化不可原初疑偃佺养灵药魑魅触之无故落又疑蛟龙伏巨卵雷电击之从此?或者女娲补天余却下青冥遗耳珠不然盘古戏为乐聊取天弧弹朱雀物理万状终难知巧心推求徒自疲不如引客坐石上好奇且醉手中卮

八月十五日夜寄友人

故人音信絶对月动相思清露滴红叶此怀当告谁秋风广陵郭正是望涛时

华州祗役往冯翊留别楚正叔【建中】

芳菲不得驻会取余春还欲知回首处渭曲苍茫间

何秀才【汉伦】郊园五首

主人耽诗书乐道深居久挟策往来游东冈复南亩浊酒不取味素琴无复弦何须更清论相见自萧然苍苍竹林暝郁鬱松气寒纵横兴来笔欹侧醉中冠褰裳涉幽涧日落烟岩空踟躇待新月长啸来清风夏木绕茅庐暮酒资清宴密叶緑藏枝空闻黄鸟啖

夏日过陈秀才园林

桑?青青紫葢垂鲜风荡麦生涟漪驱童策马踏村路乘兴出游当访谁槿花篱落围丛竹风日萧疎满园緑到门下马问主人文籍先生其姓陈高谈浩浩究今古不觉林间日将暮茅庐蒿径幸不遥不厌频频数来去陪同年吴冲卿登宿州北楼望梁楚之郊访古作是诗

大禹息洪潦画野经九州波沈露羣山嶷嶷相婴钩?洄澹兹土平敞诚寡仇乘高极回望坦坦无陵丘先王崇皞济建祀邦诸侯玉帛从会同赴告书春秋六雄方逐鹿为羸弱姬周兹为会战场喋血无时休汉错削七国祸生东南陬亚夫闭高壁坐折强吴谋典午倒太阿辟户延旃裘淮泗漫腥羶房心掩旄头人移烟火絶榛茂豺狼游唐纲日寢衰盗起如螟螣相携聚?蒲袒臂提鉏耰蟠薄数千里焚劫无余留圣朝定多垒劒戟包貔貅蓁蓁荆棘林撫撫良田畴耒耜趣时雨黍稷丰岁秋昔为车骑利今睹桑麻收我来宦东土苒苒乘春流行行次符离固为亲交留樽罍且为乐携手登高楼是时新雨余风日方和柔云鲜乱花薄波緑迷芳洲羃羃游丝转袞袞野阳浮调篴语双鹇翻雪矫群鸥爱兹登临美况复依良俦聊适笑言乐尽忘羈旅忧翔阳何冉冉渐与西山遘驿程前有期恋此当何由分首下迢嶢怅然登暮舟

塞上【六言】

胡兵欲下陰山寒烽远过萧关将军贵轻士卒几人回首生还

奉和经略庞龙图延州南城八咏

迎薰亭

华馆压清波坐待南风至须知明牧贤善達吾君意

供兵磴

晨暮响寒泉飞轮驶风转士饱气益振轻与先零战

柳湖

依依烟未歇漠漠风初静浮花满波面不见参差影

飞盖园

军中富余暇飞盖南城隈雍容陪後乘一一应刘才

翠漪亭

雕檐日华动滉漾照漪涟四月芰荷满不似在穷边

延利渠

枝分清浅流纵横贯城市还如恩在人润泽无终既

缘云轩

逼汉敞高岩缘云结飞阁东山草树曛致足登临乐

禊堂

箫鼓震阳休组练照芳洲意气坐中客羞笑山陰游河上督役怀器之寄呈公明叔度时器之
鞠狱沧州

河灾泛东郡庐井多堙沦题輿得贤佐姁妪安疲民遂令枯槁余稍复苏阳春伊人屏外饰倜
傥穷天真徒观浩荡波莫测江海津矧兹同府士一一随和珍公明抱全德洞澈无緇磷叔度

秉峻节竦若凌霜筠顾兹不肖材亦齿幕中宾同依松柏陰共醉醞醐醇高论探要妙佳句裁
清新有诗纵欢谑杯案沾衣巾曾无礼节间但以风期亲北州有疑狱两造正纷纶当须于公
断然後无冤人送行出郊岐扬鞭从此违堤繇春事起行役未成归索居如几日河草已芳菲
徒然掩瑶瑟坐叹知音稀昨夜西南风梦中东北飞行行涉沧海髣髴睹容晖寤思益惆悵天
长羽翼微离怀如柳色极目正依依

华星篇【时视役河上寄郡中诸同舍】

凉风净扫云无迹海月未生星历历贝聯珠贯拱北辰三五纵横此何夕重楼叠榭出秋空鵷
鹄露寒连桂宫瑶井迴临丹阙外玉绳斜挂琐牕中征人远别空闺悄钟漏萧疎天不晓碧纱
展转无复眠卧视寒光度华沼汉家贤将戍临洮结髮从军今二毛谁怜身老心犹壮深入长
占太白高丰城古劒沉沦久匣中夜半双龙吼乃知神物不自藏紫气依稀见牛斗有客离居
望所亲遥知清夜会荀陈堤繇未息无由去不及浮槎河畔人

宿石堰闻牧马者歌

大河之曲多寛闲牧田枕倚长堤湾乌栖鹄散堤树寂柝木声稀宵欲阑牧儿跨马乘凉月历
历绕羣高唱发幽情逸气生自然往往鸣鞘应疎节歌辞难辨野风高似述离忧嗟役劳徘徊
不断何妨近髣髴微闻已复遥长川冷浸秋云白露草翻光凝碧色星疎河淡夜初长展转空
亭奈孤客洞箫音律京君明可怜骨朽不更生安得使传哀怨意为我写之羌笛声

杨白华

劝君勿嫌杨花太轻薄篱下沟中纷漠漠翠鬟婢子不胜愁扫尽还飞满朱阁晚来风雨送行
春天无游?地无尘雪狂絮乱安可得孤树青青愁杀人

传家集卷三

卷四

<集部,别集类,北宋建隆至靖康,传家集>

钦定四库全书

传家集卷四 宋 司马光 撰古诗三

都下秋怀呈聂之美

愚疎强从仕趣尚与时乖
竭来游京邑荣愿知谁谐
王国富英奇气象标岩崖
云鸿送双目攀援路可阶
秋风转枯叶飒飒绕寒斋
出门无所之飞尘满天街
夫君宦未达犹得称吾侪
解衣换斗酒且尽平生怀

陪张龙图南湖暑饮【六言】

红旆紫林却转琼筵就水重开
荷香着衣不去竹色映酒遥来

楼船潏潏轻浪鸥鹭缤纷满天
清歌久之未度画梁尘落芳筵

道傍田家

道傍田家翁妪俱垂白
败屋萧条无壮息
翁携鎌索妪携箕
自向薄田收黍稷
静夜偷舂避债家
比明门外已如麻
筋疲力敝不入腹
未议县官租税促

送李汝臣同年谪官导江主簿

得丧互循环古今昧终始
百岁落其间仅与毫芒似
所以达人心身外不复纪
愁来若乱丝疏解当以理
昔君关外来籍籍声华起
凭案一濡毫万言俱落纸
老生闕其文色若寒灰死
阁笔不能下敢有玼瑕指
或时抵卿相入门俱倒屣
阍夫迎受谒不敢扬眸视
解褐吏边州长涂初进跬
蛟龙得尺水双骺方嶷嶷
西羌负德泽飞镞笋边鄙
添兵十万余斗粟无支拟
州郡走符檄纵横恣鞭箠
閭閻浪愁苦卒食半糠粃
上官知君才悉以储粮委
开仓募平糴至者车连轨
严明束吏手诱谕提民耳
留谷受金去若与同侪
市弦朔未云周露积丘山
比曾无转饷劳坐饱防秋
士幕府上其功明诏深嘉
美为僚登九寺长人专百
里聊用报勤劬未言穷任
使何期逢怨讎意外成疮
痍刻骨舞文法吹毛出瑕
滓清霜五月飞惨烈伤兰
芷鸾凤失椅梧飘泊还荆
枳圣朝方任能大过尚收
齿况於济时具蹇然遭诋
訾宁因青蝇恶遂取璫璠
毁良工构明堂必不遗杞
梓勉哉益自立勿为穷衰
止人生难豫期神理无终
否庸知今日忧不为後日
喜

吾道诚无亏壤坎安足耻关山迤邐长百剑连天倚紫纒结危栈迴入云星里蜀国富嬉游花繁春酒旨莫作吊原文投之岷江水

春日书寄东郡诸同舍

滑台古镇揭高牙主人贤厚宾友嘉公庭退休射堂饮水沈緑李浮甘瓜清言妙谕间诙謔笑语往反何喧譁别来泛滥若浮梗尘愁俗累稠於麻提鞭俄盖触风日惨澁满眼飞埃沙朱门湛湛果深浅门外日拥千余车闾人未肯即通刺指弹手版景欲斜就令入见亦何事气象渺邈凌青霞围碁角智赌胜负拙者理与功名賒舍之归入户庭隘仰视青天如井蛙後檐数尺地荒秽不翦欲令生荠花当春寂寂但如此意恐至外逢纷华奈何胜友百余里不可一见如天涯何时更共把卮酒侧身北望空咨嗟

秋日寄山中友人

昨夜听秋风霜崖几树红心随新鴈去宛至碧谿东圣主搜渔钓林岩今已空胡为执高节憔悴久山中

和之美舟行杂诗八首

舟中夜坐二首

风柳动萧疎寒星浸寥落中宵四寂然时有游鱼跃汀沙落席帆岸柳紫单舸小市远微茫簇水初灯火

船行遇风

蔡水仅成波不若江湖濬诚无倾侧忧纒弱终难进

野花

喧喧桃李蹊何妨笑幽草但愿保天真徐共春风老

水鸭

?穉出短蒲毵毵浴清水物忌太鲜明何妨染泥滓

鱼鹰

翩然下林表不憚风湍恶得隼辄高飞为君羞击搏

渔者

弱筱絃轻丝尽日寒溪侧获少近知无溪鱼皆尔识

都门路

红尘昼夜飞车马古今迹独怜道傍柳惨淡少颜色

和之美河洲四诗

冉冉河洲晓晴霞登木杪稍见水烟开孤舟天际小杳杳河洲晚客行殊未返目随林鸟还心共征鸿远寂寂河洲夜芦花绕墟舍孤客久未眠窗灯落寒地漠漠河洲雨依稀辨村聚时哉鸥鸟羣凌乱争鸣舞

又和夜雨宿村舍

积雨久未阕岂徒行客忧夜闻屋中人叹息悲田畴方春播殖时种食皆外求鞭诃犯赤日酷烈慙羸牛草薺竞禾长从人借鋤耰晨薅戴星起日闇未能休岂无一时勤所冀岁有秋今兹昏垫灾大埜成洪流直疑沧海溢蜚粟浮陵丘昔时百丈原泛泛皆挈舟乔木失端杪饥鸟下无投黍稷沉黄泥圭合安可收嗟予乏技能无以易糠粃贩鬻固所昧敢托市井游欲依盗贼羣懦不闲戈矛已哉任天地无益徒为愁一身无死所况为妻儿谋之美爱物者凄然涕沾裘一夫有不获伊尹为深羞何当富斯民比屋困仓稠惜哉禄秩卑此志终宜酬

送韩太祝【维】归许昌【赋得交字】

王城名利窟冠盖相交夫君独凤举影然去喧呶颍水清可濯箕山高可巢回顾公相荣一芥浮堂【逸二字】大吕重岂知轻斗筲苍苍气象严万木拥寒郊【逸二字】点隈曲初旭染林梢去去善自将因声访衡茅

和兴宗夜直听雨

【逸一字】茫冻雨来入夜势增急纵横挟春风飘洒相喷吸败窗端见欺遽有万点入先生伏经编眼冷倍昏澁夜分童仆倦跛倚厌久立灯火为溟蒙诗书亦沾湿夫君储善价未售不悵悵物华迎霁新佳赏时将及困中秫几何营釀须汲汲

花庵诗寄邵尧夫【时任西京留台廨舍东新开小园无亭榭乃构木插竹多种酴醾宝相及牵牛扁豆诸蔓延之物使蒙冪其上如栋宇之状以为游涉休息之所名曰花庵】

洛阳四时常有花雨晴颜色秋更好谁能相与共此乐坐对年华不知老

自然天物胜人为万叶无风緑四垂犹恨簪绅未离俗荷衣蕙带始相宜

康定中予过洛桥南得诗两句於今三十二年矣再过其处足成一章

铜驼陌上桃花红洛阳无处无春风重来羞见水中影鬓毛萧飒如秋蓬

宝监贻开叔

流尘集宝监尘昏监不昏纖泥落清水泥浑非水浑人能辨二物相与自忘言二物不能辨悠
悠何足论无为舍其内逐外取烦冤

谢王道济惠古诗古石器

侯氏古城里好古王道济作诗有古风读书知古意朝来遣仆夫遗我古石器结从天地初生
自一拳际工倕创规摹般输施削劂?茗北窗下坐有羲皇思嗟予性迂鄙齟齬居今世忝官污
台省曾无益时智退藏又濡滞尚不离朝市阙地避烦暑颇与营窟类【新构西斋中凿地为
室谓之凉洞】诚非古人比拜赐得无愧

题太原通判杨郎中【希元】新买水北园

洛阳名园不胜纪门巷相连如栉齿修竹长杨深径迂令人邑邑气不舒爱君买园中桥北堂
压崖端跨空碧满川桃李皆目前近水远山一朝得曾陪尊兄此高会豁然如出樊笼外翫游
尚尔况久居胜气清风日相对易生画笔世所珍麋猿满壁皆逼真并州近胡沙尘恶终更早
来为主人

首夏呈诸邻二章

首夏木陰薄清和自一时笋抽八九尺荷生三四枝新服裁蝉翼旧扇拂蛛?莎径热未剧晨昏
往来宜熈熈久旱天飒飒昨宵雨尘头清过辙水脉生新渚岂徒滋杞菊亦可望禾黍勿笑盘
蔬陋时来一觴举

酬王安之谢药栽二章

洛人栽花不栽药吾属好尚何其偏服之虽能已百?爱闲成僻无由痊

护根带土我亲移荷插汲泉君自种悦目宁将恶草殊扶危或比兼金重

雨中过王安之所居不谒以诗寄之

万木含凉雨驱马有余清长街带短芜旧潦骈新萍高斋彼谁居雅尚推名卿污亭虽地卑蹶履未妨行野服踞藜牀萧散临前楹纂纂枣林繁欣欣药畹荣过门不敢叩自视慙冠纓【素与安之约不以公服相过】

送药栽与王安之

盛夏移药栽及雨方可种为君着屐取呼童执伞送到时云已开枝软叶犹重夕阳宜屡浇又须烦抱瓮张明叔兄弟雨中见过弄水轩投壶赌酒薄暮而散诘朝以诗谢之

喜君午际来凉雨正纷泊呼奴扫南轩壶席谨量度轩前红薇开壶下鸣泉落【虎爪泉上覆之以板每投壶板上设榻绕之榻去壶各二矢半】必争如五射有礼异六博求全怯垂成倒置畏反跃【新格倒中者壶中之筭尽废之】虽无百骁巧且有一笑乐交飞觥酒满强进盘餐薄苟非兴趣同珍馐徒绮错

小雨

云日互出没数朝飞雨清曈曨似欲止廉纖还未晴映空轻丝乱着物细珠明叶端危未落荷心重忽倾喜凉高鷺舞便湿羣蛙鸣於予亦有得药畹胡麻生

园中书事二絕

芳洲晚日鲜曲岸新雨好红薇点圆荷金?出幽草坐嗅白莲蘂卧看青竹枝闲斋不成寐起读圣俞诗

送刘仲通知泾州

四载一相逢相逢遽为别侪辈日萧条与君俱白发卮酒不暇执旧游那复说忽忽无他言暑行戒饥渴

和宋复古大雨

积陰连日作郁蒸长云飞天势如鹏白雨四注垂万絙坐间斗寒衣可增

雷公推车电施鞭飞腾九泽舞百川须臾开晴万物鲜仰视白日当青天

见山台昼卧偶成

移牀独上高台卧飒飒凉风吹面过林蝉忽噪惊薄梦手执残书幅巾堕

修酴醾架

贫家不办构坚木缚竹立架擎酴醾风摇雨渍不耐久未及三载俱离披往来遂复废此径举头碍冠行絺衣呼奴改作岂得已抽新换故拆四篱来春席地还可饮日色不到香风吹

萤

林塘荒湿地向夕已飞萤月没蛩吟砌露凉人在庭随风疑落烬过水乱踈星学子灯前寝谁将尔照经

张明叔家瑞莲

君家得莲种远自浙江湄明烛然深盃浓朱画细丝盛开尤萼苞到落不离披岂独夏花好仍兼秋实奇味长包石蜜殼嫩剥燕脂况复芬芳久霜前殊未衰

莲房

莲房前後熟供噉不须齐肉嫩山蜂子棱深天马蹄尚连余蘂在深映乱荷低脆美知新采近根犹带泥

不寐

长年睡益少气耗非神清昨朝多啜茶况以思虑并中烦枕屡移展转何时明苏秦六国印力取鸿毛轻白圭万金产运智立可营如何五更梦百方终不成

苦雨

今春忧亢阳引领望云族首夏忽滂沱意为苍生福自尔无虚日高原亦沾足连年困饥馑此际庶和熟如何涉秋序沈陰仍惨黥长檐泻潺湲昼夜浩相续喧豕流潦怒突兀坏垣秃驾牛泥没鼻跨马水平腹瓦欹松漫白道废草浓绿污莱闵下田漏湿怜破屋纵横委地麻狼藉卧陇谷怯闻饥婴啼愁听寡妇哭闲官虽无责饱食愧有禄世纷久去心物役奈经日鬱陶聊秉笔狂简已盈幅

八月十五日夜宿南园怀王君贶

昔公在洛师未尝弃嘉节今宵秋半分空羡西园月天色湛澄清风声冷骚屑笑言不可亲引领望金阙赖有篋中诗端居数披阅

八月十六日过天街怀范景仁

秋潦收四野晴云无一斑忽惊龙门缺远见鸣臯山凉飈入毛发颦气清心顔悠然念吾友道
遥城阙间思陪篮輿尾共此登临闲

宿南园

顷来兴味少旬日不为诗昏昏但思眠疲病知吾衰岂无篱边菊不欲拈酒卮络纬尔何苦终
夕鸣声悲九月十一日夜雨宿南园韩秉国寄酒兼见招以诗谢之

雨多秋草盛浓绿拥寒阶吾庐奥且曲退缩如晴蜗小园已自隘欲往泥沾鞋体羸畏风冷室
处门常闭【空娲切】九日古所重负此时节佳缅想使君宴绮席临高斋肥羜堆玉盘飞觴酒
如淮楚舞陵湖波茱萸落金钗神醒鼓吹喧百叠疑倾崖欢余忽我思牙兵星火差溟泉耻独
醉醇味相与偕我饮虽不多和气浩无涯梧子拾为果拒霜伐为柴沼中数寸鱼烹煎足为鲑
【吴人谓鱼肉为鲑】谁言无以侑绕渚多鸣蛙交道久衰薄岿然见吾侪奈何数舍遥晤语
积年乖况乃辱嘉招私心岂不怀輶轺石道溢重以陰云埋虽有果下马款段非渥洼临风徒
踈踊志愿焉能谐狂诗寄一笑聊用当诙俳

古坟

茫茫野田平极目历历古坟如夏屋碑板无文荆棘深石兽沈沦松柏秃问人虽不知姓名昔
皆高官仍厚禄子孙流落何所之凶吉当年非不卜我来正值寒食天祭餼不设无人哭

酬赵少卿【丙字南正】药园见赠

鄙性苦迂僻有园名独乐满城争种花治地惟种药栽培亲荷锄购买屡倾橐纵横百余区所
识恨不博身病尚未攻何论疗民瘼

登封龐国博【元常字懋德】年三十八自云欲弃官隐嵩山作吏隐庵於县寺俾光赋诗勉
率塞命

懋德负长才全牛不足剗才为百里宰骥足殊未展齿发方盛强趣尚已高远结庵哦二室志
欲巢絶巘贤人心如云无迹有舒卷不须惊俗目卓犖乃求显既知吏可隐何必遗轩冕

暮春同刘伯寿史诚之饮宋叔达园

絮狂飞作团梅小不多酸共惜春余好更穷今日欢清流入花底翠岭出林端嫩笋玉紫筴新
櫻珠照盘邀迎嘉客易会合故人难寄语门前仆骅骝任解鞍

用前韵再呈

旧友今余几追思鼻可酸休论身外事且尽目前欢薜荔垂堤面醪醑拥席端舞精抽茧绪弦
妙落珠盘醇酒回春易灵丹却老难扶归不复记酩酊上金鞍

示道人

天覆地载如洪鑪万物死生同一涂其中松柏与龟鹤得年稍久终摧枯借令真有蓬莱山未
免亦居天地间君不见太上老君头似雪世人浪说驻童颜

谢王君贶中秋见招不及赴

不侍庾公宴月华虚四秋幸逢东阁开又阻西园游清辉散广坐孤影随行輶衮衣如未归志
愿终可酬

久雨效乐天体

雨多虽可厌气凉还可喜欲语口慵开无眠身?起一榻有余宽一饭有余美想彼庙堂人正应
忧燮理

闻范景仁迁居许昌为诗寄之

天衢名利场尘泥继朝昏况兹辞荣久厌苦车马喧慨然忽高举翩若黄鹄翻朝卖西城宅暮
理南行辕回首岂无怀眷眷望国门想象解装初完美未可论纵横置老屋缺剥周短垣臧获
念去故炊?假甕盆幼穉喜就新阶庭走诸孙幸有克家子生事不日温许昌昔名都於今亦雄
藩先贤虽已远风迹凛犹存况复多巨公分义素所敦丞相辞黄阁学士乘朱轡青云司禁省
白首会山樊渼水湛寒光尽眼清心魂华堂临曲渚画舫承芳樽高谈金石谐逸笔风雨奔得
朋诚多欢孤陋未可谗时当惠好音独乐慰荒园

送张伯常同年移居郢州

楚江白逶迤楚山碧参差玉炊稻粒长缕切鱼腴肥美君尽室行飘然无所羁伐竹营茅茨种
橘为藩篱荒坡无四垣但以荷塘围官虽朝大夫身世已相遗野老坐争席林叟谈忘归犹嫌
沮溺徒名字为人知

南园饮罢留宿诘朝呈鲜于子骏范尧夫彝叟

园僻青春深衣寒积雨阁中宵酒力散卧对满窗月旁观万象寂远听羣动绝只疑玉壶冰未
足比明洁

自用前韵

耿耿寐不成迢迢夜未阑良朋悔不留负此当轩月怀想空鬱陶眺听转清絶佗时重见过余樽犹可洁

不寐

思梦久不效良夜行已阑此心如杯水扰易澄苦难百年能几何万虑谁能殫弃置勿复寻专取形神安

招鲜于子骏范尧夫

虚牖延朝光高林散晴霭深夏犹清和闲斋亦爽垲离羣才宿昔跂伫心已痠楸枰颇光洁置设俨相待轩车能竭来鸡黍足充馁

和家兄喜晴用王安之韵

象龙虽得请跃蜃亦须占既有膏苗益宁无漂麦嫌余霏方映户反照忽通帘羈旅愁怀阙农家喜色添田间拾穗满陌上荷锄兼预想三川迴秋场万庾尖

病中鲜于子骏见招不往兼呈楚正叔范尧夫【时正叔约次日为会】

衰朽拙自将蘊积成中病掩扉卧小榻安养惟便静遥知良友集鬱若荀陈盛献醺屏浮饰简率任真性虽无束带苦实憚把酒并开囊检药物不与樽罍称筋骸幸复常佗时扫三径

和鲜于子骏秋意

好风自远来小雨初濡地虽当朱夏半已有清秋意新蝉乍孤吟病叶或先坠顿觉愈沉痾翫喜濯炎炽彩笔动高兴瑶徽发幽思贱子独何为宵凉甘熟寐

龙门

石楼临晴空南眺出千里人怜山气佳予叹禹功美想彼未凿时极目皆洪水谁知耕桑民幸免魴与鲤

坐中呈鲜于子骏范尧夫【六言】

微雨虽妨行乐薄寒却解留花今日且游小圃明朝更向谁家

和范景仁缙氏别後见寄求决乐议虽用其韵而不依次盖以景仁才力高逸步骤絶羣非弩拙所能追故也

至乐存要眇失易求之难昔从周道衰畴人旷其官声律久无师文字多缺漫仁皇闵崩坏广庭集危冠纷纭鬬笔舌异论谁能殫或欲徇陈迹窃厚潜鏖剗或欲立私意妄取旧史刊古今互齟齬大抵皆欺谰景仁信其说墨守不可干贱子欲面从谁与换肝胆必求此议决深谷为崇峦何如两置之试就中和看天地育万物生成适暄寒圣人保四海皇极致阜安乐理亦如此炳焕犹朱丹曄缓与噍杀折衷遗两端兹道苟不由芒刃难婴髀鲁乐最为备雍彻施三桓齐韶犹肄习太公避陈完唐民听伴侣不复含悲酸乃知乐有源钟鼓皆波澜昨者清明初榆火始改鑕景仁从许来倾都咸聚观诸公竞邀迓非独惜春残议乐不复对昼夕且穷欢来时桃李穠去日芍药阑三旬只须臾驶若阪上丸轘轳逢雨别恹恹归骑单东西步步远回首祝加餐仍冀勉中和心广体自胖

和韩秉国招范景仁饮景仁不至云方作书与光论乐

小桃佳李实如拳西湖尽眼铺芳莲景仁不从乡贤饮为此乐论方穷研周衰官失畴人散钟律要眇谁能传近人欺衆出私意最可闵笑房生顛如光初不辨宫羽是非得失安敢专每烦教谕累百纸顽如铁石不可镌王李阮胡相诋毁各执所学何妨偏景仁家居铸觚斛欲除民瘼恐未然要须中和育万物始见大乐之功全

同鲜于子骏题和乐亭

春禽弄晴朝秋虫吟雨夕风和振兰芳露寒滋菊色万物苟得所随时各有适矧伊人最灵胡为长戚戚圣人垂大训灿烂着方册至乐和无声大礼简无迹心专守中庸身不蹈邪僻造次常在前须臾不离侧穷通虽百变何往不自得兹亭聊寓名和乐在胸臆

王君貺宣徽垂示嵩山祈雪诗十章合为一篇以疇之

今秋少雨冬不雪麦寄浮埃根欲絶圣主焦心闵万民负宸不怡常膳撤诏书朝下徧九州岳渎百神俱祷求西都留守?君命促驾不敢须臾留嵩高万仞蟠地中海内衆山无与雄前驱大旆拥千骑波腾云涌来祠宫牲肥酒香笾豆洁盛服斋明荐毛血有司执事皆肃然宝帐神来风翠屑公心犹畏九阍遥丹诚不能通青霄分留导从屯林麓别张醺具登山椒山椒迢遰峻无极行挽枯藤蹋危石万室嗷嗷愁死饥敢惮劬劳爱余力天门上出俄坦平下视一世尘杳冥焚香拜手倾恳恻左右前後皆列星公今三守三川地咫尺嵩高未尝至诘朝既毕祠事严暂转鸣珂历诸寺少林昔为达摩居达摩英灵今有无瘦辞流散满天下竟以两手扪空虚法王魏氏离宫旧玉刻狻猊羣犹有子孙宗庙皆尘灰止见伽蓝存不朽会善庭隅千岁松一根二股凌寒空势如鼎足争秀出泠泠永夜吟霜风少室先生乐闲暇弃官来家玉峯下昔为浪泊据鞍人今结东陵卖瓜舍溪上有堂名挂冠四垣重复皆林峦呼儿扫地喜公到随分弦歌留尽欢周王太子名闻久相传羽化缙山首鹤飞笙远宵无迹遗庙今人空沥酒公来本不事遨嬉周流间里询疲羸亲呼令长嘱赤子勿贪荣利穷鞭笞境中羣望无不走回轡仍过凿龙口奉先暮投林日曛浥涧晨征辙永厚归来新诗盈一编明珠大贝相属联此行虽不从公後历历胜游皆目前

酬吴仲庶龙图终南山诗

泰山鲁所瞻终南乃秦望西侵井络阔北压鹑野旷条梅韞名材金玉富珍藏飘风何烈烈万物尽摇荡屹立不倾倚势与厚坤壮有如牧伯贤斯民蒙保障雪霜举世寒千里独重纆病夫伏闾里非能事微尚顾无孤高实藻饰安可强景行虽不忘讵敢承嘉贶

酬永乐刘秘校【庚】四洞诗

贫居苦湫隘无术逃炎曦穿地作幽室颇与朱夏宜寬者容一席狭者分三支芳草植中唐嘉卉周四垂讵堪接宾宴适足供儿嬉自问安取法前修果慕谁非如太古民营窟避寒威又非学射人空石专致思又非沮漆俗陶复习西夷又非楚司马金奏相宾仪又非郑伯有壑谷甘糟醯又非越王子丹穴免忧危又非张巨和崇岩立师资所慕於陵子欲效蚓所为微窋足藏身槁壤足充饥养生既无憾此外安敢知唯祈膏泽布歌啸乐余滋岂羞泥涂贱甘受高明嗤何言清尚士善颂形声诗困剥固未尝井复敢终辞

传家集卷四

卷五

钦定四库全书

传家集卷五 宋 司马光 撰古诗四

瞻彼南山诗

瞻彼南山有栌有棠维叶牂牂君子之燕笾豆洋洋鼎俎将将百羞阜昌上下乐康邦家之光
君子万年抚有四荒受禄无疆瞻彼南山有栲有栩维叶湑湑君子之燕清酒有奠壶樽有楚
酌言赐之命之醕之上下以序君子万年永绥兆民受天之祜瞻彼南山有杞有枲维叶逢逢
君子之燕管丝嘒嘒奏鼓 自堂徂庭上下肃雍靡有不恭君子万年令德高明高明有融
赫赫明明天命有严命我祖考九土是监倭𩇑之东蛮貊之南享献允时靡敢不詹闕兹余文
复阁岩岩万世是承四方是瞻帝曰卿士左右之臣四方无虞矜尔之勤式观且游从予一人
于壺于闕于堂于陈金石之符翰墨之珍匪予汝夸祖考之勲多士庶尹羣公百辟拜手稽首
答扬休德既醉既饱慎思尔职罔顾尔私罔爱尔力惇忠祇敕永奉丕则立民之极载祀千亿

秋柏寄傅钦之

彼秋者柏生于崇岫其叶丸丸君子爰处爰处爰游匪忧勿忧其乐休休彼郁者兰生於幽涯
其叶菲菲君子爰处爰处爰嬉靡适弗宜忘其渴饥洋洋者舟泛彼中流于渚于洲思其可思
知其可知其逝勿追其来勿期

园樱

园樱伤老也

园有繁樱圃有肥菁我酒既清我殽既馨我友戾止聊以娱情今我不乐日月其征

园有穠李圃有肥杞我酒既旨我殽既美我友戾止改忧为喜今我不乐年其有几

园有弱柳圃有肥韭我酒既有我殽既阜载笑载歌以宴我友今我不乐年其无久

悠悠泛舟载纵载横白日将倾飘风载惊嗟我老矣髮脱齿零胡为百忧劳此余生

戏下歌

项王初破函关兵气压山河风火明旌旗金鼓四十万夜泊鸿门期晓战关东席卷五诸侯沛公君臣相视愁幸因项伯谢前过进谒不敢须臾留椎牛高会召诸将宝剑泠泠舞席上咸阳灰烬义帝迁分裂九州如指掌功高意满思东归韩生受诛不复疑区区蜀汉迁谪地纵使倒戈何足为

海仙歌

东望海波苍茫浩渺无所极高浪洪涛黯风色翻星倒汉天地黑陰灵出没互相索东方曡曡景气清庆云合沓吐赤精蓬莱瀛洲杳如萍遥观五楼十二城羣仙劍佩朝玉京祥风缥渺钧天声彩幢翠盖烟霞生鸾歌凤舞入帝乡紫麟徐驱白鹤翔餐芝茹术饮玉浆千年万年乐未央

孟尝君歌

君不见薛公在齐当路时三千豪士相追随邑封万户无自入椎牛酺酒不为贵门下纷纷如市人鸡鸣狗盗亦同尘一朝失势宾客落唯有冯驩西入秦

燕台歌

万古苍茫空盛衰燕台贤客姓名谁君看碣石崑中草宁似昭王拥簪时黄金散尽余基没易水萧条烽火飞

吴冲卿直舍阎士安画墨竹歌

阎生画竹旧所闻望中一见遥可分伊予不甚晓佳画犹爱气骨高出羣狂枝怒叶凌绢素势若飞动争纷纭蟠根数节出地底上有积年苍藓纹森然直干忽孤耸意恐出屋排浮云秋风飒飒生左右耳目洒落遗尘氛乃知良工自神解昧者仿习徒艰勤子猷昔者得收玩不患终朝无此君

送伊阙王大夫歌

于嗟古之道邈既远兮日陵夷而就衰羣儒角逐异端竞进兮圣涂榛枳幽昧而难知君独耻从衆人之後兮轩然高举远取而穷追拨去虹蜺汎扫氛浊兮廓然迺得睹夫朝曦授邑於雒之南兮始者既学今得而施归风俗於醇厚兮又何西门卓鲁之足为消奸化桀折牙杜蘅兮寂不知其所之何者为令之德兮黄童皓首接手而游嬉菽粟露积牛羊被壅兮百里独比於太古之时予愿解冠弃佩兮受一?於伊之埜蓑身笠首兮同邑民以熙熙

和钱君倚日本刀歌

昆吾道远不复通世传切玉谁能穷宝刀近出日本国越贾得之沧海东鱼皮装贴香木鞘黄白间杂鍮与铜【贾人云真鍮似金真铜似银】百金传入好事手佩服可以攘祿凶传闻其国居大岛土壤沃饶风俗好其先徐福诈秦民采药淹留童叟老百工五种与之俱至今器用皆精巧前朝贡献屡往来士人往往工辞藻徐福行时书未焚逸书百篇今尚存令严不许传中国举世无人识古文嗟予乘桴欲往学沧波浩荡无通津令人感叹坐流涕锈濫短刀何足云

风林石歌【蔡着作抗字子直得此石於朱阳山】

闻君家有风林石镌刻无?画无迹靡然合势俱左倾偃蹇常如负风力置之坐侧野意生静听若有飕飕声忽疑身世在丘壑使我萧然无俗情黄金白璧岂非好子直视之不为宝

天马歌

大宛汗血古共知青海龙种骨更奇网丝旧画昔尝见不意人间今见之银鞍玉镫黄金轡广路长鸣增意气富平公子韩王孙求买倾家不知贵芙蓉高阙北向开金印紫绶从天来路人回首无所见流风瞥过惊浮埃如何弃置归阜栈踠足垂头困羈絆精神惨澹筋骨羸举目双睛犹璀璨伏波马式今已无子阿肉腐骨久枯举世无人相骐驎憔悴不与驽骀殊神兵淬砺精芒在宝监游尘肯终晦君今鬻别被鸣鸾尚能腾踏崑仑外

苦寒行

穷冬北上太行岭霰雪紕结风峥嵘熊潜豹伏飞鸟絶一迳仅可通人行僮饥马羸石磴滑战栗流汗皆成冰妻愁儿号强相逐万险历尽方到并并州从来号惨烈今日乃信非虚名陰烟苦雾朝不散旭日不复能精明跨鞍?轡趋上府髮拳须磔指欲零炭炉炙砚汤涉笔重复画字终难成谁言醇醪能独立壶腹迸裂无由倾石脂装火近不热蓬勃气入头颅腥仰慙鸿鴈得自适随阳南去何溟溟又慙鴈鸟识时节岩穴足以潜微形我来盖欲报恩分契阔非徇利与荣古人有为知已死只恐冻骨埋边庭中朝故人岂念我重裘厚履飘华纓传闻此北更寒极不知彼民何以生

楚宫行

楚王宫中夜未央清歌秘舞会华堂木兰为柱桂为梁随珠和璧烂同光横吹乍鸣秋竹裂繁弦初度春雨歇九微火树垂垂灭罗衣纷纷玉纓絶满朝冠劔东方明宫门未啓君朝醒秦关日夜出奇兵武安君火照夷陵

洛阳少年行

铜駝陌上桃花红洛阳无处无春风青丝尾结连钱驄相从射猎北邙东流鞭纵镒未云毕青

山团团载红日云分电散无影迹黄鸡未鸣已复出

将军行

赤光满面唇激朱虬须虎颡三十余腰垂金印结紫绶诸将不敢过庭除羽林精卒二十万注听钲鼓观麾旗肥牛百头酒万石烂漫一日供欢娱自言不喜读兵法智略何必求孙吴贺兰山前烽火满谁令小虏骄慢延须臾

缢山引

王子吹笙去不还当时旧物唯缢山山深树老藏遗庙春月秋风空自闲輶轳左界连商雒碧瓦朱栏露华薄经时掩户庭草深永昼无人涧花落徘徊未下日将西遥望嵩阳烟景微鹤驭飘飏向何许林间空见白云飞

乌栖曲二首

风透金铺结绮钱穿帘入幌舞垂莲可怜无人夜不晓起视西窗月华皎

星踈月明漏水长罗帷翠帐华灯光佳人起舞玉钗堕门外乌栖鴈南过

和王介甫明妃曲

胡雏上马唱胡歌锦车已驾白橐驼明妃挥泪辞汉主汉主伤心知奈何宫门铜环双兽面回首何时复来见自嗟不若住巫山布袖蒿簪嫁乡县万里寒沙草木稀居延塞外使人归旧来相识更无物只有云边秋鴈飞愁坐泠泠调四弦曲终掩面向胡天侍儿不解汉家语指下哀声犹可传传徧胡人到中土万一佗年流乐府妾身生死知不归妾意终期寤人主目前美丑良易知咫尺掖庭犹可欺君不见白头萧太傅被谗仰药更无疑

悯狱谣

五刑象天有震耀上圣本以防奸邪法官由来少和泰臯陶之面如削瓜况於秦汉任酷吏死人籍籍如乱麻捶楚之求靡不得小者劓刖大灭家君不见古时牢狱地几多冤骨埋黄沙

宫漏谣

宫漏清高处闻六街寂寂夜将分南下河梁缅诘曲北瞻禁阙郁缤纷黄金锁闭斗城斜白玉楼通上帝家若木未光潜日月神仙不动积烟霞铜壶银箭夜何长杳杳亭亭未遽央复道回廊接西掖千门万户遥相当宛转徘徊不能驻复出宫城透宫树宫树乌飞月欲西烛光一道照沙堤龙骑联翩排闾阖凤帷岑寂对狻猊广庭肃肃延冠带劔佩峥嵘百神会施政发令

四海春庙堂垂衣天?泰

穷兔謡二首

鹊翅崩腾来九霄兔命迫窄无所逃秋毫就死忽背跃鹊拳不中还飞高安知韩卢复在後力屈但作婴儿号少年只取一快乐谁念草根腥血毛

兔营三窟定何在棘间塹底高丘巔却行百步方跃入未免余踪留雪田少年何为无恻隐解鹰纵犬薰以烟人言兔狡非兔狡窘急偷生真可怜

张子厚先生哀辞【名载】

先生负材气弱冠游穷边麻衣揖钜公决策期万全谓言叛羌背坐可执而鞭意趣小参差万金莫留连中年更折节六籍事精研羲农讫周孔上下皆贯穿造次循绳墨儒行无少愆师道久废阙模范几无传先生力振起不絶尚联绵教人学虽博要以礼为先庶几百世後复覩三王前释老比尤炽羣伦将荡然先生论性命指示令知天声光动京师名卿争荐延寘之石渠阁岂徒修简编丞相正自用立有荣枯权先生不可屈去之归卧坚孤嫠聚满室餬口耕无田欣欣茹藜藿皆不思肥鲜近因诏书起?取病告旋旧庐不能到丹旄风翩翩人生会归尽但问愚与贤借令阳虎寿讵足骄颜渊况於朱紫贵飘忽如云烟岂若有清名高出太白巔門人俱經带雪涕会松阡厚终信为美继志仍须专读经守旧学勿为利禄迁好礼效古人勿为时俗牵修内勿修外执中勿执偏当令洙泗风郁郁满秦川先生傥有知无憾归重泉

景福殿东厢诗【皇佑元年作】

皇佑元年秋八月皇帝临策贤良方正及武举进士仆与范景仁受诏雋校策卷寓直於景福殿东厢凡三日得诗十三首编之左方

夜意

清夜四无譁深严上帝家星翻珠网白斗挂玉楼斜风静虚成韵霜轻未作花还疑汉津客浩荡寄流槎

即日

杙栝留深殿仓琅秘九門日长人对直风迴鷺高翻林有萧疎意云无片缕?钧天真自到不独暂飞魂

柏

落落抱高节秀出青云端
无言礪谷幽自致宫庭难芳风
袭玉宇余露分铜盘不使万年木
嘉名高岁寒

御沟

万户郁相钩枝分瑟瑟流
紫纒通桂观隐见带龙楼碧映
千林曙红飘一叶秋寒波长不竭
岁奉宸游

赐酒

和气盈金榼恩光湛玉觞
应知北山羽犹怯上林霜醇味回
秋色清都近醉乡山茅沾雨露誓
极寸心长

菊

琐琐南阳菊秋潭岁自开
孤根拥红叶落蘂媚苍苔正以参
灵药因之植紫台愿兼金掌露同
入柏梁杯

赐果

南海荔枝来别馆蒲萄成
匪颁浹下陈捧拜同驩荣置黍敢
先食临盘多未名怀核待归种复
愁千岁生

赐书

上圣固天纵英艺皆絶伦
时乘万几闲翰动如有神用之当
豫游不忘安四民匪颁及羣下络
绎来中宸毳毼灵凤翔鬱怒虬龙
振清若四海秋熙如天下春愚臣
土芥微亦受雨露均愿推
赐书意直以古义陈士本学先王
所求谊与仁农当服稼穡昏作
亩勤百工备用器不治刺
绣文万商迁有无不通珠翠珍四
业既交修坐令风化纯人和衣食
丰天应殊祥臻皇心正在
此非以能高人

怪石

昔去江湖乡来与松桂接
圭角老龙脊锋棱秋劒铗历乱枯
苔点交横败莎叶会使成都人更
取神蓍揲

未开木芙蓉

木末采芙蓉骚人歌所无
何言霜花艳不与水芝殊香苞麝
脐结茂叶桐陰敷岂若龟巢类飘

零老五湖

读武士策

汉家求猛士云集未央宫天外胡星淡山西将种空奇谋纷并进壮节凛生风八阵纵横势依然见目中

观试骑射

阊阖风正清觚棱日初媚材雄集便殿玉座亲临视三河侠少儿初识天子贵天山汗血骝蹀躞金镫扬鞭秋云高顾盼有余锐萦回势可观罄控动如志毫厘应心目审固参身臂鸣弦电雹惊寸的冰瓦碎龙颜薄笑春喜色连傍侍旦为徒步人暮作影纓使扬扬出九门亲友生意气须知天地德慎勿忘所自黠羌犹旅拒狺狺方繁炽求为忠义臣无负搜罗意

同范景仁寄修书诸同舍

烈火非不猛不耗百链金寒霜非不严不雕竹柏林小人势利合倾覆无常心君子道德亲白首犹视今诸君闺台秀相得如璆琳离羣一昔期乃尔动悲吟古风久已衰交道日颓侵愿名思友操播之清徽琴

和聂之美讽古

曲逆从汉祖出奇谁与让一朝寄天下不及王陵戇海客久藏机鸥知人未知如何毫末利管鲍亦相欺

和之美二贫诗

君子尚仁义宝用为身资其人苟不贤富饶亦胡为所以回宪徒不厌糠与藜当时万金产令名传者谁之美初解褐为吏长河湄月得数斗禄仅足供饘糜谓言家无宝不必修藩篱囊衣不自暖乃为偷意窥穿墉入其室探取无纖遗从事借之带同列乞其衣日高服未具不敢踰门畿萧条四壁寒独立空自嗤援毫引幅纸书作二贫诗上言运命遭温飢无时期下嗟职事劳旧学日以隳乃知贤者心不独忧寒饥 坎虽益多志业终无衰我实甚贫者视君犹白圭行年三十余碌碌无佗奇庇身太学官旦夕唯盐齏读君二贫作我事借君词君诚士林秀不免青衫卑满腹岂无才抱蓄未有施不用固为小用之活蒸黎如君有此富岂必藏珠玑财贫非道贫已矣何嗟咨

送薯预苗与兴宗

客从魏都来贻我山薯实散之膏土间春苗比如栉吾家庭户狭树艺苦其密危根递扶戴怒

牙犹拂鬣兴言念伊人好嗜与我一家蓄桐君书喜观泛氏述虽为簪带拘雅尚林樊逸分猷
取其诚岂容羞薄物况闻知药者饵此等苓术愿益君子年康直体无疾散诞得寬壤繁大宜
无日萧梢新蔓抽苾?故丛失入冬霜霰严叶落掇可出伸如猿臂长拳若熊蹯臍拾木?铜鼎
相期聚书室谁得与其徒谿茶与山栗

答昌言求薯预苗

冬实散肥壤春苗动新叶雅意非遗人野情聊自愜何言好事者求访来相叠会种十亩余坐
取诗盈篋

送冷金牋与兴宗

蜀山瘦碧玉蜀土膏黄金寒谿漱其间演?清且深工人剪穉麻搗之白石砧就溪沔为纸莹若
裁璆琳风日常清和小无尘滓侵时逐贾舟来万里巴江浔王城压汴流英俊萃如林雄文溢
箱篋争买倾奇琛夫君乃冠冕辞气高千寻十载为举首於今犹陆沉嗟我蓄此纸才藻不足
任愿以写君诗益为人所钦缟带岂多物足明同好心黄钟声如雷岂病无知音请以此为质
佗年神所临华轩策驷马慎勿忘遗簪

和端式十题

春塘冰

春塘含薄冰淅沥隐隈曲晴日射寒芒柔风折衰玉草树曾未知波光已先綠

烟际钟

苍茫返照收羃历寒烟起前山黯同色不辨峯峦美独有远来钟悠扬翠微里

汀洲苹

秋江【逸一字】澹荡波急枝难定参差碧叶繁皎洁寒花静幽人吟不归独立汀洲暝

渔洲火

渔翁系叶舟远映枫林宿手携双白鱼呼儿爨山竹深夜寂无人明灭寒江曲

寒溪石

穹石正嶭岩寒流更清急霜飞败叶拥波溅苍苔湿谿僧勿剧来沙鹤方孤立

幽谷泉

深谷窅无底空闻泉水哀时因秋日照微见碧萦回谷里非人境胡麻何处来

秋原菊

高原向摇落丛菊始滋荣草际浮金碧照人双目明何须天生理玉斝泛余英

垂崖鞭

山竹引春根垂透苍崖底绸直老龙须佶屈修蛇尾支郎虽畜马不忍裁为箠

古木陰

古木夏陰薄萧萧蠹叶微岂无緑树浓爱此风烟姿高僧此休息肩倚瘦筇枝

天外峯

飞鸟去不息长空黯何极踈峯带夕晖点缀秋天碧禅观坐超然相望两沈寂

和聂之美鸡泽官舍诗七首

西斋

明府学既优所闻今得施四境已澄清还以书自怡西斋几黄卷治原俱在兹

题厅壁

百里有民社古为子男国苟有爱物心穉老皆蒙德为身不为人鄙哉陶彭泽

县楼

孤楼虽不高足以瞰四远饷妇陌头归田夫桑蔭饭敕吏省追胥勿令农事晚

苇

索索夕风適瀼瀼朝露裊雀裊寒枝宿萤依败叶眇然秋兴长坐与江潮接

柳

驿道苦车马田庐悲斧斤谁栽官舍前老朽完天真所愿明府心庇树如庇人

向城路

村路烟欲暝行人殊未稀借问往来者营营皆有为乃知市朝客趣务良可悲

怀翠亭

高斋对秋山平望殊不远虽违独往心苍苍长在眼可嗟都邑游终日红尘满

超然台诗寄子瞻学士

使君仁智心济以忠义胆婴儿手自抚猛虎须可揽出牧为龚黄廷议乃陵黜万锺何所加甌石何所减用此始优游当官免阿谄曷时守高密民安吏手敛投闲为小台节物得周览容膝常有余纵目皆不掩山川远布张花卉近缀点筵宾穀核旅燕居兵卫俨比之在陋巷为乐亦何歉可笑夸者愚中天犹惨惨

今古路行

出门道路多纵横不我测我今欲远行须问曾行客徐徐逢路人咨问青松侧客曰君何往答曰游京邑客乃指要路而言行有益古路虽大道不如今路直但行今人路犹如假羽翼彼客别我去独自踟蹰立为见今古路无乃须差忒今路足轮蹄古路饶荆棘欲行今人路恐背古人迹拟行古人路今人笑迂僻又拟不出门奈有饥寒逼哀哀於此情悠悠苍天色不避今人嫌路须行古陌古陌虽然远且保无厥失勉哉自勉哉前古难知识不复见杨朱万古凝愁魄

忆同寻上阳故宫路

上阳门外云连草车马遥遥往来道昔王游豫几何年今人岂识当时好明珠翠羽已成尘道上行人几番老当时秋天落宫槐今此婆娑皆合抱

秋意呈邻几冲卿

新凉入闾巷旧暑何人扫筠笼卖红莲莎堦坠丹枣蕉衫日以疎纨扇安能好蝉悲西风树燕乱斜阳草此意属渊明篱边几樽倒

传家集卷五

卷六

钦定四库全书

传家集卷六 宋 司马光 撰律诗一

御制後苑赏花钓鱼奉圣旨次韵

馥娑蜚廉次第开鸣鞘传跸自天来云随彩仗低临幄柳压金堤翠入杯
檻倚柔风丝缥渺花翻丽日影徘徊上林春色长如旧玉辇嬉游岁岁陪

奉和御制龙图等阁观三圣御书【嘉佑七年十二月二十七日上】

积厚丕丕业重光郁郁文宝书垂列宿玉字切浮云散帙鸣銮驻充庭杂佩分
愿移天纵艺似续圣功勤

资善堂宴餞应诏

士论归清德皇心重老成陈谟侍经席得谢解尘纓坐密金章并行徐玉醴
清都门昔供帐疏傅未为荣

赏花钓鱼二首

飞廉通上苑鵙鵲带天渊树色含春雾波光静晓烟香飘仙仗外花舞御卮前
籊籊文竿裊簃素鲔鲜误陪金马籍愧奉栢梁篇愿献南山寿宸游侍亿年

日丽芙蓉阙春荣太液波苑门鸣玉集輦路翠华过芳树周阿密嘉鱼在渚多
浮英入樽竿颁首出蒲荷人乐熙熙德臣賡旦旦歌万生同鼓舞相与醉天和

迓英阁读毕後汉书蒙恩赐御筵

赤伏开兴运昆阳定壮图官仪还旧物郊兆建新都杲日羣陰破油云万类苏
銮輿陟乔岳玺綬抚匈奴厚禄优诸将嘉猷访大儒重明绍堂构奕叶奉规模
叔世条纲紊遗风节义扶袁安空陨涕扬震卒蒙?佞指车前鹿人瞻屋上乌
炎精尽河渚黄眚兆当涂青简传良直金华侍燕娱兴衰炳辙迹淑慝粲龟符
赫赫天光照孳孳睿思紆方齐建武治不啻永平俱化盛文明正恩隆饮食需
曦阳慙杞棘濡味愧鵲鹔帝力生成大臣功报效无先民诚可监愿不忘斯须

奉和江邻几文德殿观文武百官等上尊号十五韵【六月七日】

舜禹曾何与羲农实强名含灵徒叶赞造物始无情闾阖非烟澹觚棱晓气清葳蕤大衢隘殷
璘外朝盈鲜旭分衣绘薰风拂佩琼华顛方内集殊俗海隅倾桀戟金闺奥囊书赭案横敷言
齐列位稽首从羣卿不报乾坤施难图日月明仁心由性得治体与时行金石皆中欸丹青岂
外荣功归元首重泽及草茅轻业业冲虚意区区爱戴诚何为犹让德不以慰怀生退复歌天
保期於采颂声

和宋次道大庆殿上元迎驾

凤律年华到尚新九重气象已成春晓云低拂羽林仗宿雨先清紫陌尘玉殿鸣鞘传警蹕彤
庭委佩集簪绅阙前无复鱼龙戏自有驩谣亿万人

寒食御筵口号二首

雨意沉沉泼火余夔龙盛集退朝初酒殽络绎来丹禁冠劔参差下玉除紫凤归飞云烂漫黄
鹂新啭柳扶疎麦禾满野边烽息佳节何妨赋乐胥

圣主褒优鼎轴臣金觴玉醴照青春万家烟火朝来静九陌风光雨後新高鶩翻飞惊紫綬余
光点缀托朱轮问牛因得观民俗不独嬉游惜令辰

春祠致斋寄呈范景仁宋次道

比日聚官舍笑言曾未厌暂成挥手别各有侍祠严晴景朝朝丽春容物物添解斋当共醉莫
遣此期淹

和王道粹春寒趋馆马上口占

残腊尚要春清寒更着人雪华犹惜别物意倍添新云压宫城重风调玉漏匀行游宜结轡九
陌未多尘同宋次道元日宿尚书省听戒誓寄常州邵不疑【去年是日次道同不疑斋直】

椒花献岁新瑄玉侍祠频此夕同华省非才愧後尘江风迎茜旆沙雨待朱轮不比斋宫冷端
居弃擲春正月三日与广渊同出南薰门分趋斋宫涂中成

并轡出都门葱茏日欲昕野寒余宿雪树闇湿春云未望郊宫近先愁马首分一朝犹恋恋可
复久离羣二月二日太常致斋晨起呈范景仁宋次道二同舍

官舍春萧瑟朝来尚薄寒人虽繁陌上尘不近门端已负踏青约【同舍先有是约】仍无举
白欢【从次道求酒不获故云】凭君御沟上试折柳条看

和王道粹垂拱早朝王范二直阁班列在前戏成小诗

霁日扶霜仗祥烟覆晓班帝居回北斗天阙竦南山紫殿鸿鸾肃金门虎豹环蓬菜两仙伯迴立白云间

和宋子才郎中孟秋省直

夜久残暑尽好风来满襟牀空唯置枕冠小不施簪竹影乱凉月林梢转晓参人心有喧寂何必卧云岑

八月五日夜省直

大火已西落温风犹袭人留连惜纨扇散诞脱纱巾蟾影夜色浅蛩声秋意新图书足自适何物更关身

八月七日夜省直苦雨三首

夜色槐陰重雨声官舍寒野农安敢问环堵未能完尽日流云度何时大块乾正愁开霁晚霜雾满红栏怅望中秋月於今已上弦明生圭棣小影露桂花偏幽思邈难致浮云去不还何当出陰翳清彻照中天菊蕊如排栗青青见叶心未尝窥白日何以散黄金欹侧踈篱短绵延蔓草深寒蛩尔何与终夕亦悲吟

次韵和江邻几九月五日省直

羣驹布路散瘦马解鞵回雨阁虫声乐秋深菊意催图书纷自适僚友邈谁陪何以消寒夜残醪不满杯

和宋次道奉慈斋宫见寄

去住邈如霄与尘依依欲别更相亲虽知洛邑饶英俊莫忘斋庐并直人

次韵和王胜之十二月十五日朝退马上作

瓦沟微白雪光清阙角初红海日腾尘息长街千骑入鞘鸣深殿六龙昇云岩有客空回首圭萼何人尚曲肱自笑鰕生章绶缚不容逃去正如?

又和雪

四檐冰管未全曦一夕陰风雪又飞客卧牛衣忧死别人留玉塞望生归公车岁晚怜东郭辽

海云深失令威颇忆当年映书否物华如旧鬓毛非

和王粹道雪夜直宿

天禄凝严近紫台书帙夜对雪华开层楼直倚寒空出清漏还从深殿来薄梦不成冰柱折晓
光先到玉花催兔园终是诸侯事虚费相如能赋才

馆宿遇雨怀诸同舍

佳雨濯烦暑翛然生晓凉森沉殿瓦碧幂历井苔苍院静杉篁秀人闲钟鼓长凭谁同把酒清
兴宵相望

寒食南宫夜饮

积旬留省署容易度春华芳草踏青晚长楸行乐赊云疎时送雨风细暗飞花直有黄金百无
因过酒家

和范景仁夜读试卷

案前官烛堕花频满目高文妙入神勇气先登势无敌巧心後发语尤新好贤何啻三薰贵求
宝方知百汰真愚鲁自非凭骥髮崑山千里到无因

代叔礼作使北诗

人主爱民物心无彼此情约欢同一国蒙福徧羣生玉帛遥相望风波寂不惊熙熙南北海所
至尽升平

又击球

肃奉乘轺命仍陪戏马游朋分初迴出势合复相收顾盼华星激紫回紫电流良因重嘉好礼
接使臣优

同宋次道陪讌琼林

冠盖连翩数里尘帝家全借上林春鹄行不动烟霞秀龙角正高雷雨新喜气晴曛宫树緑飞
花醉堕玉卮频蒲萄卢橘应相识半是当年举酒人【是日在席同年七人】

寄题兴州晁都官【仲约】东沼沼上有唐郑都官诗刻石

名郎游胜地心迹继风流昔为题诗着今因好事修四山相照映五马屡淹留想见波光净依然一片秋【郑诗云彻底千峯影无风一片秋】

和赵子舆龙州吏隐堂

四望逶迤万叠山微通云栈落尘寰谁知吏道自可隐未必仙家有此闲酒熟何人能共醉诗成无事复相关浮生适意即为乐安用腰金鼎鼐间

寄题钱君倚明州重修衆乐亭【公辅】

横桥通废岛华宇出荒榛风日逢知己湖山得主人使君如独乐衆庶必深颺何以知家给笙歌满水滨

题杨中正供奉洗心堂【崇勲之孙】

闼闼盛山西朱门扬戟衣雅知名教乐深笑宴游非一室琴书隘三年园圃稀异时论事业肯复让轻肥

寄题李舍人【伟】蒲中新斋

陇上家声勇气殊边庭卧鼓欲安居非同王翦私求宅更似甘宁晚好书劒倚寒窗风淅沥门无杂客柳萧疎蒲州风土平生爱为问旁邻地有余

寄题常州东山亭二首

谢傅英声高可攀结茅积土想东山常忧胜槩一朝尽岂信风流千古还麈尾蒲葵供永日酒樽碁局奉欢顔贤侯心迹遥相望不使兰陵风月闲

闼闼崔嵬动四方入门鸾鹤自成行青綈旧已临佳郡墨客新归耀故乡醉舞几应摧屐齿对碁正欲赌香囊阶庭玉树寒相照更使东山逸气长

王金吾北园

丞相後园天籟邻年年分借上林春目前但识禽鱼乐门外何妨车马尘花蘂祇疑名品尽图书方验古今贫将军朝下无余事端为风烟作主人

寄题傅钦之济源别业

县郭遥相望修篁百亩余林间清济水门外太行车道胜随宜足身闲与世疎何时容命驾采

蕨钓肥鱼

游李卫公平泉庄

相国已何在空山余故林
曷时堪炙手今日但伤心
陵谷尚未改门阑不可寻
谁知荆棘地鹤盖旧成阴

寄题李水部【庠】滹水别业

茅茨临素滹沃野带长林
日永一堂静草生三迳深
消忧何用酒为乐不须琴
扰扰市朝客无人知此心

寄题济源李少卿【章】园亭

县僻人事少土肥风物殊
杖刊灵寿木轮裹溴梁蒲
竹不减淇水花仍似洛都
主公眉雪白游览未尝扶

寄题宇文中允【之邵】所居

孤宦行直道栖栖良可悲
谁能拂衣去不待挂冠期
经史乃吾友云山为已知
世间青紫贵尽付两佳儿

戏书宋子才止足堂

举世恋荣禄夜行无乃劳
独君年未至止足一何高
矮制乌纱帽宽裁白氎袍
华裯坐终日闲按紫檀槽

寄题张著作【中理】善颂堂【嘉州公裕学士之父】

玉垒老先生逍遥乐太平
门阑百客盛冠盖一乡荣
国族招邀近堂皇指顾成
江山对平远图史散纵横
止水中心适秋毫物外轻
鲤庭新露冕闾巷不须惊

寄题刁景纯藏春坞【景纯致政归京口治其所居命曰藏春坞前有一岗皆松林命曰万松岭】

藏春在何许鬱鬱万松林
永日门阑静东风花木深
主公今素髮野服遂初心
时与乡人醉高歌散百金

游灋上刘氏园

日暖孤台迴露浓幽迳微茅斋举白饮沙溆踏青归照水清满眼穿林香湿衣莫言春尚浅已有杏花飞

题致仕李太傅园亭

汉家飞将种气槩耿清秋解去金貂贵来从洛社游清商拥高宴华馆带长流可笑班超老崎岖万里侯

太行

象帝胚浑散愚公辙迹开横行四极外蟠据九河隈崑崙天关近峥嵘地轴回阳崖明草树陰壑转风雷波沓羣峰涌云奔峭壁来猿嵒垂磊落龙窟鬬喧豗喷雨惊湍洒跳垒巨石颓平途忧屐折跬步戒轮摧覆顶千春雪缘潭万古苔谷盘容国土髓裂饵仙才晋市飞樵札燕郊落烧煤碁图分冀野蚁壤认丛台在昔王涂塞尝闻霸略恢严关陰伏甲间道夜衔枚挟诈挥金斗贪功袭墨綬战场空爍火京观悉蒿莱险易曾何变兴亡只可哀隆平方恃德襟带自崔嵬

渔父

楚岸橘花香扁舟泛渺茫短蓑冲密雨素髮净秋霜烟外鸣榔远波间掷线长无人识名姓击楫入沧浪

早春

璿霄转斗车春意逼梅花熟寐侵街鼓闲情到酒家晴阳浮地末寒色敛天涯归鴈空余迹朝来印浦沙

山中早春

山木欣欣意春光次第催欹巾望归鴈伏檻听新雷岩静闻冰折巢空喜鷺来涧花从寂寞亦向草堂开

赠学仙者

微迳透重峦茅堂竹叶冠方瞳映骨静秀气逼人寒夜火装丹竈晴霜醺石坛不须惊浅俗轻举入云端

入塞

万骑入榆关皐兰苦战还摧锋佩刀缺蹋血马蹄殷铙吹来风外牛羊出雾间须知沙塞恶壮

士变衰顏

田家

未塞豪人夺何言公赋收皇心虽惻隐蓬户或焦愁为吏空多禄无人能此忧知君坐公府佗日富民侯

和人萇花

葭莢迷河曲高秋一番荣齐纨张野白楚练照川明不夜月长皎踰时雪未晴万仙霓帔合千亩玉苗生漠漠波澜偃茫茫沙碛平际空盐海竭垂地塞云横日暖鸥无色风高鹤有声逢君得嘲赋岂愧束薪并

华清宫

新丰鸡犬稀蓊北马秋肥金殿翠华去玉阶红叶飞荒林上路废温谷旧流微嗟此非人事何须问是非

虎牢关

天险限西东难知造化功路邀三晋会势压两河雄余雪沾枯草惊飈卷断蓬徒观争战处今古索然空

梧桐

紫极宫庭阔扶疎四五栽初闻一叶落知是九秋来实满风前地根添雨後苔羣仙傥来会灵凤必徘徊

秋日登观信亭

西风连夜雨草树已萧条宿霭稍零落寒山更寂寥林红犹带日岸白欲生潮新鴈来何处离离天际遥

湖上村家

万顷寒烟外茅茨枕碧流枫林巢乳鹤沙渚乱鸣鸥漠漠菰蒲晚苍苍芦荻秋欲过南浦去篱下出渔舟

双竹

草木类同而种殊者竹为多杭州广岩寺有双竹相比而生举林皆然其尤异者生枯树腹中自其顶出森然竦树如龙蛇相萦矫首矚然予见而赋之

双干标枯腹青青凡几霜龙腾双角直鲸喷两须长但欲寻支遁安能问辟疆屡来非别意未与此君忘

南湖二首

宋都南野水花柳媚名园鸟起沙留迹鱼惊浪结痕朱桥通别岛白路出荒村城邑虽云迥常无车马喧海鴈长桥北乘闲日日来游鱼自应乐宿鸟不相猜弱柳周遭合芳花次第开梁王昔游集後乘列邹枚

西谿公讌二首

五马非从乐西城念劝功翠帷低映水红旆不胜风叶脱青山静云归碧落空淹留尽佳兴新月渐朦胧谢守爱山水军城况不賒鱼惊避落叶鸟倦立浮查古柏依冈远垂杨带岸斜秋风吹急管一曲度荷花

西湖

佳丽三吴国湖光荡日华鱼惊动苹叶鷺喜掠杨花云过山腰黑风驱雨脚斜烟波遥尽处髣髴见渔家

夏日西斋书事

榴花映叶未全开槐影沉沉雨势来小院地偏人不到满庭鸟迹印苍苔

过故洛阳城二首

四合连山缭绕青三川滉?素波明春风不识兴亡意草色年年满故城

烟愁雨啸奈华生宫阙簪蕖旧帝京若问古今兴废事请君只看洛阳城

初春登兴国寺塔

雨过风清露气匀林花变色柳条新为君作意登高处试望皇州表里春

和李殿丞仓中对菊三首

高士寄朝市迴然心迹殊秋风太仓里黄菊满庭隅陶令成诗後王公送酒无遥知厌俗事未免强踟蹰文案渐消散仓闲吏已稀庭空数蝶下夜静一萤飞爱赏忽成句淹留时忘归高情虽不系遇此独依依凉风正萧瑟好月复徘徊幽兴眇不尽芳罇时一开余英盖红叶坠露湿苍苔从此东篱下应忘归去来

执酒

执酒劝君君尽之今朝取醉不当疑好风好景心无事闲利闲名何足知

河桥春别

河桥春尽送君归又惜无欢度此时乱花满眼遮人望不见行尘空酒旗

答陈进士谓之忆江东旧游见赠

客路今东去亭臯木叶飞居然不堪恨况与赏心违顾渚烟波阔长洲草树微江边好春色行望锦标归

又赠谓之

文藻兼名理三吴第一贤乡心几千里飞鴈满秋天篱下多新菊渊明归思长主人方爱客未得傲羲皇君念东归日应须昼绣荣当令故关吏还识弃繻生

重九日忆菊

节物都何晚佳辰容易过黄花不足念当奈酒盃何

客思

客思倦漂泊居然感物华关头望红叶马上见黄花薄宦终无定闲愁讵有涯今朝书至否几夕梦还家前年春与楚正叔同游陟岵寺今兹已复周岁杳然思之

陟岵寺南山曾陪半日闲春来梦携手宛在白云间

晓霁

梦觉繁声絶林光透隙来开门惊鸟鸟余滴堕苍苔

观江上人壁许道宁画寒林

昔曾驱瘦马冲雪过荥阳不悟当时景萧然在此堂

自都往余杭怀聂之美

阁上新文卷欲逢知己开相思不能已欹枕梦君来

梦与之美为寒食游

寒食无佳赏芳菲半已空夜来逢胜友未至负东风

别聂之美

客宦常漂泊离怀徒自劳贫无衣换酒空有涕沾袍木叶寒犹在江湖暮更豪行舟远不见赖有片帆高

松江

吴山黯黯江水清欲雨未雨伤交情扁舟荡?泊何处红蓼白苹相映生

秋风索索连江起暮过烟波十余里长芦瘦竹映渔家灯火渺茫寒照水

潮水二首

平江欲上潮古木自萧萧两岸饶葭苇寒波浸寂寥淋淋出海门百里雪花喷坐看东归去平沙空有痕

旅宿睢阳南湖

梁王弃宫馆时世古今违犹有南湖水春来鴈鹭飞楼台沈倒影林薄挂余晖豪侈终何在行人得暂依

闻龚伯建下第

文章真长物堪叹又遗贤利器空埋土灵光久照天赵锥犹未出荆璧会须传道在虽穷困知君不慨然

题陈秀才凤园林

剧谈惊满座音貌独琅然可惜酈生老谁知苏季贤青囊世外药碧幕醉中天不佩黄金印都

缘负郭田

九日登麻藺坂

客路逢佳节无欢更益愁前山造云日登陟不因游

游延安宿马太博东馆【字承之】

高馆寂无譁安闲胜在家暮烟凝塞上堠火落天涯坐久笔生冻夜阑灯作花主人意未尽归路不为賒送何济川为龐公使庆阳席上探得冬字【陟】

幕府遥三舍传车乘一封忠深轻远道醉後失严冬圖水犹飞檄芦閤未灭烽贤侯虽喜士难得久从容

延安道中作

羈旅兼边思川原蹠血新烟云长带雨草树不知春细水淘沙骨惊飈转路尘今朝见烽火白首太平人

鄜州怀聂之美

何言内外家忧患两如麻别泪行三岁思心各一涯海边昏雾雨塞外惨风沙安得云飞术乘空去不遐

和张推官同年师爽春陰无绪偶成

澹泊轻云寒不收未成春雨只添愁风烟寂寞几何限尽入凭高一寸眸

薄寒未去腊才过春色先知在綠波不是宿云能作思大都王粲自情多

春晓

钟漏初传晓满窗风雨寒东冈行可种欹枕不成安

鹭鸶

清闲自合无忧累白髮何因更飒然遥望孤飞下秋水雪花一片落晴天

待诏二首

京洛风尘里相逢眼尽青
故人多密近谁诵四隅铭
待诏久公车囊装半已虚
雄文虽雅丽未得似相如

观僧室画山水

画精禅室冷方暑久徘徊
不尽林端雪长青石上苔
心闲对岩岫目净失尘埃
坐久清风至疑从翠涧来

赠外兄吴之才【挺】

何须亲始重友分固非疎
况复羁孤极同经忧患余
晚成应大器先得类凡鱼
游衍陪严忌声华诵子虚
蒲轮诏枚叔马宠相如莫
忘西都日寒牕夜读书

九日怀聂之美【时余在河南聂在陈州】

钱唐江里扁舟上别後篱
花几度黄忧患萦心何繚
绕风光满目尽凄凉谁同
凿落盃中酒独系茱萸肘
後囊可复无书道情素云
间空有鴈南翔

太室横山蔽十里相思空
复上高台瓮头白酒行当
熟篱下黄花稍复开陶令
不无同醉兴孟君况有解
嘲才欲凭西北高风势飞
度輶轳劝一盃

饮吴之才家

京洛相逢设主人富家鼎
食不如贫解衣换酒同为
乐知是交情百倍亲

晚秋洛中思归东园

不利不名空去国鴈飞叶
落未归来秋风肯待主人
至篱下黄花随意开

普明寺荷塘上置酒

菡萏飘零水寂寥败荷疎
柳共萧条烟斜雨细愁无
限醇酒千分不易消

送孟仲习宜君令【翱】

合抱生毫末无为厌小官
政成心更逸道胜意常寬
野迴山形秀云疎雪意闌
离盃如不尽何用御祁寒

雪霁登普贤阁

积雪明朝日山河坐可分
嵒岩初解冻片段未归云濶望穷人境高
寻俯鴈羣开门枝鸟散玉絮墮纷纷

和陈殿丞芍药

化工余巧惜春残更发浓芳继牡丹
檀点藏心殷胜缣异香迎鼻酷如兰
琼楼窈窕仙家宅云叶低垂醉里冠
【缣子楼子兄子醉西施皆芍药名品】
自有殊功存药録不当独取郑诗看

到任明年旨罢官有作

恬然如一梦分竹守长安去日冰犹壮
归时花未阑风光经目少惠爱及民难
可惜终南色临行子细看

和景文议交絶句

迺来友义渐隳颓直谅多闻贵不回
势利相交何足道已知余耳愧陈雷

传家集卷六

卷七

<集部,别集类,北宋建隆至靖康,传家集>

钦定四库全书

传家集卷七 宋 司马光 撰律诗二

归田诗

同年张周辅尝语及仕宦之多端因称仲长子有言使吾有良田美宅背山临流适意极乐诚无事於此慨然感之作归四诗五章

秋水风波大嗟嗟未可游渔樵自应乐珪组为谁忧直木知先伐明珠忌暗投果然鉤可曲不惜取封侯绂冕诚虚器簪裳悉畏途触机身未保好直道先孤飢石曾何有田园浪更无可能推两耜沮溺共为徒圣哲虽云远遗文幸未亡沈冥观礼乐髣髴见虞黄鸡黍延三迳琴书乐一堂逍遥名教内富贵亦微茫松菊陶潜宅蓬蒿仲蔚家行游筇杖瘦啸傲幅巾斜屋小踈茅覆门深乱柳遮村童迎客至竹箒扫桃花桑柘緑无际田间戴胜飞清醪迎社熟鸣雉向春肥执耒时将急衔盃日渐稀四邻能共乐招饮莫相违

咏史三首

不事王侯者翛然郑子真开田谷口美荷锄白渠春德化移乡曲声光动搢绅一时鍾鼎贵磨灭彼何人延陵腰利劒上国使初通待我周游徧逢君遣奠终晶荧系高树萧瑟动寒风谁敢欺生死苍苍照尔衷春风三阁上珠翠日纷纷乐饮陶江月清歌遏海云醉中失陈国梦里入隋军玉树庭花曲凄凉不可闻

秋夜望月

万里氛昏歇金波秋更明星连河渚闇风绕桂枝生鵲鹊临华馆新丰落故城古今佳赏尽殊自有余清

汉宫词

苜蓿花犹短蒲萄叶未齐更衣过柏谷走马宿棠梨逆旅聊怀玺田间共鬪鸡犹思饮云露高举出虹蜺

读汉武帝纪

方士陈僊术飘飘意不疑云浮仲山鼎风降寿宫祠上药行当就殊庭庶可期蓬菜何日返五利不吾欺

咏寒士

洋洋泌水侧蓬室苦萧条衣薄难胜夜厨闲空过朝笑谈东郭履歌诵买臣樵但问才何似无疑卿相遥

野庙

古庙崩榱在墙间杂树荒依稀设余像寂寞閤祠堂旧日牲豕地今晨狐兔乡英灵如未灭何以度凄凉

吕禄庙

赤帝祚四百徒然诸吕谋出游逢友卖未返见家收弊冢昔无托遗祠今幸留士心俱左袒何怨曲周侯

梅花三首

从与夫君别寒花几度春坐愁芳树老况乃监中人塞北为君戍江南是妾家遥知关外雪只似岭头花驿使何时发凭君寄一枝陇头人不识空向笛中吹

云际亭

高齐杳冥际迴与世尘违席上山河近天边桑柘微人间已飘洒栋里始纷霏草树收残照迢遥久未归

和孙器之清风楼

贤侯宴枚马歌鼓事繁华晚吹来千里清商落万家平原转踈雨远树隔残霞宋玉虽能赋还须念景差

先春亭

园林近铃合旦夕被仁风自得芳菲早岂将踈远同水开半塘绿雨借数枝红会待韶光徧还应到野丛

沈陰欲雪与同列会饮南斋

簿领日沈迷从容乐事稀宾朋幸相值樽酒不须违
惨澹愁云积参差远树微淹留勿轻散待取雪花飞

五哀诗

孔子恶利口之覆邦家者甚矣谗之为害不可一二数也聊观战国以来楚之屈原赵之李牧汉之晁错马援齐之斛律光皆负不世之才竭忠於上然卒困於谗不能自脱流亡不得其所而死或者国随以丘墟此其尤可大哀者也因即其事作五哀诗且以警後世云

屈平

白玉徒为洁幽兰未谓芳穷羞事令尹疎不忘怀王冤骨消寒渚忠魂失旧乡空余楚辞在犹与日争光

李牧

椎牛飧壮士拔距养奇材敌帐方惊避秦金已闇来旌旗移幕府荆棘蔓丛台部曲依稀在犹能话郭开

晁大夫

人主恩犹盛谗夫弄舌端旋闻就斧质不得解衣冠反贼齿才冷谋臣心尽寒晁宗噍类尽汉室泰山安

马伏波

汉令班南海蛮兵避郁林天涯柱分界徼外贡输金坐失奸臣意谁明报国心一棺忠勇骨漂泊瘴烟深

斛律丞相

君臣日荒宴歌舞讳言愁老相犹当国强邻不敢谋谣言虽未出奸谤已先流谁察忠臣意通宵抱膝忧

遣兴

京洛红尘里闭门常独居虽无守道愧终与趣时疎文举徒飞表曹丘懒挟书谁怜从宦久不

及策名初待兔谋真拙屠龙艺亦虚何当治归计松菊绕吾庐

阍吏

弊车羸马犯尘泥愁到朱门徧徧辞相国舍人难骤见将军马监岂相知因循岁月劳何补颠倒风埃辱固宜惆怅东冈旧陂在素心空负白云期

山家

林下脱双履牕边挂幅巾闲堂风掩户断岭月窥人

风

陇首红旗急罽前翠幕重林端翻远刹花外转疎钟夜寂清机发春阑别意浓如何玉琴韵并欲在青松

金山寺

香刹冠嵯峨松门络薜萝风清尘不到岸阔鸟难过欲雨江声怒新晴海气多行舟未摇棹回望隔烟波

出塞

边草荒无路星河秋夜明卷旗遮远塞歇马受降城霜重征衣薄风高战鼓鸣将军功未厌士卒不须生

古松

摧颓岩壑间磊落得天顽香叶低淅水余根倒挂山白猿窥子落黄鹤认巢还不久应为石莓苔旧已斑斑

故绛城

文公恢霸略征讨辅周衰奕世为盟主诸侯听会期山河表里在朝市古今移欲访鹿祁处乡人亦不知

塞上四首

节物正防秋关山落叶稠霜风壮金鼓雾气湿旌裘未得西羌灭终为大汉羞慙非班定远弃

笔取封侯鸿鴈秋先到牛羊夕未还旌旗遥背水亭堠远依山落日衔西塞陰烟澹北关何时
献戎捷鞍甲一朝闲瀚海秋风至萧萧木叶飞如何逢汉使犹未寄征衣不叹千里远难甘一
信稀年年沙漠鴈随意得南归劒客苍鷹队将军白虎牙分兵逻闥水纵骑猎鸣沙浪有书藏
袖难凭信达家不堪闻晓角吹尽落梅花

黄柑

黄金缀缥蒂摇落楚江涯采助杯盘胜羞将橘柚偕时移香不变物远味尤佳欲种沧洲树何
年此意谐

晋阳三月未有春色

天心均煦妪物态异芬芳上国花应烂边城柳未黄清明空改火元已漫浮觴仍说秋寒早年
年八月霜

柳溪对雪

春风不胜雪散漫度龙沙密映缘谿柳争飞乱眼花鸱夷賒美酒油壁系轻车塞下芳菲晚聊
将当物华

酪羹

军厨重羊酪飧土旧风传不数紫萁滑徒夸素鲔鲜 蠡烦捫取勺药助烹?莫与吴儿说还令
笑茂先

奉同道矩谢始平公惠砚

爵台今已倾飘瓦出芜城还入缣绡用尤资笔墨精相君怜古物内史擅书名聊用飞军檄何
愁楯鼻平

陪始平公燕柳谿

谿光不动柳风轻玉帐森沈拥万兵鸥入烟中闲自舞鱼翻波面喜相迎楼船下视晴天碧鼓
吹前驱远陌清桃李归时应盛发薰然和气满春城

到并州已复数月率尔成诗

忽忽此何地经时更自猜深疑醉里得复似梦中来薄宦真何益浮生信可咍鹏蜩定有分不
若寸心灰和道矩送客汾西村舍杏花盛开置酒其下

田家繁杏压枝红远胜桃夭与李穰何事偏宜闲处植无端复向别时逢林间暂系黄金勒花下聊飞码碯锤会待重来醉嘉树只愁风雨不相容

北轩老杏其大十围春色向晚止开一花予悯其憔悴作诗嘲之

春木争秀发嗟君独不材须慙一花少强逐衆芳开顽艶人谁采微香蝶不来直为无用物空尔费栽培

杏解嘲

造物本非我荣枯那足言但余良干在何必艶花繁壮丽华林苑欢娛梓泽园芳菲如可采岂得侍君轩

寄陕西提刑江学士

明主矜庶狱选才从本朝鄮侯三尺律汉使一封轺郡国清名满关河古意饶凄凉乘障客华髮日萧萧

从始平公城西大閱

沧溟浴日照春台组练光中玉帟开汾水腾凌金鼓震西山宛转旆旌回逍遥静散晴空雨叱咤横飞迴野雷坐镇四夷真汉相武侯空复道英才

陪诸君北园乐饮

浩歌纵饮任天机莫使欢娛与性违玉枕醉人从独卧金羈倦客听先归须知会府闲时少况复边城乐事稀花卉正浓风日好今年已不负春晖

和道矩红梨花二首

繁枝细叶互低昂香敌酴醾艶海棠应为穷边太寥落并将春色付穠芳

蜀江新锦濯朝阳楚国纖腰傅薄粧何事白花零落早同时不改鬪芬芳

和懋贤闻道矩小园置酒助以酒果副之以诗

芙蓉幕下惜余闲不使芳华取次残珍果醇醪与新句并将佳味助清欢

数日不至後圃今晚偶来芳物都尽率然成诗

烂漫不解赏飘零空惨凄残红正满地不忍踏芳蹊和乐道自河外南辕过宜芳雨晴和气景物可爱马上偶成

京洛春应老河边初解颜碧浮烟际草翠滴雨余山日极褰帷外诗成揽辔间满川桃李色共喜传车还

夏日

穷边已深夏气色耿清秋鲜旭开山郭凉烟澹戍楼兜铃烽火息区脱虏尘收迨此军中暇无妨文雅游

晨发故关寄逢吉

画戟衣中趋绦帐驿亭门外拂征鞍已嗟漂泊三年别更负从容十日欢煖席未穷谈笑乐陟冈相望滞留难扬鞭策马几多意原上秋风作晓寒

中秋夜始平公命与考校诸君置酒赋诗

月华秋色雨鲜新万里澄空不受尘兔濯素毛腾浩露桂飘香实下飞轮光侵酒面寒无力清入诗豪健有神坐客何须辞醉倒相君应不惜车茵

病酒呈晋州李八丈

身如五岭炎蒸里心似三江高浪中谁道醉乡风土好舟车常愿不相通

和李八丈小雪同会有怀邻几

天禄淹回德齿尊暂留汾曲两朱幡闲轩坐啸正飞雪同舍倦游来及门空叹高歌如郢客愧无佳赋似文园坐中犹欠邻几在深负棊枰与酒樽

三月晦日登丰州故城

春尽芜城天一涯白榆生荚柳生花满川战骨知谁罪深属来人戒覆车

寄聂之美【之美时监韶州钱监】

去岁双毛白今春一齿零人生浮似叶客宦泛如萍塞上貂裘弊天涯海气腥何当占箕颍萧散并柴扃

又寄

心目悠悠逐去鸿别来容易四秋风莫嗟密密书连纸万里经年信一通

和钱学士【公辅字君倚】呈邵兴宗

霜露苍苍宰树高累茵列鼎重鸿毛兼葭自幸犹依玉骕骝何能学奏刀才薄无由裨覆焘命奇不得报劬劳【光仕始周岁二亲继丧】平生念此心先乱蓼蓼难分莠与蒿

晓思

束带朝尚早蓬门未脱扃短篱潜落月老树带孤星隐几貂裘黑开编竹简青子云非执戟何以得穷经钱君倚示诗有归吴之兴为诗三十二韵以赠

吴越为君土崑函是我家濯纓从吏事倾盖聚京华奕世交朋重【二先君景德二年同年进士】同僚分谊加【光与君倚崇文吏部开封皆同官】声光尝耳剽臭味辱肩差选士参县石烝髦应掾置帝畿围日月蓬堵积烟霞咨访倾肝胆推褒借齿牙後來慙瓦砾旁倚愧兼葭谈论寥天一诙谐老柏槎虚舟坦莫逆璞玉莹无瑕信美陪游衍胡为起咄嗟劳歌尽乡思旅梦各天涯诚厌簪绅累难堪狱讼譁觚箒朝插蝟贯索暮如麻霰霏沾朝服蜩螗沸尹衙宿奸牢窟宅弊俗费鞭撻魑鱗思吹絮【吴中食魑鱼鱗以杨花为候】羊羹忆卧沙【关中美羊有卧沙细肋】梅林连雨熟梨味得霜佳秋色城临水春风路入花稻肥初断蟹【断蟹事见笠泽丛书】桑密不通鵀【秦人谓桑密有鵀飞不过之语】蹙衄浮盘芡鉤联卧瓠瓜江蓴半卷叶石蕨乍舒芽风物随乡乐山川苦道遐若人才有裕修己德无邪正恐临骕骝安能舍鎔錡怒飞期寢逼肥遯迹犹賒不比沟中木微同井底蛙果能真引去谁复强邀遮旋结蜗牛舍还乘下泽车闭门常反拒醉帻任欹斜林野游如鹿泥涂蛰似蛇故人时记忆阳羨致新茶

喜张圣民得登州

尽日少闲暇中宵梦亦劳符移空浩浩榜楚镇警警敢说今求郡飜思昔坐曹美君乘五马东去一何高诗寄云夫处士老兄兼呈知府待制八丈

一鶚曾飞奏中林下鹤书今乘使君马重到逸人居松竹过从久閭閻惠爱余只应棠树影比旧更扶疎

和任屯田【迥字元道】感旧叙怀

结交英俊乐如何风谊敦明寄咏歌自致青云今有几化为异物已居多棣中本自沽良价毫末安能滑至和邻笛不堪频叹息酒炉那得重经过年华易度髡尘影人事难期海水波贤业着鞭犹可在况君壮齿未蹉跎

次韵和冲卿中秋朧月

岂无锦幄翠帘垂
匝树明灯正赫曦
共惜月华方满夜
更当秋色中分时
乌皮几稳风侵鬓
白玉楼高冷透肌
千里浮云何处断
北来试问鴈应知

次韵和邻几秋雨十六韵

气象殊朝夕
兴居错晦明
混元初不宰
霖雨浩无程
蛰隘宁天意
咨嗟固物情
嗟方有望
荟蔚已随生
杲杲升还隐
凄凄断复行
乱莎长被径
荒藓绿缘甍
辙迹康庄絕
潢污壠亩平
茅茨不足庇
禾黍若为成
蟋蟀颓墙泣
蚍蜉坏竈盈
乘时衆鷗舞
得意怒蛙鸣
牛马谁分异
萧兰已混并
闲犹叵度负
重况遐征
舟泊川无渚
轮摧路有阻
輶愁病妇
炀竈拥寒婴
灾不妨明德
神应格至诚
淳光终下烛
时藿久心倾

和始平公郡斋偶书二首

文武从容两有余
公槐将幕往来居
已安四海如三杰
欲散千金比二疏
今日监边亲跪轂
佗年入殿赐乘车
武侯暂为苍生起
长忆隆中卧旧庐

平安候火出云间
区脱无尘刁斗闲
汉相威声遥制敌
胡兵远迹夜开关
赤松雅意思轻举
黄阁羣心望复还
玉帐牙旗空壮观
谢公高兴在东山

春猎

小苑微寒春鴈飞
石关宫外草萋萋
汉家旌旆连围合
秦国山川入望低
花色才临珠缀发
柳陰欲傍金堤齐
韩嫣承恩来视兽
飞尘遥出建章西

柳枝词十三首

烟满上林春未归
三三两两雪花飞
柳条别得东皇意
映堤拂水已依依

依依高树出宫墙
摇曳青丝百尺长
愿与宣温万年树
年年岁岁奉君王

君王游豫赏青春
折柳为觥赐侍臣
莫怪长条低拂地
只缘供扫属车尘

属车隐隐远如雷
陈后愁眉久不开
杨花都不知人意
故入长门宫里来

长门宫晓未成粧
结雨萦风蔽琐牕
莫令透入华梁鵲
那堪负汝更双双

双双春鵲扬云霄
楚国宫深乐事饶
会待急管繁弦际
试取纖条并舞腰

舞腰缤纷长乐东柳间帐饮送春风请君试望邯郸道青门袅袅彻新丰
新丰道上灞陵头又送夫君去远游借问柳枝能寄否古今共有几多愁
多愁尤是别离深折条相赠各沾襟留住不住居人意欲去未去行人心
行人白马去遥遥初上金堤欲过桥望尘不见遮人眼苦怨无情万万条
五柳先生门乍开宅边植杖久徘徊陌头遥认颜光禄诘旦先乘瘦马来
白雪虽然比絮花艷阳不得共繁华为君故入乌衣巷飞舞风流谢傅家
宣阳门前三月初家家杨柳绿藏乌欢似白花飘荡去忍能弃掷博山炉

上郡南三十里有相思亭在太山之麓二水所交平臯之上往来者徒习其名莫详其义庆历
甲申岁余适延安过於其下于时夏虏梗边征戍未息窃感东山采薇之义叙其情而愍其劳
因作五诗庶几不违周公之指且以释亭之名尔【庆历四年作】

岭上双流水犹知会合时行人过於此那得不相思偃蹇登修阪高侵云日间几人征戍客跋
马望家山寨上春寒在东风雪满须河阳机上妇知我苦辛无柳似妖饶舞花如烂漫粧那堪
陇头水呜咽断人肠空外游丝转飘扬似妾心别来今几日髣髴近雕陰友人楚孟德过余纵
言及神仙余谓之无孟德谓之有伊人也非诞妄者盖有以知之矣然余俗士终疑之故作游
仙曲五章以佐戏笑云

神仙谓无还似有秦汉可怜空白首会须一蹶青云梯与子同祛千古疑
仙术有无终未知眼看白髮乱如丝何时得接浮丘袂沧海横飞万余里
若士北游穷地角还食蛤蜊养龟殼卢敖尸骨不能飞今朝九垓何处期
仙家不似人间欢瑶浆琅菜青玉盘乘醉东游憩阳谷酒瓢闲挂扶桑木
桡师知子能操舟稳过茫茫沧海流白浪驾天千万里直令挂骨长鲸齿
武成致斋奉酬吴冲卿寺丞太学宿直见寄二首

广文更直太常斋咫尺无从尽素怀不及清风得随意夜深容易过天街
雪後余冰尚缀檐月华霜气入疎帘难堪琼玉惊心骨坐觉清寒几倍添

雪中寻友人不遇

拥袖犯风雪驱车行诣谁朱门不可入素友复难期依世诚多拙迷方忽自悲
徧心终寡合吾道易参差

河边晓望

高浪崩奔卷白沙悠悠极望入天涯谁能脱落尘中意乘兴东游坐石槎

早春寄东郡旧同僚

楼台带余雪寒色未全收久负入关意空为同舍羞清樽接胜友飞盖从贤侯
应恨春来晚烟林已数游

边将三首

红旗一簇聚山椒霁日清风看射雕脱?少年遥稽首汉家新将霍嫖姚

月白星稀霜气多卷旗束甲涉?河田家不觉官军度夜半只闻风雨过

横吹长笛千万骑将军塞北立功回边人争出孤城望渐见旌旗天外来

传家集卷七

卷八

钦定四库全书

传家集卷八 宋 司马光 撰律诗三

感兴寄聂之美

平生百无可强为一官縻世味偏予薄心期独子知林猿愁玉琐枥马患金羁年事今华髮求荣欲为谁

和江邻几金铃菊

何处见佳菊秋风汶水阳酒浮金铎细露泛蜜房香不谓红尘地相逢君子堂依然故人意不减旧芬芳

寄清逸魏处士

乡树三摇落临风歌式微徒嗟俗缘重端使素心违茅阁松杉冷山园药草肥不能如海鷺岁岁一西飞

赠清衍

我厌俗缘苦空为薄宦牵如师真达者於世亦超然敝笠冲尘陌寒云拥雪天崎岖远相顾深愧此心专

梦穉子

穷泉纖骨已成尘幽草闲花二十春昔日相逢犹是梦今宵梦里更非真

二月二十四日馆宿兴宗舍後桃花盛开偶书牖上

金马春寂寂穠桃随意开夕风零落尽不待主人来二月三十日与同舍宴李氏园晚归马上赋诗【归字】

门前蹀?金羁满坐上连翩玉笋飞数尺游丝留客醉一行垂柳送人归同邀胜友时难得重到名园花已稀莫惜芳辰?行乐无端风雨横相违

和宋次道西都元日怀不疑并见寄

露冕优分竹题舆佐画圻比年携手乐兹日赏心违斋祀春来并娱游别後稀谁怜从窆卒草际犯寒归

酬次道板桥晚望见寄

春来曾约醉河桥深负垂杨千万条今日都门相望处西风乱叶正萧萧

双井茶寄赠范景仁

春睡无端巧逐人驱诃不去苦相亲欲凭洪井真茶力试遣刀圭报谷神

正月二十四日夜雪

叠瓦浮轻雪参差粉画难苦欺初变柳故压未生兰夜色微分白春容不受寒即为花卉夺犹得暂供看

酬不疑雪中书怀见寄【校理邵必】

直道免三黜敢云羞小官盘餐红粟澁衣桁黑貂寒画府容身易侯门曲意难荆扉盈尺雪有客问袁安

答师道对雪见寄【直讲陈洙】

陰风一夕惊晓雪满都城气覆千家白光连万象清恋空飞不下弄态舞相萦历乱看无定飘飏转未成缀垣时缺剥压竹乍欹倾细隙过无滞寒?拂有声园林句结练观阁巧雕琼草木情先喜乾坤意亦荣营魂顿踈健病目慙虚明郢曲高谁和羞将叩缶并

苦雨

积雨欲侵旬朝晡漫不分苍凉微露日惨澹已生云地半成泥滓天应厌垢氛时闻度鶻鹄空外自为羣

酬师道雪夜见寄

玉树交横雪後天银河沈着斗栏干笔峯微结冰丝澁灯晕初成花烬残太学先生羶苦薄公车倦客履仍单欲吟佳句到清晓夜寂愁闻金石寒

昌言有咏石髮诗三章模写精楷殆难复加仆虽未睹兹物而已若识之久者辄复强为三诗以继其後非敢庶几肩差适足为前诗之舆台耳【校理石扬休】

万古风涛浸石岩老苔垂足细?髣传闻海底珠无数何事从来散不簪

金阙银城仙客居欲传消息问麻姑蓬莱无物堪为信剪寄苍龙一握须

琅菜来从若木边【西王母传有碧海之琅菜】非膏非沐绿宛延玉盘委积羞佳客不是陶家无馔钱

钱子高有徐浩诗碑石昌言借摹其文甫及数本石有微衅惧而归之子高答简有碎珊瑚之戏昌言以诗赠子高同舍皆和【司谏钱彦远】

徐公精笔老生神石刻犹能妙夺真几为通书翻丧宝愈令好事惜传人锋铍半折犹能健圭璧微瑕自足珍直使尽随如意碎石家玉树未全贫【昌言家图书所收最多】

又和雪霁

南宫来几时挟纊易春衣意谓花将晚何言雪尚飞夜声通旅枕晓色弄晴晖继日劳王事离鴈已归

又和二月五日夜风雪

春风正豪怒夜雪复飘扬勿使羈愁乱自知清兴长帘疎声淅沥灯冷晕微茫此夕牛衣客成名不可忘

喜范景仁直秘阁

延阁屹中天积书云汉连神宗重其选国士此为偏夫子岷嶓秀声名俊造先清标峻不极胜气驶无前待价犹怀璧临岐首着鞭介推不求显张季久方迂玉檻钩陈上丹梯北斗边帝容瞻日角【阁有太宗圣容】宸翰照星躔职秩曾无贵光华在得贤公卿殊未晚尚少买臣年

和伯镇再入馆

甘泉献赋人流落浙江滨自叹三年谪归来万事新铨衡时进对户牖日相亲明主方思贾非徒问鬼神

双竹诗

上苑通丹禁修林绕玉堂周阿纤镂槛并?擢新篁萧洒骈瑶瓮连翩拂璧璫虬腾双角直鲸喷
两须长晓泊烟华重晴留雨气凉分音成律吕齐秀待鸾凰碧借云霞润清依日月光物情知
有谓天造固无方比节羣诚合虚心至道彰吾君愈勤德不敢有嘉祥

秦人

楚旗猎猎盖山红回首咸阳一炬空惆怅秦人虚用意几年辛苦得山东

山头春色

天意欲回煦羣生稍郁蒸平田犹未徧絶岭独先升翠色添崖柏寒声折涧冰谁为物外友挈
手共同登

和子渊除夜

缙室重飞玉琯灰物华全与斗杓回依依残腊无情别历历新春满眼来强取酒卮浮翠柏懒
开粽叶覓杨梅男儿努力平生志肯使功名落草莱

和子渊元夕

神岳嵯峨阙角齐银蟾无影玉绳低风传丝管交加发灯滉星河上下迷清醴横飞金凿落香
尘不染锦鄣泥谁知此夕斋祠客近在宫城槐柳西

冬夜

冬夜何其永寒光四沆寥鴈横星历历人静漏迢迢破屋霜应重荒庭雪未消不眠何所念达
晓思无寥

答刘遵父谢龐公惠炭

东郭先生履半穿御冬深愧主人贤应怜道上雪欲积意使炉中灰复然麴蘖暗添寒酒力图
书共免湿薪烟茅斋斗似饶光彩客至何忧腊後天

兴宗许菊久之未得【邵亢】

菊栽许送定如何庭下不堪秋草多九日无花更无酒便携藜杖直相过

得菊栽并诗

黄花小堦和烟斲野兴萧萧已相逐同来更得兼诗句久立看诗忘栽菊

和同舍对菊无酒

黄花倚秋色晬晬为谁开更使窥残榼空令洗旧杯嗅香行缭绕捻蕊立徘徊尽日柴门外白衣来不来

聂之美访及不获展奉以诗为谢

昔君来阙下定馆必吾庐今者虽相值依然是索居【之美馆於僧舍】不堪休沐少便使往还疎深愧原思巷空回长者车

苏门先生

长啸苏门石行藏世莫知逍遥心迹远寂寞姓名谁郷在无何有时方不可为麒麟本神物安得系而羈

和冲卿喜雨偶成

万里风随快雨来尘昏消伏旱光开物情濯热参差喜天意为仁容易回帘映薄寒灯有晕牕含虚白麝成煤君侯雅有江湖兴萧洒何须气象催

寄赠致仕刘都官【讽张元常云讽年六十二致仕夫妇皆徙居简州赖山中有二子皆有官其一登进士第诸孙皆好书】

星郎年未至辞禄一何高目莹栖灵气眉疎出秀毫胷中自有乐身外尽徒劳回首红尘地纷纷笑我曹解绂沱江外诛茅井络边老莱夫妇隐韦孟子孙贤浮蚁邀旁舍蹲鸱种薄田不须亲几杖想望已萧然【范景仁诗云移家尚恐青云浅隐几唯知白日长朱公绰诗云疏草焚来应见史橐金散尽只留书】

和吴省副【中复字仲庶】梅花半开招凭由张司封饮【伯玉字公达】

帝乡春色岭头梅高压年华犯雪开正与嘉宾思共醉不须芳物重相催从车贮酒传呼出侧弁簪花倒载回风雨难期王事剧未知休沐几旬来

依韵和仲庶省壁画山水

画工执笔已心游稍稍衡皋引杜洲堆案烦文犹倦暑满轩新意忽惊秋天生贤者非无谓官遇明时未易休正恐怒飞朝暮事丹青难得久淹留

太博同年叶兄【纒】以诗及建茶为贐家有蜀牋二轴辄敢系诗二章献於左右亦投桃报李之意也

闽山草木未全春破蘂真茶采撷新雅意不忘同臭味先分畴昔桂堂人

西来万里浣花牋舒卷云霞照手鲜书笥久藏无可称愿投诗客助新编

秋夕不寐呈谏长乐道龙图

雨气生烟晕霜寒入漏声踈篱过萤影腐叶掩虫鸣丘壑违初愿簪裾徇外荣丹心终夜苦白髮诘朝生恩与乾坤大身如草木轻何阶见明主垂拱视升平

始平公以光得免使北赐之以诗谨依韵酬和

皇华将命得人难专对非才辄自言幸免驱车涉沙漠尚容载笔侍宣温不唯羞屈穹庐膝无奈常游魏阙?袞职区区未能补何时余论奉清樽

孟尝

冠盖盈门意气豪海鱼兼雨未充庖归来散尽三千客方悟时人市道交

喜李侍郎东之得西京留台

贱子何为者栖栖今二毛沧波浮片叶大块载秋毫利物物何补营身身已劳美君遗世网脱屣一何高

始平公新作双樗庵命光为诗

间气生王佐多才秉国钧栋隆凭杞梓节劲仰松筠底绩承平业遗荣寿考身结庐依散木退让乐天真忝职谏垣日负忧畏?思云夫处士老兄萧然物外何乐如之因成浮槎诗寄献以抒鄙怀

秋水浮槎客漂如一叶轻鸥羣须?信鲸口几忘生耿耿天津濶滔滔海浪惊何时还故土怀糒问君平

奉和何济川代书三十韵寄诸同舍

金马延羣?芸香聚衆书杳疑神境絶深与世尘踈气逼烟霄爽光分日月余不材叨误选故友幸联居云盖森胡骑天阍谨契鱼後先陪贾马左右揖严徐朱阁霜清外璇题日上初辞林精

采撷艺圃纵游渔决胜楸枰暝穷欢绮席舒朝昏升紫闥咫尺待雕舆玉垒俄乡思铜符忽诏除彩衣承几杖华毂照园庐四郭柑垂?千塍稻散渠壶浆迎露冕铙吹拥高旂有德能仁虎无欺耻怒狙道途繁揖让犴狱絶沦胥滞穗栖场圃鸣桴静里闾贫宁费官烛饥不茹家蔬翁子怀青绶文园驾赤车古今相与校胜负定何如上正开宣室人方诵子虚追锋行入谒委佩复传胪抚已聊曦骥临民遽起予居然耗廩禄岂不愧簪裾鵷翼顔何厚锥囊意未摅因循恋糠粃汨没老涂淤自顾徒为尔诚非益者欤俄承吕公檄遂策阮生驴驿骑传巴徼诗筒达鲁墟琳琅固无价燕石敢沾诸

和始平公贻一二宾僚

儒冠蔼蔼从平津东合由来盛衆宾终始何尝忘教育高卑曾不间疎亲共陪樽俎无虚日空喜谿山得主人白雪屡歌殊未和自知羞愧後车尘

留客

酒烟漠漠自生春舞袖飘飏拍拍新须信客归丝竹散清风白月解愁人

和始平公长句寄汉州何学士

势交倏忽易萧条赖有伊人尚建标须信松筠凌雪茂肯为蒲柳望秋凋钦贤高馆三年别广汉专城百舍遥书纸如云诗叩玉数凭疾翼度青霄

何济川有书见贻云以亲老须守远郡以便禄养不得如光在主人幕下因以诗答

千骑駉駉簇画輶高旌大盖五骅骝斋中酒美连翩醉湖上花繁烂漫游鸡犬相闻通故里旨甘不絶奉晨羞只应朝夕平津合得向君前立胜筹

二月十一日与一二僚友游叔礼园亭以诗戏呈

下马久徘徊林芳殊未开春风真有意须待主翁来十四日小园置茶招宗圣应之皆辞以醉为诗赠之

草树弄春晖家家倒载归谁怜独醒客日暝掩双扉

同僚有独游东游者小诗寄之三首

车马东城路芬芳数里尘风光不相待愁杀未游人咫尺东园乐无如簿领何春风连夜恶闻道落花多城楼传晚鼓稍稍讼庭稀起拂衣中土还骑款段归

小诗招僚友晚游後园二首

五陵年少竞春晖肥马银鞍白玉羈何似松间煮新茗更来花底覆残棋

麦田小雨陇微青草树欣欣照晚晴花下客来醒亦好犹胜闭户过清明

小园晚饮【赋得春字】

公府丰暇豫真成弃掷春招邀俱胜友烂漫醉芳辰花艷穠无敌文锋健有神犹胜拥朱墨终日坐埃尘

李花【得韵同前】

嘉李繁相倚园林淡泊春齐纨剪衣薄吴紵下机新色与晴光乱香和露气匀望中皆玉树环堵不为贫

东牕

临风梳短髮萧飒晚凉新不识市朝客何如江海人沈吟凭几欹侧带纱巾浊事无尽东牕聊放神

奉和始平公酬大资政吴侍郎

道盛经纶业文高翰墨场雍容偃藩地密迩钓璜乡回首红尘远清心白日长山形抱城堞谿影照公堂 棹千塍碧芙蕖万顷香跨波横略约逼地亚簔簞大埜禾麻溢高斋几席凉夔龙屡赓唱东壁正垂光

晚行後园见菊戏宜甫

野菊荒无数班班初见花径须求一醉试遣问东家

野菊

野菊未尝种秋花何处来羞随衆草没故犯早霜开寒蝶舞不去夜蛩吟更哀幽人自移席小摘泛青杯

秋夜

城上调秋角烟间发暝钟风枝摇宿鸟霜草覆寒蛩久负观书乐端愁束带恭慙因羣吏散还

得遂幽慵

再呈宜甫

西家壶已倒次第向东邻朱户如坚闭黄花恶笑人宜甫家有金铃菊客未之识因代菊赠宜甫

主人倦邀客寂寞委苍苔此日开无益明年不复开

深夜

疎星映户月流天羣动收声四寂然嗟尔寒蛩怨何事悲吟彻曙亦无眠

奉和始平公喜闻昌言修注

凤口除书下九阍簪绅拭目仰殊恩晓提麟笔依华盖日就螭?记圣言桃李新陰方蔼蔼骅骝老志更轩轩主人喜见相如达趣召邹枚洗玉樽【光与昌言俱出始平公门下昌言时年五十】

秋雨萧条闻宗圣案伎应之饮酒诗呈宜甫

寒风细雨未晴天密似轻尘薄似烟一室独吟图史乱四邻高会绮罗鲜鴈飞斜柱弦随指蟹荐新螯酒满船自笑不歌仍不饮昏昏只解枕牀眠

宜甫东楼晚饮

宾主俱欢醉高楼迴倚空形忘羈检外酒散笑谈中晚市烟初白秋园叶半红登临不厌数朝夕是寒风昌言谪官符离有病鹤折翼舟载以行及还修注始平公以诗问之命光同赋二首

曾下青田啄玉苗泥沙病羽久萧条谪仙不欲留尘世依旧提携上碧霄

相合书传紫闕深破緘先问九臯禽不令一物伤天理仁爱方知真宰心

和聂之美重游东郡二首

跃马津亭未几何宦游容易十年过飘飄空似随流梗寂寞犹为挂壁梭西岭应余当日翠南湖真减几分波【之美云南浦比旧水涸过半】输君尚得飞征盖重向春园听旧歌南湖重过正逢春官柳虽疎亦解新台榭倾欹宾友散临风愁杀独游人

大热

山泽欲焦枯炎光满太虚不知天地外暑气复何如

夷齐

夷齐双骨已成尘独有清名日日新饿死沟中人不识可怜今古几何人

龙女祠後塘自生荷花数枝与史诚之更相酬和七首

平湖漠漠芰荷稠水国芳春不胜秋空有棹歌人不语晚风一曲去悠悠

越女行歌纵棹轻苍茫别浦晚烟凝荷花折尽不归去潏潏扁舟不易胜

荷底清涟照绮罗长安公子旧情多踟躇不去知君意重唱吴音白紵歌

贺监家居逸兴饶枝分监水阔容舸穿荷宜去邀渔叟共醉船头半榼醪

清江向晚采莲稀独倚兰舟久未归目断可堪人不语斜风细雨湿罗衣

素舸朱篷青竹篙棹歌风散近还遥斜阳借问归何处家住水村郎姓萧

别殿无人梨自芳玉阶朱槛绕金塘馆娃寂寞无西子羞与吴宫竞晓粧

赠楚法曹叔度

夫君能直节不耻杨曹轻道果因时屈官无当已荣松杉虽偃蹇霜霰苦峥嵘会有良工识终
观大器成

寄扬州侯都监仲伦

木落淮南树秋风日夜高月临扬子渡雪卷广陵涛不得同萧散何因破郁陶空凭尺书速未
解梦魂劳

感怀

昨日春冰破水边今朝腊雪坠风前岁华过目疾飞鸟壮志如何不着鞭

之美举进士寓京师此诗寄之

结髮声华盛无疑屈未伸何妨久垂翅从此欲惊人鹰击天风壮鹏飞海浪春行当解故褐不惜化京尘风雨数日不见叔度晚约公明共诣之二首

云雪连朝闇朋从叹坐违临文与谁共开卷为君稀趣扫六花散聊通一径微当携兔园赋同映读书帙南荣卮酒罢君返道东居坐作三朝别杳疑千里余闲门嗟雀网深泞怯柴车向晚开帘喜彤云稍觉疎

赠吴之才

胜冠自立艰难里大器由来贵晚成松柏傥非生磊落岩崖何易出峥嵘苏秦游困羞妻嫂主父居贫厌弟兄六印佗年拥车骑会须重过洛阳城

寒食许昌道中寄幕府诸君

原上烟芜淡复浓寂寥佳节思无穷竹林近水半边绿桃树连村一片红尽日解鞍山店雨晚天回首酒旗风遥知幕府清明饮应笑驱驰羈旅中

和叔度独登天台水亭

郊外灵潭阔新亭占曲堤戏鱼迎坠絮惊雉出荒蹊绿倒杨梢乱光翻芰叶齐雨余纖月偃野迴断云低水气常喷薄天风助惨凄何知尘外境近在郡楼西

喜孙器之来自共城

取友不无人爱君天性真远寻穷巷宅未拂满衣尘主礼贫尤重交情别更亲谁家酿醇酒尽醉准衣巾

和聂之美鴈

汲汲复栖栖往来谁与期映云才可见入雾杳难追羈枕梦初断寒闺涕已危冥冥远繒缴愧尔独知时

送王太祝豫知伊阙

百里驩迎新令贤儒经吏术尽家传天开岭阜竦双阙地杂桑麻隘一川锦雉驯飞春陌上雪鳬高去夕岚边长才久屈君无限所惜斯民受赐偏

传家集卷八

卷九

<集部,别集类,北宋建隆至靖康,传家集>

钦定四库全书

传家集卷九 宋 司马光 撰律诗四

和何济川汉州西湖杂咏十七首

清风台

太守金闺客天朝应对才非因板舆恋宁驾使车来水监秋毫尽霜锋错节开清风偏千里不独此高台

伫月亭

灯火动鱼矶湖边过鸟稀孤蟾久未上五马不成归长啸风生座高吟露满衣闲情无日厌岸帻对清晖

药圃

三蜀膏腴地偏於药物宜小畦千种聚春雨一番滋山相慙多识桐君未偏知佗年似胡广养寿复扶衰

竹坞

二何迹相继竹坞日陰森【济川诗注云前守何修撰不伐西湖竹予亦遵之】欲识养民意先观爱物心低垂樽俎冷密映管弦深勿恠湖光少年来碧影侵

射棚

叠鼓花前急红旗竹外高惊飈分白羽余响振乌号壮观倾春陌讙声涌夜涛因兹刑礼俗岂独事游遨

玉徽亭

房公昔漂泊置酒此鸣琴人事有忧乐山光无古今风流俱寂寞结构尚萧森松竹含虚?犹疑弦上音

书楼

使君有书癖记览浩无涯况此孤楼迥端无外物譁横肱欹曲几搔首落乌纱此趣人谁识长吟牕日斜

朔会堂

朔旦集俺吏兹堂簪组繁舞空孤鹤下映日两鳬翻花散东方骑萍浮北海樽须知太守贵饶吹引朱轮

浮觴亭

曲水华榭下浮觴去复还浪摇花影碎日射酒缸殷灭没遥寻客徘徊怯度湾穷欢不知醉清泚照心顏

清燕亭

波澄?羣木永日湛清华碧筱静秋色白苹低晚花松声工醒酒泉味最便茶外事付丞掾无妨风景嘉

流芳桥

桥下流芳度余春日夕催呼人洗樽俎招客藉莓苔倚柱时流滞随波乍往回仙家如不近安得此花来

晓景亭

帘栊分晓色远树子规啼浓露侵衣冷晴烟压水低神游灵境健身入画图迷衙吏无烦报河洲鹭正栖

假山

广汉土平远已嫌丘壑踈呼工刻岩洞应手出庭除缥缈神仙宅嵌空虎豹居人功与天力秀絕两何如

探花桥

桥边春意近五马屡徘徊湖水旦暮绿林花早晚开?因尝酒到又为赋诗来借问双华表经过日几回

乐轩

繁弦凝绿水叠鼓掺渔阳风结舞初急尘飞歌正长鳧鹭争上下栋宇为低昂太守且安坐新声未遽央

坐船

使君张皂盖高宴碧湖心苒蒻牵菱蔓夷犹泊柳阴晚风侵坐冷春浪没篙深倒载归何晚波间夕照沈

枇杷洲

周官歛珍味【场人掌国之场圃而树之果蓏珍异之物以时歛而藏之郑康成曰珍异蒲桃枇杷之属】汉苑结芳根【初修上林苑羣臣远方各献名果异树有枇杷十株】何意荒洲上犹余嘉树存犯寒花已发迎暑实尤繁愿逐蒲萄使离宫奉至尊

寓泊郑圃寄献昌言舍人

旅食缁衣馆飘蓬恍自迷树横寒雾远山隐古原低愁暮空庭雀惊晨别墅鸡故人在依约玉绳西

奉和始平公忆东平二首

相印东临汶水阳两看春叶与秋霜登山置酒延邹湛上马回鞭问葛强溪竹低垂寒滴翠露荷相倚净交香宵衣深念长城固肯得从容傲醉乡

千?秀色拥晴川万顷陂光上下天委地鱼盐随处市蔽空桑柘不容田讼庭虚静官曹乐儒服宽长邑里贤不为从知方负羽独乘鱼艇老风烟

和运使舍人北园餞别行憇三交僧舍冒雪宿百井关见寄

骊驹北上雪孱颜?矢前驱度汉关僧室松杉清照眼驿亭烟火迴依山马衔边草枯犹瘦鴈怯胡云冷未还贱子不须回首问鬓毛萧飒簿书间

又和留题定襄驿

按节羊肠阪褰帷并塞州仁风熙爱日清德凛高秋甘泽随征盖华星近戍楼佗年叱驭事直
笔寄歆彪

又寄献

承明共直庐瞬息八年余幸托屏星驾前迎使者车迹虽殊贵贱心不置亲踈青眼披情素犹
如相见初

自嘲

英名愧终贾高节谢巢由直取云山笑空为簪组羞浮沈乖俗好隐显拙身谋惆怅临清监霜
毛不待秋

读颢公清风集四首

伊臯垂训皆王度周召陈诗尽国风非独立言方不朽相君功业自无穷

人生百岁隙中光唯有高名久不忘千古但令编简在清风养物一何长

佳城鬱鬱閟英灵幸有文章见典型开卷未终双袖湿目前髣髴对渊庭

一言华袞足为荣况托文编久愈明邹湛不逢羊叔子世间何处复知名【公集有遗光诗数
章】

赠狄节推【国宾梁公之孙】

天马云孙在终然骨相奇泥涂辱虽久霜雪志难移白髮无嗟老青衫莫厌卑为山已九仞高
节肯中衰

感春

积草满春庭衡门永昼扃波头何事白柳眼为谁青荣落浮云度悲欢熟醉醒繁华非我物随
意任飘零

不寐

四远寂然羣动收只余严鼓度坊楼无由更续三更梦何处飞来一点愁

鸡

羽短笼深不得飞久留宁为稻粱肥胶胶风雨鸣何苦满室高眠正掩扉

皇佑二年谒告归乡里至治平二年方得 来怆然感怀诗以纪事

十六载重归顺涂歌式微青松弊庐在白首故人稀外饰服章改流光顔貌非巫咸旧山色相见尚依依辞坟【嘉佑元年通判并州因公事至绛私归拜坟不敢至夏县而去於今十年矣】

十年一展墓旬浹复东旋岂负襁褓爱横遭章绶纒更来知几日遗恨恐终天恸哭出松径悲风为飒然

谒三门禹祠

信矣禹功美独兼人鬼谋长山忽中断巨浸失横流迹与天地久民无鱼鼈忧谁能报盛德空尔荐醪羞鼯鼯青崖裂喧豗白浪豪客舟浮木叶生理脱鸿毛栢映孤峯短【水际孤峯甚细而高上有小栢耆旧相传不知几何年矣而止长尺余人莫测其理】铭书絶壁高【唐太宗刻铭砥柱之陰魏郑公撰字几盈尺残缺仅可读】河师不耕织容易戏风涛

游三门开化寺

山石古来色河流无尽声行船自往返羣木几枯荣狂象调难伏空华灭复生我来何所得聊此濯尘缨

三月十五日宿魏云夫山庄二首

先生嫌俗宾犹与故乡亲不惜烟霞地暂容纒鎖身林庐深有径鸡犬四无邻蔽蔽闇花堕苍苍古木春饭炊松粒细盘采蕨芽新静觉精神健闲知气味真谿泉冷毛髮山翠湿衣巾竹色消醒易林声破梦频客轮来去辙驿路古今尘明日空回首白云应笑人

闻道山家门镇开独驱瘦马出尘埃白云明月先无约何事今宵亦此来

留别逢吉

君念承明臭味稀相逢惜别重依依会稽太守方坐啸东郭先生还步归【严助朱买臣皆为会稽守东郭先生孝武时待诏公车】乐饮林塘留节物钱行里舍动光辉双旌回去行人发一带长皐烟雨微

陕城桃李零落已尽硤石山中今方盛开马上口占

西望飞花千树暗东来芳蕤一番新行人不惜泥涂倦喜见年光两处春

自澠至洛循穀水行百余里

已烦穀水远相送更得嵩峯遥见迎水碧峯青看未足却愁前到洛阳城

田横墓【在偃师西】

昔时南面并称孤今日还为绛灌徒忍死祇能添屈辱偷生不足爱须臾一朝从殉倾羣客千古生风激懦夫直使强顏臣汉帝韩彭未必免同诛

登平陆北山回瞰陕城奉寄李八丈学士使君二十二韵

汉家二千石体望向来尊况复严徐客从前益稷孙公侯贵不絕礼乐器长存符竹临分陕声光应列藩亲闱先契重【三司同僚】子舍近交敦【滑州同幕】柏塋依仁域棠陰接故园怀归聊露请予告入推恩荷祿烦强候停车下郡门帷廡纷大馆驺骑屈朱轡不以黎苗待还将臭味论森罗牢礼重灭裂俗仪烦霜霁威严息春生笑语温草微侵碧甃尘不染华轩日影摇云栋风?过玉樽落尘歌迴出激楚衷双翻雅戏象交局珍肴熊荐蹕河梁俄首路汾曲访吹埧举手辞双戟腾装改北辕乌飞城树晓鴈泊野芜暄耿耿清标阔涔涔宿酒昏百蟠紫阪道数里豁川原跋马风烟外依稀鼓吹喧

员村坂【其东八政水即古之傅岩有传说庙义东北虞城古虞公之国也】

穹谷鬱盘纒河濒陕北隅泉流涓不絕冈势俨相扶初旭纷高下空烟似有无石滩醒耳快峽树云孤天霁岚光合人稀草色苏牧儿歌自若樵子远相呼坏道傍连传空城右指虞穷岩今寂寞蔓草只荒芜野店寒餐澁山程瘦马瘠物华供兴趣亦是慰崎岖

顷为诸生常受经於钱文学赋於张丈今乃叨忝同为侍臣蒙钱丈置酒张丈赐诗愧悚之深言志为谢

畴昔胜冠日曾为绛帐生九言闻至教一顾得虚声不意叨严近於今接老成宁须诗酒赐侍坐已知荣次韵和韩子华寒食休沐与诸公同会赵令园暮归马上偶成

冠盖连翩陌上来风光烂漫拥楼台玉卮贮酒随宜饮绮席寻花触处开小雨前宵先拨火季春明日又吹灰须知胜集人间少惆怅金羈容易迴

景仁招游东园马上口占

适野自可爱况逢佳主人马穿官柳影衣拂帝城尘物外谁知乐樽前别有春年华已消歇历

历见松筠赠河中通判朱郎中【壽昌侍郎翼之子襁抱中母刘氏被出壽昌长而访之不能得熙宁中知广德军年五十三乃乞寻医身自访求得於同州为民党氏妻壽昌归奏授封邑壽昌扬州人以其母子孙俱在同州故折资通判河中】

陟岵今将老扶牀昔未行旨甘无所展朱紫不为荣里巷传呼入比邻失涕惊方知贯金石何以易精诚苏才翁子美有赠扶沟白鹤观黄道士诗纪于屋壁岁久漫灭今县宰周同年得完本於民间抵予求诗

潦倒黄冠无足论白头嗜酒住荒村狂名偶为留诗着陈迹仍因好事存金石锵洋虚殿寂龙蛇洒落古墙昏飞黄灭没浮云外疲马何能望骏奔

长垣道中作

极目王畿四坦然方舆如地盖如天始知恃险不如德去杀胜残已百年

再使河北

桑麦青青四月初皇华使者又脂车为臣岂得辞王事只向金銮坐读书

河北道中作三首

綠柳陰中白浪花河边日日暗风沙解鞍纵马悄无事隐几看书随处家

河势东回今几年浓陰满目尽桑田川原变化无终极一气不为常寂然

原上累累古冢高昔时意气尽贤豪断碑名姓已磨灭永日东风吹野蒿

夜发长垣

长涂暑气剧永日卧邮亭画伏如墙鼠宵行似野萤歇鞍沙月白拂面柳风醒历历瞻云汉谁为二使星和景仁琼林席上偶成【时康与禹玉景仁次道之子同时登科在席】

念昔琼林赐宴归彩衣綠绶正相宜将雏虽复慰心喜负米翻成触目悲殿角花犹红胜火樽前髮自白如丝桂林衰朽何须恨幸有新枝续旧枝

早朝书事

太白明如李东方三丈高晨光孤照阙雾气湿侵袍槐柳经霜惨骅骝得路豪素餐无小补俛仰愧金螯

登长安见山楼

到官今十日才得一朝闲岁晚愁云合登楼不见山和吴仲庶寄吴瑛比部安道之子壮年致政归隐蘄春

负米承亲愿已赊【遭母忧服除遂致仕】耻随鸡鹜啄泥沙一朝投绂真高士万卷藏书旧世家齿髮未衰非药物山林不返为云霞顰眉尚有郎潜者徇禄忧生直可嗟

别长安

暂来还复去梦里到长安可惜终南色临行仔细看

初到洛中书怀

三十余年西复东劳生薄宦等飞蓬所存旧业惟清白不负明君有朴忠早避喧烦真得策未逢危辱好收功太平触处农桑满赢取间阎鹤髮翁

和景仁题崇福宫

历历山头雪冷冷松下风樽中亦有酒恨不与君同不独山头白头人亦垂素积雪有时消青山色如故

早行

寒犬吠柴门荒鸡鸣远村河声空自急月影不曾浑木末星犹白榛中露已繁客心独惆怅四顾与谁言

酬终南阎谏议【询字议道】见寄

齿衰心力耗揣分乞西台微禄供多病闲官养不才弊庐容啸傲清洛伴归来故友犹相念寒光生死灰

寄成都吴龙图同年

照席烛花煖随车劔骑寒江山资秀句风月助清欢政简坤维静仁深井络安行歌与独酌岂得并闲官

花庵独坐

荒园才一亩意足已为多虽不居丘壑常如隐薜萝忘机林鸟下极目塞鸿过为问市朝客红尘深几何

秋夜

浮云一消散星斗粲长天浩露洒翠柏清香生白莲体凉犹衣葛耳静已无蝉坐久羣动息秋空唯寂然平日游园常策筇杖秋来发篋复出貂褥二物皆景仁所赐覩物思人斐然成诗

筇杖携已久貂褥展犹新渐染岷山雪拂除京国尘危扶醉归路稳称病来身赖此斋中物时如见故人

云

晴空碧於水那得片云飞映日成丹凤随风变白衣去来皆絶迹隐显两忘机天理谁能测终然何所归

闲来

闲来观万物在处可逍遥鱼为贪钩得蛾因赴火焦碧梧饥鸞鷺白粒饱鷓鴣带索谁家子行歌复采樵

赠邵尧夫

家虽在城阙萧瑟似荒郊远去名利窟自称安乐巢云归白石洞鹤立碧松梢得丧非吾事何须更解嘲花庵多牵牛清晨始开日出已瘁花虽甚美而不堪留赏

望远云凝岫粧余黛散钿缥囊承晓露翠盖拂秋烟向慕非葵比雕零在槿先才供少顷玩空废日高眠

花庵二首

谁谓花庵小才容三两人君看宾席上经月有凝尘谁谓花庵漏徒为见者嗤此中胜广厦人自不能知

和杨卿中秋月

秋气平分夜沈陰乍散天窥林初淡薄照席忽孤圆冷入诗毫健光浮醉弁偏嘉宾勿轻去桂影正娟娟

乐

吾心自有乐世俗岂能知不及老莱子多於荣啓期緼袍寬称体脱粟饱随宜乘兴辄独往?第任所之

和邵尧夫秋霁登石阁

飞檐危檻出林端王屋嵩丘咫尺间独爱高明游佛阁岂知忧喜满尘寰目穷莽苍纖毫尽身得逍遥万象闲暇日登临无厌数悲风残叶已珊珊【先生冬夏俱不出】

和河阳五宣徽【拱辰字君贶】九日平嵩阁宴集

九日英僚集千秋胜赏同飞桥贯河渚危阁压霜风金散黄花泛雷惊叠鼓通百峯高鸟外万里寸眸中檻底临丹叶杯中倒碧嵩来云低拂座去鴈远沈空吹?陪游阻摇旌结想丛风流免堙没邹湛倚羊公

和任开叔观福严院旧题名

墨踪尘淡鬓华新犹喜重来值故人二十二年如转目洛阳不改旧时春

柏梯寺

凿石开蹊踰登崖置阁危笑谈空谷应步武白云随衆壑如翻浪邻州若布棊何当遂栖隐身世两相遗

重过华下

昔辞莲幕去三十四炎凉旧物三峯雪新悲一镊霜云低秦野阔木落渭川长欲问当时事无人独叹伤

和李君锡惠书及诗勉以早归

书意勤渠诗意新清如白雪暖如春西游不尽谿山乐策马归来就故人

和君锡雪後招探春

莫嫌微雪压梅芽已有归鸿泊浦沙天上诏来难久驻直须早看洛阳花

又和早春夜雪

繁霰回夜雪淩乱落春云虚幌寒相袭华堂静不闻玉卮深可敌银烛近微分谁念牛衣客穷
经白髮纷

醉

厚於太古暖於春耳目无营见道真果使屈原知醉趣当年不作独醒人

雪寒取酒

雪意久未就寒云低不收飘扬插孤帟迢递映高楼试假贤人浊聊攻客子愁呼僮攜小榼更
準黑貂裘

留别东郡诸僚友

际日浮空涨海流虫沙龙蜃各优游津涯浩荡虽难测不见惊澜曾覆舟

白璧紫金为世宝贤愚知贵莫能名庙堂祭器杯盘物随处得之光彩生

楚国良金百鍊精深藏求售价连城岂徒丰狱吹毛利兼有秦台照胆明

祖帐飘扬堤柳边北来飞盖复连翩追随不忍轻言别迴首城楼没晚烟

空府同来贤大夫短亭门外即长涂不辞烂醉樽前倒明日此欢重得无

追和张学士从沂公游广固城

苍鹅集宋幕游鹿上燕台霸气山河尽王师江汉来重围经岁合严鎖夜深开废殿余沙砾颓
墙翳草莱清时间千岁良牧借三台狱市乘余暇芜城赋上才

去岁与东郡幕府诸君同游河亭望太行雪饮酒赋诗今冬罢归京邑怅然有怀

畴昔追清景狂吟忘苦寒河水塞津口山雪照林端健笔千篇富醇醪一醉欢困犹挥落麈尾
不顾归鞍多是光陰驶离羣会合难谁知尘满袖今日客长安

贡院中戏从元礼求酒【太常博士毕田】

顾我虚罍耻知君余沥多庭前有春雪如此薄寒何石昌言学士宰中牟日为诗见寄久未之
答今冬罢武成幕来京师此诗诗谢之【杨休】

昔年三月浪鳞翼化云雷竹箭流俱上芙蓉幕对开【扬休释褐昌言除同州推官光华州判官】潘泉扬沸渭泰华耸崔嵬捧檄容归省飞觴复屡陪【时先人知同州光以吏事时往省覲复得与昌言游】芬芳袭芝室嘉庆侍兰堦吴璧评残笔隋碑读渍苔【同州龙兴寺即隋文帝故宅寺有李德林撰碑国公吴道子书画或未就而止云以俟後之能者】清陰依玉树和气乐春台薄宦俄成别私门忽遇灾一朝捐彩服五载泣麤縗季路还从仕任安独见哀近畿须健令剧邑试长才过日全牛解迎锋巨枿摧雉留乘?伏蝗避境苗邇时得鸣琴暇仍飞丽句来正知荣篋笥无足报璿瑰紉鼓俄攀邓安车已召枚赋成平乐馆燕奉柏梁盃自顾诚弩缓于今尚草莱履穿羞路雪盖敝怯京埃傥借余光便炎风动死灰

昌言见督诗债戏呈絕句

学馁才贫杼轴劳踰年避债负诗豪倒囊不惜偿虚券未敌琼瑶旧价高

静夜

午夜空斋四悄然清寒透骨不成眠秋风故揭疎帘起正漏月华来枕前

春

红桃素李竞年华周偏长安万万家何事青青庭下柏东风吹尽亦无花

寄题陟岵寺

郑南峯下寺前轩反景分明见渭川为报十年容易别於今愁悴不如先

寄郑县史令千之【前君为白马尉廨舍前即南浦今西溪封内胜地也】

怜君比比得佳县胜槩闲情双有余为看西溪日沈後如何南浦月生初

长春宫柳远扶疎新树应多旧已枯蠹柱苔墙偏寄历古亭犹有杜诗无

闰正月十五日夜监直对月怀诸同舍【二首】

雾净金波溢天开碧幕空夜寒虽料峭春意自冲融熠熠枝上露翛翛竹杪风慙还林野兴不似畜樊笼澹泊春云散亘昂北斗横微分汉津鴈静识建章更浊酒怜虚爵高文忆友生前轩空不掩怅息负孤清

归鴈

亦知南国稻粱肥水满春江努力归闻道楚人增缴细平沙短草尽藏机

传家集卷九

卷十

钦定四库全书

传家集卷十 宋 司马光 撰律诗五

赠祖择之

人生荣与辱 百变似浮云 自有穷通定 徒劳得丧分 消愁唯有酒 娱意莫如文 方寸常萧散 其余何足云

和宋子才致仕後岁旦见赠

闲官逢献岁 拜揖亦纷然 须信家居日 方为已有年 劬劳中外徧 名迹始终全 伯玉空搔首 蹉跎愧在前

上元书怀

老去春无味 年年觉病添 酒因脾积断 灯为目阿嫌 势位非其好 纷华已久厌 唯余读书乐 暖日坐前檐

喜才元过洛小诗招饮

素髮各垂领 旧交相见稀 不唯春物好 况是锦衣归 洛社冻醪熟 【诗春酒冻醪也】 伊鲂^① 膾肥 【唐人谚曰洛鲤伊鲂贵於牛羊】 南轩已洒扫 命驾不须违

仲庶同年兄自成都移长安以诗寄贺

蚕丛龟印解 鶉野隼旟新 借问锦江乐 何如兴庆春 骊歌遮去辙 竹马望行尘 惠政如膏雨 遥知彼此均

西台诗二十四韵

翰苑昔陪侍 天光辱顾瞻 宠虽承涣汗 功不立毫纖 山鹿纓频顿 铅刀砺不銛 拭花眸子缺 捻雪领髭添 局影惭尸素 胡顏处禁严 辞盈虽免戾 取少讵因廉 定鼎分都异 张官执法兼 剡章愚恳尽 出綬茂恩沾 原宪非无粟 胡威尚有缣 求田近灋洛 买宅混闾阎 地僻宜花卉 儿勤付米盐 倦游良足悔 居吉不烦占 裘葛肤无见 困仓饭属餽 僧居闲可借 野步静无嫌 行乐筇枝

瘦延宾稻醴甜麦田泥试屐桑??低檐爱竹忙犹种贪书老未厌松烟溪石润檀炷博山尖
啓来慵拆衣冠脱怕拈紫毫斜倚架黄卷密垂籤涸辙犹蒙润寒灰免附炎所忧资秩满但愿
岁时淹自是散无用非为智养恬圣朝英彦富幸许一夫潜

和邵尧夫年老逢春

年老逢春春莫哈朱顔不肯似春田酒因多病无心醉花不解愁随意开荒径倦游从碧草空
庭慵扫自苍苔相逢谈笑犹能在坐待牵车陌上来

和范景仁谢寄西游行记二首

洛川秦野鬱相望风物山河旧帝乡涧底逢人问樵径松间系马宿僧房恨无同好携三雅共
讲前闻醉百场【李白诗痛扫鸚鵡洲与君醉百场】历徧胜游翻怅望日边回首远烟苍八
水三川路渺茫翠微深处白云乡目□懒拭如松液领髮频?似栗房林壑不嫌无用物形骸难
入少年场缘苔蹑蔓知多少千里归来屐齿苍

独步至洛滨二首

拜表归来抵寺居解鞍纵马罢传呼紫衣金带尽脱去便是林间一野夫

草软波清沙径微手?筇竹着深衣白鸥不信忘机久见我犹穿岸柳飞

送酒与邵尧夫

红樱零落杏花开春物相催次第来莫作林间独醒客任从花笑玉山颓

再和邵尧夫年老逢春

年老逢春犹解狂行歌南陌上东冈晴云高鸟各自得白日游丝相与长草色无情尽眼緑花
林多思袭人香吾侪幸免簪裾累痛饮闲吟乐未央

又和来韵

年老逢春无用惊对花弄笔眼犹明不嫌贫舍旧来鶩唤起醉眠何处鷺一仆相随幅巾出羣
童聚看小车行人间万事都损去莫遣胷中气不平

邵尧夫许来石阁久待不至

淡日浓云合复开碧嵩清洛远萦迴林端高阁望已久花外小车犹未来

石阁春望

极目千里外川原绣画新方知平地上见不尽青春

和邵尧夫安乐窝中职事吟

灵台无事日休休安乐由来不外求细雨寒风宜独坐暖天佳景即闲游松篁亦足开青眼桃李何妨插白头我以着书为职业为君偷暇上高楼

和范景仁闻蝉

春林满岩绿谁信已鸣蝉叶上正多露山中别有天心闲宁感物道合况忘年坐听生秋思何须膝上弦

和范景仁宿憩鹤寺

回廊复阁势萦纡四岭中涵一气虚最爱欣欣向荣木每来相见不相疎

游喷玉潭二首

惊风动地起游客望山行若待佳辰去应无好事名万木吼穹谷駉駉屹不前犹胜望尘客伫立九衢边

和范景仁

昨朝景气如暑天僮仆流汗衣裘单安知向晚暴风作一变阳春成大寒比时结友寻名山伶俜徒步水石间棘刺冒衣行路难枯藤毒柏同攀援惊沙击眼百箭攒时得闭牖窥林峦景仁年长力更孱牵衣执手幸不颠仍闻旁谷有伏虎赖得与君俱早还【按律诗卷中误编入古诗诸本皆同】

游山呈范景仁【景仁年六十三致仕】

我禄多糗舍【舍为吏不过六百石辄自免去】君年少孔戣【戣七十致仕韩愈留之】道心闲始见世路老方知山水不相厌风光难豫期嬉游不可缓花卉即离披

和范景仁游壽安

宜阳城下作游人都为衣冠不系身衆窍怒号成地籁也胜终日在红尘

噴玉潭

千尺崖头一派清古今不絕坠崢嶸长风卷起散岩壑此日方知噴玉名

疊石溪二首

道傍行采药石底卧题名【溪边有石横出下甚隘景仁卧其下题名而去】野老相迎拜谿童乍见惊

山鸟劝人饮【山多提壶鸟】山蝉笑我狂【山蝉声如笑】归时兴未尽不得看斜阳

和范景仁疊石溪

溪边有村落未始识纷华去县只数里居民踰百家山腰荒径转谷口翠微遮老木纷无际重峦浩莫涯力穷才到顶势尽复成洼不定云烟色难名药草芽泥钩罗比屋涧石载连车【谷口多鬻窑土人自女几涧采石载来卖之为油】宛有淳风在谁云太古遐梁随木性曲檐逐地形斜榛路牛呼犊丛祠雀噪蛇倚崖松偃盖落石浪翻花安用游青峤何须蹑紫霞好将诗笔写还入帝城夸已买渔樵舍毋令後约差

应天院朝拜回呈景仁

鷄鸣上马过河桥何异东都赴早朝红日已高犹熟寝比君殊未得逍遥

和景仁卜居许下【景仁顷见许居洛今而背之故诗中颇致其怨】

壮齿相知约岁寒索居今日鬓俱斑拂衣已解虞卿印筑室何须谢傅山许下田园虽有素洛中花卉足供闲他年决意归何处便见交情厚薄间

喜雨三首呈景仁侍郎兼献大尹宣徽

累日增烦暑通宵结薄陰苍茫变风色散漫作春霖野店垂杨重僧房綠筱深踈慵尤得趣闭户拥重衾漠漠春云合熈熈旱气收人心方有望时雨不须求岂独老农喜仍令恶客留洛城花未谢作意更同游麦田正尘坌桑径忽滂沱比屋起相告荷鋤行且歌园林半局鎖车马絕经过大尹爱民物何妨喜更多

亨杞下第作诗示之

清白君家旧文章时态新何妨偶蹉跌未必遂沈沦莫叹科名晚惟忧道谊贫进修专在已得失尽由人孝友亦为政箴瓢足养亲那将少年泪容易辄伤春

景仁思归雨未克行以诗留之

嘉客念归程泥深未可行今朝陰又重春雨亦多情

送景仁至丁正臣园寄主人

客到暂开局春芜生满庭主人殊不顾修竹为谁青

和君贶老君庙姚黄牡丹

芳菲触目已萧然独着金衣奉老仙若占上春先秀发千花万卉不成妍

又和董氏东园桧屏石牀

密叶萧森翠幕?暂来犹恨不长居脱冠解带坐终日花落石牀春自如

奉同运使陈殿丞【知俭字公廩】惜洛阳牡丹为霜风所损

名花多种欲纷敷一夕霜风非所虞节物偶然何足道人情遗恨不能无
飄飄健笔诗千首惆悵东风酒百壶纵使前春满朱檻使车那复滞西都

又和惜春謠

朝来风雨歇春意漠然收去我不辞诀凭谁能借留杓星渐西转洛水自东流
曲渚撒华幄芳园罢彩球雉鸣坵麦秀蚕起野桑柔乱絮天涯满晴阳草际浮
已嗟心绪减况复鬢丝稠赖听新翻曲非为负胜游【刘伯壽坐中度曲命曰惜春謠】

还陈殿丞原人论【宗密所撰破自然破元气破天命明佛性】

品物芸芸游太虚不知谁氏宰洪炉一株花落分荣辱万窍风号见有无
觉後共占犹是梦衣中所得亦非珠何如鼓瑟浴沂水春服成时咏舞雩

和王秀才【虞仲字道济】以光始自陝右游山归复将登少室爲诗见寄

瘦马飄飄屡往还疲劳专为访名山须知筋力行将老渐恐峯峦不可攀
蜡屐早能寻胜槩弹冠悔更落尘寰幸依贤者为东道大得逍遥水石间

和景仁西湖泛舟

满船歌吹拂春湾天外晴霞水底斑谁信飞觞临绮席独能回首望青山东门车马忽忽别西洛风烟寂寂闲叠石溪头应更好却输野叟坐林间

新买叠石溪庄再用前韵招景仁

一溪清水佩声寒两岸莓苔锦绣斑三径谁来卜隣舍千峯我已作家山鹿裘藜杖偏宜老紫陌红尘不称闲早挈琴书远相就放歌烂醉白云间

贻夸者

我乐非君乐君忧非我忧蓬蒿与溟渤终老不同游

春游

人物竞纷华骊驹逐钿车此时松与柏不及道傍花

和潞公游天章楚谏议园宅

名卿新治第上宰旧连墙槐叶青青叶星邻两两光林花裂锦狭门路筑沙长共引庭间水交生壁外篁鱼窥荐琴石萤散读书牀玉帐方怀远松斋欲就荒旌幢今少憇兰蕙不徒芳早晚平狼望同来举寿觞

还张景昱景昌秀才兄弟

翩翩新诗卷青春映棣华机云今继美载协旧承家幸托仁人里时回长者车白虹光乱眼何敢议瑜瑕

和宇文公南涂中见寄

驄马乌纱游洛尘未能全得自由身深慙白首恋微禄不向青山为散人斥鷃卑飞聊取适冥鸿高举益难亲蜀都迢递千余里徒诵新诗妙入神

酬张二十五秀才南园遣意【景昱字明叔】

花卉日相续朝昏兴寄新露荷香入坐风竹净无尘啸咏皆羣从喧嚣远四邻须知轩冕客富贵不关身

酬张三十秀才见赠【景昌字子京】

朴学居人後清涂忝衆先瓠因无用弃木为不才全比得林泉趣仍依邑里贤自惭头半白方解赋归田八月十五日夜陪留守宣徽登西楼值雨待月久不见

经岁侍佳节无如陰霭何果然时雨足安用月华多未免银缸进空闻玉漏过庾公兴不浅久为驻鸣珂

秋雨新霁游水北马上偶成

秋色与秋声萧然满洛城未霜林叶赤新雨野风清水气侵肌冷岚光刮眼明谁云景如画但恐画难成运使虞部按行洛西诸县因游所过名山有诗百余首合为一篇蒙赐宠示俾之继作一首

属城穷僻地揽辔徧周流弊政已更化名山不废游鸣驺留谷口轻屐历岩幽聚看官仪者相扶半白头和君贶暮秋四日登石家寺阁晓泛洛舟二首

嬉游乘晓霁登览犯秋寒不出埃尘外安知在壤寛宫前断山碧林表落霞丹欲下惜佳趣相留更倚栏【右登阁】叶下宫槐老云飞洛浦秋复陪元礼棹却望仲宣楼曲岸迷频转遥山碎不流夷犹聊寓赏浩荡得忘忧晨出露渐径昏归月满舟星河散寥廓珠贝映汀洲林馆回车入壶觞秉烛游山公兴未尽徒御且番休【右泛舟】

又和六日四老会

萸房迎令节菊蕊入芳筵华烛初长夜清霜未冷天悲风咽横吹骤雨送繁弦聊附邹枚客敢希园绮贤和王少卿【尚恭字汝之】十日与留台国子监崇福宫诸官赴王尹赏菊之会

儒衣武弁聚华轩尽是西都冷落官莫叹黄花过佳节且将素髮共清欢红牙板急弦声咽白玉舟横酒量寛青眼主公情不薄一如省闕要人看

和白都官序见赠

齿疎髮白两眸昏万事无堪老病身脱粟犹沾太仓禄法官仍忝外台臣直缘迂僻求闲地岂是孤高慕古人英俊满朝皆稷契太山何必一飞尘

酬邵尧夫见示安乐窝中打乖吟

安乐?中自在身犹嫌名字落红尘醉吟终日不知老经史满堂谁道贫长掩柴荆避寒暑只将花卉记冬春料非空处打乖客乃是清朝避世人

和邠守宋度支迪来卜居与南园为邻

弱冠交游鬓髮苍饱谙官况好深藏闲居共买一壥地尽老常依数仞墙虽喜卜邻同晏子尚
慙推宅异周郎何时税此凭熊驾倚仗相迎立路傍

和张文裕初寒十首

何处初寒好初寒邾鄆城垂绅多俊彦列第尽公卿裘马过从盛门阑洒扫清谁家拥兽炭尽
日管弦声何处初寒好初寒洛汭宫翠华虽脉脉佳气自葱葱阙角月华白苑墙霜叶红都人
心望幸注目不离东何处初寒好初寒洛水桥沙?水清浅风叶柳萧条关塞长涂直嵩丘倒影
遥凤楼虽在北车马不尘嚣何处初寒好初寒太室山晴空烟澹泊返照雪孱颜极目鴈稍没
无心云自还犹余拜表累不得坐松间【嵩山去洛近二百里五日仅能往还以妨拜表未果
往】

何处初寒好初寒禹凿门遥天露崖口轻浪漱山根万佛龕苔老一灯林霭昏渔梁杳相望石
濑夜声喧何处初寒好初寒喷玉泉折冰流谷口飞溜落云边雀噪聚林杪樵歌下石巔寻幽
不思返坐啸夕阳偏何处初寒好初寒叠石溪山斜改昏晓路曲失东西拾栗走村稚凿垣巢
乳鸡我来闲拥褐曝背草檐低何处初寒好初寒肃政台官闲免簿领门静少尘埃天借风霜
气人无鹰隼猜庭荒余老柏尚有夕乌来何处初寒好初寒游弈园林间叶未尽篱底菊犹存
结竹为庵小开炉构火温谁言处城市岑寂似丘樊何处初寒好初寒福善居长宵对灯火满
室聚诗书暂息登山屐休脂下泽车所安容膝地何必更多余【游弈福善皆坊名】

和君貺少林寺

達摩自云传佛心绪言迷世到於今既?只履归西域安得遗灵在少林孤月正明高殿冷清风
不断老松深谢公自爱山泉美肯为幽禅此访寻

又和岳祠谢雪题岳寺平法华庵

宴坐几何年庭芜与砌连焚修真谛苦功行得无圆阙里诗三百赖乡文五千厌烦犹不读何
况淤泥莲【平住庵不出近四十年日诵法华经数十卷】

望日示康广宏

清晨三緑袍罗拜北堂高积善因先烈余光及尔曹勿矜从事早当念起家劳修立皆由已何
人可佩刀

和君貺题潞公东庄

嵩峯远叠千重雪伊浦低临一片天百顷平皋连别馆两行疎柳拂清泉国须柱石扶丕构须
人待楼航济巨川萧相方如左右手且於穷僻置闲田

和君貺任少师园赏梅二首

寒压春头草未芽喜闻置酒赏新葩官仪赫奕三川守野意萧疎四皓家不用管弦妨淡泊岂容桃李竞繁华昏鷗散乱传呼出归路林间烛影斜

风日虽寒昼景长探春远访白莲庄岸冰犹在水先绿柳叶未生条已黄老木根侵苔径窄新梅花入酒卮香天真不必人修饰得趣勿嫌台馆荒

又和开叔

寒梅犯雪荣大隐久专名异种生江渚何年到洛城【洛中虽有梅开花常晚独大隐梅最先开相传好事者自江南移来今数十年矣】色如虚室白香似主人清向使吴儿见不思菰菜羹

和公廙喜雪【用庄字韵】

邇来河洛久愆阳祷祀徒劳罄肃庄林雪飞花欣暂白麦田濡叶未全黄城中稍觉桑薪贵村外时闻社瓮香八使孜孜悯惸独斯民那复畏凶荒

和史诚之谢送张明叔梅台三种梅花

别後相惊两鬓霜可怜梅蕊为谁芳台头日暖分三色林下风清共一香正烂漫时游不足忽离披去乐难常殷懃手折遥相赠不欲花前独举觴

早春寄景仁二首

辛夷花烂开故人殊未来愁看柳渐绿忍更折残梅【去岁景仁约辛夷花开即来洛中芍药谢乃去】

叠石溪上春茅茨卜筑新前言如不践山蝉又笑人

和君貺宴张氏梅台

京洛春何早凭高种岭梅纷披百株密烂漫一朝开青女工黏缀霜娥巧剪裁崑山云满谷蓬渚浪成堆势拥樽前合香从席下来蜺旌虬天起练甲洗兵回不使光风散曾无夜色催人稠衣馥郁地狭舞徘徊民服召公化时推何逊才【何逊有早梅诗】淹留文酒乐璧月上瑶台

看花四絕句

洛阳相望尽名园墙外花胜墙里看手摘青梅共拨酒何须一一具杯盘

洛阳相识尽名流骑马游胜下马游乘兴东西无不到但逢青眼即淹留

洛阳春日最繁华红绿阴中十万家谁道群花如锦绣人将锦绣学群花

南园桃李近方栽浇水未乾花已开山果野蔬随分有交游不厌但频来

留别友生

野际共为别客亭芳草新何心更执酒满目尽伤春今古无穷路东西相背尘行行复回首不欲着鞭频二月六日初见待漏房前柳色微绿欣然成咏

宫城映出丝丝绿顿觉皇州春意迥从此不辞驱瘦马六街终日踏尘埃

垂柳

天意清和二月初春风不动整如梳陶潜宅外时无此想更萧条不易居

闲居

故人通贵绝相过门外真堪置雀罗我已幽慵僮更懒雨来春草一番多

中秋陪张龙图讌射堂初夕阴云酒行顿解喜而成咏

飞盖共徘徊西园高宴开秋云惜明月留待庾公来

贻宋四行简迪

离群如几辰屈指十青春不意轮蹄迹共兹京洛尘文场投漆契客路转蓬身别易相逢阔过从莫厌频

和国子夏主簿李花有章

儒官岑寂觉春闲仙李繁花重压栏碎锦不飞蒙树合素云欹亚举枝难能诗此日当推谢捧赐他年足继桓更约雕盘荐秋实岂徒穠?一朝看

传家集卷十

卷十一

钦定四库全书

传家集卷十一 宋 司马光 撰律诗六

和君贶清明与上巳日泛舟洛川十韵

繁华两佳节邂逅适同时雅俗共为乐风光如有期晓烟新里巷春服满津涯已散汉宫烛仍浮洛水卮占花分设席爱柳就张帷华毂争门去轻帘夹路垂一川云锦烂四座玉山欹叠鼓传遥吹轻桡破直漪清谈何衮衮和气益熙熙想见周南俗当年播逸诗

和君贶寄河阳侍中牡丹

真宰无私妯娌同洛花何事占全功山河势胜帝王宅寒暑气和天地中尽日玉盘堆秀色满城绣毂走香风谢公高兴看春物倍忆清伊与碧嵩

又和安国寺及诸园赏牡丹

洛邑牡丹天下最西南土沃得春多一城奇品推安国四面名园接月波山相着书称上药翰林弄笔作新歌人间朱粉无因学浪把菱花百徧磨

送酒与邵尧夫因戏之【前送牡丹药苗尧夫皆有诗】

林下虽无忧可消许由闻说挂空瓢请君呼取孟光饮共插花枝煮药苗

酬仲通初提举崇福宫见寄

富寿安民旧学违符移拥笔素心非青云有路那足顾白髮满头胡不归永日杜门无俗客临风隐几得天机西山爽气秋应好恨不相从上翠微

酬君贶和景仁见寄【三首】

嬾拙无时用耆朋独我思乘闲同把酒道旧各成诗高义刮眼膜清风生鬢丝方将激衰俗贱子独何为北阙黄金印西山白髮翁訏谟帝廷异小筑洛川同晴野峯峯碧霜林叶叶红无因侍樽席惆悵又秋风【右上宣徽】何事挂冠客至今留帝台红尘终可厌青眼不长开春路半消雪寒枝初破梅南园虚客席洒扫望公来【右上侍郎】

和王安之四絕句

野軒

黃雞白酒田間樂藜杖葛巾林下風更若食芹仍暴背野懷并在一軒中

污亭

雜花亂種盤渦底小屋深居監燧心朝市器聲那得到晨昏暑氣不能侵

藥軒

雨余條甲繞堦生往往桐君昔未名采貯不須勤暴簞秋陽日日滿檐楹

晚暉亭

俯臨城市厭諠譁回顧園林景更加醉立斜陽頭似雪往來誤認白公家【樂天西樓獨立詩云身著白衣頭似雪時時獨立小樓中路人回顧應生恠十六年來見此翁】

喜雨呈明叔

蘊隆亦太甚蒼蔚不朝隲直可忧秋廩非徒病夏畦民心或能徹天造固難稽黯淡云才族滂沱日未西衣襟坐來冷城闕望中迷園笋新梢活庭蕉濕叶低响从窻破紙行喜屐生泥昨旦煩相報凭君謝竹雞【明叔家旧养竹鸡放之林中今蕃息颇多俗以为雨候】

六月十八日夜大暑

老柳蝸蟬噪荒庭熠燿流人情正苦暑物態已惊秋月下濯寒水風前梳白頭如何夜半客束帶謁公侯

閑中有富貴

閑中有富貴迴与俗尘殊水淨齊紈展花繁蜀錦紵竹風寒扣玉荷雨急跳珠可笑公孫衍酣歌夸丈夫

寄唐州吳辨叔二兄

方城古称險遠在豫州南近岁污萊辟新民秦晋参当官誠近厚获譴亦无慙但惜墻陰竹归軒几日驂

自题写真

黄面霜须细瘦身从来未识漫相亲居然不可市朝住骨相天生林野人

和安之久雨

秋霖逢甲子禾耳恐须生流俗幸无验高田犹有成润唯藜莠得烂与蕙兰并早晚浮云豁迢遥赋晚晴

和宋复古小园书事

饱食复闲眠风清雨霁天叶深时坠果岸曲乍藏莲波面秋光净林梢夕照鲜东家近亦富满地布苔钱复古诗首句云独步复静坐辄继二章

踽踽出东轩徐徐步小园何须从吏卒亦不引儿孙蹑屐寻莎径?筇拨水源愁闻俗客到唯说市朝喧【右独步】一榻仅容膝身心俱寂然直缘知乐内亦不为安禅几陈编掩竹窗残局捐尚余喧噪在野鸟与林蝉【右静坐】

光诗首句云饱食复闲眠又成二章

钱少何须万杯多不过三龟肠本易足熊掌讵宜贪散步竹斋外高吟柳径南此心无所用脱粟亦深慙【右饱食】秋怀一事无暑尽昼凉初竹户静长闭藜牀安有余逍遥化胡蝶容易入华胥天上多官府神仙恐不如【右闲眠】

和明叔九日

不奈衰须白羞看朝监明聊凭佳节酒强作少年情雨冷弊裘薄风高醉帽倾如何不行乐况复值秋成

闲居呈复古

闲居虽嬾放未得便无营伐木添山色穿渠擘水声经霜收芋美带雨接花成前日邻翁至柴门扫叶迎

和明叔游白龙溪

溪深荒径微寻胜不知疲寒月影随马晓风冰满髭行歌被褐叟聚戏拾薪儿外野饶真趣令人怀抱夷

和景仁七十一偶成

心地长闲为已物年华不住是天时当如海上乘槎客维楫都无任所之

六十寄景仁

从来好与天争力困竭方知已力微见事晚於籀伯玉今知五十九年非

去春与景仁同至河阳谒晦叔館於府之後园既去晦叔名其館曰礼贤梦得作诗以纪其事
光虽愧其名亦作诗以继之

蓬飞匏系十余年并?华棖出偶然郭隗金台虽见礼华歆龙尾岂能贤浮云世味闲尤薄寒柏
交情老更坚明日河梁即分手人生乐事信难全

与王乐道约会超化寺比至乐道以疾先归涂中有诗见寄

颠毛种种齿浮摇屈指交游渐寂寥时较半朝非是晚路无数里不为遥子猷垂到复归去安
道虽知未易邀古寺徘徊久东望青春云日冷萧萧

和王乐道再以诗见寄

諫垣簪笔接英游今日华颠昔日忧邂逅升沈皆是命逍遥出处本无愁衡门不羡金门贵藿
食焉知肉食谋溟海榆枋各安分蓬莱未必胜嵩丘

晚春病起呈择之治臣

风日正和柔身轻喜病瘳嬾抛残蠹简暖脱弊貂裘值客开青眼逢花忘白头家家好春色何
处可同游

次韵和宋复古春日五絶句

雪霜衰鬓拔还生桃李新园长未成五十尚能胜六十今年又灭去年情

车如流水马如龙花市相逢咽不通独闭柴荆老春色任他陌上暮尘红

东城丝网蹴红球北里琼楼唱石州堪笑迂儒竹斋里眼昏逼纸看蝇头

家藏歌吹只西邻吹落梅花歌落尘百叶桃开深院里输他白髮有情人

驚拂人衣絮扑头红英满地綠陰稠残春举目多愁思休上迢迢百尺楼

酬宋叔达【道复古之兄】卜居洛城见寄

离羣四十一春风纵有相逢似梦中幸得相逢作邻舍但嗟彼此是衰翁汉文前席人将去【复古谪官不日牵复】庾信诛茅橐未充【来诗云自笑颠狂便归去并无穿系买山钱】怅望金堤碧芜濶杖藜?手几时同

和王安之题独乐园

草浓初过雨林静远含烟驚引新飞鷁荷承半坠莲朋来惟有月山见不须钱谁与同其乐壶中浊酒贤

和吴辨叔知凤翔见寄

岐阳府舍始相逢四十余春屈指中昔日布衣今露冕当时小吏亦衰翁醉吟久作藏身计条教应多及物功惟是彩衣难再着长林极目起悲风

和王安之今春於郑国相公及光处得缀珠莲各一本植之盆中仲夏始见一花喜而成咏末句云未知先合谢谁家

春冻消时种两芽南风薰日见孤花先开必自陶钧力且合归功丞相家

君貺环溪

地胜风埃外门深花竹间波光冷於玉溪势曲如环荣路回翔厌华轩啸咏闲堪羞谢太傅不复到东山

瞑目

瞑目思千古飘然一烘尘山川宛如旧多少未来人

独乐园二首

独乐园中客朝朝常闭门端居无一事今日又黄昏客到暂冠带客归还上关朱门客如市岂得似林间

放鸚鵡二首

野性思归久笼樊今始开虽知主恩厚何日肯重来虽道长安乐争如在陇头林间祝圣主万岁复千秋

呈乐道

欢迎俛仰皆陈迹薄宦须臾即色空试忆昔年双桂会只如前日梦魂中

和刘伯壽陪潞公禊饮

旌幢车骑满沙头鼓吹喧繁画鷁浮十里罗纨光照地千家帘幕远临流觴随洛水周公事月映凤楼裴相游令典久堕【火规切】今更举行闻美俗徧中州

南园雨霁景物粗佳怀楚正叔王安之

洛阳秋雨阒荒圃物华饶白鹤寒尤盛红薇晚未雕鸟惊朱实堕云灭翠岑遥扬子方嘲白相如尚苦瘠【安之有疾】徘徊瞻望近邂逅笑谈辽官冷慙无具相思不敢招和潞公与张昌言楚正叔游独乐园徘徊久之主人不至

茂勲成亮采胜赏寄风流闲引翹林客同为独乐游厌居华宇盛翻爱弊庐幽愧不先操簪迎尘立道周潞公游龙门光以室家病不获参陪献诗十六韵

旄节拥凭熊逶迤向凿龙顺成时过蜡闭塞令行冬雪垄痕犹湿梅林思已浓传呼空谷应前导白云逢飞盖多邀客停车数问农禹功双壁断佛刼万龕重絶顶标孤刹疎林透远钟气蒸泉郁郁冰绽水溶溶药阁低临渚茅庵背倚峯冻醪资野酌寒笋佐晨饔【公作药寮潞公庵临伊庵皆在龙门】碁局多依石茶炉坐?松醉醒皆衆共小大尽公从顾以私恩累难追胜赏踪原思初不病叔夜亦非慵稽古慙经笥摛华怯笔锋会须参後乘异日待从容

初夏独游南园二首

取醉非无酒忘忧亦有花暂来疑是客归去不成家桃李都无日梧桐半死身那堪衰病意更作独游人

和景仁答李才元寄示花图

高士闲居旧名花独步今移从洛浦远濯自锦江深传得巫山貌非因延壽金不须天女散已解动禅心【近岁举世谈禅独景仁未耳今亦有空相之句故卒章戏之】

或谓光嗤景仁谈禅而自谈又因用前韵为景仁解禅

贱子误已久景仁迷自今良因拯溺急是致涉波深到岸何须棹挥鉏不见金浮云任来往明月在天心

题传灯錄後

呷着声闻酒更狂佗州浪走不归乡谁曾缚汝安用解彼自无创勿误伤探月拾针传妄语安居暇食赖先王但令时世如三代达摩从他面向墙

奉和大夫同年张兄会南园诗【徽字伯常】

露浓秋过半气爽雨收余取酒邀嘉客呼儿扫弊庐生涯数亩地官业一轩书竹结垂纶屋泉分入座渠惬心皆乐事容膝即安居梁静栖无鶩波澄戏有鱼茂林穿繚绕微径步虚徐果落方知熟莎长不忍除过从常苦远接待每慙疎不厌茅茨陋时适长者车

答张伯常之郢州涂中见寄

适意遗轩冕轻於鸿一毛扁舟千里远佳句百篇豪酒饮宜城美歌闻白雪高家林已春色慎勿滞江臯

独乐园新春

春风与汝不相关何事潜来入我园曲沼揉蓝通底绿新梅剪彩压枝繁短莎乍见殊堪喜鸣鸟初闻未觉喧凭仗东君徐按轡旋添花卉伴芳樽

和潞公真率会诗

洛下衣冠爱惜春相从小饮任天真随家所有自可乐为具更微谁笑贫不待珍羞方下筯只将佳景便娱宾庾公此兴知非浅藜藿终难继主人

景仁书云去冬因酒病耳病牙遂不入洛以诗寄呈

许昌?手尽时英况复新开甲第成醉里都将春作达老来不向酒藏情齿疎无废衙盃趣耳病犹分度曲声旧友昔游浑忘却可怜寂寂洛阳城

又云新铸鬴斛与今太府寺尺及权衡若合符契复次前韵

裁筩累黍久研精况复新修鬴斛成岂校忽微争口语本期淳古变人情既言乐律符今尺但恐箫韶似郑声若欲世人俱信服凤凰再集颖川城

王安之以诗二絶见招作真率会光以无从者不及赴依韵和呈

真率由来无次第【来诗云真率会名今第几】经旬踰月不为稀蓝舆但恨无人举【今日军士皆请粮不?赶赴】坐想纷纷醉落晖【来诗云数酌仍须就晚晖】杯盘丰腴胜陶令园沼繁华减白家惆怅佳辰掩蓬荜不陪高会赏隣花【来示云下瞰隣花】

用安之韵招君从安之正叔不疑南园为真率会二首

榆钱凌乱柳花飞枝上红英渐渐稀莫厌街杯不虚日须知共力惜春晖

真率春来频宴聚不过东里即西家小园容易邀嘉客饌具虽无亦有花

二十六日作真率会伯康与君从七十八岁安之七十七岁正叔七十四岁不疑七十三岁叔达七十岁光六十五岁合五百一十五岁口号成诗用安之前韵

七人五百有余岁同醉花前今古稀走马鬪鸡非我事紵衣丝髮且相晖【乐天九老诗云七人五百七十岁】

经春无事连翩醉彼此往来能几家切莫辞斟十分酒尽从他笑满头花

别用韵

坐中七叟推年纪比较前人少几多花似锦红头雪白不游不饮欲如何

其夕宿独乐园诘朝将归赋诗

平晓何人没井华辘轳声发散春鷗开园更有四五日映叶尚余三两花宿病岑岑犹带酒无眠耿耿不禁【平声】茶自嫌行乐妨年少遽索蓝舆且向家

邀子骏尧夫赏西街诸花

今年节物非常晚春尽西街花尚多试问二三真率友小车篮舁肯重过

呈张子贱朝散【名于新自安邑徙居洛】

近时洛社名真率簞食壶浆取次游试问西来老朝散可能同志便相收

和邵兴宗秋夜学舍宿直

直舍逍遥度清夜暂投逢掖解儒冠高楼影背星河转疎竹气兼风露寒篱下黄花新蘂乱门边碧柳旧株残折腰把板今无有勿似陶潜遂弃官

和吴冲卿病中偶书呈诸同舍光时亦卧疾

病来门不扫秋草翳吾庐弃置贤人酒萧条长者车冥迷牀鬪蚁润溽篋生鱼药物从无继簞瓢自有余形神寂可吊身世邈相疎何事文园客消中亦着书

月下小饮

美景赏心相值难良宵四座尽儒冠月华过冷衣襟润酒力易消樽俎寒自有笑谈供逸气不须丝竹借余欢坊楼五鼓欲催曙桂影长先高兴阑

举首孤轮不似遥尊前狂气出云霄常娥不惜借丹桂欲就高枝挂酒瓢

马病

羸病何其久仁心到栈频须怜苜蓿歉当认主人贫客舍同萧索山程共苦辛未能逢伯乐且可自相亲

庆历七年祀南郊礼毕贺赦

雷鼓千通破大幽天开狱钥纵累囚驿书散出先飞鸟一日恩流四百州

送张太博肃知岳州

严风秀木折为薪得罪由来为出羣粥粥黄鸡憎鸛介芄芄青蔓掩兰薰天资谗嫉多端巧人极精明不易分饮水岂言吴刺史谤书翻似马将军波涛汹涌动寒野楼阁崔嵬压暮云红叶寺深秋暖见苍山钟迴夜清闻何妨絶境聊为中正恐中朝亟用君身外百愁俱掷置放歌沈饮且醺醺

和之美河西列岫亭二首

秋山对疎牖羈客倦登临雨後岚光活晴初落照深素波明别浦赤叶照衰林伫目寂无语何人知此心亭臯资远瞩秋思浩无涯鴈唼牵菱蔓童歌出荻花塋荒犹叱犊枝暗稍栖鷗烟靄藏东渚凭轩莫望家

书事

志士喜功业感时心易劳
蘂栽终枯柏荒蔓任蓬蒿
梁竦慵为吏萧咸耻诣曹
风霜果不变会见出云高

钓鱼有感二首

垂竿临晚岸坚坐据莓苔
饵落萍初散鱼惊荷暂开
有求虽琐细未获且低回
君识磻碛老曾垂緑髮来
野钓披榛竹无人知往来
高空飞不下鸥鸟已相猜

忆龐之道

畴昔两垂髫知音结久要
何言半涂别不待岁寒雕
幸有才名在非随气运消
英灵犹髣髴宿草已萧萧

兴宗约游会灵久不闻问以诗趣之

胜地何妨行乐频
万双白璧不余春
腊醅已老久未压杨柳青青不待人

清明日兴宗饮赵道士东轩

佳游得令辰过此不为春
一境风光秀万家烟火新
鷺初飞玉殿草不染香轮
逼水蒲牙短围堤柳带匀
纵谈高出古落笔健生神
日暮还醒去林花应笑人

上巳日与太学诸同舍饮王都尉园

冠盖鬱相依名园花木稀
游丝萦复展狂絮堕还飞
积弩遗风陋兰亭旧俗微
何如咏沂水春服舞雩归

寄题洪州慈济师西轩

登临传胜絶怅息未成游
山气高凌霁湖光碧照秋
烟疎茶竈迴灯冷竹房幽
安得聊凭檻萧然洗客愁

传家集卷十一

卷十二

钦定四库全书

传家集卷十二 宋 司马光 撰律诗七

会不疑家席上纪实

召客客俱来赏花花正开寒暄方得所风雨不相催席上柳飞雪门前车隐雷主人意仍厚安得不徘徊三月三十日微雨偶成诗二十四韵书怀献留守开府太尉兼呈真率诸公

春尽少欢意昏昏睡思添正忧花意索更用雨声兼乍语鶯喉澁慵飞柳絮黏落英红没砌茂草碧侵帘宝相锦铺架酴醾雪拥檐沼萍浮钿靥林笋露犀尖坐惜光风驶行愁畏日炎追随任尘甑歌笑望霜髯落笔诗情放飞觥酒令严金丹呼胜彩玉烛擢新籤傲岸冠巾侧淋浪襟袖沾饥仍留瘦马归必待清蟾筋力虽无几娱游亦未厌脱身离簿领适性得间阎多病非辞贵无才岂养恬清涂诚愧忝微禄已伤廉日费须三爵年支仰数缣糒粮粗能足蓍蔡不烦占河洛今为盛图书昔所潜家家花啓户处处酒飘帘温饱资兼爱安平倚具瞻愚夫犹乐育下客愈撝谦落拓形骸逸优游岁月淹余生信多幸狂醉亦无嫌

其日雨中闻姚黄开戏成诗二章呈子骏尧夫

谷雨後來花更浓【洛人谓谷雨为牡丹厄今年谷雨後名花始开】前时已是玉玲珑【前时与尧夫游西街得新出白千叶花以呈潞公潞公名之曰玉玲珑】客来更说姚黄发只在街西相第东【园夫张八家在富相宅东】

小雨留春春未归好花虽有恐行稀劝君披取鱼蓑去走看姚黄判湿衣

立夏呈安之

留春春不住昨夜的然归欢趣何妨少闲游勿恠稀林鶯欣有托【前日始闻鶯】丛蝶怅无依窗下忘怀客高眠正掩扉【陶潜尝言夏月虚闲高卧北窗下清风飒至自谓羲皇上人】

和子骏洛中书事

西都自古繁华地冠盖优游萃五方比户清风人种竹满川浓緑土宜桑凿龙山断开天阙导洛波回载羽觴况有耆英诗酒乐问君何处不如唐

安之令子河阳官舍作蛙乐轩安之有诗寄题辄敢继和

鼓吹娱俗耳蛙鸣惬雅怀最宜凉雨歇更与晚风偕骥子方长骛云衢偶未谐功名当努力留此遗吾侪

和安之喜雨

吁嗟方请雨润溽果如占黍稷固有望来麴亦未嫌声繁清倦枕气冷入疎帘蔓喜龙头举泉惊虎爪添田畴诚最急花药不妨兼诗伯才盈斛聊应费笔尖

逍遥四章呈钦之尧夫

结髮读经史疲精非一朝於今成濩落所幸得逍遥不随狂心息难平客气消巢林易为足窃敢比鷦鷯闲思宇宙内何物不由天定分不移易劳心徒弃捐鹏飞九万里松壽一千年斥鷃与朝菌逍遥亦自然闭目念前古飘然一烘尘两仪仍似旧万物互争新轩冕荣何在簞瓢乐最真衆人俱我笑我亦笑其人六合旷无际逍遥好纵游放怀同一贯瞬目即千秋丸遇区?止萍随波浪流所之皆自得何惧亦何忧

送稻醴与子才

昔贤尊道谊置醴待嘉宾今我乐闲放提壶饷故人蠲浮杯面白味撇瓮头醇何以助高兴篱边菊蕊新

感物

朝看新鷺飞暮聽子规啼尺蠖身藏叶神龟尾曳泥羈鷹何用掣枥马不当嘶自伐憎狙巧颓然爱木鸡

酬安之谢光兄弟见过

平时一二日不见已相思况复闭关久杳无?手期清谈胜妙药高韵敌凉颼愧乏机云美虚承青眼知

酬王安之闻罢真率会

闭关寧是率辞疾似非真既处讥嘲地谁为长厚人虚舟非有意飘瓦不须嗔此过如何赎清秋宴席陈【安之诗有解嘲意故以此戏之资一笑】

和潞公伏日讌府园示坐客

盛阳金气伏华宇玉樽开真率除烦礼耆英集上才炎蒸疑远避流景忘西颓幸忝俊游并仍
慙右席陪蒲葵参执扇水果侑传杯相国方留客如何务早回

和子骏新荷

嬾不窥园久元非效仲舒新荷满沼密蓝舁出门疎借问含烟晚能胜裊露初愧无鱼戏句弄
翰白纷如

和子华游君贶园

甲第朱门久不开春风潜入发江梅今朝丞相双车辙碾破林间水畔苔

小桃似喜相君来争发新花继落梅更仗环溪醒残酒没篙春水绿於苔【太尉公引水绕园
可以延客名曰环溪】

又和上元日游南园赏梅花

梅簇荒台自可羞相君爱赏忘宵游未言美实调羹味且荐清香泛酒瓯

又和游赵中令园

中令园陪丞相游百分劝酒不须愁春风陌上醒归去只恐更为桃李羞

又和游吴氏园二首

天气清和无喘牛花林烂熳竹林幽临风高咏足爲乐有勇知方笑仲由

名园易主似行邮美竹高松景自幽谁悟本来天地物长为已有固无由

和子骏约游一二园亭看花遇雨而止

行乐及佳时官闲无所羈只知花正发不共雨为期浅草碧无际浓云冷四垂陪游兴未尽安
得不相思【来诗云人寻载酒地雨破看花期又云感公行乐处蚤莫得相思】

又即事二章上呈

雨不成游半路归逢花值柳倍依依朝来顿饮三杯酒醉卧西斋昼掩扉

觉後追思气味长欢情愁绪两俱忘近来方得醉中趣熟寐沈沈是醉乡

明日雨止复招子骏尧夫游南园

昨朝洛北阻游陪惆怅中桥半醉回
泼火既经寒食雨解醒须拨冻醪醅【诗传曰春酒冻醪也】
遥思花寨交横锦未分春心斗顿灰更与二三头白友试携薄具上高台

戏呈尧夫

近来朝野客无坐不谈禅顾我何为者
逢人独懵然美君诗既好说佛衆谁先
只恐前身是东都白乐天

闻正叔与客过赵园欢饮戏成小诗

吾庐寂寞类荒村但有林间鸟雀喧
不似楚家多乐事笙歌拾得醉邻园

和子华应天院行香归过洛川

印节传呼洛北还府庭无讼不妨闲
度桥寒色侵春服按辔晴光露晓山
香穗徘徊凝广殿花篮繁会满通闾
自知白雪高难和忍愧谁能寄我颜

寒食游南园独饮

寒食良辰无赏心杂花烂熳柳成陰
若非独酌酬佳景一日风光直万金

次前韵二首

头白惜春情更深花间独醉竞分陰
泉声醒耳自可乐不用歌抛满袖金

南园莫笑独追寻明日未知晴与陰
挥手一朝辞逆旅满堂安用累千金

观孙儿戏感怀

我昔垂髫今白头中间万事水东流
此心争得还如是戏走阶前不识愁

陪子华燕醺厅酒半过赵中令园

簪裾丞相合林沼令君家烟曲香
寻篆杯深酒过花霏微烬沈水馥郁
渍棋枰愧乏相如赋陪游托後车

和秉国寄子骏尧夫二留台

一台二妙日追游琥珀香醪白玉瓿相下不厌贤者意尚言执友欠龙头

和伯常自郢州见寄

西郊去岁揖行人柳暗花浓又一春坐想高风清入骨沈吟佳句健生神潺湲杳霭烟波右【来书云郢西雨多潺湲杳霭】散诞逍遥兴趣新应笑洛阳车马道缁衣未免化红尘和潞公行及白马寺得留守相公书云名园例惜好花以候同赏诗二章

云汉成章湛露曦都门宴饯羽觞飞谢安不复东山去争似阿衡得谢归

相国东郊迓帝师油幢交映碧参差都人共喜安舆到正是余花可惜时

和子华喜潞公入覲归置酒游诸园赏牡丹

介圭成礼下中天春物虽阑色尚妍园吏望尘皆辟户肩舆回步即开筵波涛凌乱鞦韆旁锦风雨纵横拨底弦洛邑衣冠陪後乘寻花载酒愿年年

陪致政开府太师留守相公致政内翰燕集辄歌盛美为三公壽皆用公字为韵

独佐成康世高年有毕公神心降维岳龟兆告非熊黄合遵成范太常书茂功归来保眉壽恩礼享优隆【右太师】东合延髦士西都守别宫不忘如卫武难老似僖公位貌今虽远官僚旧忝同开怀尽卮酒足以厚时风【右相公】眉似高僧秀顏如童子红忠纯汲长孺高洁夏黄公矫矫辽东鶴冥冥塞北鸿自夸新酒量像想百分空【右内翰】

景仁将归颖昌辄为诗二十韵纪赠

秀发西南美挺生河岳灵雕龙蔚文采老鶴莹仪形落笔高时隼飞綏侍帝庭英声轶云汉远势击沧溟苦节专忧国嘉谋每据经温虽比圭璧直不避雷霆道胜轩裳薄神和气体宁忠诚怀畎亩乐事寄林垆藻鉴评随月过从德应星苦吟金出矿确论木衔钉贱子叨流辈高风仰典刑巨川容滴水余景借流萤久别眉俱白重来眼更青淹留弦与晦游集醉还醒有酒须相就无歌不共聽奇花喧夕市叠鼓咽春亭扬袂行辞洛回车去望陁【许西北有陁山见来书】往还天表鴈离合浪间萍异日期同传【景仁尝言他日与光若得在国史必同传】穷泉约互铭【光与景仁约後死者当为先死者作墓铭】古今难得事交分保颓龄

复用三公燕集韵酬子骏尧夫

官闲虚室白粟饱太仓红朝夕扫三径往来从二公蒹葭徒倚玉燕雀岂知鸿相过辄同醉惟愁樽酒空和吴朝议【执中字几圣】同年谢光与景仁同年见过

结绶东堂同发策白头相值益相亲却思景佑无多日共见元丰有几人天下高名归广受【二公皆致仕】古来交道重雷陈谢公身老才方壮落笔成章字字新

伏蒙留守相公赐示陪太师潞公东田宴集诗辄敢属和

舞雩新雨浹公田水满东溪上下天行径乍远初见笋浮舟正好未生莲弦收裂帛胡琴阁袖结清风楚舞妍相国火城光满路夜归不假玉蟾圆

和潞公招尧夫不至

东合樽罍招共饮後房罗绮约同观既无蓊子分身术须欠车公一座欢

和子华招潞公暑饮

朱门近在府园东杖屨过从跬步中避暑连翩投辖宴析醒萧洒满襟风闲来高韵浑如鹤醉里朱颜却变童剪烛添香欢未极但惊铜漏太匆匆

再和伯常见寄

诛茅宋玉宅边人知醉宜城几瓮春细雨短蓑渔向市孤村极浦鼓迎神徧游七泽身忘倦更赋千篇意转新不必沧浪羡清泚邇来纓上已无尘

再和秉国约游石淙

上国分携十五秋未尝偶坐捧茶瓯石淙今会须如约彼此霜毛各满头

席君从於洛城种金橘今秋始结六实以其四献开府太师招三客以赏之留守相公时赋诗以继其事光窃不自揆辄依高韵继成五章

宜春果结洛阳枝【太师云此果本出袁州】正遇耆明会客时更引轻舟倚芦岸香秔鲜鱸雅相宜

圆小香黄珠颗垂结成洛邑重霜时相公和气陶羣物不是寒温变土宜

君从好事不知疲种子成株凡几时摘献帝师三取二自尝两颗且随宜

物不须多且赏奇御寒相见结庵时江南江北徒虚语尽信前书是不宜

弊居橘亦自南移爱护栽培费岁时前此实成酸苦甚应由与德不相宜

和留守相公九月八日与潞公宴赵令园有怀去年与景仁秉国游赏

今岁台星聚洛中甘棠前後雨陰浓英辞唱和诗千首高宴游陪禄万鍾木末霜繁花未落云间字小鴈相从西湖在望亲朋远节物那堪处处逢

和留守相公寄酒与景仁

想对白衣初满倾执杯未饮已诗成怀贤孤坐悄无语不是朝来困宿醒

和秉国芙蓉五章

清晓霜华漫自浓独凭爱日养残红劝君秉烛须勤赏闾阖难禁一夜风

北方稀见诚奇物笔界轻丝指捻红楚蜀可怜人不赏墙根屋角数无穷

平昔低头避桃李英华今发岁云秋盛时已过浑如我醉舞狂歌插满头

後时独立诚难事犹赖阶庭有菊丛绰约霜前弄姿态非如羣木万林红

但见涉江求水际岂知胜木采霜中微红未肯全衰歇正似 顏鸛髮翁

和尧夫见寄

志趣苦难合依俛何所依逢君始相照知我信为稀忽报除书下徒瞻征盖飞相思千里远洛浦又春归仁政如慈父蒲人得所依教条前後接风迹古今稀试郡才书最还朝必奋飞西台旧班列犹望绣衣归华严真师以诗见贶聊成二章纪其趣尚

知足随缘处处安一身温饱不为难禅房窄小才容榻此外从他世界寬

素髮青眸七十余未尝游学只安居旁无几杖身轻健应为心闲得自如

和子华过王帅家见梅花盛开呈君实子骏兼简尧夫

去年与客尽清欢今日重来立马看犹是攜觴同醉在只愁风雨横相干

和张伯常贺迁资政

不驾使车开汉关【相如】不栖岩穴鍊金丹【子微】岂无开径三人友分着垂綬五寸冠【随游之士】坐饱太仓犹自愧謬跻秘殿益难安愿同野老嬉尧壤长守先生苜蓿盘

又书一絕戏呈

伯常远自郢中回喜与愁心相继来幸得蒹葭依玉树慙将瓦砾报琼瑰

又和南园真率会见赠

白头难入少年場林下相招莫笑狂綠筱影侵碁局暗黄梅花渍酒卮香任真自愧殺羞薄假寐初便枕簟凉酬应诗豪困牵率从来嬾放似稽康

春日思景仁

去岁洛城中嬉游处处同从离嶢岭北常梦湏泉东草遶春街碧花繁夕市红临风默惆悵想像白眉翁效赵学士体成口号十章献开府太师

都人共喜太师回比【频必切】户争迎不得催正值土楼滩水浅大家出手挽船来

东郊车马走红尘城外多於城里人谁信今朝还政後过如前岁下车新

归来甫可及春残丞相频邀赏牡丹远处名园多不到尊前日献百余盘

洛阳风俗重繁华荷担樵夫亦戴花贪看二公同宴会游人昏黑忘还家

公厨敕许酿芳樽屡唤宾朋醉後园谿浪畧无名位间谁人知道太师尊

过春稀复到诸园厌苦终朝鼓吹喧招得老僧江外至啜茶挥麈话松轩

东田小籍选新声歌吹胡琴色色精客少有时全不用天然水竹湛余清

首夏清和新雨晴綠莎细软不妨行园夫遮道白何事梔子花开斑笋生

矮?长绦紫縠衫朱门深静似重岩莫言永日浑无事种药移花一一监

八十聪明强健身况从壮岁秉鸿钧功名富贵古亦有无事归来能几人

自嘲

盘飧罗新蔬充腹不求余穷巷昼扃户闲轩卧读书有心齐塞马无意羨川鱼世道方邀逐如君术已疎虞部刘员外约游金明光以贱事失期刘惠诗见嘲以诗四首谢之【宗孟】

丝管嘈嘈耳不分绮罗杂踏自成春不唯汉帝昆明小更觉唐家曲水贫
绦阙朝归散玉珂不游不饮奈春何皇仁聽使欢娱极白简从君冷峭多
碧柳红桃照眼春绮肴芳醴集朝绅自嫌林野疎顽迹难预风流席上宾
上苑花繁高覆墙曲堤风暖柳丝长炉边应有步兵尉瓮下难寻吏部郎

孙器之奉使淮浙至江为书见寄以诗谢之五首

?矢迎山驿輶车下帝台夜看牛斗分应有使星来晓棹旌旗迴暮河钲鼓喧商船极目避汉使
一何尊吴酿木兰春【苏州有木兰堂酒】红鲈白锦鳞玉盘聊下筯初识紫丝蓴

岫贴晴天濶舟缘石岸深【吴江中石岸长数里】遥知作书处?裊緑波心

沙渚鸕争飞波光可染衣松江异淇水信美不如归【器之家卫州】

传家集卷十二

卷十三

<集部,别集类,北宋建隆至靖康,传家集>

钦定四库全书

传家集卷十三 宋 司马光 撰律诗八

送导江李主簿君俞

学海无涯富辞锋一战勋声华掩终贾赋颂继渊云五斗为边吏千仓饱戍军明恩美尤异优秩赏能勤黄祖阴怀怒张汤巧用文折虽因木秀烧不变兰薰迹有穷通异心无得丧分龙蛇宁久蛰玉石岂俱焚蜀国花饶思临邛酒易醺西风时有意尺纸慰离羣

送峡州陈廉秘丞三首

宜都贤太守治迹古人齐虎负衆子去凤环羣鸟栖行增潁川秩别降武都泥正恐还朝速春林未子规郡府猿声外旌旗鸟道边楼高出楚塞烟霁识巴船襦袴嗟来暮簪绅惜外迁皇仁矜远俗非谓意疎贤地险三巴口江流百折蟠迥珂通峡响门戟照秋寒翠壁虎牙石素花狼尾滩孙刘置栅处细为写图看

送聂之美摄尉韦城

徒劳已足倦漂泊益栖遑短劔无三尺征衣共一囊折腰从事马替谒使君堂并日屡承檄无时不裹粮官曹大儿戏弓槊小军行破柱翻偷窟倾林索盗赃村墟旅顔黑风日故衫黄暝宿投烟舍朝餐?道桑唯忧课书殿岂慕荐飞章志气空磅礴才华浪激昂镌鑱圭始莹磨拂监尤光衣褐仍纏袴无羞俗吏装

送吴辨叔大名司户二首

元宰司宫钥旌旄压大河敢言趋府倦私叹折腰多机发何妨避光尘未免和艰难方远到庆阀肯蹉跎致远必自近如君岂橡曹鱼龙试春浪松栝露秋毫错落辞华富? 气节高垂天起肤寸无叹走尘劳

送杨太祝【忱】知长洲县

三吴佳县首民物旧熙熙专用清谈治非如俗吏为林疎丹橘迴稻熟白芒歆宜使民无忘严

修太伯祠

送韩太祝【缙】知钱塘

冠佩鬱相映由来积德家一时推隲异四海走声华图籍添舟重江山忘路賒夷涂指霄汉局
驥不须嗟

送赵书记【衆】之官华州

车马西城外遥遥未有尘辞梁犹带雪过洛渐生春幕府斜依岳关山曲抱秦曩来谩画拙不
必笑前人

送华亭沈主簿

执袂青门道萧萧马欲东暮云零落翠远树浅深红楚泽吟声里吴山醉眼中相思杳何许野
鹤唳高风

送郑推官【戡】赴邠州三首

形便邠公国旌旗拥将坛秦云低落日塞树怯春寒草檄无留思投壶不废欢还应笑黄卷寂
寂守儒官百榼行春乐千弓从猎豪苦吟边月冷飞镒野风高奇策鞭殊俗长纓系不毛输君
跃马贵一等着青袍骄虏已归计圣朝方寢兵时闻候火入非复塞尘惊秋岭无南牧春田恣
北耕休穷西海路辛苦学甘英

送何万下第归蜀二首

十上终无就才高定复论清时守儒术白首在丘园远树隐残日孤烟生暮村扬鞭万里去几
许不销?失意流年老残春对夕阳可堪临远道更复举离觞花柳已萧索云山复渺茫西风如
有意音信勿相忘送王殿丞【景阳】知眉山县二首【先公与秘阁府君相继为利州路转
运使予与眉山同年登第】

畴昔侍严亲俱为彩服人游兰已多益得桂复同春风树悲欢异萍波聚散频峡中尽遗事何
处不沾巾君行杳何许万里蜀云西野色春期近林烟晓意迷天藏巴峡小星逼劔关低莫使
乡愁乱咬咬信子规

送朱校理【案字廉叔】知潍州

东国连年水伤稼使君到部即行春茫茫四野潢污竭鬱鬱万行桑柘新俗不好奢田器贵狱
无留系吏家贫齐人忽怨归朝速自是承明侍从臣

送孟着作【翱字仲习】知济陰

圣主焦劳意谁云百里轻东州比灾害剧令选精明水去良田阔人归旅穀生闻阎还旧观鷄犬变新声盗散疲民活奸穷老吏惊政成知不日双耳为君倾

送冯状元【京】归鄂州

夙昔负奇节琅然为衆殊下韝连得隼出手尽成卢喜气兼邻曲荣名溢道涂风云俱动色非复旧江湖

送吴耿先生【先生通六经大义客閩中今还建阳北山】

儒服若烟海几人潜圣心难才成自昔贱学况于今夫子独神解明时何陆沈大羹无和味至乐寡知音礲礲貂裘弊飘萧鹤发侵游秦不得意思越动长吟甌米难求玉经囊益少金拂衣谢宾友纵棹指云岑积叶迷幽迳荒藤络旧林涧猿惊重至野老喜相寻山色犹当户弦声不变琴人生贵适意何必慕华簪

送高陟归金陵【三举不登科以好学孝弟闻於乡里】

之子秣陵去悠悠天堑东帆开晓风疾潮落夜江空在昔才华盛至今人物丰山川气虽尽龙虎势犹雄卞玉已三献齐禽会一冲当令关下吏洗目认终童

送僧聰归蜀

翠柏老精舍红尘倦帝城千山一锡远万里片云轻江栈纡还直天星纵复横听猿应更喜还是故乡声

送史馆任祠部【颢】河东转运使

问望簪绅旧恩华雨露重图书周内史汾浍晋全封秀发千寻壁寒生百链锋归时门有戟惜别更从容

送冲卿通判河中府【校理吴充】

闻道名都行有期依然想见昔游时寒光一曲秋河转翠岭三条夕照移孤竹旧风民有让重华余教俗无疵不须到日方登历已在君家十二诗

送史馆唐祠部【询字彦猷】江南西路转运使

豪杰争唐鹿江南号富强明时虽混一余俗尚雕伤税版诛求急词曹牒诉忙皇心愍颓弊使
节付才良贪吏先投绂奸民尽越乡间阎无插笔田亩有栖粮汉阁归期阔隋河去驿长风高
片帆疾钲鼓入秋光

送张寺丞覲知富顺监

汉家五尺道置吏抚南夷欲使文翁教兼令孟获知盘羞蒟酱实歌杂竹枝辞取酒须勤醉乡
关不可思

送二同年使北

华缨下玉除天子宠匈奴虽复夷风陋犹知汉使殊夜烽沈不举秋柝寂无虞何必燕然刻苍
生肝脑涂【右吕侂叔】云愁雪欲零四牡出郊垧古塞烟华紫寒沙日气青金门秘鸡树朱
节耀龙庭几夜天街北遥占汉使星【右李公素】

送沈寺丞绅知南昌县【字公仪】

长江湛湛带枫林古木寒云县寺深老吏不能容狡狴细民无复有冤侵洪崖丹井闻犹在徐
孺衡门说可寻寧复淹留如宝剑更令牛斗气沈沈

送王校理【字公和】守琅琊【沂公兄子为公後】

金门倦鸣玉千骑出东方封略依沧海粉榆近故乡秦碑苔蚀字郾稻日翻芒国吏遥应识当
年丞相郎

送龚章判官之卫州【新及第】

几砚昔年游於今成十秋松坚终发石鱼变即辞流近郡无飞檄清时不借筹淇园春竹美军
宴日椎牛送王瓘同年河南府司录【字文玉先君尝为此官】

彩服昔为儿随亲宦洛师至今余梦想常记旧游嬉佐史头应白书楼树已欹闻君行有日使
我泪交颐

送王彦臣同年通判亳州【字伯逢】

先朝御六飞亲谒瀨乡祠牛酒当时惠衣冠此日思仙踪丹有竈天瑞桧生枝圣主怜耆旧题
輿得吏师

送茹屯田【孝标】知无为军

叠鼓鸣铙迎候新军牙子子倚淮津聊应衣绣过乡曲不作引章惊故人荻迸短芽淝水暖荷浮圆叶灤湖春使君此去荣夕夕少犹是当年书劒身

送邵不疑知常州

宦学不营身京华费十春非贪为郡乐意欲与民亲祖帐青门道归帆扬子津江山旧游在烟火故乡邻敢惜离群阔欣闻得吏循嗟余一囊米深负鬓丝新

送聂之美任鸡泽令

赵魏高气侠到今风俗然椎埋吏难禁击断世称贤明府宜更瑟罢民庶息肩无如茧丝者急欲纵敲鞭

送张秘校【牧】知分寧【献臣父】

百里大夫官不轻莫嗟领上发垂星人生穀禄偏宜晚世路艰难不厌经数曲秋江紫县白几峯霁色入帘青于公向日多陰德已有鵷鷺在帝庭

送韩直讲【铎字子文】郢州寧亲

车马俨何之东冈旧有陂三年别亲意千里達家时去仕元戎幕来为太学师寧须负斗米不复断机丝物色迎归鞚光辉入壽卮人生无此乐此乐独君知

送丁秘丞【翊字公佐】知雍邱

古县跨河流人繁军市稠羽飞朝暮驿鲜叠往来舟兄擅才华久时推政治尤足犹妨老骥目不碍全牛从道西来近能无东望愁时因趋上府穷巷一相求

送计先辈【泰符】尉宗城

红尘久帝城高价动公卿竹栢寒方茂骅骝老更成冰霜驱马瘦书劒束装轻丞相虚东阁遥知倒屣迎送赵殿丞【象字子舆】归成都【祀明堂礼毕子舆新升朝以恩官其父大理评字事赐告归寧得其除书以俱二三同舍为诗以纪其美仆得回字】

蜀栈锦衣来高堂绶笥开恩辉同日至喜色共春回驷马过邻社朝裾捧壽杯吾生无此乐空使寸心摧送张都官【肃字子庄】江南东路提刑【得前字】

楚俗号难治司刑尤择贤危疑片言决舒惨一方专松不雕寒色丝曾断直弦清风过江外应在下车前

送杨秘丞【秉】通判扬州

苦闻小杜说扬都当昔豪华今在无江势横来控南楚地形前不瞰东吴万商落日船交尾一市春风酒并垆得意莫忘京国友踏尘冲雪奉朝趋

送光禄王卿【周】致仕归荆南

九列谁云非显涂人生已不负为儒拂衣长揖夔龙贵散发还为黄绮徒白鹤归飞心自远青霞高举势何孤千金尽与乡人费不向江头买木奴

送王殿丞【恪】西京签判

清白世风存王公复有孙挺生如玉树不竭似淮源日背嵩峯紫春添洛水喧幕中多胜友肯使负芳樽

送谢都官【顗】知光化军

廐吏整车马忽忽办晓装青鞵出闾阖朱旆指沧浪野店杏初发津亭柳已黄行行不可驻犹及劝耕桑

送仲更归泽州

太行横拥巨川回三晋由来产异才展墓乘春走乡陌负书拂晓下兰台河阳路侧花应合天井关头雪未开会使乡人惊六印莫羞今日弊裘来

送刘观察【从广】知洺州

汉家英俊士袞袞出金闾久袭通侯籍新腰太守章畛封连故赵庐井带清漳春色迎铙吹应忘道路长

送晁校理【仲衍字子长】知怀州

鸡犬相闻桑柘春光明润帝乡邻群峯斜转太行角万谷同趋马颊津簪组倾都邀别袂壶浆满路候行尘非君厌薄承明直天子方今重治人

席上赋得榛字

微物生山泽萧条荆棘邻何人掇秋实此日待嘉宾虽无木桃赠投此寄情亲

送师道知长溪因归覲省

羈旅帝城久逢人青眼稀闻君又当去使我益思归佳色邻乡树高堂望彩衣春流先自疾心出片帆飞

送次道通判西京

相府新承檄兰台旧校文题舆荣得士把袂惜离羣首夏郊原秀晴阳草树曛觚棱日边远关塞雾中分翠?林端出飞泉竹外闻金羈游烂熳珠履醉缤纷人服声光重官无簿领勤归期肯留滞汉主待渊云

送刘仪先辈大名尉

潭潭相府开旌骑拥三台闻道廷中吏无非天下才策名新振拔把板尚低回勿为卑飞困青冥尽此来

送皇甫寺丞【穆】知蓝田县

南山三辅剧百里古诸侯谁为弦歌小不分宵旰忧烟横辋川暝云照武关秋安得无羈束从君一纵游

送祁峽颍阳主簿

苍山临县郭云木冷萧骚人有渔樵乐官无簿领劳垂天起肤寸合抱本纖毫志意诚修立归飞羽翼高

送李尉以监丞致仕归闽中

行行歌式微浩叹返荆扉却着登山屐尽焚趋府衣溪清鱼影乱竹闇笋牙肥应悔浮名误空将白发归

送李祠部【复圭字审言】知滑州

东郡堤繇苦曩来烟火疎提封百里远生齿万家余贤守车才下疲人意已纾行闻謡五袴京廩满郊墟

送田校理【谅字仲孚】知晋州【前判吏部南曹】

铨筦萃贤豪夫君主剧曹长才沛余裕衆论蔚推高逮此分符贵知无顿刃劳公卿如有缺不

独赐金褒

送人为闽宰

万里东瓯外溪山秀出羣乡人皆嗜学太守复工文正用慈良化居无牒诉纷谁云远京国佳
政日相闻

传家集卷十三

卷十四

钦定四库全书

传家集卷十四 宋 司马光 撰律诗九

送李才元知广安军归成都覲省

皁盖五骅骝今来异昔游
箎壶交里舍饶吹下瀛州
壽酒行当举归鞭不可留
春光久相待先在锦江头

送上雒王推官【经臣】

墨绶百里宰红蕖幕府僚民淳无鬪
辩地胜得逍遥日上云未散春深雪不消
知音已交荐勿茹紫芝苗

送瀛州签判苏秘丞【案】

高陰十万兵幕府藉时英
塞上风犹劲关南春未生
投壶边柝静倚马檄书成
不忘尘中客征鸿可寄声

送周寺丞旼知洛南【周华人】

太华指商於中间百里余
稍行山驿远渐与世尘疎
楚塞参差接秦民错杂居
惜哉非繁肯不足试投虚

送齐学士【廓字公辟】知荆南

汉家太守治才高楚国山川气象豪
旗旆逶迤蟠梦泽楼船鼉虬压江涛
雄名谁复知宣武遗爱犹应祀叔敖
何必三年求奏计诏书朝夕赐金褒

送王待制知陕府

畴昔诚相契间关分不渝【先君知凤翔府待制通判府事以道谊相知非直僚友而已】
絶弦悲宿草抚首念诸孤位略尊荣间年忘德齿殊清陰容息足重语辱嘘枯【待制主漕京西光仕武成幕府仍叨獎引】
鸛阁騫云表虹旌拂海隅明光新出綵陕陌重分符丰润还桑梓
謹讴复路衢寧须更条教耆旧已箎壶【待制再为陕牧先实陕人】

送张景淳知邵武军

闽岭宵何在东南千里遥
此离伤草草会合更迢迢
隋岸微吹絮吴江欲上潮
肯无同舍念回首弭轻桡

送章伯镇知湖州

江外饶佳郡吴兴天下稀
蓴羹紫丝滑鲈脍雪花肥
星斗寒相照烟波碧四围
柳侯还作牧草树转清辉

送王伯初通判婺州

煜爚屏星驾迢迢婺女区
岚光晴向背溪溜暖萦纡
万室鸣机杼千艘隘舶舻
若逢耆旧问能说隐侯无

送张少卿学士【子宪】知洪州

相府典刑在朝闺望实高
紬书荣史观典乐重卿曹
夷路迎飞鞚桑林应奏刀
家藏传旧学庙鼎刻前劳
絃服屯千骑连樯閤万艘
劒芒冲夜气阁影动秋涛
风色传花信烟光拂酒膏
使君专问俗无意在游遨

送昭远兄归陕

种种亲头白帝城难少留
倚门应有望列鼎本无求
清夜多归梦红尘厌久游
此行殊捧檄辕下五骅骝

送云卿知卫州

汗简成新令褰帷刺剧州
韦平家法在邵杜治声优
野竹交淇水秋瓜蔓帝邱
三年归奉计肯顾石渠游

送石昌言知宿州

炜炜符离守中流簇鼓旗
柳陰浓不断舟势激如飞
魏阙行归奏承明祗慙违
星轺晨夜度尺素勿令稀

送何济川知汉州二首

金马从容乐问君何所之
客心影若梗亲发髯如丝
旧学已孤陋素交仍别离
执经时有问使

我复从谁千骑拥朱幡青霞昼绣还复寻题柱迹重过弃繻关晓栈流云湿秋湖脱叶殷久游
今得意真不愧江山

送程端明【戡】知成都

高阳将幕开濯锦使旌来欲识关头雪正如江上梅宵衣矜远俗露冕寄良才岂待三年最修
梧茂帝台

送聂秘丞之美宰桐城二首

问子青云器胡为不少留未能充禄养安散及身谋卓尔千人俊居然百里忧连城价终在自
是玉工羞七载一相值恍然如路衢形骸渐枯槁志业转荒芜往事云过眼新愁雪染须明朝
又分首上马即重湖

送蒲中舍霖致政归蜀【前栗亭令】二首

厌苦折腰久飘然黄鹄飞田园未芜没邻曲有光辉昔奋儒衣去今纡朝绂归人生贵知足得
此已为稀念昔两髦日乌奴同燕游随时自有乐何物可为愁岂意今头白相逢欲涕流凭君
访题壁好在水西楼【光侍先君为利州路转运使与君屡游乌奴山寺题名屋壁】

送李侍郎【柬之】西京留台

先公勲烈盛塩梅清白仍闻世济才华省拂衣辞簿领长衢回首谢尘埃嵩峯排雾依稀出洛
水迎人迤邐来寄语马前头白吏何殊昔日李西台

送元待制【绛字厚之】出牧福唐

瓯越东南美田肥果稼饶况怀新赐绶重过旧题桥食足奸回熄风移狱犴销长才报政速铃
合日逍遥

送吴驾部【处厚】知真州

羈托屏星驾同随丞相车终朝容?拙经岁庇迥疎共此趋云阙旋闻建隼旗江淮一都会游刃
必多余

送王着作【慤】西京签判

古来都邑美孰与雒阳先况复元侯贵兼之从事贤玦离横阙塞珠曲逗伊川熨眼登临乐送
君空惘然

郭氏园送张仲通出刺棣州【得朝字】

名园送嘉客冠盖去倾朝
小雨尘微敛余寒酒易消
鴈归春近塞日上海生潮
北道平如掌东风五马骄

送裴中舍【士杰】赴太原幕府

元戎台鼎旧大府节旄新边候
正无事宾筵况得人山寒太行晓
水碧晋祠春斋酿蒲萄熟飞觴不厌频

送致仕朱郎中令孙

世间荣利无穷物奔走劳劳何所之
仕宦为郎非不達功名有命待无时
橐中虽乏千金直膝下常?两绶儿
细校人生能此少好从闾里乐期颐

送宋郎中知凤翔府

昔解陈仓印於今二十秋
双鳧久东上五马重西游
骁骑行关外壶浆拥道周
民心已化服条教不更修

送王都官【淑字尤之】官满还都

粹美清庙器可嗟沉下僚
优游仲举坐洋溢海沂
謠奏课应居首知音况满朝
从今黄鹄举眼令望青霄

送昌言舍人得告还蜀三首

迢遞铜梁道凝严青琐闱
负书当日去鸣玉此时归
乡树迎朱轂江花照锦衣
临邛不足并荣耀古今稀
凄怆怀桑梓劬劳咏蓼莪
树风今远矣鼎食奈悲何
劒阁登车近秦关屈指过
腾装才首路夕梦已江沱
富贵动归思由来光里闾
戒门羞主父负弩笑相如
外物有荣悴中心无戚疎
遥知见亲旧不改布衣初
送张学士【师中字吉老】两浙提点刑狱【赋得清字】

朝家重典刑书府借时英
钲鼓喧江下云山拂眼清
秋风鲈膾美书日锦衣荣
勿似朱翁子空令守邸惊

送王书记【申字应辰】之官永兴

白发添新镊红尘满弊衣
人生适未值吾道岂云非
巩洛风烟远函秦草树微
长安春酒美行乐勿令希

送朱贛方【处臣字表臣】提举江淮运盐

熬漉沧波耗征输泽国贫
嬰罗矜赤子运筴借能臣
拜手觚?晚浮舟浪荡春
东南待苏息别酒莫逡巡

送次道知太平州

浪荡春流满芜湖候吏迎
旌旗晓日丽钲鼓野风清
颺喜红尘远休嗟素发生
专城方四十自古以为荣

送苏屯田【案字公佐】知单州【苏先君尝知单父县】

佳郡望都城相闻击柝声
宾朋才执别耆旧已前迎
彩服当年戲骊驹此日荣
弦歌应尽在琴调不须更

送李学士【及之字公远】使北

征盖霜空迴飘飘迎塞鸿
虏牙侵海角汉节下天中
酒薄陰山雪裘寒易水风
边声不可听归思浩无穷

送薛水部十丈通判并州

十万貔貅士旌旗晋水阳
元戎倚耆硕别乘选才良
秀直寒松节精明利劒鋌
知君留滞久从此欲腾骧

送祖泽之守陕

声教空岩穴夫君集帝庭
辞华动丹宸光价塞青冥
俊德争推轂荣涂易建瓴
陆离寒水玉磊落曙天星
得丧谁先识艰虞困屡经
蹉???渥洼足漂泊凤凰翎
粉署疏恩纪甘棠寄典刑
仁风思布濩疲俗待绥寧
贱子良多愧余光每乞灵
题名联士版占籍备民丁
种种颠毛白萧萧垄栢青
陌头瞻阜盖独立涕飘零

送贤良陈著作【舜俞】签书壽州判官

海隅方万里豪隽几何人
百汰求才尽三薰得士新
声华四方耸器业一朝伸
佗日苍生望非徒泽壽春

送魏寺丞【广】赴辟秦州判官

征西大府开後乘得高才区脱烽烟静渠搜臧贡来陇云低玉帐羌舞奉金罍信美从军乐修梧茂帝台

送丁正臣知蔡州

？ 汝水滨千骑拥朱轮悬瓠遗基古鞶囊吉梦新丹心留紫闼清耳远红尘须识明君意先应试治民

送周密学【沆字子真】真定安抚使

玉帐前茅举铜鱼左契分平生公望着期月政声闻陌上壶浆溢潭边花气曛遥知待新将民物两欣欣

送燕谏议知潭州

长沙地饶美贾谊独伤悲自古临荣辱几人无怨咨使君拥符节大舰出江湄意气陶然乐应无吊屈辞送李益之侍郎致政归庐山二首【益之好谈禅故效其语】

儒业金华贵归心白鹤孤江山依旧在轩冕邇来无啸咏谁当共登临未索扶浩然知此乐迴与世人殊水底元无月衣中自有珠六尘皆外物万法尽迷涂瀑布寒云湿觚棱瑞气扶遥知至乐地不异在京都

送惠思归钱塘

孤岫平湖外禪房老栢陰倦游谙浊世独往遂初心夜雨灯窗迴秋苔屐齿深勿鉏山径草便有俗人寻

送僧归吴

高枕聊成梦晴空忽见花浮生尽是客何处得为家旅食帝城久归舟泽国賒勿因菰菜味回首浩无涯

送晁秘丞【端彦】通判雄州

少傅名德重蔚然人物师群孙满丹穴嘉瑞尽长离勿叹毛羽短已惊文采奇勉哉勤志业余庆未应衰

送向防御【经】知陈州

千骑去翩翩专城上少年韦平家好学陰马世称贤官用才能进恩非雨露偏想闻河润远封
畛帝畿连泉水诗送吴都官【太元字一翁】分司归和州

泉水出幽谷原流本自清萦回徧中国浩荡入东瀛峡口春雷怒潭心晓监平悠悠随所值行
止两无情

依前韵奉送才元和甫使北

析木带天津华星随去人扬旂踰絶漠负弩候前尘出塞风霜苦归涂杨柳春会书专对美??
满秋筠

送丁正臣通判复州

得失故有命世人空自劳冬温少霜雪松短没蓬蒿孤宦千里远荣名一旦高回看碌碌者太
华与秋毫

送吴仲庶知江寧

江南佳丽地人物自风流青骨灵祠在黄旗王气收衣冠余旧俗歌颂乐贤侯正恐还朝速江
山未徧游

长安送李尧夫同年

昔岁琼林花气曛今朝长乐柳梢春事随流水滔滔度鬓结繁霜戢戢新世路饱谙都是梦人
生可贵莫如身会须筑室临清洛相与携筇戴葛巾

送罗郎中登管勾玉局观

官名为玉局已与俗尘疎钟出寒松迴香疑古殿虚乡间非甚远俸禄岂无余谁道神仙乐神
仙恐不如

送刘仲通赴京师

圣朝方考牧蕃育寄才能屡别良可叹闲游不复曾行尘遵洛汭朝骑对觚棱灊上秋台迴归
来正好登

送伯淳监汝州酒

惟知负米乐不觉抱关卑出处两得意是非皆自知

送尧夫知河中府二首

耆老承风旧丝纶锡命新展禽安屡黜原宪乐常贫执志穷通壹论交表里真但祈深自重膏泽望斯民河抱城根曲山侵地势斜周余古楼观舜俗旧人家回首游从阔装怀牒诉譁何时重载酒同醉洛阳花

送白都官归长安

丈夫那肯浪低眉薄宦空添鬓里丝泸水归来山浩荡都门辞去菊离披黄鸡白酒五陵乐杜曲樊川九穀宜复见夫君行直道崆峒气俗未应衰

送雷章秘丞知芮城

西伯昔断讼令名存迄今南临大河曲北倚首阳岑俗被圣贤化人多礼让心夫君老经术终日想鸣琴

春帖子词

皇帝合六首

肇履璿玑历重飞缇室灰寒随土牛尽煖应斗车回鸾路迎长日农祥正晓天九垓同燠沐万物向蕃鲜盛德方迎木柔风渐布和省耕将效驾击壤已闻歌候鴈来归北寒鱼陟负冰相乌风色改阳谷日华升浮阳满野白溶溶泽底山椒淑气通草木岂能知造化一华一叶尽天功

漠然天造与时新根着浮流一气均万物不须雕刻巧正如恭已布深仁

太皇太后阁六首

盛德初临震阳和已动坤发生天施大厚载母仪尊种桃临玉井裁胜刻金花借问此何处崑山王母家长乐晓钟残皇舆入问安东风犹料峭冒絮御余寒庆寿风烟接未央飞楼复道欝相望春来无以销长日闲取经书教小王

冰渐半解波先绿柳叶未生条已黄四海澄清天子孝朝回日奉万年觞

东宫归政五年余隐几时观黄老书禁闕无为民自化熙熙不独在春初

皇太后合六首

母德思齐盛天心奋豫初青晖凝輶路佳气拥宸居暖日初添刻柔风乍袭衣弄孙时哺果观

织屡临机脍肉纷银缕兰芽簇紫茸太官遵旧俗岁岁与今同钗上花开海鷺飞红缯翦萼蜡
粘枝风前飘荡参差羽还似瑶箱呈瑞时

玉漏声残金殿开乘輿清跸问安来尽将草木欣欣意同与新春入壽盃

裁缝大练成春服慈俭由来性所鍾肯使外家矜侈靡车如流水马如龙

皇后合五首

種陸献新种禕?澣旧衣玉鈎随步輦行看采桑归樛木犹藏叶夭桃未作花六宫歌逮下四海
咏宜家沟暖冰初断牕晴雪半消余寒不足畏涂壁尽芳椒宝胜金幡巧鬪功彩花蜡鷺扬和
风玉盘翠苣映红蓼捧案朝来献两宫

春衣不用蕙兰薰领缘无烦刺绣文曾在蚕宫亲织紵方知缕缕尽辛勤

夫人合四首

壁带非烟润金铺霁景鲜绣功添采缕和气入繁弦翦彩催花发开帘望鷺归藏?新过腊习舞
竞裁衣绮窗绣户又东风丹掖游陪岁岁同但愿太平无限乐何须三十六离宫

圣主终朝勤万几燕居专事养希夷千门永昼春岑寂不用车前插竹枝

传家集卷十四

卷十五

钦定四库全书

传家集卷十五 宋 司马光 撰律诗十

仁宗皇帝挽辞二首

声教万余里文明四十春茂勲留信史盛德满生民共适禽鱼乐安知橐籥仁百年龙驭远空复仰威神雾晓铜鱼跃霜寒闾阖开哀声际海发灵仗拂天来别寝严虚位重闾闕夜台柏城空有路无复属车回

英宗皇帝挽辞三首

盛德师尧舜英姿肖祖宗太阳光徧照沧海量兼容鸿业知能继齐民望可封如何未五载已上鼎湖龙虹瑞流朱邸童髦侍紫宸简心天与子授位帝知人学古功时敏钩深道日新宜然三百载民物仰威神谏省臣无状龙鳞昔屡婴恩深忘位贱义重觉生轻不正诛锄法仍蒙獎叹荣百身何足报天造固难名

神宗皇帝挽辞五首

决事神明速任人金石坚天机先兆朕圣度蘊渊泉仁义生知性恩威独化权乾坤无毁息长与大名传听政涉中昃观书度夜分周王忘自逸汉祖不知勤棣萼因心友云章落笔文佗年紬石室光大继皇坟至德成无象徽名避不居期门弋猎絶步辇宴游疎钱列金釭暗兵严武帐虚蓬莱日晏仗犹望驾宫车螯禁叨承诏金华侍执经微生轻草芥圣泽濶沧溟鹿性安林野葵心注阙庭尧云不可望白首涕飘零式道清行马灵輶下陞帘云奔同輶集雨泣兆民瞻石阙苍烟暝松门白露沾载弓徒陨絶无计附龙髯

光献慈圣太后挽辞二首

麟阁承家庆轩星应德晖帝猷陰有补嫔则动无违遽就苍梧野空余大练衣只应彤管在万古播鸿徽四纪禕衣盛两朝长乐尊九州贡甘旨万乘问晨昏明辟归元子嘉谋赉孝孙群生资后土难答化光恩

相国魏忠献韩公【琦】挽辞三首

瀛海訏谟定宗祧指顾安鸿勲柱石壮劲节雪霜寒翼亮三朝久初终一德完如何未黄发塋

栢已丸丸爱物威容悴忧公宿疹加孤忠贯白日美志掩丹霞行路皆惆怅闻风悉叹嗟英灵
覲宗祖犹想佑皇家惻怛动旒宸鸿胪葬老臣箫铙震涂口绋纛隘漳滨久大英名在哀荣异
礼陈丰碑纪遗烈长泣邺城人

相国郑元宪宋公【庠】挽辞二首

仁圣初承绪敷天吁隽贤得人兹最盛射策独居先禁省英声远岩廊至化宣辞荣还故第三
事究高年邦光华袞补家宝素书陈东合簪裾散西芒宅兆新泉台无复晓柏迳不知春独有
高文在芬芳继古人

相国祁正献杜公【衍】挽辞三首

舟楫才猷大冰霜德操坚陶钧成茂业书史乐高年瞻望簪绅共吁嗟馆舍捐举时无异论方
信令名全钧玉吴台旧诛茅梁苑新位登华袞贵家似布衣贫直道高当世清风遗後人千秋
寒照目竹帛不栖尘先子同乌府知音诚皦然脱纆来拜伏抚首辱哀怜迨此泉扃掩空悲尘
网牵无由怀酒絮撒涕望新阡

相国广平文简程公【琳】挽辞二首

明直君臣合安危将相兼金章四辅贵玉帟万兵严御侮长城隐临繁利刃鋤南山賁岩石何
以慰民瞻帝诰封泥紫皇坟杀简青坐谈安玉垒专对讐龙庭黼黻昭文理冰霜莹典刑英灵
入箕尾终古作天星

相国颍庄敏庞公【籍】挽辞三首

儒衣临絶塞庙畧运奇兵缓带羌尘静灵旗海雾清公心结明主陰德庇羣生名遂身仍退人
间五福并铭旌远明?骑吹去低昂三鼎功名大重泉日月长鹤飞来吊客牛卧卜连冈车马还
城郭悲风满白杨沧波与邓林鱼鸟久飞沉一旦成陈迹何人识寸心高山亡景行流水失知
音泪尽离东合归来破故琴

司徒开府韩国富公【弼】挽辞四首

天佑休明祚时生隽杰臣贤科首多士宰府泽生民灿烂三台正冲融四海春欲知甄冶力试
问白头人松漠骄无信渔阳广聚兵移书侮中国决意背齐盟直气轻轺入英辞左衽惊虏归
烽火??县复升平大吕功名重鸿毛轩冕轻闲居客愈盛鬻出市皆倾溟海涵容大龙门谒见
荣谦光俨在目恸哭望佳城杖屦还私第精诚在本朝爱君老不懈忧国没方昭东合秋牢落
西芒夜寂寥只应忠亮志气运不能消

参政正肃吴公【育】挽诗三首

皇家延茂异鸛立迴无伦高议谁能夺英才自有真骅骝寧受紮冰监不栖尘试为咨清论风流第几人辞华已独步政治复无前吏不容三宄民皆戴二天於今知和寡自古愧才偏惆悵棠陰下仁风尚藹然【公 为陕牧光实陕人知公之政】

念昔少年日謬登君子堂重言何以称厚德不能忘【光昔以文请见公答以长歌过有褒叹】玉麈声容在泉台岁月长凭谁寄清泪为我洒松冈

北京留守太师王公【拱辰】挽辞二首

卢肇时推重终军衆共贤何如夺标日未及弃繻年官历清涂徧名居美事先人间福有五视履岂非全昔日程文士【光应举公发解】中间侍坐宾游陪慙晚輩待遇过佗人方叹龙门远俄惊马鬣新西园行乐处引领但沾巾

赠太师文公挽辞三首

汾晋地形美古今多鉅贤况承勲烈後宜有庆灵传着位登朝古声华出衆先起家从此始圭组遂蝉联美化流民物薰然遗爱多栾公当日社邵父至今歌庭有三鱣集门容駟马过欲知余庆在公鼎格平和夏屋封何处山田有卧牛蟠根走伊水回首负嵩丘忠孝家风备哀荣礼秩优龙鸾舞宸翰万古照松楸

枢密太傅文恭胡公【宿】挽辞二首

行冠乡人品文为学者师黄裳蘊厚德玉律俨清规大节人难夺嘉谟世莫知仪型不可见遗烈满丰碑徘徊游内禁密勿赞鸿枢陰德加民物清名服士夫天方遗一老星忽陨三吴疑从龙髯去来云在帝都赠太子太傅康靖李公【若谷】挽辞二首

黄发今彫丧苍生欲奈何散金才极乐曳杖已成歌十郡余恩在三台故吏多位崇仍有後五福更为多鹵簿去悠悠西郊乱叶秋旒翻寒日薄笳咽断云愁吊客门飞鹤佳城山卧牛灵车今不返洧水自东流

宣徽惠穆吕公【公弼】挽辞二首

奕世台衡贵盈门绂冕荣遐方流惠化殊俗讐威声宥密资忠力安平寄老成遽骑箕尾去何以慰苍生维岳人皆仰长城衆所依远猷方克壮昭世忽长违象设俨如在英灵宵不归唯应令名久竹素藹余辉

宣徽使文肃郑公戡挽辞二首

璿玑敷帝命金节护边兵尽付将军制真为儒者荣扶摇方上击蒙汜忽西倾罢市人相吊纷

纷满百城柳絮丧容盛江山故国遥清时独长往何日重来朝事与秋云断荣如晓梦消西风虎丘路马鬣又崔嵬

又代孙检讨【瑜】作二首

湖澄翠岫孤胜地古东吴气象常时秀英灵何世无金闺演王綍玉帐绾兵符炜?照乡曲从兹益重儒人为天地客处世若浮休岂有生长在祇知名可留露沾寒草晚风啸白杨秋地下求文友应从顾陆游

翰林彭学士【乘】挽辞三首

夙昔游清贯时流籍重名讐书石渠秘视草玉堂荣吉兆虚三鱣凶期告两楹子云思故国坟树必西倾平生对交旧万日正如初不复知荣贱都能忘戚疎遗灵瞻素几伪物屏涂车家事何萧索空余万卷书祖奠垂将撤笳箫俨欲行野寒嘶故马树转出新旌泉路幽无底鱼灯暖不明如何齎美志鬱鬱向佳城

杨侍郎【察】挽辞二首

时论归清德皇心重老臣祖风终鯁直家学本深淳便殿谈经久安车就第新如何金未尽奄忽弃乡人忧国心如石当朝有古风挂冠虽在远遗札不忘忠飞旄西归洛新阡背倚嵩还令往来客下马白杨中

王侍郎【琪】挽辞二首

弱冠献奇策居然终贾才赋成平乐馆歌奉柏梁杯【侍郎天圣初以江都主簿上书献十策召试馆職尝侍宴後苑赋山水石歌首出诸文士独被褒赏】丽藻留昭世英游隔夜台中埋美玉谁见不兴哀

振鹭辞灵沼冥鸿翔太虚清朝解鸣玉旧里挂安车诗酒江山胜园林俸禄余所忠今不往谁奏茂陵书

郑侍郎【紆】挽辞

云梦气回复比肩生隼豪司农家学富廷尉里门高骐驎昔千里凤凰今一毛即邱余庆在终应吕?刀

侍读王学士挽辞二首

石室书编富金华讲席重荐神归博洽鸣玉称雍容贰负累囚象尸臣古塚踪老成今已矣咨

访欲谁从杖底潜蛇影
門陰集戴鷺玉樓新記就石椁旧銘沈篋有封畧札羸无遺子金寂寥
封馬鬣秋色淨松林

参政尚書文簡丁公度挽辭二首

凤跽游汾曲非熊得偉人
閨台尤显重訓誥愈深淳
論道參黃閣橫經侍紫宸
如何天不憖志業未全伸
丹闕晨趨退蕭然忘世榮
閑齋虛自白永日澹无營
脫落簪纓累沈冥丘壑情
貪夫誠有激千載素風清

侍讀張學士【瓊】哀辭二首

喜怒与榮枯居之悉晏如
稍門多執筆至老不拋書
常愧无能極曾沾清論余
秋風郭門外雨泣望喪車
凶夢歌洹水妖巢集戴鷺
未嘗余俸祿无以具衣衾
衰渙分倉谷翁歸賜府金
佗年純固傳寧使令名沈
【朝廷以公清貧?贈有加】

錢左丞【明】挽辭二首

煒?傳家學連翩射策榮
走丸過省閣破竹取公卿
埋玉嗟何早為山惜未成
空令澤宮友相顧泪纵横
【同年致祭者二十二人】

象設如平昔升堂不見君
尚疑言笑在忽念死生分
清論千秋雪浮榮一片云
泉台多少路何處復修文

紫微石舍人【昌言】挽辭二首

地勝岷峨秀時清隽父生
揚雄晚得祿何武少知名
性有圖書癖心忘綬冕榮
前年歸諭蜀不使里人惊
顧我非君比最為相得歡
平生游處久美行始終完
長夜忍埋玉秋霜不借蘭
西風濕襟袖空有泪闌干

邵少卿挽辭

北固后佳城東吳實德星
總帷長寂寞羽扇遂飄零
泉燭千年碧霜松數寸青
余庆知有在玉樹滿階庭

梅都官【堯臣】挽辭二首

兵形窮勝負史法貫興衰
落落虽殊衆恂恂不迂時
位卑名自重才大命須奇
世俗那能识傷嗟止為詩
漆灯无復曙柏徑不知春
南紀光華減中朝俊秀貧
淒清千古韵寂寞一邱尘
昇日昭亭下方多?酒人

臧郎中挽辞二首

积庆承前烈呈才会圣时践杨朝有籍治行吏为师僚友皆亲誉黎民每去思惜哉违世早志业未全施素履存诚厚虚怀待物真乡间昔相接朋友世弥亲遗札蝇头细长阡马鬣新九原那可作空复想音尘

张元常挽辞二首

为吏文无害临民政不苟浑金生自美古井澹无波方喜风鹏举旋闻隙驷过善人宜壽考报施定如何秀眉无足验结轡遽为灾乡曲三年别江山万里回林间飞旒入书劒逐舟来坟草枯还绿重泉不复开

王朝议【尚恭】哀辞二首

场屋推声价朝绅仰典型朱衣老卿列白首恋亲庭舟壑一朝失泉台万古扁音容宛在目争免净飘零乐易春阳暖孤高秋气清老惟知自适贫不问为生京兆开阡贵延陵题墓荣如何帝师笔纯孝纪名卿

邵尧夫先生哀辞二首

菽藿一簞乐蒿莱三亩寛蒲轮不能起瓮牖有余安高节去圭角久要敦岁寒今朝郊外客谁免涕丸澜慕德闻风久论交倾盖新何须半面旧不待一言亲讲道切磋直忘怀笑语真重言蒙跖实佩服敢书绅【先生尝以予为脚踏实地之人】

哭公素二首

负书游上国拾芹取荣名雅度津涯阔高文风雨惊忘怀翻得谤纵酒遂伤生忍使泉台客悵悵不自明丹旌倚輶车荣辱尽虚无半道骅骝顿先秋兰?枯儿痴才过亂亲老不胜扶家事今萧瑟寧将未第殊

哭尚穎【字公楚】

操业五常备艰难六极全仲尼难语命裨竈不知天弱女飘何许遗文散莫传官轻史不录後世孰称贤

哭刘仲遵父

天下才无几夫君独患多高文粲列宿英辩泻长河荣宦成朝梦浮生度尺波旧僚空执酒相与泪滂沱昔醉金明渚今来慧辩祠当年笑相视此日哭殊悲天迴川原净风高草木衰江梅

灵气在泉下复相知

哭马承之

平生千里别书问亦常来隼拂秋云击鸾兼霏雾回颶无高世艺安见出伦才有纸盈箱篋局封不忍开

传家集卷十五

卷十六

<集部,别集类,北宋建隆至靖康,传家集>

钦定四库全书

传家集卷十六 宋 司马光 撰制诏

殿前都指挥使节度使加宣徽南院使制【限二百字以上成】

国家选果毅之材以守卫中禁委谨信之士以敷扬大猷自非忠力冠伦识略高世折冲厌难外可以任爪牙之官谕志布和内可以受腹心之寄则何以克叶民望无旷天工在兹详求固匪轻受爰发休命诞告明庭具官某心通武经材应时用以礼乐慈爱为制胜之本以智信仁勇为和衆之资羞孙吴而不为慕方召而自任疑尔深念则物莫能窥截然长驱则敌不及避是以锡之六纛總此八屯士皆知方国以增重嘉其扈从之久积是勤劳之多宜峻宠名以昭丕绩俾奉宣於美德庶敦懋於肤公永念厥艰必有以称於戏竭股肱之效所以报恩荣罄夙夜之勤所以熙职业典听朕恣无弃尔成

翰林学士礼部侍郎除三司使制【限一百五十字以上成】

朕荷天地之赐施承祖宗之庆灵四方无虞万物咸遂而公私之积尚未丰衍岁小不登民有菜色岂朕所以姬煦抚循之未至将有司奉扬宣布之未称与何其设心之勤而收效之寡也以尔具官某性质之美得於自然而发挥於文追琢於学多士之秀无尔为先虽禁林清涂秩宗美仕居之积久誉望已优而古之进贤必试以事财赋之任於今为急求称其职金曰汝能是用命汝典兹邦计汝其勿以金穀为末而不恤勿以簿领为烦而不为九功所歌八政所重登平之业将汝乎取之

诚励举人敦修行检诏【限二百字以上成】

孔子称德成而上艺成而下故为四科以第门人而文学处末然则为士者文有余而德不足斯而已矣奚足尚哉国家宪章前古详延俊乂敷奏以言明试以功何尝不勤求敦忠屏斥浮伪列于庶位得人已多尚虑有司教导之方不登尽善登进之法有所未精是以士或背本追末弃实取华不知从学所以立身为文所以行远而谓能离章辨句则百行可遗非属辞比事则六经无用习尚成俗安恬不非此岂圣人所以立教之心而朕所以待贤之志哉自今天下之士其务以道德为师仁义为友进之於内而让之於外治之於身而施之於人才虽美不敢以自骄善未至不敢以自怠如是则穷居閭閻何病乎不達苟异於是朕无取焉仍敕有司明谕中外使咸称朕意

赐宰臣韩琦乞退第一表不允批答

朕以寡薄少承基绪未及究明师保之训更閱事物之变而遽失先帝之大庇膺四海之重任
忧惕危惧若涉巨川践于春冰实赖耆耄不贰心之臣朝夕左右同力協义用济于艰难夫选
贤任能广参同异何损於政设官分职论列得失亦维其常至於天时数沴盖以警诲朕躬非
专辅弼而卿遽自咎责抗章辞位是重朕之不德也卿其体兹眷倚之志专精致思广裕厥心
博采嘉谟以辅不逮

赐新除知枢密院事陈升之辞免恩命不允断来章诏

敕升之省所奏劄子今枢密院使副四员无容其间更置一知院事既非旧典骤增员数当无
事时四方闻之得无惊动耳目伏望圣慈如臣前所请若大名府永兴军已除用人即且乞授
臣陈颖一郡事且悉卿志气安裕明智自将屡更边藩尝佐枢府出牧於外迨今暮年朕惟汝
思俾复旧职宜夙夜竭力以副所期尚尔固辞殊失朕意夫登用贤隽忧在不多咨询大猷患
在不博设官随世何必故常今边境虽安而不虞当戒亟践乃位毋违朕言所乞宜不允仍断
来奏故兹诏示想宜知悉

赐资政殿大学士户部侍郎知青州吴奎乞就差知兖州不允诏

敕吴奎省所奏乞就差知兖州贵便颐养事具悉卿朝廷旧臣践历二府忠厚强直简在朕心
海岱之区土沃民庶风声气俗卿所习知虽宿疾未平而事务无废式是重望底绥一方当体
至怀未容辞避所乞宜不允赐文武百寮曾公亮已下上第三表乞上尊号不允断来请批答

省表具之朕荷祖宗之重寄元元困穷未获厥所夙夜悼惧如涉春冰属以报本之礼不敢堕
旷故躬执牺牲祇见上帝固非昭告成功自营福祿也而羣公卿士猥见褒誉欲归以溢美增
其徽称抗章勤请至于再三朕乏馨香之德不能媚于神祇乃甲申地震淫雨为灾天威彰着
日虞罪悔尚何盛烈之可述鸿名之敢当心焉愧惕流汗沾足况尚在谅闇哀素未忘何宜此
时亟举盛典若斯之议非所敢闻宜体予至诚勿复为奏所请宜不允仍断来请

赐新除知枢密院事陈升之上第一表辞恩命不允断来章批答

省表具之股肱之臣佐佑帝室枢机之职託谟庙堂自非金谐曷敢轻授卿历事三世克肩一
心事效已明时望攸属膺兹图任夫复何辞所辞宜不允仍断来章

赐宰臣曾公亮不允批答

省表具之朕以不德灾及元元地震冀方堤防横溃流离压覆靡所底居朕夙夜震惧不忘于
心实赖祖考所遗耆儒之臣佐佑辅翼济于艰难今乃遽自引咎抗章辞位朕何望焉卿其专
精致思勉修职业以裨不逮所请宜不允

赐观文殿学士新除兵部尚书知青州欧阳修诏

敕欧阳修省所劄子奏准枢密院递到诰勅授臣兵部尚书依前观文殿学士知青州伏念臣近以疾病累乞致仕未赐俞允欲望且守旧任冀得将理衰残卿服采三朝佐佑大政朕惟东表之地事任至重自非宗工莫可付委况膺力未衰嘉猷克壮宜念王事勿复有辞所乞宜不允可便受告勅发赴本任

除文彦博

门下虽天子必有尊所以严自上之训唯圣人能飡帝所以昭报本之诚朕祇绍丕基肇称元祀礼文既备庆诞敷眷惟心膺之臣幹是机衡之任共膺神贶宜处衆先推忠协谋崇仁同德赞治守正保运亮节佐理翊戴功臣枢密使劔南西川节度管内观察处置桥道等使开府仪同三司守司空检校太师兼侍中兼羣牧制置使行成都尹上柱国潞国公食邑一万六千二百户食实封六千三百户文彦博道茂国华才推人杰体忠厚以居德壮谋猷而奋庸弼亮三朝周旋二纪 司魁柄仍冠中枢仗钺临戎则凶渠折首秉钧调化则黎猷承风内外荐更名实弥劭矧在纂承之际亲闻顾托之言委寄至隆眷注为重协赞盛仪之举克臻熙事之成是用进美号以褒功取闲田而增邑并伸异数式示优恩於戏虑危於安所以绥万国怀远以义所以靖四夷益懋乃官用副朕志可特授依前守司空检校太师兼侍中兼羣牧制置使行成都尹潞国公充枢密使劔南西川节度管内观察处置桥道等使加食邑一千户食实封四百户仍赐推忠协谋崇仁同德赞治守正保运亮节佐理翊戴功臣散官勲如故主者施行

除皇弟顓

门下立爱惟亲治由近始因心则友化自上行朕合太宫逆厘后帝百神受职四海推恩矧孝弟之至隆宜宠章之光被皇弟山南西道节度管内观察处置桥道等使光禄大夫检校太尉同中书门下平章事兴元尹上柱国高密郡王食邑一千七百度户食实封陆伯户顓温良异稟聰達夙成胜衣彤信厚之风佩鞶负老成之志孝友之性不强而安德义之经未言而喻甫当就学亦既迹封予所抚怜同气异息迨盛仪之具举方涣泽之诞敷锡嘉号以记功进崇阶而叙位仍加并赋益重藩维於戏宠而不骄以谦恭为之本满而不溢以节俭为之先汝其念哉无替朕命可特授特进依前检校太尉同中书门下平章事兴元尹高密郡王充山南西道节度管内观察处置桥道等使加食邑七百度户仍赐崇仁保运功臣勲食实封如故主者施行

除皇伯祖承显

门下朕惇宗盛礼祇遹先猷茂对三灵骏奔亿丑臣工显相后帝居歆嘉与亲贤共膺戩?皇伯祖昭化军节度金州管内观察处置等使金紫光禄大夫检校工部尚书使持节金州诸军事金州刺史兼御史大夫上柱国康国公食邑五千八百户食实封一千八百户承显治躬斋栗养志粹和挺宗室之令仪藹公侯之淑问地隆磐石任重藩垣春秋寢高学问不倦被服儒素蘊河间之雅材琢磨箴规蹈卫武之美德助我恭祀協於多仪是用进功伐之名益陪敦之赋

仍加真食併示徽恩於戏怀德维寧昔王之明训为善?乐前哲之徽猷勉思高满之危勿忘临履之戒可特授依前检校工部尚书使持节金州诸军事金州刺史兼御史大夫康国公充昭化军节度金州管内观察处置等使加食邑七百户食实封三百户赐推诚保顺功臣散官勲如故主者施行

除郝质

门下朕顺考古道率由旧章三岁一郊四海大赉乃眷爪牙之士实惟心膂之臣宜涣茂恩以均景贶亮节保顺功臣殿前都指挥使安武军节度冀州管内观察处置等使光禄大夫检校尚书左仆射使持节冀州诸军事冀州刺史兼御史大夫上柱国天水郡开国公食邑三千一百户食实封七百户郝质温恭不犯沈毅有谋敢决应北方之强闲暇得晋国之勇仁能附衆忠以发身内总七萃之师外分十连之任训兵肃给驺御习於义方逢时安平戎狄仰其威信属是斋祠之谨复兼扈从之劳不有旌褒曷昭倚注论功加等益地从隆考诸金谐允为宜称於戏竭诚尽节所以享安荣徇公忘私所以报宠禄往服休命汝其懋哉可特授依前检校尚书左仆射使持节冀州诸军事冀州刺史兼御史大夫充殿前都指挥使安武军节度冀州管内观察处置等使加食邑七百户食实封三百户仍赐亮节保顺翊戴功臣散官勲封如故主者施行

赐文武百寮宰臣富弼已下上第五表乞皇帝御正殿复常膳听乐允批答

省表具之朕秉德不明陰阳谬戾旱暵为灾辜及元元为人父母不能保养覆冒以厚其生朕甚愧之是用避去正寝贬膳彻乐夙夜悼惧内自刻责以请咎於神祇浹辰之间虽霖霖屡沾而不能周洽菽麦将槁禾麻未滋而羣公卿士以尊奉母慈诞扬显号良日既戒宜以时行礼乐之文不可不备当抑已复常以成大典苟协於义朕何敢违所请宜允

西京应天禅院及会圣宫奏安仁宗英宗皇帝御容了毕德音

门下朕祗绍前烈宠绥庶邦率时典常罔敢坠逸越兹有洛之汭自昔令王之都艺祖之所诞生迹存遗老寝园之所以宅神有余威是用即西竺之仁祠因北胡之胜地仪刑二后镇抚一方爰命宰司肃将使指鸿仪克举熙事大成永惟畿甸之民能无供亿之役宜敷涣泽用慰羣心应西京管内限德音到日见禁罪人除故杀劫杀鬪杀谋杀十恶及伪造符印放火官典犯赃不赦外杂犯死罪降从流内情理切害奏取指挥其余流罪降从徒徒罪降从杖杖罪已下并放见勾当修奉天禅院会圣宫影殿使臣官员已下并工匠兵士及迎奉执擎并并与等第支赐应西京城都内耆老年八十已上者勘会诣实人数仰长吏等赐酒食仍量支赐每人茶三斤绢二匹常加存抚即不得於村县追集致有劳扰於戏称秩旧章克广奉先之孝蠲除有罪式昭惠下之仁咨尔羣伦咸体予意主者施行

赐枢密使守司空检校太师兼侍中文彦博乞退不允手诏

省所 上表乞罢枢府事具悉卿器质方厚谋猷明审忧公尽忠临事能断越自仁祖知卿美材入辅出藩于兹二纪 冠台席一总鸿枢事功蔚然洽于黎庶任重道远卿实有焉朕负荷前烈夙宵危惧若涉大川必凭舟楫卿当悉心致力以裨不逮而何嫌何疑遽求去位封奏荐至良用怵然抚览再三殊失所望老成之德重於典刑当体至怀安居厥职所请宜不允付彦博赐枢密使守司空兼侍中文彦博不允手诏

省所奏伏覩诏书宰臣陈升之位任在臣之下者愿寝异恩庶安孤迹事具悉卿翼亮三朝周旋二府国之耆儒望实素隆升之任用尚新甫登宰席原其雅意必欲推先是用斟酌礼文裁其宜称发於朕志奚取常规盖以褒异老成岂与利用为比卿谦恭久着於此何嫌往安乃居母逆朕命所乞宜不允付彦博

除皇伯宗谔

门下朕祇荷先烈诞受多方乐与宗支共其福禄悦率履之有立在褒表之敢忘皇伯推诚保顺功臣集庆军节度亳州管内观察处置河堤等使光禄大夫检校尚书左仆射使持节亳州诸军事亳州刺史兼御史大夫上柱国虢国公食邑六千四百户食实封一千八百户宗谔属尊地亲材高性敏承累朝敦睦之庆膺列藩封建之荣间由思虑之疏丽于文法之禁眷是有司之议系夫天下之公爱虽甚隆理不可居是用收还相印专秉节旄将警动於放心期辅成於盛德迨兹周岁克懋令图勤被仁服义之风励临深履薄之戒朕於庶姓犹不弃人况九族之【下文缺】

赐参知政事王安石乞退不允批答

省表具之卿文学高一时名誉专四海勇於立事急於进贤朕心倚之以安平士论待之以康济盖居位之尚浅或改命之未孚虽羣言之正謹岂同德之有间遽求分务深用骇闻居就乃功期副予望所乞宜不允

赐南平王李日尊示谕敕书

敕南平王日尊省所上表称於今年二月内亲领本道兵甲乘驾舟航直抵南蕃与占城国及占謁国蕃兵交战其占城国及占謁国蕃兵甲一时败散臣带领兵甲回旋本道师旅保全舟航寧谧事具悉卿与占城等国交战师出逾时今覩奏章备言胜捷益敦忠顺良用叹嘉朕子视兆民臣畜万国思销偃於中外共嬉游於迺遐宜体至怀以绥後福故兹示谕想宜知悉

赐参知政事王安石不允断来章批答

省表具之朕以卿材高古人名重当世召自岩穴寘诸庙朝推心委诚言听计用人莫能间衆所共知今士夫沸腾黎民骚动乃欲委远事任退处便安卿之私谋固为无憾朕所素望将以诱谁祇复官常无用辞费所乞宜不允仍断来章

赐参知政事右谏议大夫赵抃乞退第一表不允批答

省表具之朕躬揽庶政烛理未周思得博闻善言以参得失卿以清直之操夙夜在公遽求外迁殊匪朕志所乞宜不允

赐殿前都指挥使安武军节度使郝质不允诏

敕郝质省所上表星未半周疾已十作伏望罢领殿帅俾外补於散官庶渐苏於余喘事具悉卿以沈勇冠军忠厚许国内典严卫外秉节旄夙夜之劳简于朕志偃息之便难徇尔怀所乞宜不允故兹诏示想宜知悉祁国长公主特进封卫国长公主制【张尉】

门下帝妹中行易象赞其元吉王姬下嫁召南美其肃雍命服亚正后之尊主礼用上公之贵宠光之盛谁昔【释训谁 昔畴昔也】而然矧同气之至亲推异数而何爱祁国长公主席灵长之绪承濬哲之祥稟乾坤之粹和锺日月之明润渊懿可度柔嘉有章志女功而忘劳承师教而不倦今玉笄在首厌翟戒涂方结帨於皇家将执笄【音烦竹器】於士族宜疏沫土之邑俾适富平之孙庸展茂恩诞孚醴化於戏琴瑟静好式昭和乐之音雷风顺承是为常久之道勿以夫家之贫素有亏妇德之听从祇服训辞永绥福履可特进封卫国长公主仍令所司择日备礼册命主者施行

赐新除参知政事韩绛辞恩命不允断来章批答

省表具之卿世济明允时推儒良毗赞枢庭茂着功烈俾参国论允叶衆心需章亟来谦志太过引先誓祈还故栖夫显亲扬名斯为上孝建功立事莫若尽忠往即乃官勿替朕命所辞宜不允仍断来章

赐新除宣徽南院使特进检校太保判太原府欧阳修辞免恩命不允诏

敕欧阳修省所两次劄子奏伏蒙特差中使齎到告敕除臣宣徽南院使判太原府事所有敕告未敢祇受欲望检会臣前所陈乞於淮颖间移一小郡俾养残年事具悉卿才名素高华夏所服中外备更文武咸适眷兹并部气俗沈鸞绥和一方威怀二敌牧伯之任岂易其人询谋僉谐然後发命朕所选付卿宜体识况风土高凉其何恙不已往践乃职毋复固辞所辞宜不允故兹诏示想宜知悉

赐守司徒兼侍中判大名府韩琦不允诏

敕韩琦省所四上劄子乞就移徐州一任事具悉卿倦居守之勤乐偃藩之逸眷是别都之重控夫北道之冲自非元臣畴克誉处是以临遣近侍往宣至怀恩礼之隆所宜钦若而上兹固请良用怵然卿以衰疾为言则未愆於膂力以朴忠自许则可憚於剧烦安视尔师毋逆朕命所乞宜不允故兹诏示想宜知悉

赐新除枢密副使右谏议大夫冯京辞恩命不允断来章批答

省表具之枢衡之司基本攸托制胜帷幄折冲方隅苟非文武之兼资孰副安危之重委简自朕志无若汝材故推不次之恩冀获非常之效当思自勉勿或深辞所辞宜不允仍断来章

除董氈制

门下国家蠲洁大德怀柔四方懋宣行苇之仁横被蓼萧之泽遐迩无间内外一均西藩邈川首领保顺军节度洮州管内观察处置押蕃落等使金紫光禄大夫检校太傅使持节洮州诸军事洮州刺史兼御史大夫上柱国常乐郡开国公食邑五千一百户食实封一千一百户董氈气稟沈雄性资果毅载勲庸於奕世开土宇於西陲早膺旄钺之荣抚有洮湟之地祇勤厥事忠诚着於皇家纠逖不?威令行於戎落修其职贡保我封畛宜陈锡於宠章用褒嘉於美志位进异等食衍真封岂繫镇服於尔师抑亦光华於殊俗於戏王官至重固不徒施臣道惟艰谅无虚受勉服休命益思壮猷可特授特进依前检校太傅使持节洮州诸军事洮州刺史兼御史大夫充保顺军节度洮州管内观察处置押蕃落等使仍旧西蕃邈川首领加食邑一千户食实封三百户勲封如故主者施行

赐新除河阳三城节度使守司空检校太师兼侍中充集禧观使曾公亮辞免恩命不允诏

敕公亮省所劄子奏伏望圣慈特赐停罢使相之命许只授正官充观使事具悉卿久居宰席道茂勲隆屡以耆耄恳辞机政朕重违雅志曲成冲德礼命之数愧於未厚而尚兹逊避良用恍然宜即钦承以副优养所辞宜不允故兹诏示想宜知悉

赐新除守司空检校太师兼侍中充河阳三城节度使集禧观使曾公亮辞免恩命第一表不允批答

省表具之卿以耆明之德寅亮皇家功成告休海内归美崇报之典朕旋其薄冲挹之志卿以为优勇退难进益增嘉尚成命不易毋庸固辞所辞宜不允

赐新除参知政事冯京辞恩命不允断来章批答

省表具之卿负英异之才首俊造之选内尹京邑风绩着闻外护边兵民夷清谧入冠宪府进跻枢庭况观尔能宜赞朕政往祇成命无或再辞所辞宜不允仍断来章

赐新除枢密副使右谏议大夫吴充辞恩命不允断来章批答

省表具之卿之英声着於士伦卿之嘉绩简在朕心是用擢诸计廷陟彼枢府乃更过自菲薄固辞宠光谦降之深叹尚不已所辞宜不允仍断来章

赐观文殿学士户部尚书知陈州张方平乞南京留台不允诏

敕方平省所奏乞南京留台事具悉卿学问精洽文辞雅奥荐登儒科久居迹列入赞大政出
临近藩晦明小愆何恙不已遽祈散地良用恍然当体眷怀往安尔职所乞宜不允故兹诏示
想宜知悉

赐文彦博辞恩命第一表不允批答

省表具之卿社稷元老股肱三朝黎庶具瞻百工矜式矧以丞弼相予毖祀书劳进律抑有旧
章宜亮眷怀无庸辞避所辞宜不允

赐殿前都指挥使郝质辞恩命不允批答

省表具之卿總领禁卫为王虎臣敦忠一心夙夜匪懈况兹戎祀之大兼有侍从之勤推恩报
功固有常典尚兹冲避岂悉至怀所辞宜不允

赐殿前都指挥使郝质辞恩命不允断来章批答

省表具之朕奉若训典肃将禋祀嘉与臣工共兹休福卿董率王旅陪赞国容居则有侍卫之
谨出则有扈从之劳考诸故常宜在褒进当体至意勿复有辞所辞宜不允仍断来章

赐皇伯祖昭化军节度使检校工部尚书康国公承显辞恩命第一表不允批答

省表具之朕仰稽唐虞惇叙九族矧以尊属相予肆祀推恩进律礼亦宜之兹率典彝无为辞
避所辞宜不允

赐文彦博辞恩命不允断来章批答

省表具之朕躬执珪币对越三灵惟时福祥不敢专享湛恩布濩覃及海隅卿国之耆明幹统
机密兹率常典奚烦固辞所辞宜不允仍断来章

赐皇弟高密郡王頵辞恩命第一表不允批答

省表具之朕以郊礼大备广敷庆泽物无遐遗况於亲昵锡兹异数咸迪旧章汝其勿辞往服
嘉命所辞宜不允

赐皇弟高密郡王頵辞恩命第二表不允断来章批答

省表具之禋宗类帝国之盛仪施恩亲贤由来盖久兄弟具迓悃悞无华汝往钦哉毋烦辞避

所辞宜不允仍断来章

赐皇伯祖昭化军节度使承显舜恩命第二表不允断来章批答

省表具之朕躬祠郊丘诞布惠泽周浹庶姓况於宗英执谦固辞益昭令德朕命不易往其钦承所辞宜不允仍断来章

赐宰臣富弼等上表贺云陰日食不及分数批答

省表具之朕不明庶政上累三光天虽微陰人谁不见彼食分之少损由司历之未精为惧方深奚贺之有矧明书於信史将取诮於异时宜懋乃诚以辅台德所贺知

赐宰臣曾公亮已下贺壽星出现批答

省表具之司分底日垂象降休炳然德星着见南极太史献状以为壽祺卿等浚明一心寅亮元化燮友气物导迎善祥仍贡需章愿书信牒眷言归美重益愧怀所贺知仍依奏宣付史馆

赐枢密使文彦博等贺壽星出见批答

省表具之天垂文象依类而言世格隆平得臣是赖卿等懋建一德光辅万微格于上神锡兹嘉瑞昭申丙位申告永年刻章以闻传信为请虽菲凉之可愧顾忠爱之敢忘所贺知

传家集卷十六

卷十七

钦定四库全书

传家集卷十七 宋 司马光 撰表

为龐相公让明堂加恩第一表

展采合宫用成於盛礼推恩列位首冒於徽章内省空疎交深震栗【中谢】伏念臣出於单族素乏异能遭会圣辰袭承义训肩随羣士齿列具僚始更郡县之劳遂玷闺台之美虽慕尽公之节力自拔摩迄无高衆之名可容称道顷由边琐进贰枢庭复参丞弼之司旋总几微之务固已任踰才表荣出望涯十七物之珍羞居慙厚赐三百困之重禄坐愧素餐虽僂俛以自安常忸怩而内讼属国家讲求阔典祇绍明禋幸千载之亲逢叨一时之荣观伏遇尊号皇帝陛下天衷广覆圣道兼容不专享於神休俾下覃於朝衆谓臣职当扈蹕礼与执膳曲矜孱陋之踪猥被殊尤之泽位列元功之次邑增真食之封事与志违名非德称惴如临谷忧甚履冰岂可忽非据之灾安无劳之赏俾衆庶有假人之议致朝廷蒙含垢之羞熟自省循诚难膺克伏望俯矜危欵曲轸睿慈特寝不赉之恩以全无似之质露诚获允受赐益深

第二表

愚衷上列冀寢於殊恩睿志莫回必申於前命征营无措兢战失图【中谢】伏以陟配总章昔王之盛节追严庙祐前载之美谈唐虞着五府之文商周增重屋之制久兹旷絶未暇修明伏遇尊号皇帝陛下祇若天常寅恭祭典谓五精之气不可久契於神欢三祖之灵不可弗亲於宗祀若稽古训濬发圣谟崑仑放玉带之图路寢采康成之议八窗四户属象相依万舞九成声明具在臣谬居机近忝助裸将庀徒护法驾之严负玺托属车之末奉汝上肃雝之庆无周南留滞之嗟其在蠢愚固为荣幸不可复妄膺高位叨窃宠名况七萃有暴露之劳百司有供亿之费欲加之赏宜用为先臣禄秩已丰勤劬至薄岂可复膺褒进以重愆尤伏惟天鉴崇高下垂烛察物诚精至庶获感通

为庞相公谢明堂礼成转官表

叨荣过厚揣分非宜制命益严恳辞不获【中谢】伏念臣颡愚无术孤陋寡徒起家衡茅致位机近此皆出於天幸断自宸知非才伎过絶於人岂朋援陰为之地是以每循涯知止以宠为忧获一官若负谴诤进一位若怀疾眚非敢厌薄高爵希慕虚名诚以居三府之崇赞万机之大久留不去妨废实多况禄厚者衆之所趋势尤者人之所疾不独力绵任重失职是虞亦将智浅迹单处躬可畏方自谋於逊避以深远於讥嫌岂谓伏遇尊号皇帝陛下濬发清衷述修盛礼合祛天地之祀严配祖宗之灵茂典既成鸿私劳洽谓臣属当扈从与在骏奔畴其执

事之劳均以受厘之庆迁地官之亚列增帝傅之宠名悉非庸虚所能堪称是用力陈危歛冀寝殊恩葵藿之心徒自倾而无隐雨露之泽非已降而可收虽祇徇於诏文实内慙於灵府敢不益坚苦节愈厉朴忠当官而行蹈水火而无避惟力是视竭筋骨以为期

为文相公谢赐神道碑文表

命发宸庭文成禁署泽加存歿荣动迺遐【中谢】窃以金石之传久而弥茂风树之感贵而自悲谅知为子之心咸有显亲之愿伏念先臣策名休运接武辨朝陈力当官服勤没齿臣荷析薪之业绍作室之功虽资性甚愚曾无肖似而义方未坠少追谴尤伏遇尊号皇帝陛下过听菲才遽加大任寘彼官师之首列於丞弼之司非藉世荣曷膺国宠顷以岁时得卜宅兆图新将论譔於丰碑用表章於大隧岂意睿明曲照优渥臻彼神翰揭诸螭首仍诏代言之职直书传信之辞着琬琰以无忘与松楸而并列声光不朽永蒙庇於昆孙精爽有知潜拜嘉於幽壤荷恩益腆抚已知轻且身体发肤皆仰资於顾复而股肱心膂敢有爱於生成未识津涯徒知涕泗

为文相公求退第二表

臣省躬甚明揣分已熟非敢外饰以邀上知天恩留连未见识察物意专慙期於感通【中谢】伏念臣本以诸生亲逢盛世行能无出於萃类学术不际於几微所期解韦布之衣沾斗石之禄竭簿领之效免耕稼之勤安敢企踵帝庭许身王佐伏遇尊号皇帝陛下嘉其木讷亮以孤忠课於近小之功粗能称旨役以烦縻之事不至败官乃谓榘桷之才可胜栋楹之任錡釜之器足兼鼎鼐之容远自西州骤叨重柄跻密地则不踰中宿参大政则曾未期年遽越等夷直登佐弼静言遭际熟察基缘宁左右先为之容岂朋援陰为之地莫非睿鉴特振寒踪虽以草木之微犹知雨露之泽况於有识詎敢忘恩岂欲违去旒扆之前远离阙庭之外弃万锺之秩辞四辅之崇顾以义不可留情有所迫大易存覆餗之戒诗人着在梁之讥任重难胜位高多惧虽人主含贷未赐於谴诃有司因循不加於治臣敢不扪心自愧顾影知非乘疵吝之未形保名迹而先退必使愆尤增积谤讟流闻致陛下失终始之仁愚臣受远迺之责非止谋身之过抑亦负国之深是用寝食震惊夙宵悸慄视金章於芒刺等黄合於焦原苟未去身何能歉志伏望烛临危歛矜恤苦言听避位於上司得保躬於散地博求僞杰光辅休明则臣俯就下陈若获九迁之喜出居外职无殊三接之荣干冒冕旒不胜惓惓之至

为龐相公让官表

恩出非常位迁不次内循空薄交集震惊【中谢】臣识昧疏通学非殫洽依凭时会叨假国灵荐更要剧之权遂跻通显之地陪侍帷幄参与机衡虽尽股肱之劳不遗余力讫无毫发之效克厌衆心居常自思敢忘内讼方且俟清闲之燕竭惓歛之私力辞宥密之聯退祈冗散之秩庶追官责少息人言岂期志愿未从宠光愈峻遽以朽疎之质猥当佑弼之司承命以还措躬无所窃以缉熙帝术寅亮国成翼戴万机统和三极得人则羣生蒙福失职则百度乖方詎可妄居岂容滥授臣虽欲冒荣不顾怀禄苟安悦衆庶责望之深诚朝廷倚毗之失是用夙宵

愧慙寤寐兢忧不知列鼎之荣恍若临渊之惧伏望尊号皇帝陛下俯从危款曲照孤踪矜其驱策之勤为日已久察其避让之固於心不欺俾祇服於旧官特寝除於新命旁求隼德式副輿情

为龐相公再让宰相表

需奏仰陈冀安於涯分纶言俯及未照於悃诚躋地载惊履冰逾畏【中谢】臣闻量能授职者人主之通术陈力就列者臣下之令图义或此违治何由立臣是以退居深念申旦伏思窃惟佑弼之崇实系安平之本总领衆职镇抚四夷下遂万物之宜上序三光之统凡将图任岂易轻言至若黄霸循良朱博锐敏始为郡守皆号能臣暨陟宰司遂隳盛誉或受嗤於鷦雀或召咎於鼓妖岂前智而後愚盖任盈而量溢况臣空薄詎敢拟伦必欲使用不违才举无败事则莫若委之藩服俾敷寬大之条寘以边方得奉绥怀之畧庶几展效不敢憚勤傥以服役有年居官无过不欲捐之草莽尚将留彼阙庭则愿且守故栖未迁佗职私自宁於密地得时望於清光忝幸已深感槩何极岂敢使岩廊旷位元鼎失和窃贪一日之荣不虞四海之责伏望尊号皇帝陛下曲垂矜恤靡赐勿遗察底里之无欺全始终而可保持收涣命俯徇愚衷少安据蒺之忧尚免在梁之刺内惟恳迫期获允俞

为龐相公谢官表

荷恩逾分沥恳敷言成命莫回愧顔无寄【中谢】伏念臣赋能甚薄探道未深习诗礼以为儒师法令而补吏适际亨嘉之会误膺濬哲之知亟陟显涂荐膺烦使监边则尽护羣师侍幄则協赞万微密迩清光訏谟基命固已任逾器表荣溢望涯居无终日之间少忘素餐之责何意天恩横被宸睠曲成猥抡樗液之才专委栋隆之任靡由阶渐遽尔直登冠册府之华资总史臣之善志翻经演法进律加田甫闻出綍之言殆失措躬之地力陈丹悃仰黷邃旒虽坚不夺之诚难变已行之令威顔甚迕私愿莫从俯俛若惊徜徉自失此盖伏遇尊号皇帝陛下用人道广爱物义深不求纯备之功姑委變调之职爰从隗始俾奉萧规敢不祓饰厥心耀明其志识虑所及不敢顾私筋力可任期於尽瘁小助缉熙之化仰酬覆焘之仁

为文相公许州谢上表

避辞公鼎虽弛负担违离天闕倍深眷恋【中谢】伏念臣材非出类识不先几逢辰休嘉致位通显谨司斥候亟守於边隅?布教条荐更於方镇讫无声迹可聳传闻伏遇尊号皇帝陛下明烛幽微仁沾疏逖遽选抡於遐服俾陪贰於中枢曾不浹旬遂参大政未能周岁爰陟上司念遭际之非常求比伦之盖寡虽滨陨越岂谢生成是用杜侥幸之门窒奇袤之径激扬廉让抑止浮华苟有利於公家固不为於私计然而力非其任智实有涯羣心万殊理难称惬衆目环视动成诋诃纷如锋矢之冲浩若波涛之沸从之则惧伤国体违之则立致身殃进退靡遑啓居无所屡以清闲之侍力陈退避之诚盖揣分之甚详恐败官而为辱贵全终始不避颠危陛下察其愚衷必非缘饰愍其孤迹易致怨憎俾述职於近藩得免讥於尸禄仍进天官之秩复升殿幄之华礼数甚优恩辉愈洽脱吕梁之险亟就安澜去焦原之危更遵夷路非曲叨於

庇佑岂自信於保全惟许昌之奥区乃昆吾之故壤土毛丰衍民齿夥繁敢不致在拊循勤加训导奉承寬大之诏期臻富庶之风少副忧勤兹为报效

为滑州张龙图贺章献章懿皇后祔庙表

圣心追远思慕慈亲陟配祔宫顺成大礼【中谢】伏以章献明肃皇后辅佐先朝敷明陰教导扬末命镇绥大业章懿皇后淑慎在躬受天元祉茂育圣神光啓丕祚而犹分祀闕宫未登太室尊号皇帝陛下濬发孝思沿情着制采开元之令典讲国家之故事?选嘉辰咸升配侑述祖宗之志成母后之尊允所谓道隆列辟法垂後世礼行於宗庙孝通乎神明日月所临霜露所坠拚手蹈足小大同之况臣任居藩垣职参台阁欣豫之志倍亿等夷官守所拘不获奔诣阙庭称庆

谢中冬衣袄表

祗荷宠光心顔无措【中谢】恭惟皇帝陛下皇仁溥洽衣被九围軫念祁寒宠锡嘉服臣虽无似蒙泽犹均濫承安燠之荣空慙不称之责无任感恩激切之至

进交趾献奇兽赋表【嘉佑八年九月初三日上】

臣光言今月二十五日有诏诣崇政殿观交州所献异兽曰麒麟者臣愚不学不足以识异物窃以麟瑞兽也旷世而不可覩其於经有名而无形传记有形而去圣久远衆说纷揉自非圣人莫能识其真况承学之臣固不能决其是非也臣光【中谢】窃以王者道盛德至格于神明则有仁兽不召而自至不羈而自驯此其所以为瑞也今是兽也生於遐荒拘之檻梏载之方舟輿曳万里致於阙庭形质诡异不应经传真伪之间未易究测傥其真也则非自然而来设其伪也徒为远夷所笑殆非所以发扬圣朝之光辉补益治平之实效也旅獒曰不作无益害有益功乃成不贵异物贱用物民乃足犬马非其土性不畜珎禽奇兽不育于国不宝远物则远人格所宝惟贤则还人安臣窃以为宜延见使者賚之金帛赐以诏书嘉答其意归其麒麟使复故壤然後登俊杰之才修政治之实使家给人足礼兴乐行四夷宾服天瑞自至以遵旅獒之意不亦盛乎臣不胜愤悱谨述交趾献奇兽赋一篇奉表投进以闻

进瞻彼南山诗表

臣光言臣闻天尊地卑道之常也而乾下坤上谓之泰岂非阳不下陰则无以行其施君不交臣则无以得其心是以诗人歌颂其君之德多称饮食饫燕之丰钟鼓筦磬之乐车服旌旗之盛帛锡予之多盖以君臣兄弟朋友之际舍此无以相交也虽然人君不以诚心加之则此四者虽美无益也故鹿鸣曰我有旨酒以燕乐嘉宾之心彤弓曰我有嘉宾中心赋之此言君臣之恩不由外来也【中谢】伏见体天法道钦文聪武圣神孝德皇帝陛下以十二月二十三日二十七日再幸天章阁悉召宰辅侍从之臣徧观瑞物及先帝御书御集又幸宝文阁亲为飞白书并御墨纸笔以赐羣臣又赋诗命羣臣属和又幸羣玉殿置酒作乐比暮而罢其酒

醪醑?罗花金器多出禁中於二十七日仍面谕羣臣以前日之燕办於造次未尽朕心故欲重与卿等为乐今天下方无事母惜尽醉以称朕意是日凡为燕之具又加厚於前其所以劳徕存抚羣臣莫非出於陛下之志者是以羣臣膏沐宠光被服德音熏蒸条鬯浹於肌肤沦於骨髓固不待饮食而先醉饱矣退而咏歌圣德流布四方闻者无不咨嗟叹息以为陛下之於羣臣可为无负而羣臣实负陛下多矣苟有可以死於其职补益万分莫敢爱也【中谢】窃以羣臣前後受陛下爵位廩禄飧燕赐予固已多矣未有如今日之欢欣感激深厚切至上下如一者其故何哉此非外物丰衍所能致也正由陛下加之诚心而已矣陛下方将推广此心以被天下至於朝廷之政进贤退不肖赏善罚恶无不尽诚以求之臣见四海之内如殿堂之上无不沈酣於茂恩饜饫於盛德矣不胜鼓舞拚蹈之至谨成瞻彼南山诗七章随表上进文采鄙野不自揣度羞污盛时伏惟陛下察其狂简而裁其罪罚焉

进古文孝经指解表【嘉佑元年作】

臣光言臣闻圣人之德莫加於孝犹江河之有源草木之有本源远流则流大本固则叶繁是由古及今臣畜四海未有孝不先隆而能宣昭功化者也【中谢】伏惟尊号皇帝陛下纯孝之性发於自然动静云为必咨训典起居出入不忘先烈以为滁州者太祖皇帝所以禽馘奸桀肇开王迹并州者太宗皇帝所以芟夷僭乱混一九围澶州者真宗皇帝所以攘却贪残亿宁华夏皆大勲懿业威灵所存遂命有司分建原庙图绩圣容躬题扁榜严奉之礼备尽恭勤羽卫供帐率从丰衍兹有以见陛下尊显祖宗之意无不至矣经曰爱敬尽於事亲而德教加於百姓形于四海夫以陛下天授之资爱敬之志而又念夫百官者祖宗之百官不可以私非其人府库者祖宗之府库不可以赏非其功法令者祖宗之法令不可以罚非其罪慎之重之益自儆戒如是则为无不成求无不给荣名之彰炳如日月基绪之固巍如泰山黎民乂安四夷怀服草木禽鱼靡不茂豫此诚孝德之极致也臣愚幸得补文馆之缺以经史为职窃覩秘阁所藏古文孝经先秦旧书传注遗逸孤学堙微不絶如綫是以不自揆量妄以所闻为之指解虽才识褊浅无能发明庶几因圣人之言得少关省览则粪土之臣荣愿足矣其古文孝经指解一卷谨随表奉进以闻

进通志表

臣光言臣闻治乱之原古今同体载在方册不可不思【中谢】臣少好史学病其烦冗常欲删取其要为编年一书力薄道久而未就今兹伏遇皇帝陛下丕承基绪留意艺文开延儒臣讲求古训臣有先所述通志八卷起周威烈王二十三年尽秦二世三年史记之外参以佗书於七国兴亡之迹大畧可见文理迺疏无足观采不敢自匿谨缮写随表上进

谢二股河北流已闭赐獎谕勅书并对衣金带鞍轡马表

圣言优渥宠锡便蕃顾循无劳何以堪称【中谢】窃以去秋积雨河决枣强朝廷忧劳悯兹昏垫臣祇奉明诏相视所询采衆言闻達天听舍短收长率由圣志处决利害昭晰如神今流势东折径趋渤海恩冀西北公私安堵斯皆上帝储休明主独断劳心建策则有当官之人勩

力奏功则有执役之士臣进无运筹之智退无负薪之勤曾何施为膺兹赐赉辞之则涉於伪慢受之则实为尸素有腠面目无地自容臣性虽顽愚灵於草木蒙被天地敢忘报效唯期竭忠庶裨万一

贺皇子降生表

伏以熊罴之兆载於诗雅弓韣之祥着诸典礼盖以保育黎元莫兹为大本支既茂基祚益安是故百男昌而周兴五宗强而汉炽隆替之源古今一揆【中谢】伏惟尊号皇帝陛下纯孝奉先远猷垂世锡类之祉久属羣心皇穹降休诞啓茂绪蓬矢遵吉牢修具仪斯实宗庙眷佑之灵衆庶无疆之福穷河际海声教所沾悦曰有心率知相庆况臣职叨近署位备列藩窃聆嘉喜奚胜踊跃官守有系阻远阙庭臣无任瞻天望圣蹈舞屏营之至

贺皇子【昕】建节表

封建本支光隆基祚王室增维城之固万方有磐石之安【中谢】恭惟皇帝陛下仁被海内道合天衷膺受纯禧诞锡元胄采古昔之令典考今兹之盛务爰立藩邸恢建宏规假节秉钺习以戎律赤舄褒衣崇其仪望苴茅胙土训以政治明尊尚亲资忠移孝一举而善衆美具该斯实堂构之远谋黎民之隆福也臣述职外方传闻嘉喜不胜拚蹈激切之至

谢赐资治通监序表

臣光言伏蒙圣恩令臣读所修资治通监仍面赐御制御书序一篇者臣性识弩钝学问空浅偶自幼龄粗涉羣史常欲芟去芜杂发挥精雋穷探治乱之迹上助圣明之鉴功大力薄任重道悠徒怀寸心行将白首伏遇先皇帝若稽古道博采微言俾摭旧闻遂伸微志尚方纸墨分於奏御之余内阁图书从其假借之便未遑汗简已泣遗弓陛下祗服骏命丕承前烈臣以属橐有绪不可不成受诏所为不敢不上铨次无法抵牾实多仰污览观伏须罪戾岂谓皇帝陛下赦其狂简赏其专勤思所以旌异於佗书焜燿於羣下特发殊恩不用常例属当劝讲之始俾参经史之末迨此清闲命之进读而又序其本原冠於篇帙发言为典肆笔成书炳蔚互变如虎豹之明灏噩无涯逾商周之盛况复褒贬是非古人有所未至造端立意愚臣不能自言陛下一赐指陈涣然冰释至於博而得其要简而周於事典刑之总会册牒之渊林臣实何人克堪此语若乃嘉文宣以作则授正观而为师兹实生民之福岂伊微臣之幸【中谢】窃以周之南董汉之迁固皆推高一时播美千载未有亲屈帝文特纁宸翰曲蒙獎饰大振辉光如臣朴 小才固非先贤之比便蕃茂泽独专後世之荣退自揣循殆无容措遂使萤磷末照依日月以永存草木常名附天地而不朽臣不任恳款之至

知永兴军谢上表

荷恩至重任责尤深循抚吏民敷宣诏令【中谢】臣识虑闇浅规为阔踈唯知愚忠屡贡狂直奉事三世操守一心间以齿发寝衰疾疹交集曾靡论思之效久污侍从之班既无补於本

朝祈自安於散地不图睿泽更委名都虽要重之权自知不称而烦剧之地难以固辞受命以还措躬无所竭来就道甫尔到官惟此咸秦昔为畿甸山川美秀土地膏腴论其平时诚为乐土在於今日适值凶年经夏亢阳苗青乾而不秀涉秋淫雨穗腐黑而无收廩食一空家乏盖藏之粟襁负相属道有流离之人老弱怀沟壑之忧奸猾蓄萑蒲之志正宜安静不可动摇譬诸烹鱼勿烦扰则免於糜烂如彼种木任生殖则自然蕃滋谨当策励疲弩雕磨朽钝智力所及勤瘁无辞虽复失位危身终不病民负国庶几小补用答大恩臣无任戴天荷圣激切屏营之至遗表【元丰五年秋吾苦语澁疑为中风之候恐朝夕疾作猝然不救乃豫作遗表自书之常置卧内俟且死以授范尧夫范梦得使上之八年三月五日宫车晏驾此表无用留以示子孙欲使知吾事君区区之心耳】

臣世受国恩常思补报但以性识愚戇不合圣心是以比年以来屏居杜口不敢复言今衰疾日侵将填沟壑敢以平生忠恳一达天聪庶几陛下知臣无求於朝廷而未尝忘国家也【中谢】伏惟皇帝陛下天纵睿哲烛物精敏践祚以来銳志求治图任奇杰恢张洪业得王安石委而信之不复疑贰听其言从其计人有沮毁之者责而逐之虽周成王之信周公齐桓公之任管仲燕昭王之倚乐毅蜀先主之托诸葛亮殆无以及斯乃不世出之英主旷千载而难逢者也不幸所委不得其人安石既愚且愎不知择祖宗之令典合天下之嘉谋以啓迪聪明佐佑丕烈乃足已自是谓古今之人皆莫已如有人与之同则喜与之异则怒喜则数年之间援引登青云怒则黜逐摈斥终身沈草莱凡人之情谁不喜富贵而畏刑祸於是忠直远屏奸谀竞进为之腹心羽翼以干禄徼利遂使中外权要之任非其党与不得处也深疾谏者过於仇雠严禁诽谤甚於盗贼然後逞其胸臆变乱旧章兴害除利舍是取非其尤病民伤国者畧举四条其一曰青苗钱分命使者诱以重赏强散息钱腴民求利取新偿旧负债岁多官守空簿实无所获货重物轻公私两困其二曰免役钱纵富强应役之人使家居自逸征贫弱不役之户使流离转死凡农家所有不过穀帛与力自古赋役无出三者今皆不取专责以钱钱非私家所铸要须贸易外求丰岁穀贱已自伤农又迫於期限不得半价尽槩所收未能充数家之餬粮不暇更留若值凶年则又无穀可槩人人卖田无往可售遂致杀牛卖肉伐桑鬻薪来年生计安敢复议用此雇浮浪之人以供百役使缓则为奸急则逃窜处事若此岂非倒置其三曰保甲自唐募长征之兵赋农民穀帛以给其衣粮农固已困矣今穀帛税如故又使舍耕桑事战陈一身二任民何以堪又罢巡检兵士及尉司弓手皆易以保甲半月一代彼畎亩之民尚未能操弓挟矢已复代去用此擒盗不亦难乎夫夺其衣食使无以为生是驱民为盗也使比屋习战劝以官赏是教民为盗也又撤去捕盗之人是纵民为盗也谋国如此果为利乎四曰市易遣吏坐列贩卖与细民争利下至菜果油面狙侏所得皆?而夺之使道路怨嗟远近羞笑商旅不行酒税亏损夺彼与此得少失多又称贷於民恣其所取使无赖子弟得醉饱之资在家父兄受督责之苦倾貲破产十有五六凡此四者皆逆人情违物理天下非之莫之肯从安石乃以峻法驱之彼十恶盗贼累更赦令犹得寛除独违新法者不以赦降去官原免是其所犯重於十恶盗贼也安石苟欲遂其狠心无顾治体此其厉阶至今为梗也又有奸诈之臣如种谔薛向王韶李宪王中正之徒行险徼幸怀谖罔上轻动干戈妄扰蛮夷夫兵者国之大事废兴存亡於是乎在而谔等苟营一身之官赏不顾百姓之死亡国家之利病轻虑浅谋发於造次深入自溃仅同儿戏使兵夫数十万暴骸於旷野资仗巨亿弃捐於异域昔王恢为马邑之谋单于觉之遁去时汉军无所失亡但无功耳武帝犹以为不诛恢无以谢天下今溃败

身亡狼籍如此而建议行师之人晏然若无愧畏或更蒙宠任窃见国家至仁重惜人命诸州论囚有法应流而误入死者举州官吏皆坐停废柰何使数十万人无罪就死反无所坐乎此所以使狂躁贪冒之人竞为尝试之说而无所惩艾者也若举事屡如此其於国家岂可不忧乎臣闻堂上不□则郊草不瞻旷芸是以古圣王之治天下必先内而後外安近以服远故书曰帝乃诞敷文德七旬有苗格诗云王猷允塞徐方既来下至齐桓晋文亦先富教其民然後用之陛下何不视今日朝廷之政治何如羣臣之智能何如百姓之富乐何如士卒之精锐何如乃遽从事於四夷也臣所惜者以陛下之圣明不师虞舜周宣之德反慕秦皇汉武之所为借使能踰葱岭絕大漠鑿臯兰焚龙庭又何足贵哉自古人主喜於用兵疲弊百姓致内盜蠭起或外寇觊觎者多矣申屠刚曰未至豫言固常为虚及其已至又无所及必若待四方糜沸如秦汉隋唐之季然後悔之固已晚矣夫諫争之臣人主之耳目也安可一日无之书曰若跣弗视地厥足用伤设有人闭目塞耳跣而疾趋前遇险阻安有不颠蹶者哉臣窃见十年以来天下以言为讳大臣偷安於禄位小臣苟免於罪戾闾阎之民憔悴困穷无所控告宗庙社稷危於累卵可为寒心人无贤愚贵贱莫不知之而讫无一人敢发口言者陛下深居九重徒日闻諛臣之言以为天下家给人足太平之功十已八九成矣臣是以不胜愤懣为陛下忍死言之庶几陛下览其垂尽之辞察其愿忠之志廓然发日月之明毅然奋乾刚之断悔既往之失收将来之福登进忠直黜远佞邪审黄发之可任寤谗言之难信罢苗役废保甲以寬农民除市易絕称贷以惠工商斥退聚斂之臣褒显循良之吏禁约边将不使贪功而危国制抑近习不使握兵而兆乱除苛察之法以隆易简之政变刻薄之俗以复敦朴之化使衆庶安农桑士卒保首领宗社永安传祚无穷则臣没胜於存死荣於生瞑目九泉无所复恨矣臣不胜瞻天恋圣之至

慰太皇太后上仙表

臣今月二十三日蒙西京宣示二十日太皇太后遗诰者旻天降祸仙驭上宾奉讣哀惶罔知所措伏以太皇太后作配仁祖听政英朝洪基所以固安景命由其保佑风化形於海内德泽结於民心宜永享东朝之尊长膺天下之养而中壽未至大期有终哀纏两宫痛浹万宇恭惟皇帝陛下孝心罔极号慕难居瞻内寝以如存追慈顏而靡及伏望上为宗庙之重下庇烝民之生少抑圣情俯就中制臣忝列侍从不获奔赴阙庭瞻望宸极

谢提举崇福宫表

臣光言伏奉勅命宜令再任提举西京崇福宫者囊奏上陈始虞报罢黜聪垂德亟沐颁恩祇荷寬优伏增兢悸伏念臣器非适用学不知方被遇三朝忝尘二禁?天光之顾问侍经席之从容亦尝委总宪司讫无报称擢陪枢府不敢叨居剖竹雍都蔑闻於治效分台洛邑幸养於沉痾仍再领於祠庭遂十更於岁龠顷自受命先帝俾刊旧闻逮陛下之缵图发德音而继至而臣?橐在外奏篇未经盖简册之浩繁致岁时之淹久虽官守无事慙四体之不勤而史学紬事实寸陰之是惜惧先沟壑以负恩私久去班行顾其佗而无补坐糜禄廩尝自讼而靡遑尚或无厌复求自便辄披私恳轻冒宸严岂谓皇帝陛下大德包荒至明烛远罔责再三之渎曲垂开可之私盖特出於异恩故不拘於尽法乾坤至大虽万物皆遂其生雨露新沾或一夫独被

其泽惟颛愚之无状容侥幸以兹多臣敢不深戒宴安祇勤夙夜毕精撰述图报生成

进资治通监表

臣光言先奉勅編集历代君臣事迹又奉圣旨赐名资治通监今已了毕者伏念臣性识愚鲁学术荒疏凡百事为皆出人下独於前史粗尝尽心自幼至老嗜之不厌每患迂固以来文字繁多自布衣之士读之不徧况於人主日有万机何暇周览臣常不自揆欲删削冗长举撮机要专取关国家兴衰系生民休戚善可为法恶可为戒者为编年一书使先後有伦精粗不杂私家力薄无由可成伏遇英宗皇帝资睿智之性敷文明之治思历览古事用恢张大猷爰诏下臣俾之編集臣夙昔所愿一朝获伸踊跃奉承惟惧不称先帝仍命自选辟官属於崇文院置局许借龙图天章阁三馆秘阁书籍赐以御书笔墨缙帛及御前钱以供果饵以内臣为承受眷遇之荣近臣莫及不幸书未进御先帝违弃羣臣陛下绍膺大统钦承先志宠以冠序锡之嘉名每开经筵常令进读臣虽顽愚荷两朝知待如此甚厚陨身丧元未足报塞苟智力所及岂敢有遗会差知永兴军以衰疾不任治剧乞就冗官陛下俯从所欲曲赐容养差判西京留司御史台及提举嵩山崇福宫前後六任仍听以书局自随给之禄秩不责职业臣既无他事得以研精极虑穷竭所有日力不足继之以夜徧阅旧史旁采小说简牘盈积浩如烟海抉擿幽隐校计毫厘上起战国下终五代凡一千三百六十二年修成二百九十四卷又畧举事目年经国纬以备检寻为目录三十卷又参考羣书评其同异俾归一涂为考异三十卷合三百五十四卷自治平开局迨今始成岁月淹久其间抵牾不敢自保罪负之重固无所逃【中谢】重念臣违离阙庭十有五年虽身处于外区区之心朝夕寤寐何尝不在陛下之左右顾以弩蹇无施而可是以专事铅槧用酬大恩庶竭涓尘少裨海岳臣今筋骸癯瘁目视昏近齿牙无几神识衰耗目前所为旋踵遗忘臣之精力尽於此书伏望陛下寬其妄作之诛察其愿忠之意以清闲之燕时赐省览监前世之兴衰考当今之得失嘉善矜恶取是舍非足以懋稽古之盛德躋无前之至治俾四海羣生咸蒙其福则臣虽委骨九泉志愿永毕矣

贺立皇太子表

臣光言伏覩制书节文皇太子延安郡王侑可立为皇太子仍赐名煦者主器惟长立邦家之基锡命以时为社稷之福【中谢】窃以天意与子人情爱亲三王以来百世不易伏惟皇帝陛下光绍前烈濬发远猷仰尊宗庙之严俯眷烝民之重宠建上嗣诞告多方离日昭布於重光震雷何啻於百里封畛之内声教所覃凡有识知孰不鼓舞况臣叨居近列夙受大恩喜闻徽音远踰庶品

元丰八年三月奔国丧太皇太后遣入内供奉官梁惟简宣谕

邦家不幸大行升遐嗣君冲幼同摄国政公历事累朝忠亮显着母惜奏章赞予不逮

谢宣谕表【元丰八年三月二十三日上】

臣光言今月二十二日入内供奉官梁惟简传太皇太后陛下宣谕以臣历事累朝令母惜奏章者【中谢】臣文学政事一无所长蒙仁宗皇帝擢寘侍臣英宗皇帝引为学士大行皇帝初登宸极召入翰林继处宪台又承人乏俾贰枢府臣荷累圣大恩无以为报惟竭愚时进狂瞽祇知推诚不识忌讳每荷矜容未尝谴黜属者大行皇帝遭疾弥留深惟万几之重请陛下权同处分上天降祸奄及大故陛下建立圣嗣绥宁中外民物咸若神祇协从此皆陛下之渊谋羣生之厚幸臣以进怀先帝盛德奔赴阙庭上欲一望梓宫少展臣子之哀诚即退归洛邑复就冗官不意陛下过有听采特降中使曲加獎饰待以耆旧许之尽言臣闻商书曰木从?则正后从谏则圣后克圣臣不命其承陛下实有圣德知所先务听政之初首开言路臣本何人齿发衰朽精力昏耗有何才识克堪兹任但冀天下之士由此识陛下之心嘉言响应正论辐凑民间疾苦何患不闻国家纪纲何患不治斯乃宗庙社稷之灵四海羣生之福岂伊微臣独为庆幸

谢门下侍郎表

臣光言近上表辞免新除门下侍郎恩命伏奉批答不允者母慈临御嗣圣亮陰登进弼臣眷求旧物才非称任辞不获从【中谢】伏念臣出自诸生幸承素业守泥古之朴学乏经世之远猷逮事仁皇备员谏省容逆鳞之愚直无补衮之嘉谋会英祖之纂承进河图之近密最膺异礼深亮孤忠及先皇即政之初被内相代言之命委司天宪擢贰枢钧终获遂於恳辞盖曲成於志守而臣?埃罔效精力早衰出守无能分台得请留连祠馆荏苒岁华不图仙驾之升永絶清光之望伏遇皇帝陛下丕承洪绪寅御中区访落之谋亟先於羣辟赐还之诏屡出於中宸起於林壑之中处以庙堂之上矧今始初政事绥靖邦家四方翘首以向风万姓倾心而听上斯乃君臣儆惧之日宗社安危之机必得非常之才以济维新之治臣避命弗获居宠为忧谨当承元首之明竭股肱之力庶图薄效仰答鸿私臣无任戴天荷圣激切屏营之至

上皇帝谢赐生日礼物表

臣光言伏蒙圣恩以臣生日特降诏书赐臣米面羊酒者使车传命宸检颁恩乃眷微生特推异数【中谢】伏念臣本由孤进历事先朝属睿哲之统临承赞襄之乏使无嘉谋之云补有素食之深讥适当生育之辰倍切劬劳之感累茵列鼎思负米以难追立身扬名在显亲而何有敢烦君赐下逮家庭虽邦礼之有常在臣愚而曷称此盖伏遇皇帝陛下宠优近列仁育羣生隆饴廩之多仪广云天之丽泽先事後得顾慙锡与之荣移孝为忠誓竭糜捐之节

上太皇太后谢赐生日礼物表

臣光言伏蒙圣慈以臣生日特降诏书赐臣米面羊酒者至仁垂眷多物分颁拜赐惟优汗顔有腩【中谢】伏念臣器能浅陋术学迂踈仰膺简注之隆进备弼谐之职适及始生之旦复叨厚下之恩及养无因感劬劳於兹日致礼有秩蒙庆泽以自天此盖伏遇太皇太后陛下坤厚兼容母慈广被重近司之责任推异数以劝官特加饴廩之仪以示宠光之渥所生无忝敢忘夙夜之勤来事可为益图忠义之报

上皇帝辞免正议大夫表

臣光言伏奉制命特授臣正议大夫者中天霈泽近辅书劳亦及罔功岂宜虚受【中谢】伏念臣素无佗技唯系孤忠误蒙累圣之知寝服近僚之列顷因人乏进贰宰司先帝审讯羣臣靡预誓言之末陛下嗣膺大宝曾无翊戴之勤岂弗畏於名言讵敢当於懋宠矧乃方任人而立政惟即命以记功将深戒於官师宜先从於近始伏望皇帝陛下慎司名器申劝臣邻收出綽之过恩亮循墙之愚恳爵惟馭贵免上累於至公赏必及劳盖率由於旧典

上太皇太后辞免正议大夫表

人惟图旧赏贵及劳义所当辞情难冒处【中谢】伏念臣早缘末学被遇累朝乏稽古之令猷无致君之远业入陪经幄久亲日月之光出领祠宫实荷云天之庇会慈宸之御极登嗣圣以承祧徒膺乏使之求进预同寅之列属宠褒於近弼特序进於文阶顾无横草之勤均被出纶之渥輿情共骇内忪靡遑伏望太皇太后陛下洪造听卑至明烛隐慎守馭臣之柄无轻出器之名昭示大公辍已行之成命少安愚分息被已之深讥

上皇帝谢转正议大夫表

臣光言伏奉告命授臣正议大夫上表辞免奉批答不允仍断来章者离明继照兑泽旁流祇受已还震惶无措【中谢】臣闻以资诏爵则民兴忠谊眡功为赏则下絶觊觎故德盛者其位隆力勤者其报厚劝沮斯在授受靡虚伏念臣学不适时才非经世谬尘近列最後诸臣辱体貌之兼隆竭股肱而无补属举懋官之典咸畴卫上之方绩用蔑闻褒章误及虽危诚之备列终成命之莫回居宠无名在顔有腴此盖伏遇皇帝陛下馭臣惟礼厚下以仁优其进等之恩责以致身之节乾坤至大均覆载以不遗日月无私委照临而尽及永图报塞唯誓靡捐

上太皇太后谢转正议大夫表

明纶误及涣汗难收弗获恳辞终慙冒处【中谢】伏念臣自陪机政无补圣猷虽夙夜以自强惟事功之匪立每流年之是惜加衰疾之所婴敢以瘵官复当懋赏是以历陈故实备述惓诚荐奉诏音两紆使节对天威之咫尺烦睿训之丁宁循走无从强顔祇受此盖伏遇太皇太后陛下至仁勤施大德兼容推均一於鵷鸿昭忠厚於行苇体乾坤之覆育品物不遗并日月以照临光明下济誓殫努力仰答鸿恩

谢起居减拜表

臣光言伏准合门告报今月十四日内降以臣与吕公着近各推恩转官所有将来正谢特令两拜起居余免舞蹈仍於执政官班次後别作一班及自今後凡遇前殿应于大起居特令别作一班止两拜起居恩出非常礼加异数优假太过慙负愈深【中谢】臣猥以琐才预闻机政去春以後疾疹屡生入冬以来饮食渐少迨兹岁序之首顿觉筋力之衰拜起絶艰朝请殆

废内惟恩纪之重天地所不能踰退思绩效之微丝毫未尝有立欲避位则为罪益大欲就列则强力不前朝夕为衆目所观啓处无措躬之地敢谓皇帝陛下太皇太后陛下仁沾枯朽明烛幽微特亏着定之仪曲遂形骸之便臣询诸故老或谓有旧章然彼皆位跻宰辅之崇德着耆明之美岂臣么麽所敢比方欲辞则实所不支欲受则自知非分踧踖心悸战兢汗流惟仰赖於宠灵冀有瘳於药物病庶遄已礼得如初期於竭忠不敢爱死

奏弹王安石表

熙宁三年御史中丞光等累次全台上疏参知政事王安石不合妄生奸诈荧惑圣聪及公亮等各务依违未曾辨正乞明其罪不蒙施行窃以易喻履霜示为君制臣之术书戒作福明凶国害家之常易书之义其知几乎君子见几不俟终日是以自古君无过失而臣不奸欺盖知其几而遏其端也伏遇陛下即位以来日慎一日闻过则喜从谏如流四方翹企以望太平万俗讴謡而陶美化其以用安石为相斯见陛下焦中心而求治急先务以济时者也而安石备政府必当辅国以伊周之道致时为尧舜之民发政施仁俾合輿意而安石首倡邪术欲生乱阶违法易常轻革朝典学非言伪王制所诛非曰良臣是为民贼而又牵合衰世文饰奸言徒有嗇夫之辨谈拒塞争臣之正论加以朋党鳞集亲旧星攢式备近畿或居重任窥伺神器专制福威人心动摇天下惊骇苟陛下不遏其端则安石为祸不小夫书易之戒正急於斯且陛下以安石有师保之尊故旧之恩俾为相臣使预政事昔汉尊桓荣徒闻设几燕贵邹衍惟见筑宫岂有俾居显重而妄使改为若不正其罪恶亦难以顺乎衆意臣职居御史身为谏官非不能希意苟合以求宠荣盖以立君朝者当励已以去邪食君禄者必轻身而为国臣之与安石犹冰炭之不可共器若寒暑之不可同时是以屡犯天顔辄陈狂瞽心既为国宁复爱身苟今日蒙鈇钺之诛胜异日死贼臣之手伏愿陛下独奋乾刚专行夬决一遵祖宪无用邪谋诛逐乱臣延纳正士上以顺皇太后之意下以慰亿兆人之心则臣等退就诛戮亦所甘心

谢赐银绢表

臣光言伏蒙圣慈以臣编修百官年表成书特降诏奨谕仍赐臣银一百两绢一百匹者奏篇甫上褒诏爰颁荷宠若惊省躬无措【中谢】伏念臣浅才末学庸识卑辞久尘侍从之班曾乏猷为之补顷膺睿旨俾纂旧章恭惟祖宗创业垂统之难邦国立政任官之要必表年而纪月可鉴古以验今畧举宏纲庶存成式淹留累岁铨次终篇仰稽乙夜之观方虞旷职之咎岂期温诏发自渊衷锡外府之兼金加丘园之賁帛载惟虚受弥切腼顔此盖皇帝陛下顺考百王丕承列圣刚健而笃学缉熙於光明眷执简之微勤形賛书之重奨宠踰华袞既稽首以拜嘉赐厚百朋实无功而冒赏

传家集卷十七

卷十八

<集部,别集类,北宋建隆至靖康,传家集>

钦定四库全书

传家集卷十八 宋 司马光 撰章奏一

论两浙不宜添置弓手状【先公知杭州为作】

臣窃观两浙一路与佗路不同臣谨条列添置弓手不便事件如左伏惟圣恩省察少加详择焉当今西戎梗边三方皆耸人心易动当务安之一旦异常诏书大加调发擐甲执兵学习战陈置指挥使节级等名目颇似军法以为欲倣河北陕西沿边乡兵谓国家以权计点之假名捕盗渐欲收为卒伍戍守边防吴人轻怯易惑难晓道听涂说衆情鼎沸至欲毁体捐生窜匿山泽臣虽明加告谕严行止约愚民无知不可户说诚恐?点之後摇动生忧其不可一也吴越素不习兵以故常少盗贼不过聚结朋党私贩茶盐时遇官司往往鬪敌在於两浙最为剧贼然皆权时则合事讫则散不能久相屯结又无銛利兵器止偷商税不敢剽掠平人近年以来虽亦颇有强盗然比诸内地要自稀疎今避差点者若窜匿无归必列为寇加以弓矢刀锯之类许其私置自今以後贼盗必多及私贩茶盐之徒皆有利兵拭拒吏士益难擒讨积微至着渐不可久其不可二也奸吏贪饕惟利是务不畏法令不顾公议幸得因缘惟喜多事今计杭州管界当差若干人他州比卒大凡有几县胥里长於兹相庆民既忧愁而又胁之烦苦不安而又扰之所规自润岂顾其外虽朝廷重为惩禁特倍常科长吏劳心不能悉察厚利所诱死亦冒之加以版籍差误户口异同毫厘不当互相告决追呼无时狱讼不歇则民未暇为公上给役而先困於贪吏之诛求矣此之极扰势不能免其不可三也民皆生长畎畝天性戇愚所知不过播种之法所识不过耒耜之器加之吴人弩弱天下所知一旦使弃其所工学所不能徒烦教调终无所成就其有成不堪施用则是虚有烦费而与不添置无异其不可四也吴子壽梦以前世服於楚自申公巫臣得罪于楚逃奔于晋为晋聘吴教之乘车教之战陈其後楚人戎车岁驾早朝晏罢奔命不息以至吴亡自是以来号称轻狡远则刘濞近至钱鏐其间承风倔强无数岂唯其人之跋扈亦由习俗之乐乱也幸赖祖宗之驯致陛下之敦化至德之酿沦於骨髓暴乱之风移变无迹此皆上天降佑前世所不能庶几者也今忽无故黷玩威棱狎侮危事示以逆德弄之凶器生奸回之心启祸患之兆臣恐以久非国家之至便所以万全而无害其不可五也方今两浙虽水旱稍愆未至流殍闻阎无事盗贼不添纵使有之旧来吏士随发擒讨甚有余力不假更求正恐平居兴役有害无益而已臣职忝密近官备藩方不敢默默理须上列伏望陛下特令两浙一路更不添置或以事须过防旧人太少则乞只依近降敕命量加添补更不立指挥使等名目阅习诸事一如旧规贵得衆情大安别无生事

为孙太博乞免广南转运判官状

臣昨自滑州签判就除本州通判未及半岁今又蒙恩授前件差遣於臣忝冒实踰涯分供命陈力岂宜复辞向若止臣一身崎岖困苦虽更远役靡不甘心敢以微诚轻烦圣听念臣二亲垂白思恋乡里两任滑州去家差近迎侍朝夕往来如意甘脆供须颇为私便一日离侧倚门致念况复贪荣远从吏道其在人子何心自安转运判官国家近置推择委任务在得人臣愚疎恐难堪称伏惟圣慈详求干敏授以此职令臣且充滑州通判终满一任庶得官政无废侍养不阙君亲之际恩义两全弃骨殚身竭云补报

论屈野河西修堡状【嘉佑二年上】

窃以为人臣者事君不避难有罪不逃刑臣先任通判并州军州事日准经畧司牒差往麟州勾当公事其屈野河西一带田土积年以来为夏虏所侵臣委曲询访本州当职官吏以虏之侵盗为日已久谕之以理则不肯退缩逼之以兵则动成战鬪召之重定界至则偃蹇不来春种秋获无有已期如何区处可以不战而得所侵之地其本州官吏为臣言州城之西临屈野河自河以西直抵界首五六十里并无堡障斥堠以此虏得恣耕其田游骑往往直至城下或过城东州人不知去岁已於河西置一小堡以处斥堠之人亦曾申经畧司乞於其西增置二堡会今春以来虏骑屯聚徧满河西经畧司牒令候西人退散别申取指挥今虏衆尽已退去自州城以西至大横水浪爽平数十里间絶无一人一骑若乘此际急於州西二十里左右增置二堡每堡不过十日可成比至虏中再行点集此堡已皆有备虏不能为害如此则麟州永无侵軼之虞州兵出入有所宿顿堡外先侵之田虏皆不能耕种臣之愚心亦为国家固争屈野河西田者非少此尺寸之地盖以虏侵耕至河则麟州孤危果能成此二堡以为麟州耳目藩蔽於事诚便遂归具以官吏所言白於龐籍籍用臣言即牒麟州令依前申修筑二堡仍令精加探候广设堤备戒谕约束莫非丁宁盖欲乘间急修故不暇取旨俟报但曾奏知而已不期牒到之後元未兴修虏衆已复大集於五月五日彼处兵官引一千许人夜开城门径往屈野河西前无探候後无策应中无部伍但齎酒食不为战备以此逢敌如何不败遂令所谋之事悉皆无成此乃诸将恃勇轻敌临事无备之所致本非修堡之过况自元昊纳款以来麟州修建堡寨及出兵过屈野河西前後非一虽与虏遇未尝败北明知今日之败在於无备不在修堡与过河也然臣窃闻议者乃以龐籍为擅修堡寨引惹边事臣伏自惟省本因臣与麟州官吏商量传道其言達於龐籍籍未尝身至河西周知利害皆臣愚戇思虑不熟轻议大事当伏重诛今乃使议者悉归咎於龐籍臣岂敢晏然不言苟求自脱上负圣朝死有余责臣虽小人义不忍为伏望陛下察龐籍本心欲为国家保固疆圉发於忠赤不顾身谋过听臣言以至於此独治臣罪以正典刑虽蹈鼎鑊亦无所恨

论屈野河西修堡第二状

臣先曾奏陈为麟州修堡事乞独治臣罪至今未奉朝旨今窃知龐籍移知青州夏倚等各有责降臣伏自惟念若朝廷不以修堡为非龐籍等必不受责若以为非则龐籍先已指挥麟州罢修此堡因臣至彼见虏骑退散方议再修武戡夏倚等虽建此策因臣至彼传道其言方得達於龐籍由是言之修堡之事皆臣所致若治其罪臣当为首今龐籍等先受其责而臣未蒙谴罚臣实内慙无以自处况臣在并州日受经畧司牒管勾本司要重公事龐籍凡处置边事

未尝不询及於臣采用其说臣亦夙夜竭尽愚虑知无不言庶几協心裨补国家有万一之益今乃以智识浅短思虑不精上为朝廷之忧下为庞籍之累若复苟求自脱不即大诛是臣以蕞尔之躯亏国家至平之法罪衅愈重不容於死伏望圣慈察臣前後所陈本宗事理严赐诛谴以正刑书臣不胜幸甚

论麦允言给卤簿状【奉圣旨麦允言有军功特给卤簿】

昔仲叔于奚有功於卫卫人使之繁缨以朝孔子曰惜也不如多与之邑惟器与名不可以假人夫爵位尊卑之谓名车服等威之谓器二者人主所以保畜其臣而安治其国家不可忽也今允言近习之臣非有元勲大劳过絶於人而赠以三公之官给以一品卤簿其为繁缨不亦大乎陛下虽欲宠秩其人而适足增其罪累也何则三公之官鼎足承君上应三台卤簿者所以褒赏元功皆非近习之臣所当得者陛下念允言服勤左右生已极其富贵死有以三事之礼为之送终鼓吹箫铙烜赫道路是则扬其僭侈之罪使天下侧目扼腕而疾之非所以为荣也惟陛下御仲叔于奚之传垂意孔子之言则知名器之重不可加非其人况唐制羣臣於国立大功者婚葬则给卤簿余不在给限伏望陛下追寝前命其麦允言更不给卤簿毋使天下之人窃敢指目以为朝廷过举不胜幸甚

乞印行荀子扬子法言状【皇佑二年上】

臣伏以战国以降百家蠹起先王之道荒塞不通独荀卿扬?排攘衆流张大正术使後世学者坦知去从国家博采艺文扶翼圣化至於庄列异端医方细伎皆命摹刻以广其传顾兹二书犹有所阙虽民间颇畜私本文字讹误读不可通诚恐贤達之言寢成废缺今欲乞降下崇文院将荀子扬子法言本精加考校讫雕板送国子监依诸书例印卖臣愚懵不達大体不胜区区贪陈所见

修筑皇地祇坛状【皇佑三年五月上奉圣旨依】

谨按唐郊祀录方丘八角三成每等高四尺上濶十六步设八陛上等陛广八尺中等陛广一丈下等陛广一丈二尺今皇地祇坛四角再成面广四丈九尺纵四丈六尺上等高四尺五寸下等高五尺方五丈三尺陛广三尺五寸平漫无城大抵卑陋不与礼典相应伏以王者父天母地天地之尊礼相亚埒今圆丘之制极为崇峻独於方丘有所阙畧未称国家严恭明察之意伏乞下有司依唐郊祀录制度增修庶合典礼

论刘平招?葬状【皇佑三年八月上】

准枢密院批送下国子博士刘庆孙等奏状六月二十三日进呈奉圣旨送太常礼院详定闻奏臣等谨按延陵季子曰骨肉归复于土?气无所不之是故圣人作为丘壠以藏其形作为宗庙以飨其神形之不存葬将安设今刘平没身虏廷丧柩不返其子不忍封树之不立哀展省之无所欲虚造棺槨招?假葬朝廷下之礼官令检详故实臣等按晋世袁瓌贺循等议以为非

身无棺非棺无槨苟无丧而葬招幽?气於德为愆义於礼为不物当时诏书明有禁约今刘庆孙等所请招?葬不可听许所有将见赠官品定諡则乞依条例施行

论张尧佐除宣徽使状【皇佑二年十二月上】

臣闻明主劳心力以求谏和顔色而受之士犹畏懦而不敢进又况震之以威压之以重而望忠臣之至直言之入难矣臣之不忠言之不直而天下安万事治者未之有也臣窃见台谏官屡以张尧佐事上言而陛下执之益坚拒之益固前日台谏官等守合请对陛下却而不内中外之人莫不骇愕以为异事昔汉元帝欲用冯昭仪兄野王为御史大夫既而疑曰吾恐後世谓吾私於後宫遂不用今尧佐有野王之嫌而无其才陛下不次用之数年间自散郎至宣徽使虽彼实有可称天下之人安可家至户晓使谓陛下不私後宫哉抑又闻之人有种瓜而甚爱之者盛夏日方中而灌之瓜不旋踵而菸败其爱之非不勤也然灌之不以其时适所以败之也今陛下贵用尧佐远过其分天下已侧目扼腕而疾之又复摧折忠谏以重其罪是正日中而灌瓜也臣窃为尧佐寒心而陛下独不为之深思远虑哉非独如是而已前者台谏官不得对之日陰雾冥冥跬步相失寒冰着木终日不解臣谨按洪范五行传听之不聪是为不谋厥咎急厥罚常寒又按京房书谓之蒙气此皆陰气太盛壅蔽阳明上下否塞疑惑不决之象天意昭然有如教语行道之人皆知其意陛下性资纯孝严恭天命容纳直言深明得失此非臣之谀乃天下所共知也独柰何以尧佐之故忽天戒而不顾弃人言而不从轻祖宗之爵禄违古今之明鉴书之简策使天下之人有以议圣德之万一或累於光融高大之美此臣所以日夜痛心疾首寝不能安食不能饱深为陛下重惜者也臣闻臣之事君犹子事父也岂有父获大谤於外而子不以告且不谏哉惟陛下亟召谏臣使竭其所闻采纳其言而慰安其意以厌上天之心解外廷之惑辟忠谏之路塞宠幸之门则天下欢然歌颂盛德岂有穷哉昔汉明帝作德阳殿鍾离意谏即时罢之後乃复作殿成谓羣臣曰鍾离尚书在此殿不成矣然则明帝非不欲为殿也所以屈意罢之者欲全谏臣之节而开直言之端也今台谏官前後言尧佐者数矣陛下曾不留神省察少为末减以慰其心夫人主所欲为人臣岂能强变之哉顾自今以往事复有大於尧佐者在列之臣噤嘿拱手视之而已矣此非朝廷之福也不然羣臣犹朽木陛下犹雷霆安可以力校哉惟陛下察之而已矣

论夏竦谥状【皇佑四年七月上】

臣等伏覩故赠太师中书令夏竦以旧在东宫特赐諡文正臣闻大戴礼曰谥者行之迹也行出於己名生於人所以劝善沮恶不可私也臣等叨预礼官諡有得失职所当言不敢隐嘿谨按令文诸諡王公及职事官三品以上皆录行状申请考功勘校下太常礼院拟諡讫申省议定奏闻所以重名实示至公也陛下圣德涵容如天如地哀愍旧臣恩厚无已知竦平生不協羣望不欲委之有司槩以公议且将揜覆其短推见所长故定諡於中而後宣示于外臣等谓犹宜择中流之諡使与行实粗相应者取以赐之亦非羣臣所敢议也今乃諡以文正二者諡之至美无以复加虽以周公之材不敢兼取况如竦者岂易克当所谓名与实爽諡与行违传之永久何以为法伏以陛下叡智聪明烛见微远如竦所为岂不素闻乃欲以恩泽之私强加美諡虽朝士大夫畏竦子孙方居美仕不敢显言四方之人耳目炳然岂可揜蔽必曰夏竦之

为如是而諡文正非以諡为公器也盖出於天子之恩耳此其讥评国家之失岂云细哉臣等所以夙夜区区不敢避诛戮之辜怨讐之祸狂僭妄言正为此耳伏乞陛下留神幸察改赐一諡庶協中外之论以为万世之法臣等无任恳款惶惧之至

论夏竦諡第一状【奉圣旨改諡文庄】

臣等近以故赠太师中书令夏竦赐諡文正辄有奏陈乞赐改更至今未奉谕旨臣等窃以凡为人臣受禄不必多居位不必高苟当官不言则刑戮之人也是以夙夜惶惧不敢默默伏惟陛下不以鄙贱而忽其言臣等窃迹諡法本意所谓道德博闻曰文者非闻见杂博之谓也盖以所学所行不离於道德也靖共其位曰正者非柔懦苟媮之谓也盖以诗云靖共尔位好是正直也今竦奢侈无度聚敛无厌内则不能制义於闺门外则不能立效於边鄙言不副行貌不应心语其道德则贪淫矣语其正直则回邪矣此皆天下所共闻非臣等所敢诬加也陛下乃以文正諡之臣等戇愚不达大体不知复以何諡待天下之正人良士哉且陛下所以念竦如此之厚者以竦尝为东宫之臣故也向者东宫之臣死而得諡者非一陛下未尝亲有所定至於竦独不然岂非知竦所为不合衆心邪陛下必以竦为正直无疑则何不委之有司付以公议然则陛下揜覆其短适所以彰之也陛下念竦不已则莫若厚抚其家至於諡者先王所以劝善沮恶非供恩泽之具也议者将以諡为虚名何害借人臣等请试言其害凡国家所以驭臣下者不过祸福荣辱而已若为善者生享其福死受其荣为不善者生遇其祸死蒙其辱天下虽欲不治安何可得已若有不令之臣生则盗其禄位死则盗其荣名善者不知所劝恶者不知所惧臧否颠倒不可复振此其为害可胜道哉虞书曰兢兢业业一日二日万几孔安国传曰言当戒惧万事之微夫事之方微治之易絶及其既着谁得治之况天下之人皆知竦为大邪陛下虽諡之以正此不足以揜竦之恶而适足以伤国家之至公耳且諡法所以信於後人者为其善善恶恶无私也今以一臣之故而败之使忠良雋杰之士蒙美諡者後世皆疑之则諡法将安用哉臣等所以冒犯天威区区不已与人父子为怨者诚惜国家劝沮大法不可因循亏废也伏惟陛下怜察少加采择特依前奏所陈改赐竦諡天下幸甚臣等不胜惶恐待命之至

论周琬事乞不坐冯浩状【皇佑四年十二月八日上】

臣伏奉圣旨以鑠厅应举人周琬重叠用殊字既条制未明试官不申请定夺臣与冯浩各特罚铜五斤放仰荷含贷喜惧无量然臣昨在武成王庙考试之时其周琬所用殊字浩本疑不系重叠用韵由臣愚懵鉴别不精观琬程试不见所善又据条制但言重叠用韵不云用佗韵引而協之者非由此坚执辄行黜落卤莽之罪尽皆在臣今浩与臣一例受罚臣虽无似能不愧心伏望圣慈特赐矜察与免冯浩责罚於臣更加严譴各得其分诚不敢辞

奏乞移高禩坛状【皇佑三年十二月上】

准敕节文高禩坛地下仰依典故增修今据濠寨张德等计料填叠修筑都役右具如前窃缘见今所置高禩坛处地势极下若就彼填叠不惟功费甚大兼夏秋霖潦四集未免浸渍谨案

北齐之制高禘为坛於南郊傍景佑四年太常礼院修定仪注约用此制今来若於南郊坛傍一二里以来别踏行高燥地修筑上件高禘坛则功费絶少又免水患参考礼典亦无所违如允所奏【云云】

传家集卷十八

卷十九

钦定四库全书

传家集卷十九 宋 司马光 撰章奏二

请建储副或进用宗室第一状【至和三年六月十九日上是岁仁宗违豫不临朝者累月国嗣未建天下寒心中外之臣勇悍不屈素以忠直自负如唐介等皆莫言惟范景仁时为谏官首建此议光闻而继之第一状留中第二状第三状降付中书】

窃以人臣之进言者舍其急而议其缓则言益繁而用益寡矣人君之听纳者忽其大而谨其细则心益劳而功益浅矣故明主不恶逆耳之言以察治乱之原忠臣不避灭身之祸以论安危之本是以上下交泰而事业光美也臣窃见陛下自首春以来圣体小有不康天下之人侧足而立累气而息恟恟忧惧若蹈冰炭间者虽已痊平而民间犹有妄为讹言以相惊动者虽有司以严刑束之彼口不得言中心惶惶何所不虑邪陛下胡不试思其所以然者何哉岂非储贰者天下之根本根本未定则众心不安也贾谊有言抱火厝之积薪之下而寝其上火未及然因谓之安当谊之时汉孝文帝春秋鼎盛有孝景以为之太子中外乂安公私富溢谊犹有是言使谊处於今日当云何哉陛下好学多闻博覽经史试以前古之事质之治乱安危之几何尝不由继嗣哉得其人则治不得其人则乱分先定则安不先定则危此明白之理皎如日月得失之机间不容发於朝?至大至急之务孰先於此而陛下晏然不以为忧羣臣爱身莫以为言此臣所以日夜痛心疾首忘其身之踈贱而不顾鼎鑊之罪者也伏惟陛下哀而察之今夫细民之家有百金之宝犹择亲戚可信任者使谨守之况天下之大乎三代之王以至二汉所以能享天之禄若是其久者岂非皆亲任九族以爲藩辅乎使亲者犹不可信则踈者庸足恃乎臣窃惟陛下天性纯孝振古无伦事无大小关於祖宗者未尝不勤身苦体小心翼翼以奉承之况所受祖宗光明盛大之基业岂可不为之深思远虑措之於安平坚固之地以保万世无疆之休哉臣闻天子之孝非若衆庶止於养亲而已盖将慎守前人之业而传於无穷然後为孝也故经称天子之孝曰德教加於百姓刑于四海诸侯之孝曰保其社稷而和其民人卿大夫之孝曰守其宗庙士之孝曰保其禄位而守其祭祀庶人之孝曰谨身节用以养父母此皆圣人之言非臣之狂瞽也今陛下所以奉事祖宗其道至矣若独於此未留睿意早定大议则邇时纯孝巍巍之德皆无益矣此天下所共为陛下重惜非特愚臣而已臣闻礼大宗无子则同宗为之後为之後者为之子也故为人後者事其所後礼皆如父所以尊尊而亲亲也伏惟祖宗受天明命功德在人本支百世子孙千亿而陛下未有皇嗣人心忧危伏望陛下深念祖宗之艰难基业之閔美神器之大宝苍生之重望勿听苟且之言勿从因循之计断自圣志昭然勿疑谨择宗室之中聪明刚正孝友仁慈者使摄居储贰之位以俟皇嗣之生退居藩服俛圣意未欲然者或且使之辅政或典宿卫或尹京邑亦足以镇安天下之心如此则天神地祇宗庙社稷实共赖陛下圣明之德况羣臣兆民其谁不欢呼鼓舞乎昔鲁漆室之女忧鲁君老太子幼彼匹妇也犹知忧国家之难盖以鲁国有难则身必与焉故也况臣食陛下之

禄立陛下之朝又得承乏典册之府比於漆室之女斯亦重矣诚不忍坐视国家至大至急之忧而隐默不言臣诚知言责不在臣言之适足自祸然而必言者万一冀陛下采而听之则臣於国家譬如蝼蚁而为陛下建万世无穷之基救四海生民之命臣荣多矣愿陛下勿以臣人微位贱谓之狂狷而忽之试以臣言自为圣意延问大臣忠於社稷者悦以为非臣请伏妄言之诛倘以为是愿陛下决志而速行之焚臣此奏勿以示外足以明臣非敢徼冀毫厘之幸也虞书曰勅天之命惟时惟几陛下当此之时变危为安变乱为治易於反掌若失时不断使天下之人有以议陛下之纯孝者则臣虽欲毕命捐躯以报陛下亦无及已臣不胜区区愤懣之诚干冒冕旒伏地待罪

请建储副或进用宗室第二状

臣先於六月十九日輒以瞽言干犯圣德伏地倾耳以俟明诏於今月余一无所闻陛下寬仁不加诛於狂愚之臣然亦未赐采纳臣窃自痛人品猥细言语吃讷不能发明国家安危大体致陛下轻而弃之此皆臣之罪也虽然臣性诚愚位诚贱而意诚忠语诚切愿陛下不以人之愚贱而废忠切之言少留圣心於宗庙社稷之至计则天下幸甚窃以为国家者政有小大事有缓急知所先後则功无不成议者或曰当今之务大而急者在於水灾泛滥是大不然彼水灾所伤不过污下及滨河之民若积雨既止有司少疏而塞之则民皆复业岂能为国家之患哉又曰然则在於穀帛窘乏是又不然夫以四海之富治平之久若养之有道用之有节使良有司治之穀帛不可胜用也岂能为国家之患哉又曰然则在於戎狄侵盗是又不然夫戎狄侵盗不过能惊扰边鄙之民若御之有道备之有谋可使朝贡相继岂能为国家之患哉以臣之愚当今最大最急之患在於本根未建衆心危疑释此不忧而顾忧彼三者是舍其肺腑而救其四肢也不亦左乎借有高才之臣能复九河之道储九年之食开千里之边而本根未建犹无益也况复细於彼三事者乌足道哉今陛下圣体虽安四方之人未能遍知尚有疑惧者陛下不以此时早择宗室之贤者使摄居储副之位内以辅卫圣躬外以镇安百姓万一有狂妄之人出於意外喧譁惊衆虽知万全无虑然亦岂可不过为之防哉臣窃意陛下圣智聪明洞照安危策虑已定而尚密之未欲宣示於外审或如此亦恐不可何则今天下之人企踵而立挾耳而听以须明诏之下然後人人自安又何待而密哉若以储副体大非造次可定者或且使之辅政或典宿卫或尹京邑亦是以遏祸难之原靖中外之意今安危之几间不容髮日失一日贵在及时而朝廷置之意外不为汲汲朝夕所议大抵皆目前常事非甚大而急者臣恐高拱雍容养成国家之患从而理之用力难矣此臣所以日夜区区寝不能安食不能饱不避死亡之诛进言不已者也伏望陛下察其愚衷特赐详择臣前日所奏及今状内事理稍有可施行者乞决计而速行之以安天下元元之心然後理臣僭妄建言之罪不敢辞也

请建储副或进用宗室第三状

臣先於六月十九日八月一日两曾上言乞择宗室贤者进而用之盖以上则辅卫圣躬下则镇安百姓迄今未闻圣朝少垂采听臣诚愚昧不達国家高远之意若臣所言非邪当明治其罪以示天下若其是邪亦谓圣心不宜弃忽岂可直以臣之愚贱不察其言若投羽毛於沧海之中杳然莫知其所之岂踈远所望哉臣不胜愤懣敢复剖析肝胆陈布以闻虽抵罪万死亦

无怨悔臣闻书曰远乃猷诗云犹之未远是用大谏凡国家之弊在於乐因循而多忌讳不於治安之时豫为长远之谋此患难所从而生也窃观汉室以至有唐简策所载帝王即位则立太子此乃古今不易之道也其或谦让未暇则有司请之所以尊宗庙重社稷皆国家莫大之庆未闻人主以为讳恶也及唐中叶以来人主始有恶闻立嗣者羣臣莫敢发言言则刑戮随之是以祸乱相寻不可复振殊不知本强则茂基壮则安此乃国家所当深鑒而不足以为法也今天下之人上自公卿下至庶人苟有知识忠於国家者其心皆知当今之务无此为大无此为急然而各畏忤旨之诛莫敢进言臣独不爱犬马之躯为陛下言之陛下岂可不少留圣思而听察之邪臣尝历观春秋以来迨至国初积一千六百余年其间天下混一内外无患兵寝不用者不过四百余年而已至如圣朝芟夷僭乱一统四海内平外顺上安下和使在朝在野之人自祖及孙耳目相传不识战鬪盖自上世以来治平之久未有若今之盛者也臣窃见国家於州县仓库斗粮尺帛未尝不严固扃鐍择人而守之况如是融明闳茂之业岂可不谨择亲戚可信任者使助陛下守之乎此则贤愚之人所共为陛下重惜者也陛下当此之时颐指如意不早决至策以固万世不拔之基独不念太祖太宗跋履山川经营天下真宗宵衣旰食以致太平之艰难乎此臣所以夙夜遑遑起则思之卧则梦之感叹涕泗不能自己不避烦瀆之诛再三进言者也或者谓臣身贱居外而言朝廷之事侵官也臣愚以为治古谏诤无官自公卿大夫士至於庶人百工商旅蒙眊刍蕘无有不得言者所以達下情而察国政也若置官而守之非其官者皆不得言则下情壅而不通如是则国家虽有迫切之忧行道之人皆知之而在上者莫得闻也此其为害岂不深乎况臣食陛下之禄於今三世矣先臣某以廉直恬退特为陛下所知擢自孤微升之侍从此恩之重子子孙孙何时敢忘而又陛下屢以水灾亲下明诏延访中外勤求得失臣独何人身逢盛际舍此大节隐而不言其余琐碎岂足道哉抑又闻之元后作民父母陛下臣父也安有人之子见危而不告其父乎伏望陛下察臣区区之心不为私其一身不惜少顷之间取臣前後所奏畧赐省覽其中万一苟有可施行者乞以陛下之意断而行之宣告中外使远近涣然无复忧疑则自然神灵悦於上而灾异伏衆庶喜於下而奸宄消至於草木昆虫靡不蒙被其福其为功业岂不盛哉夫时者难得而易失惟陛下早留神详察

乞虢州第一状【嘉佑三年上】

右臣不避斧钺倾沥危恳臣本贯陕州夏县丘垄宗族俱在彼中自先臣亡歿及臣服闋以来十有余年守官未尝得近乡里止曾一次请假焚黄得展省坟墓中心念此朝夕不忘近日方欲上烦朝廷陈乞家便一官又为自判吏部南曹未及一年及陕州侧近州郡俱未有阙所以未敢陈请今窃知已降勅命授臣开封府推官於臣之分诚为荣幸然臣有此私恳须至披陈加以禀赋愚闇不闲吏事临繁处?实非所长必虑不职以烦司寇伏望圣慈特赐矜察除知虢州或庆成军一次情愿守待远阙庶得近便洒扫光莹或上件处所无阙乞且归馆供职候有阙日特赐差除

乞虢州第二状

右臣先蒙恩授臣开封府推官臣为久不曾到乡里及自知才性疲弩不任剧职曾奏乞知虢

州或庆成军一次奉圣旨不许辞免就职以来已踰半岁体素多病牵强不前窃知虢州即今有阙臣欲乞依前来所奏差知虢州一次或已除人即乞候主判登闻鼓院尚书省闲慢司局有阙日差除一处庶几守官不至旷败

乞虢州第三状

右臣伏自去岁圣恩除开封府推官以来臣以久不到陕州乡里及资性弩下不任剧职两曾乞差知虢州或主判登闻鼓院及尚书省闲慢司局不蒙听许臣以开封府重难之处不敢更有陈请今窃知已降勅命除臣判三司度支勾院窃缘臣禀赋愚钝素无才干省府职任俱为繁剧去此就彼皆非所宜若贪荣冒居必致旷败内省侥幸不自安欲乞依前来所奏差知虢州或主判登闻鼓院及尚书省闲慢司局若俱无阙则乞知绛州乾州或在京闲慢差遣一次干冒宸严臣无任恳切战汗屏营之至

辞修起居注第一状

右臣伏奉勅差臣同修起居注臣性识庸昧学术空浅循涂平进犹惧不称况记注之职士林高选若以叙进则先達尚多若以才升则最出衆下岂敢不自揣度贪冒荣宠内犹愧忤人将谓何承命震恐殆无容措伏望圣慈俯赐矜察更择时彦以副羣望所有勅臣不敢祇受

辞修起居注第二状

右臣伏準中书劄子不许辞免便令受勅者臣闻人主度才然後授任人臣量能然後就职是以上无旷官下无窃位臣虽愚戇粗识兹义今修注之官日侍黼扆瞻望清光仕进之涂无此为美臣非恶居显荣乐在疎贱顾以弩下之质不相当称苟强顔为之不惟取四方观笑为士友所责亦恐用非其人貽朝廷羞臣愚所虑正在於此是以倾输悃悞昧死自陈今制旨益严未赐开可臣夙夜震惧不知所图岂辞语拙讷不能着白将诚信未昭无以感发俯仰惶惑若怀冰炭是用再有披露仰達天聰不敢避烦黜之诛庶几逃忝冒之罪所有差同修起居注勅臣不敢祇受乞依前奏更赐择人臣无任激切俟命之至

辞修起居注第三状

右臣伏准中书劄子奉圣旨令臣依前降指挥不许辞免便令受勅者臣区区之诚屡尘天听言理鄙拙未蒙采纳退自悼惧置躬无所臣虽愚陋岂不知非常之恩不可轻得诏命之严不可屡违所以冒犯雷霆祈请不已者诚以人臣之义陈力就列不能者止臣自释褐从仕佩服斯言奉以周旋不敢失坠仕进本末皆可覆按乡者承上庠之乏充文馆之员补奉常之属给太史之役未尝敢以片言避免烦浼朝廷盖以解摘章句校讎文字考寻仪典编次简牘苟策励疲弩庶几可以逃於罪戾是以闻命之始即时就职至於修起居注自祖宗以来皆慎择馆阁之士必得文采闳富可以润色诏命者然後为之臣自幼及长虽粗能诵习经传涉猎史籍至於属文实非所长虽欲力自切劘求及等辈性有常分不可强勉不自惟忤贪冒荣宠异

时驱策有所不称使四方之人环视讥笑以为盛明之朝容有窃位之人其为圣化之累岂云细哉如是则虽伏质横分不足以补塞无状此臣所以夙夜惶悸欲止不能者也且臣前後所陈剖心析胆莫非恳到而朝廷弃置其言曾不之省是不以情实待臣也意者使臣言出於诚陛下矜而听之足以尽下情从物欲使臣言出於伪陛下亦因而许之足以沮奸回警媮薄臣窃为朝廷计之二者皆未为失也今臣所陈请已及再三而陛下拒之愈坚督之愈急使拳拳之志无以自明岂上下坦然推心相信之道哉臣不胜愤懣伏望圣慈依臣前奏更赐择人所有同修起居注勅臣不敢祇受

辞修起居注第四状

右臣伏蒙圣恩差臣同修起居注已三次奏陈不敢受敕更乞择人今又准中书劄子奉圣旨令臣依累降指挥便受勅更不得辞免诏旨丁寧至於三四而臣偃蹇自遂是谓不恭若正典刑罪死无赦然臣知而不敢避者诚以罪有大於此者故也臣闻虞书曰无旷庶官然则官无钜细皆分理天职王者犹不敢私非其人况人臣而敢叨居其位乎如是则虽无国讨必有天刑臣虽顽愚粗知自爱虽日迁九官所不愿也臣向辞开封府推官及判三司度支勾院朝廷一有指挥不令辞免臣即时就职岂以材力为足堪其任哉窃自惟度以为朝命已行必不可移虽章奏烦多终无所益是以黽勉从事不敢复言及覩王安石前者差修起居注力自陈愬章七八上然後朝廷许之臣乃追自悔恨曩者非朝廷不许由臣请之不坚故也臣今所以烦瀆圣听不能自已虽加重诛所不敢逃况王安石文辞闳富当世少伦四方士大夫素所推服授以此职犹恳恻固让终不肯为如臣空疎何足称道比於安石相去远甚乃敢不自愧耻以当非常之命乎使臣之才得及安石一二则臣闻命之日受而不辞今臣内自省循一无可取乃与之同被选擢比肩并进岂不玷朝廷之举为士大夫所羞哉此臣所以彷徨尤不敢受者也伏望圣慈察臣诚心且令循守旧职更赐推择当今俊异之人可与安石为比者使同修起居注如此则贤不肖各当其分能不能各适其宜下情获安衆望为允所有同修起居注勅臣不敢祇受

辞修起居注第五状

右臣先奉勅差同修起居注臣四曾上奏乞更择人今又准中书劄子奉圣旨令臣依累降指挥更不得辞让便令受勅供职者臣要領如草芥不足以待斧钺躯命如蝼蚁不足以脂鼎鑊今屡违明诏当伏重诛然臣区区之情亦冀朝廷少赐寬察臣自知材能不足塞职归情上闻烦瀆圣听至於四五剝肝沥胆盈卷溢幅臣之情亦极矣臣之辞亦殫矣虽欲重复称引无以复加而朝廷以臣贱微终不知听臣昼夜忧悸无以自存俯仰三思进退维谷夫诏命至尊微臣至卑修注至荣罪诛至辱今臣以卑违尊去荣就辱原其本志岂有他哉正欲朝廷任官皆得其人愚臣处身不失其分而已若圣恩矜而许之则岂惟愚臣之幸亦可以少有补於国家若章奏烦多而诏旨不移岂惟使臣获顽愚不?之罪不容於蒞醢抑亦恐四方之人谓朝廷之於贤材如臣之比尚足固留也不胜迫切之情伏望圣慈依臣前奏更赐择人所有同修起居注勅臣不敢祇受

传家集卷十九

卷二十

钦定四库全书

传家集卷二十 宋 司马光 撰章奏三

日食遇陰云不见乞不称贺状【嘉佑六年五月二十八日上是岁果大雨不见日食不复称贺自後踵以为常】

右臣准太常礼院公文司天监奏今年六月朔太阳交食臣伏觀近世以来每有日食之变历官皆先具月日时刻及所食分数奏闻至日或为陰云所蔽或所食不满分数公卿百官皆奉表称贺以为大庆臣愚以为日之所照周徧华夷云之所蔽至为近狭今若太阳实亏而有浮云翳塞虽京师不见四方必有见者此乃天戒至深不可不察臣闻汉成帝永始元年九月日有食之四方不见京师见谷永以为沈湎于酒祸在内也二年二月日有食之四方见京师不见谷永以为百姓屈竭祸在外也臣愚以为永之所言似未協天意夫四方不见京师见者祸尚浅也四方见京师不见者祸寢深也日者人君之象天意若曰人君为陰邪所蔽灾慝明着天下皆知其忧危而朝廷独不知也由是言之人主尤宜側身戒惧忧念社稷而群臣乃始相率称贺岂得不谓之上下相蒙诬罔天譴哉又所食不满分数者历官术数之不精当治其罪亦非所以为贺也伏望陛下明勅有司若六月一日果有日食之异或四方见京师不见或所食不满分数皆不得奉表称贺以重皇天之怒则天下幸甚臣职在礼部掌羣臣庆贺章表不敢不言

陈三德上殿劄子【得旨留中三劄并初除諫官上】

臣伏蒙圣恩不以臣无似擢臣为諫官臣自幼学先王之道意欲有益於当时是以虽在外方为他官犹愿竭其愚心陈国家之所急况今立陛下之左右以言事为职陛下仁圣聪明求諫不倦羣臣虽有狂狷愚妄触犯忌悔陛下皆含容寬貸未尝加罪诚微臣千载难逢之际苟不以此时倾输胷腹之所有以副陛下延纳之意则不可以自比於人死有余罪矣臣窃惟人君之大德有三曰仁曰明曰武仁者非嫗煦姑息之谓也兴教化修政治养百姓利万物此人君之仁也明者非烦苛伺察之谓也知道义识安危别贤愚辨是非此人君之明也武者非强亢暴戾之谓也惟道所在断之不疑奸不能惑佞不能移此人君之武也故仁而不明犹有良田而不能耕也明而不武犹视苗之秽而不能耘也武而不仁犹知获而不知种也三者兼备则国治强阙一焉则衰阙二焉则危三者无一焉则亡自生民以来未之或改也臣不胜区区触死忘生窃见陛下天性慈惠慎微接下子育元元泛爱羣生虽古先圣王之仁殆无以过然自践阼以来垂四十年夙夜孜孜以求至治而朝廷纪纲犹有亏缺闾里穷民犹有怨叹意者羣臣不肖不能宣扬圣化将陛下之於三德万分之一亦有所未尽欵臣闻春秋传曰赏庆刑威曰君臣幸得以修起居注日侍黼扆之侧伏见陛下推心御物端拱渊默羣臣各以其意有所

敷奏陛下不复询访利害考察得失一皆可之诚使陛下左右前後股肱耳目之臣皆忠实正人则如此至善矣或出於不意有一奸邪在焉则岂可不为之寒心哉夫善恶是非相与混淆若待之如一无所别白或知其善而不能赏知其恶而不能罚则为善者日懈为恶者日劝善者懈恶者劝虽有尧舜禹汤文武之君稷契伊吕周召之臣以之求治犹凿冰而取火适楚而北行也伏惟陛下少垂圣思以天授之至仁廓日月之融光奋乾刚之威断善无微而不禄恶无细而不诛则唐虞三代之隆何远之有此臣愚浅所见不敢不陈取进止

言御臣上殿劄子【得旨送中书】

臣闻致治之道无他在三而已一曰任官二曰信赏三曰必罚康诰称文王之德曰庸庸祗祗威威显民言用其可用祗其可祗刑其可刑也臣窃见国家所以御羣臣之道累日月以进秩循资涂而授任苟日月积久则不择其人之贤愚而置高位资涂相值则不问其人之能否而居重职夫人之材性各有所宜而官之职业各有所守自古得贤之盛莫若唐虞之际然稷降播种益主山林垂为共工龙作纳言契敷五教皋陶明刑伯夷典礼后夔典乐皆各守一官终身不易苟使之更来迭去易地而居未必能尽善也今以羣臣之材固非八人之比廼使之遍居八人之官远者三年近者数月辄已易去如此而望职事之修功业之成必不可得也非特如是而已设有勤恪之臣悉心致力以治其职羣情未洽绩效未着在上者疑之同列者嫉之在下者怨之当是时朝廷或以衆言而罚之则勤恪者无不解体矣奸邪之臣佞奇以譁衆养交以市誉居官未久声闻四達蓄患积弊以遗後人当是之时朝廷或以衆言而赏之则奸邪者无不争进矣所以然者其失在於国家采名不采实诛文不诛意夫以名行赏则天下饰名以求功以文行罚则天下巧文以逃罪如是则为善者未必赏为恶者未必诛此陛下所以南面孜孜夙夜求治历载甚久而太平未效者也陛下诚能博选在位之士不问其始所以进及资序所当为使有德行者掌教化有文学者待顾问有政术者为守长有勇略者为将帅明於礼者典礼明於法者主法下至医卜百工皆度材而授任量能而施职有功则增秩加赏而勿徙其官无功则降黜废弃而更求能者有罪则流窜刑诛而勿加寬貸如是而朝廷不尊万事不治百姓不安四夷不伏臣请伏面欺之诛凡臣所言皆陛下耳所厌闻心所素知然致治之要无以易此知之非艰行之惟艰顾陛下力行何如耳敢昧死陈瞽言惟陛下裁择取进止

言兵上殿劄子【得旨送密院戒拣兵臣僚】

臣窃闻朝廷近降指挥?选诸指挥兵士补填近上军分其主兵之官惟务人多不复精加选择其间明知羸弱悉以充数臣以耳目踈短闻之後时不能豫陈可否致事已施行然其得失利害之明不可不尽为陛下言之往者不可及来者犹可追也臣窃惟当今国家之患在於士卒不精故四夷昌炽财用不足故公私窘迫今纵不能澄汰衰老以省大费而又平居晏然非有警急坐增无用之衆以长无穷之患臣不知为国计者果如何也方今天下安乐无虞而府库之积随得随散曾无羨余设不幸有螽螟水旱饥馑相仍盗贼猝起戎狄内侵不知陛下将何以待之此不可不为之先虑也臣窃观自唐室募兵以来果能得武猛材力之士犹为有益若不择勇怯而养之臣不知其可也唐德宗以神策军使白琇珪为京城招募使应募者皆市井沽贩之人有名无实及泾师犯阙德宗命琇珪以神策军御之卒无一人至者德宗狼狈失据

遂幸奉天及五代之际军政尤紊是以叛乱接迹祸败相寻周世宗以高平之战士卒不精故樊爱能何徽所部先奔归而大閱诸军悉简去老弱选其精锐以为侍卫亲军由是甲兵之盛近世无比故能南割淮甸北取关南羣雄畏服所向无敌太祖皇帝受天明命抚有大宝当是之时战士不过数万北御契丹西扞河东以其余威开荆楚包湖湘卷五岭吞巴蜀扫江南服吴越太宗皇帝绍丕烈奋神威遂拔晋阳一统四海堂堂之业万世赖之今天下兵数臣不能尽知窃闻比於太祖皇帝时其多数倍然元昊羌戎之豎子智高蛮獠之微种乃敢倔强河西横行岭表国家发兵讨之士卒或望尘奔北或迎锋沮溃毀辱天威为四夷笑由是观之养兵之术务精不务多也且今所选之兵升其军分增其粮赐是宜感戴上恩人人喜悦而窃闻京城之内被选之人往往咨嗟悲怨父子相泣况於外方兵士违去乡里诀别亲戚其为愁苦不言可知使中外人情遑遑如此岂惟久远之害亦不可不以切近之忧为万一之虑也兵者国之大事废兴之端安危之要尽在於是臣不知曾与不曾令两府大臣相与熟议经久利害然後行之今在京兵士已经?上分配诸军者无如之何其未?及外州军兵士伏望朝廷特降指挥下应系?军臣僚须是一一躬親子细?选好人材有膂力及得等樣别无羸弱方得?上如已经?中後朝廷别差不干碍官覆?得却有不及等樣及羸弱病患之人其元?军臣僚伏乞重行贬窜仍自今後每遇大段招?兵士并须先令两府臣僚同共商量度财用丰耗及事之缓急若须至招?方得闻奏施行并戒约?军臣僚务精不务多一如今来指挥取进止

论赦及踈决状【嘉佑六年八月十五日上】

右臣窃以赦者害多而利少非国家之善政也虞书曰眚灾肆赦怙终贼刑谓过误有害则赦之恃恶自终则杀之非不择罪之有无并赦之也汉大司马吴汉病笃光武亲临问所欲言对曰惟愿陛下慎无赦而已王符亦曰今日贼良民之甚者莫大於数赦赎赦赎数则恶人昌而善人伤矣蜀人称诸葛亮之贤亦曰军旅屡兴而赦不妄下然则古之明君贤臣未尝以数赦为美也国家承顺天心子爱百姓发号出令必先至仁然数赦之弊犹未能去又古之赦者其出无常严谨周密不可前知奸民犹抵冒以待之况今国家三年一郊未尝无赦每岁盛夏皆有踈决猾吏贪纵大为奸利悍民暴横侵侮善良百千之中败无一二幸而发露率皆亡匿不过周岁必遇赦降则晏然自出复为平人往往指望谓之热勅使愿慙之民愤邑惴恐凶狡之羣志满气扬岂爲民父母劝善沮恶之意哉且踈决之名本以盛暑之际恐囹圄之中有滞积冤结有司不为申理使无所告愬故天子临轩亲加虑问平其枉直无辜则赦有罪则诛使久系之人一朝而决故能消释沴气迎致太和非谓不问是非一切纵之也又祖宗之时每岁不过一次踈决死罪以下皆递降一等近年以来或至再三自徒以下一切赦之今岁五月以前踈决之令已再行矣此所以使百职隳慢奸邪恣睢者也今纵未能尽革前弊伏望陛下特降指挥下中书今後每岁踈决不过一次或早或晚使外人不可豫期其徒罪仍依旧降从杖或遇亲祀南郊之岁更不踈决永为定制庶几为恶之人不敢指以自寬有所戒惧

荐郑扬庭劄子

臣窃见近世以来搢绅之士专尚辞华不务经术先圣微言几成废坠臣谓苟有尽心修明六艺皆宜甄獎以励来者伏见并州孟县主簿郑扬庭自少及长研精易道撰着所得成易测六

卷不泥陰阳不涉怪妄专用人事指明六爻求之等伦诚难多得臣不敢隐蔽辄取进呈伏望
圣慈略垂省覽苟有可取量加旌异贵使学者有所劝慕取进止

荐刘庠劄子

臣伏见西鄙用兵以来草莱之士谈兵机献边策者不可胜纪其间夸诞迂阔不切事情鄙陋
肤浅无可观采者甚衆盖缘边鄙之事非土着之人耳目习熟则不能究明利病非学古之士
历观成败则不能坚定是非窃见并州乡贡进士刘庠撰成边议十卷援?古今指陈得失用意
甚勤论理颇多不敢隐蔽谨具进呈伏乞少赐省覽如有可取欲乞朝廷略加甄獎

论举选状【嘉佑六年八月二十一日上】

右臣窃以取士之道当以德行为先其次经术其次政事其次艺能近世以来专尚文辞夫文
辞者乃艺能之一端耳未足以尽天下之士也国家虽设贤良方正等科其实皆取文辞而已
近以祿享赦节文应天下士人有素敦节行兼通学术久为乡里所推者委转运使提点刑狱
同加搜访每路各三两人仍与本处长吏连署结罪保举闻奏所举之人朝廷命本州敦遣至
则馆於太学待遇甚厚考试之际不糊名誉録既而署等补官皆过所望此诚合先王取士之
道臣谓国家将除积久之弊立太平之基天下士大夫皆靡然向风矣行之未几忽闻朝廷一
切罢之无不怅然失望臣戇愚不识所谓若以所举之人多非实有材行则当治举将之罪别
加搜访岂可以一二人谬滥废天下之举贤是犹因溺而废天下之舟因噎而废天下之食也
且人之毁誉或出爱憎虽复圣贤不能自免孔子曰衆好之必察焉衆恶之必察焉恐国家亦
未可以此遥断否臧遽行黜陟也就使其人平昔所行诚有亏缺古之人或举於渔盐或举於
盗贼岂可不容其改行自新而终身弃之乎且人之行能迭有短长若不弃瑕録用而以一节
废之则失人多矣臣愚以为天子抚有四海海内之士不可一身察之也必资举者然後能尽
天下之才既用举者之言授之爵禄苟不严为禁约以防其私则请托欺罔无不至矣窃以孝
者士之尊行廉者吏之首务故汉世举士皆用孝廉行之最久得人为多臣欲乞应天下知州
府军监任内听举孝廉一人大藩听举二人转运使提点刑狱任内听举三人并须到任及一
年以上方得奏举夫乡举里选虽为古法今之为吏者不得久於其任士之素行或不能尽知
若本部无人可举即听举别部之人素所知者以充其数其在京两制以上听岁举一人其举
状逐时送下贡院置籍收掌每遇科场诏下即委贡院选择其日以前举主最多者取三十人
申奏降指挥下本贯敦遣赴阙若举主数同者即以发状先後为次【谓若俱有三人举主则
取第三状日月在前者】仍於进士奏名额内減三十人候到阙日或陛下临轩亲试或委中
书门下试经义策一道时务策一道但以义理优长为上不取文辞华美若所对经义乖戾圣
意及时务全不通晓方行黜落其及第授官并与进士第一甲同在明经之上仍於告身前列
坐举主姓名其所举之人若犯私罪情理重及正入已赃未及第者举主減三等已及第者減
一等坐之并不以赦原其公罪及私罪情理轻者举主不坐其未举以前若曾犯罪除公案见
在证验明白外举主亦不坐即因势要属请求举及为人属请并受属请而举之者并科违制
之罪受?者并以枉法论即敦遣不至者更不就除官若累经敦遣不至即乞朝廷临时裁度特
加聘召不为定制又国家置明经一科少有应者及诸科所试大义有司不以定去留盖由始

者立格太高致举人合格者少臣欲乞今後明经所试墨义止问正文不问注疏其所试大义不以明经诸科但能具注疏本意讲解稍详者为通虽不失本意而讲解踈略者为粗余并为不通若能先具注疏本意次引诸家杂说更以已意裁定援据该赡义理高远虽文辞质直皆为优等与折二通若不能记注疏本意但以已见穿凿不合正道虽文辞辩给亦降为不通其明经以六通诸科以四通以上为合格若合格人少即并取粗多者合格人多即减去通少者委试官临时相度令合元额又旧制明经以周易尚书为小经今欲乞以周易尚书毛诗为一科三礼为一科春秋三传为一科皆习孝经论语为帖经又说书一科议者多以为不当废欲乞与明经并置但每次科场止取十人奏名在诸科额内试中受官并与诸科同若自以本科及第或出身者更不得就试说书如此则求贤之路广请托之源絶浮伪之风息得人之颂兴矣

论移张叔詹知蔡州不当状【上乞改知卫州叔詹遂乞致仕朝廷许之】

右臣窃见前知寿州张叔詹因本路监司奏以本州水灾叔詹非才乞别差人寻移知蔡州伏缘寿蔡之民皆陛下赤子叔詹若为政无状於民有害移彼置此有何所殊况蔡州封部阔远户口繁庶土饶山林素多盗贼地望之重过於寿州牧守之任尤须择人岂有因不才被斥更得善处若叔詹实有才能惠及於民则当治本路监司罔上诬贤之罪使叔詹仍居旧任不复移易今臧否不分进退无据衆口籍籍皆云未允臣前上言为治之要在於择人赏罚此亦择人不精赏罚不当之一事也况叔詹资性庸下老而益昏本无片长授任过分其为忝冒人尽知之使之从政所至为害伏乞朝廷直令致仕或授以冗散之职勿使亲民庶几黜陟明白无损政体

传家集卷二十

卷二十一

<集部,别集类,北宋建隆至靖康,传家集>

钦定四库全书

传家集卷二十一 宋 司马光 撰章奏四

进五规状【嘉佑六年八月十七日止】

右臣幸得备位谏官窃以国家之事言其大者远者则汪洋濩落而无目前朝夕之益?於运阔言其小者近者则丛脞委琐徒足以烦浼圣听失於苛细夙夜惶惑口与心谋涉沥累旬乃敢自决与其受苛细之责不若取运阔之讥伏以祖宗开业之艰难国家致治之光美难得而易失不可以不慎故作保业隆平之基因而安之者易为功颓坏之势从而救之者难为力故作惜时道前定则不穷事前定则不困人无远虑必有近忧故作远谋燎原之火生於荧荧怀山之水漏於涓涓故作重微象龙不足以致雨画饼不足以疗饥华而不实无益於治故作务实合而言之谓之五规此皆守邦之要道当世之切务戇陋狂瞽触冒忌讳惟知纳忠不敢爱死伏望陛下以万几之余游豫之间垂精留神特赐省覽万一有取裁而行之则臣生於天地之间不与草木同朽矣

五规

保业

天下重器也得之至艰守之至艰王者始受天命之时天下之人皆我比肩也相与角智力而争之智竭不能抗力屈不能支然後肯稽顙而为臣当是之时有智相偶者则为二力相参者则为三愈多则愈分自非智力首出於世则天下莫得而一也斯不亦得之至艰乎及夫继体之君羣雄已服衆心已定上下之分明强弱之势殊则中人之性皆以为子孙万世如泰山之不可摇也於是有骄堕之心生骄者玩兵黷武穷泰极侈神怒不恤民怨不知一旦涣然四方糜渎秦隋之季是也惰者沈酣宴安虑不及远善恶杂揉是非颠倒日复一日至於不振汉唐之季是也二者或失之强或失之弱其致败一也斯不亦守之至艰乎臣窃观自周室东迁以来王政不行诸侯并僭分崩离析不可胜纪凡五百有五十年而合於秦秦虐用其民十有一年而天下乱又八年而合於汉汉为天子二百有六年而失其柄王莽盗之十有七年而复为汉更始不能自保光武诛除僭伪凡十有四年然後能一之又一百五十有三年董卓擅朝州郡瓦解更相吞噬至於魏氏海内三分凡九十有一年而合於晋晋得天下才二十年惠帝昏愚宗室皆构难羣胡乘衅浊乱中原散为六七聚为二三凡二百八十有八年而合於隋隋得天下才二十有八年炀帝无道九州幅裂八年而天下合於唐唐得天下一百有三十年明皇

恃其承平荒於酒色养其疽囊以为子孙不治之疾於是渔阳窃发而四海横流矣肃代以降方镇跋扈号令不从朝贡不至名为君臣实为讎敌陵夷衰微至於五代三纲頽絶五常殄灭怀玺未煖处宫未安朝成夕败有如逆旅祸乱相寻战争不息流血成川泽聚骸成丘陵生民之类其不尽者无几矣於是太祖皇帝受命於上帝起而拯之躬擐甲胄栉风沐雨东征西伐扫除海内当是之时食不暇饱寝不遑安以为子孙建太平之基大勲未集太宗皇帝嗣而成之凡二百二十有五年然後大禹之迹复混而为一黎民遗种始有所息肩矣由是观之上一千七百余年天下一统者五百余年而已其间时时小有祸乱不可悉数国家自平河东以来八十余年内无事然则三代以来治平之世未有若今之盛者也今民有十金之产犹以为先人所营苦身劳志谨而守之不敢失坠况於承祖宗光美之业奄有四海传祚万世可不重哉可不慎哉夏书曰予临兆民懍乎若朽索之馭六马周书曰心之忧危若蹈虎尾涉於春冰臣愿陛下夙兴夜寐兢兢业业思祖宗之勤劳致王业之不易援古以鑒今知太平之世难得而易失则天下生民至於鸟兽草木无不幸甚矣

惜时

夏至阳之极也而一陰生冬至陰之极也而一阳生故盛衰之相承治乱之相生天地之常经自然之至数也其在周易泰极则否否极则泰丰亨宜日中孔子传之曰日中则昃月盈则食天地盈虚与时消息而况於人乎况於鬼神乎是以圣人当国家隆盛之时则戒惧弥甚故能保其令问永久无疆也凡守太平之业者其术无他如守巨室而已今人有巨室於此将以传之子孙为无穷之规则必实其堂基壮其柱石强其栋梁厚其茨盖高其垣墉严其关键既成又择子孙之良者使谨守之日省而月视欹者扶之敝者补之如是则虽亘千万年无頽坏也夫民者国之堂基也礼法者柱石也公卿者栋梁也百吏者茨盖也将帅者垣墉也甲兵者关键也是六者不可不朝念而夕思也夫继体之君谨守祖宗之成法苟不隳之以逸欲败之以谗諂则世世相承无有穷期及夫逸欲以隳之谗諂以败之神怒於上民怨於下一旦涣然而去之则虽有仁智恭俭之君焦心劳力犹不能救陵夷之运遂至於颠沛而不振呜呼可不鑒哉今国家以此承平之时立纲布纪定万世之基使如南山之不朽江河之不竭可以指顾而成耳失今不为已乃顿足扼腕而恨之将何益矣诗云我日斯迈而月斯征夙兴夜寐无忝尔所生时乎时乎诚难得而易失也

远谋

易曰君子以思患而豫防之书曰远乃猷诗云猷之未远是用大谏昔圣人之教民也使之方暑则备寒方寒则备暑七月之诗是也今夫市井稗贩之人犹知旱则资车水则资辙夏则储裘褐冬则储絺綌彼偷安苟生之徒朝醉饱而暮饥寒者虽与之俱为编户贫富必不侔矣今为天下国家者岂可不制治於未乱保邦於未危乎诗云迨天之未陰雨彻彼桑土绸繆牖户今此下民或敢侮予孔子曰为此诗者其知道乎能治其国家谁敢侮之迨天之未陰雨者国家闲暇无灾害之时也彻彼桑土者求贤於隱微也绸繆牖户者修敕其政事也夫桑土者鵙鴒所以固其室也贤隲者明主所以固其国也国既固已虽有侮之者庸何伤哉臣窃见国家每边境有急羽书相衔或一方饥饉饿殍盈野则庙堂之上焦心劳思忘寝废食以忧之当是

之时未尝不以将帅之不选士卒之不练牧守之不良仓廩之不实追责前人以其备御之无素也幸而烽燧息五穀登则明主举万寿之觴於上羣公百官歌太平纵娱乐於下晏然自以为长无可忧之事矣呜呼使自今日已往四夷不复犯边水旱不复为灾则可矣若犹未也则天幸安可数恃哉陛下何不试以闲暇之时思不幸边鄙有警饥饉洊臻则将帅可任者为谁牧守可倚者为谁虽在千里之外使之常如目前至於甲兵之利钝金穀之盈虚皆不可不前知而豫谋也若待事至而後求之则已晚矣夫四夷水旱事之细者也抑又有大於是者陛下亦尝留少顷之虑乎诗云维此圣人瞻言百里维彼愚人覆狂以喜此言远谋之难知近言之易行也夫谋远则似远似远则人皆忽之其为害至惨也而无切身之急为利至大也而无旦夕之验则愚者抵掌谓之远也宜矣国家之制百官莫得久於其位求其功也速责其过也备是故或养交饰誉以待迁或容身免过以待去上自公卿下及斗食自非忧公忘私之人大抵多怀苟且之计莫肯为十年之规况万世之虑乎自非陛下惕然远覽勤而思之日复一日长此不已岂国家之利哉此臣日夜所以痛心泣血而忧也昔贾谊当汉文帝之时以为天下之势方病大瘡又苦???盭又类辟且病痲陛下视方今国家安固公私富贵百姓乐业孰与汉文然则天下之病无乃更甚乎失今不治必为痼疾陛下虽欲治之将无及矣治之之术非有他奇巧也在察其病之缓急择其药之良苦随而攻之勿责目前之近功期於万世治安而已矣

重微

虞书曰兢兢业业一日二日万几何谓万几几之为言微也言当戒惧万事之微也夫水之微也捧土可塞及其盛也漂木石没丘陵火之微也勺水可灭及其盛也焦都邑燔山林故治之於微则用力寡而功多治之於盛则用力多而功寡是故圣帝明主皆销恶於未萌弭祸於未形天下陰被其泽而莫知所以然也周易坤之初六曰履霜坚冰至霜者寒之始也冰者寒之极也坤之初六於律为林钟於历为建未之月阳气方盛而陰气已萌物未之知也是故圣人谨之曰履霜坚冰至言为人君者当絶恶於未形杜祸於未成也系辞曰知几其神乎君子知微知彰知柔知刚万夫之望谓此道也孔子谓鲁哀公曰昧爽夙兴正其衣冠平旦视朝虑其危难一物失理乱亡之端君以此思忧则忧可知矣太宗皇帝命诏宣使河州团练使王继恩讨蜀平之宰相请除继恩宣徽使太宗不许曰宣徽使位亚两府若使继恩为之是宦官执政之渐也宰相固请以继恩功大他官不足以赏之太宗怒切责宰相特置宣政使以授之真宗皇帝欲与章穆皇后及後宫游内库后辞曰妇人之性见珍宝财货不能无求夫府库者国家所以养六军备非常也今耗散之於妇人非所以重社稷也真宗深以为然遂止由是观之先帝以睿明卓越防微杜渐如此之深可不念哉昔扁鹊见齐桓侯曰君有疾在腠理不治将深桓侯不悦曰医之好利也欲以不疾为功及在血脉在肠胃桓侯皆不信及在骨髓扁鹊望之遂逃去徐福言霍氏大盛宜以时抑制汉宣帝不从及霍氏诛人为之讼其功以为曲突徙薪无恩泽焦头烂额为上客故未然之言常见弃忽及其已然又无所及夫晏安怠惰肇荒淫之基奇巧珍玩发奢泰之端甘言悲辞啓侥幸之涂附耳屏语开谗贼之门不惜名器导僭逼之源假借威福授陵夺之柄凡此六者其初甚微朝夕狎玩未覩其害日滋月益遂至深固比知而革之则用力百倍矣伏惟陛下思万几之至重覽大易之明戒诵孔子之格言继先帝之圣志使扁鹊得早从事毋使徐福有曲突之叹则可以修之於庙堂而德冒四海治之於今日而福流万世优游逍遥而光烈显大岂不美哉岂不美哉

务实

周书曰若作梓材既勤朴斲惟其涂丹雘此言为国家者必先实而後文也夫安国家利百姓仁之实也保基绪传子孙孝之实也辨贵贱立纲纪礼之实也和上下亲远还乐之实也决是非明好恶政之实也诘奸邪禁暴乱刑之实也察言行试政事求贤之实也量材能课功状审官之实也询安危访治乱纳谏之实也选勇果习战鬪治兵之实也实之不存虽文之盛美无益也臣窃见方今远方穷民转死沟壑而屡赦有罪巡门散钱其於仁也不亦远乎本根不固有识寒心而道宫佛庙修广御容其於孝也不亦远乎统纪不明名器紊乱而雕绩文物修饰容貌其於礼也不亦远乎羣心乖戾元元愁苦而断竹数黍敲叩古器其於乐也不亦远乎是非错缪贤不肖混殽而鈎校簿书访寻比例其於政也不亦远乎奸暴不诛冤结不理而拘泥微文纠缠细过其於刑也不亦远乎行能之士沉沦草野而考校文辞指决声病其於求贤不亦远乎材任相违职业废弛而检勘出身比类资序其於审官不亦远乎久大之谋弃而不省浅近之言应时施行其於纳谏不亦远乎将帅不良士卒不精而广聚虚数徒取外观其於治兵不亦远乎凡此十者皆文具而实亡本失而未在譬犹胶板为舟抔土为楫败布为帆朽索为维画以丹青衣以文绣使偶人驾之而履其上以之居平陆则涣然信可观矣若以之涉江河犯风涛岂不危哉伏望陛下拨去浮文悉敦信实选任良吏以子惠庶民深谋远虑以保安宗庙张布纲纪使下无觊心和厚风俗使人无离怨别白是非使万事得正诛锄奸恶使威令必行取有益罢无用使野无遗贤进有功退不职使朝无旷官察谗言考得失使谋无不尽择智将练勇士使征无不服如是则国家安若泰山而四维之也又何必以文采之饰歌颂之声眩耀愚俗之耳目哉

乞分十二等以进退羣臣上殿劄子【嘉佑六年闰八月八日上】

臣窃以国家张官置吏任事久则能否着能否着则黜陟明黜陟明则职业修职业修则万事理此古今致治之要术也今朝廷明知任官不久之弊然不能变更者其患有二一者仕进资途等级太繁若不践历无由擢用二者岁月叙迁有增无减员少人多无地可处此所以熟视日久而无如之何者也臣尝不自知其愚贱私为陛下虑之窃以今之所谓官者古之爵也所谓差遣者古之官也官以任能爵以畴功今官爵混淆品秩紊乱名实不副员数滥溢是以官吏愈多而万事益废欲治而清之莫若於旧官九品之外别分职任差遣为十二等之制以进退羣臣谨具条列如左

一十二等之制宰相第一两府第二两制以上第三三司副使知杂御史第四三司判官转运使第五提点刑狱第六知州第七通判第八知县第九幕职第十令録第十一判司簿尉第十二其余文武职任差遣并以此比类为十二等若上有阙即於次等之中择才以补之

一十二等之中旧无员数者并乞以即今人数为定员自今有阙则补不可更增

一十二等之人德行学术政事勇略钱穀刑狱文辞各随才授任其提点刑狱以上皆无罢满之期知州知县县令四年余皆三年为满未滿之间称职有功则改官益禄赏赐獎谕仍居旧

任必须上等有阙然後选择迁补其不能称职者则移易黜废有罪者贬窜刑诛

一同等之人虽名有尊卑事有闲剧地有远近治有小大遇迁补之时不复以资任相压皆合为一等选择进用

一提点刑狱以上伏乞陛下与执政大臣亲加详择其知州以下委之审官院幕职以下委之流内铨遇上等有阙即於次等之中取职业修举功利及民累经褒赏或有举主数多者次取常调少过者以次迁补

一应磨勘合改京官人且依常调差遣须候上等有阙即取有功或举主最多者以次迁补其自幕职入知县者并改京官

一因资?得京官者分监当为三等初任皆入下等监当候中等上等有阙亦依簿尉令録之制取有功或举主多者以次迁补若知县有阙则与幕职混同迁补但不改官而已仍自今後以资?授官者须历簿尉不得直除京官

一应因贪虐不公或昏懦废职坐除免停替之人永不得复旧等差遣内别无入已赃曾经叙理得差遣或降充监当者五年之外有举主五人以上听复旧等差遣

右十二等之制伏望裁择或有可采乞下公卿大臣详议然後施行取进止

乞施行制策劄子

右臣窃以国家本置六科盖欲以上观朝政之得失下知元元之疾苦非为士人设此以为进取之阶也臣昨差覆考应制举人所试策窃见上等三人所陈国家大体社稷至计其间甚有可采择者伏望陛下取正本留之禁中常置左右数加省覽以为儆戒其副本下之中书令择其所言合於当今之务者奏而行之使四方之人皆知朝廷求直言之士非以饰虚名乃取其实用也及臣前所献五规虽智识闇浅辞语鄙陋然皆臣夙夜尽忠竭诚以思治世之要道非指陈一事之得失於有司无所施行亦望陛下以视朝之隙时取观之庶几於圣政或有万分之益取进止

传家集卷二十一

卷二十二

钦定四库全书

传家集卷二十二 宋 司马光 撰章奏五

乞建储上殿劄子【嘉佑八年闰八月二十六日上】

臣先於至和三年通判并州事日三曾上言乞陛下早定继嗣以遏乱源当是之时臣疏远在外犹不敢隐忠爱死数陈社稷至计况今日侍陛下左右官以谏诤为名窃惟国家至大至急之务无先於此若舍而不言专以冗细之事烦瀆圣听厌塞职业是臣怀奸以事陛下罪不容於菹醢伏望陛下取臣曩时所进三状少加省察或有可取乞断自圣志早赐施行如此则天地神祇宗庙社稷羣臣百姓并受其福惟在陛下一言而已取进止

乞建储上殿第二劄子【寻有诏以濮王子宗实知宗正寺】

臣近於前月二十六日上殿敷奏乞检会臣在并州所奏三状早定继嗣事陛下圣意昭然即垂听纳凡所宣谕皆非愚臣所能及此乃天神地祇保佑皇家实万世无疆之休也臣谓陛下朝夕当发德音宣告大臣施行其事今将近一月未有所闻岂陛下以兹事体大慎选宗室未得其人将左右之人有所间阻荧惑圣听臣皆不得而知也臣闻为人後者为之子也着於礼律皆有明文汉孝成帝即位二十五年年四十五以未有继嗣立弟子定陶王欣为太子今陛下即位之年及春秋皆已过之岂可不为宗庙社稷深思远虑哉况今亦未使之正东宫之名但愿陛下自择宗室仁孝聪明者养以为子官爵居处稍异於衆使天下之人皆知陛下意有所属以系远近之心俟他日皇子生复使之退归藩邸有何所伤此诚天下安危之系愿陛下决意而速行之取进止

论荒政上殿劄子

臣窃闻淮南两浙今岁水灾民多乏食往往羣辈相聚操执兵仗贩鬻私盐以救朝夕至有与官军拒鬪相杀伤者若浸淫不止将成大盗朝廷不可不深以为忧盖由所司之太急故抵冒为奸臣闻周礼以荒政十有二聚民近者朝廷略以施行惟舍禁除盗贼二者似未留意今赤子冻餒滨於沟壑柰何尚与之争锱铢之利岂为民父母之意哉臣谓陛下宜戒谕职司使明体朝意稍弛盐禁而严督盗贼缓课利不充之罚急羣行剽刼之诛废告捕私盐之赏旌讨擒强暴之功弃聚斂之小得保安全之大福除恶於纖介弭乱於未形最策之得者也取进止

论劝农上殿劄子【嘉佑六年上得旨依】

臣闻食者生民之大本为政之首务也饥馑之世珠玉金银等於粪土惟穀之为宝不可一日无也今国家每下诏书必以劝农为先然而农夫日寡游手日繁岂非为利害所驱耶今农夫苦身劳力恶衣粝食以殖百穀赋敛萃焉徭役出焉岁丰则贱粝以应公上之须给债家之求岁凶则流离异乡转死沟壑如是而欲使夫商贾末作之人坐渔厚利鲜衣美食者转而缘南晦斯亦难矣然则劝农者言也害农者政也天下生之者益少食之者益多欲穀之无涸得乎哉为今之术劝农莫如重穀重穀莫如平糴使诸路转运使及州军长吏遇丰岁能广谋糴入官满之日仓库之实比於始至增羨多者赏之其无水旱之灾益兵之费而蓄积耗减者黜之又令民能力田积穀者不以为家货数如是则穀重而农劝虽有饥馑常无流亡盗贼之患矣今岁河北河东沿边穀糴至贱此亦国家所宜留意者也取进止论臣寮上殿屏人劄子【嘉佑六年九月二十八日奉圣旨依行】

臣等窃闻自先帝以来应两府台谏官等上殿奏事左右侍臣悉皆屏退盖以君不密则失臣臣不密则失身重慎枢机不得不尔窃见近日臣寮上殿奏事左右侍臣不遵旧制或有进至殿角板障门以里与御坐相去不过数步陛下德音及羣臣敷奏之语皆可听闻其间有机密大事若致漏泄大为不便欲乞一依旧制今後应遇两府台谏官等上殿奏事其左右侍臣并於殿角板障门外踏道下祇候仍乞委都知押班於两边板障门外检校如敢窃有覩听者并具姓名闻奏勘罪施行取进止

论制策等第状【既上而执政以?所试进呈欲黜之上曰其言切直不可弃也乃降一等收之即苏辙也】

右臣近蒙差赴崇政殿後覆考应制举人试卷内??两号所对策辞理俱高絶出伦辈然?所对命秩之差虚实之相养者一两事与所出差舛臣遂与范镇同议以?为第三等?为第四等详定官已定从覆考窃知初考官以为不当朝廷更为之差官重定复从初考以?为不入等臣窃以国家置此六科本欲取材识高远之士固不以文辞华靡记诵杂传为贤?所试文辞臣不敢复言但见其指陈朝廷得失无所顾虑於四人之中最为切直今若以此不蒙甄收则臣恐天下之人皆以为朝廷虚设直言极谏之科而?以直言被黜从此四方以言为讳其於圣王寬明之德亏损不细臣区区所忧正在於此非为臣已考为高等苟欲遂非取胜而已也伏望陛下察臣愚心特收?入等使天下之人皆曰?所对事目虽有漏落陛下特以其切直收之岂不美哉

乞免北使状【嘉佑六年闰八月六日上】

右臣窃知已降勅命差臣充北朝国信使臣缘名犯北朝讳所行文字虽可以更改窃虑临时语言不能记忆或有触犯兼臣体羸多病性不耐寒若涉穷荒必生疾病非敢自爱恐於王事有所废阙伏望圣慈矜悯别赐差官在於愚臣实为至幸

第二状【寻改差人】

右臣先曾奏乞免充北朝国信使至今未奉朝旨窃以专对之任亦须择才臣不惟名犯北朝讳及性不耐寒兼臣不经接伴未能谙练南北事体资性拙讷恐辱王命伏望圣慈矜察早赐选差曾经接伴之人充国信使所贵临事不至阙误

论燕饮状【嘉佑六年与王乐道同上】

右臣等窃见今岁以来灾异屡臻日食地震江淮腾溢风雨害稼民多菜色此正陛下侧身克己省礼蕃乐之时而道路之言皆云陛下近日宫中燕饮微为过差赏赉之费动以万计耗散府库调敛细民况酒之为物伤性败德禹汤所禁周公所戒殆非所以承天忧民辅养圣躬之道也陛下恭俭之德彰信兆民议者皆以为後宫奢纵务相夸尚左右近臣利於赏赉陛下重违其请屈意从之夫天以刚健为德君以正固为事柰何徇後宫左右之欲上忽天戒下忘民病中不为宗庙社稷深自重惜臣等愚惑窃为陛下不取也伏望陛下当此之际悉罢燕饮安神养气後宫妃嫔进见有度左右小臣赏赉有节及厚味腊毒之物无益奉养者皆不宜数御以伤天和乃可以解皇天谴告之威慰元元困穷之望保寿命无疆之休天下羣生不胜幸甚臣等区区纳忠忘死惟陛下裁察

论两府迁官状

右臣伏见朝廷因进用宰臣韩琦等凡两府之臣尽迁一官臣愚不明大体未识所谓窃恐从此相承遂为故事凡公卿者百吏之表率今国家方以百吏繁冗思革其弊而公卿无故一切迁官将何以使三百赤芾受爵不让者有所愧心哉况庆历中陛下以数月不雨执政之臣皆降一官以答天戒今岁日食地震河及江淮泛溢横流烈风淫雨贼伤五稼四方之民垫溺流饿不可胜纪比於庆历灾害尤衆而两府大臣无问新旧皆被褒迁殆非所以仰承天心下慰衆庶之意也窃计大臣当此之际亦必不敢受无名之赏伏望陛下因其辞让内惟枢密使副使不可以给谏及郎中为之者依旧制外其余皆不迁官以养大臣廉让之节无使之负谤於海内则其为德泽愈厚矣

论夜开宫门状【有旨劄送皇城司】

右臣窃闻今月二十五日十三公主薨其日宫中送殡出城留宫门及城门至夜深方闭物情骇异以为非宜虽陛下慈爱至深然门阙之禁不可不严若以式律言之夜开宫殿门及城门者皆须有墨勅鱼符其受勅人具録所开之门并出入人帐送中书门下自监门卫大将军以下俱诣合覆奏御注听即请合符门钥监门官司先严门仗所开之门外并立队燃炬火对勘符合然後开之符虽合不勘而开若勘符不合而为开及不承勅而擅开闭若得出入者剩将人出入其刑名轻者徒流重者处绞今以乳儿出殡之故内自禁掖外達郊野诸门洞开一如昼日车马往来络绎不絶出入之人无复讥诃有如万分之一奸险不逞之人杂处其间岂可不为之寒心哉伏望陛下深鉴安危防微杜渐自今宫殿门城门并须依时开闭非有急切大事勿复夜开必不得已须至夜开者即乞陛下亲降手勅加以御宝受勅之人仍写出入人帐委宿卫当上之官衆共验勅文真的然後覆奏候再见御批方请门钥与监门官亲自监开

依帐点閱人数放令出入即时下鑰进纳门钥其宿卫监门官司若不见手勅及御批而辄敢开者依不承勅而擅开闭律文施行虽有手勅御批不参验及不亲自监开点閱人数者依符虽合不勘而开律文施行庶可以养万乘之威尊消奸宄於未萌也

乞矜恤陈洙遗孤状【嘉佑六年九月二十三日上】

右臣窃见殿中侍御史里行陈洙资性忠果忧公忘私禀命不永奄辞圣世垂没之际犹上章奏搢绅之伦靡不嗟惜宜有旌嘉异於诸臣家素贫乏孤遗颇衆归葬闽越道涂险远伏望朝廷特赐矜悯依监察御史里行张宗谊例除子男一人官及乞降朝旨下衢信建三州候洙丧柩至彼差人防护津送前去亦足以示朝廷褒直劝忠终始之恩也

论环州事宜状【嘉佑六年十月初一日上】

右臣窃知环州熟户蕃部屯聚攻劫杀伤兵民虽犬羊之衆人面兽心缓之则骄急之则叛固其常性亦由将吏恩不能怀威不能服信不能结勇不能断平居无事则扰之使乱及其陆梁又不能制是使戎狄顺服王化则侵苦不安桀骜鸱张则富饶炽大凡边境所以多事未不由此也夫以属国小丑背诞不恭而国家不能擒讨使西北二敌闻之岂不益有轻汉之心伏望陛下特诏陕西不干碍监司体量蕃部所以叛乱之因若果由将吏抚御乖方所致即乞明行诛责以谢边民更选良将能吏有方略者使之镇遏分别蕃部善恶附顺者抚而安之以坏散其党悖逆者讨而诛之使永久慑服不然臣恐其日月浸深罪恶愈重自知不为朝廷所容将外连西夏内结诸部党与益衆气焰益大乃为朝廷旰食之忧非特鼠窃狗偷而已也

论苏安静状【嘉佑六年十月初二日上】

右臣伏见朝廷近除带御器械苏安静充内侍省押班臣窃闻国家旧制两省押班须年五十以上方得为之安静年未五十特蒙擢用臣恐自今已後内臣求进者援以为例廼有年齿极少遂居衆首国之旧章因此隳坏窃为朝廷重之伏望陛下追寢安静勅命以存典法

论张方平状【嘉佑六年十月十四日上】

右臣窃闻近者秦凤路经略安抚使知秦州张方平承信边人虚称西夏点兵侵犯边境惶扰失度闭门乘城移牒邻路索兵自救永兴以西军马皆被抽发使近边之民转相惊动关陇骚然仍飞奏上闻致朝廷忧疑已而接省皆无事实方平身为元帅系一方安危举措施为衆所瞻倚今乃怯懦轻发一至於此万一疆场实有警急使方平当之岂不败事臣窃恐敌国闻之得以鬪将帅之浅深益有轻中国之心非所以壮皇威镇殊俗也伏望朝廷治方平之罪严加谴谪更择明智沈勇之人以代其任庶几国家藩屏得御侮之臣可以高枕矣

论张方平第二状

右臣先於今月十四日上言秦凤路经略安抚使张方平怯懦轻易乞更择良将以代其任未蒙朝廷采纳臣闻将者成败之机安危之本固不可以任非其人今方平举措轻脱震骇一方传笑天下不才之迹章灼如此而朝廷犹掩覆包含一无所问臣恐敌国闻之皆有窥窬之志吏士覩之皆有轻侮之心是国家重惜方平而轻弃秦陇也凡将帅能否患在不知既知其不能而任之如故臣诚愚戇深所未达议者或以为方平虽失於仓猝然止於过为备御若从而罪之恐自今守边之臣闻有寇至皆不敢为备也臣窃以为不然所谓为备者当平居无事之时简其将佐训其士卒严其壁垒利其器械审其间谍远其斥堠使朝夕之间常若寇至如是则虽有猛鸷之敌不能犯也万一犯之可以安坐而制之耳何至狼狈如是哉臣闻方平在秦凤专以贵倨自处下情壅而不通自门墙之外皆可欺也况於兵民之休戚戎狄之情伪方平安得而知之是以一旦承信虚声惶惑失?内惊诸郡上动朝廷此而不责典刑安用臣所以区区献言不已者乃责方平之无备非责其为备也伏望朝廷察臣前後所言明治方平之罪谪之远方以儆封疆之臣使皆豫为备御不敢骄傲懈弛如方平所为也

论张方平第三状

右臣先曾上言秦凤路经略安抚使张方平怯懦轻易乞更择人至今未蒙朝廷施行臣窃闻拓跋寛祚年齿浸长猖狂好兵常分之外邀求无厌董黠凶悍狡狴过其父兄朝廷官爵不满其意颇怀怨怼与契丹结婚陰相表里此朝廷所当旰食而忧也秦州居二边之交为陕西四路之首军马民夷最号繁富而以怯懦轻易之人守之是委羔豚於虎狼之蹊也臣窃为国家危之况方平其他材识素无所长止以文辞致位至此奸险贪猥士论共知今不可使之守边事状昭然而朝廷掩覆其过曲加保全爱一人而失一方臣窃以为过矣伏望陛下不以边事为细而忽之速治方平之罪严加谴谪更择沈勇晓兵之人以代其任不然必待有烽燧之警然後易之则寇已深矣

传家集卷二十二

卷二十三

钦定四库全书

传家集卷二十三 宋 司马光 撰章奏六

论公主宅内臣状

右臣近闻有圣旨令召前管句兗国公主宅内臣二人复还本宅臣与杨畋龚鼎臣同有论列以爲非宜未蒙允纳臣闻父之爱子教以义方弗纳於邪公主生於深宫年齿幼穉不更传姆之严未知失得之理臣谓陛下宜导之以德约之以礼择淑慎长年之人使侍左右朝夕教谕纳诸善道其有恃恩任意非法邀求当少加裁抑不可尽从然後慈爱之道於斯尽矣此二人向在主第罪恶山积当伏重诛陛下寬赦斥之外方中外之人议论方息今仅数月复令召还道路籍籍口语可畏殆非所以成公主肃雍之美彰陛下义方之训也臣实愤悒爲陛下惜之伏望圣慈察臣愚忠追止前命无使四方指目以爲过举亏损盛德非细故也

乞惩劝均税官吏状【嘉佑六年十一月二十五日上】

右臣先奉勅与三司同共详定均税已立条约下诸路监司施行去讫窃以爲国家凡欲立事当先使赏罚明白然後事无不成伏见职方员外郎秦植前通判德州事均五县税皆得平允并无人户辞讼若与庸愚之人烦扰败事同归常调一无殿最则能吏解体必无成功伏望朝廷察其勤瘁优加酬獎并其余均税官吏随其功过量行惩劝则来者覩之无不尽力矣

论以公使酒食遗人刑名状【嘉佑七年正月十九日上】

臣闻圣主之教尚忠厚而贵恺悌故诗有鹿鸣伐木既醉行苇美宴好之相乐刺乾餱之失德礼有币帛饗飮行於邦国贄献饮酒施於卿党是以风俗纯和協气流通汉景帝诏曰吏受所监临以饮食免重其更议着令丞相廷尉议曰吏及诸有秩受其官属所监所治所行所将饮食计偿费勿论卓茂爲密令民有言部亭长受其米肉遗者茂曰凡人所以贵於禽兽者以有仁爱也邻里馈遗此乃人道所以相亲汝独不欲修之宁能高飞远走不在人间邪民曰然则律何故禁之茂曰律设大法礼顺人情今我以礼教汝汝必无怨恶以律治汝汝一门之内小者可刑大者可杀也近岁以来中外有司喜以微文刺举苛细至於宴饮相从酒食相馈皆积累成过诋以峻法屢闻知镇戎军曹修受邻州所送公用酒已而自首法官处以赃罪陕西都转运使彭思永奏据密院劄子贾渐起请除旧例送酒食外不得买置金帛作土风赠遗并省司参详今後以公使钱买置珍异等物及见钱送与人者并从违制定断其收受人坐赃论其有公使钱人受还答之物入已准盗论今曹修因陈首虽免书罚尚负赃名使人疑惑乞明立条约朝廷命有司参议至今未决臣窃详旧条之意明许以酒食相遗其有公使钱人受还答

之物正谓珍异见钱今曹修所受止於樽酒随而自首已爲刻薄法官又以赃罪加之剖析一条以爲二事不察人情不顾大体若朝廷因之遂爲着令臣恐忠厚之俗益衰媮薄之风遂长百司庶尹无所措其手足亏损圣朝堂堂之化非细故也臣今所言非爲曹修除雪罪名欲望朝廷申明旧条应以公使钱及财物赠遗人及受者各坐赃论其监临之官受所监临或因使於使所及经过处受取者并准律文处分即赠遗人而受其还答入已者准盗论并须赃满五疋以上方得科罪其不满五疋及以饮食之物相馈饷者皆勿论如此则人情有以相接贪吏不能爲奸百司有所循守矣

论诸科试官状

右臣伏见朝廷取勘诸处发解考试诸科官以所解之人到省十有九不中者臣窃惟国家本设诸科以求通经之士有司专以上文下注爲问已爲弊法窃闻去岁贡院出义题官更於弊法之中曲爲奇巧或离合句读故相迷误或取卷未经注字数以爲问目虽有善记诵之人亦不能对其於设科本意不亦远乎是则罪在贡院出义题官不在诸处发解官也今举人被黜已非其理又并发解之官亦坐停替臣恐自此爲吏者益务奇巧从学者益弃本原殆非所以省刑罚隆经术也伏望朝廷更取本处解发上件诸科试卷委官覆考其通粗合格者特与免罪不合格者乃依法坐之仍勅贡院将来科场选择通经术晓大体之人充诸科出义官依条出义毋得更如今来诡僻苛细至时如有十有九不中之人然後取勘本处解发考试官依前後条贯施行如此则彼皆无辞於罚论者亦不以爲冤矣

论上元令妇人相扑状【嘉佑七年正月二十八日上】

右臣窃闻今月十八日圣驾御宣德门召诸色艺人各进技艺赐与银绢内有妇人相扑者亦被赏赉臣愚窃以宣德门者国家之象魏所以垂宪度布号令也今上有天子之尊下有万民之衆后妃侍旁命妇纵观而使妇人羸戏於前殆非所以隆礼法示四方也陛下圣德温恭动遵仪典而所司巧佞妄献奇技以污渎聪明窃恐取讥四远愚臣区区实所重惜若旧例所有伏望陛下因此斥去仍诏有司严加禁约今後妇人不得於街市以此聚衆爲戏若今次上元始预百戏之列即乞取勘管勾臣寮因何置在籍中或有臣寮援引奏闻因此宣召者并重行谴责庶使巧佞之臣有所戒惧不敢导上爲非礼也

言张田状【嘉佑七月二月初八日上】

右臣窃闻朝廷差屯田员外郎张田充荆湖南路提点刑狱田之爲人倾邪险薄前知谏院唐介言之甚详伏计朝廷已熟知之提点刑狱专按察之柄系一方休戚今以倾邪险薄之人爲之诚未见其可况田曩者止自通判资序权发遣三司判官因罪左迁知蕲州议者已谓之太优今到任未及三年遂作监司臣窃恐士大夫争欲效田所爲以爲进取之捷径不惟任使失人抑亦败坏风俗伏望朝廷寢田新命更择端士以代之实远方吏民之幸

言张田第二状【嘉佑七年二月二十日上寻改差知湖州】

右臣近曾上言张田不可充荆湖南路提点刑狱未蒙朝廷施行臣窃以吏者民之纪纲提点刑狱吏之师帅苟不得其人则一方咸受其弊又凡今之朝士自常调进用者皆自此官爲始国家尤宜慎择其人田资性险薄色厉内荏毁誉出其爱憎威福发於喜怒陵其可陵佞其可佞真小人之雄杰而时俗以爲贤才夫不善之人天下皆知其不善斯不足疾也惟衆人谓之贤而实不肖者君子疾之昔汉文帝欲以啬夫爲上林令张释之以爲啬夫利口捷给恐天下随风而靡唐太宗见进士等第怪其无张昌龄王公谨名王师旦曰二人有文无行恐变陛下风雅今提点刑狱其爲轻重非特上林令与入等进士之比也臣愿陛下必选忠厚方正实有治行者爲之其饰僞行险躁於进取如田比者皆不可用也臣今所言非专爲湖南之吏民亦爲国家重惜风俗伏惟陛下察其愚忠其荆湖南路提点刑狱乞别赐择人

论李玮知卫州状【嘉佑七年二月二十八日上公主降封沂国】

右臣窃闻驸马都尉李玮出知卫州兗国公主入居禁中玮所生母杨氏归玮兄璋之宅其公主宅祇应人等悉令散遣外议籍籍无不怪愕伏以陛下始者追念章懿太后选玮使之尚主欲以申固姻戚富贵其家今以公主之故使李氏母子离析家事流落大小忧讟殆不聊生岂始所以结婚之意哉近者章懿太后忌日陛下閱奩中之故物思平生之居处独能无雨露之感凄怆之心乎臣愚以爲陛下宜且留李玮在京师其公主宅祇应人等除作过者远加窜逐出外其余并令如旧储侍什物皆按堵不移以俟岁月之间徐以义理晓谕公主庶几回意易虑率德遵礼复归本宅则中外之情无不释然不然公主必无复归李氏之志者则今日致此衆议纷纭烦渎圣聪皆由公主纵恣胷臆无所畏惮数违君父之命陵蔑夫家岂可使李玮独蒙斥逐出外而公主爵邑请受全无贬损非所以示天下至公之道也论皇城司巡察亲事官劄子【有旨亲事官决杖配下军】

臣等伏闻皇城司亲事官奏报有百姓杀人私用钱物休和事下开封府推鞠皆无事实欲勾元初巡察人照勘其皇城司庇护不肯交付臣等窃以祖宗开基之始人心未安恐有大奸陰谋无状所以躬自选择左右亲信之人使之周流民间密行伺察当是之时万一有挟私诬枉者则斧钺随之是以此属皆知畏惧莫敢爲非今海内承平已踰百年上下安固人无异望世变风移宜有厘革而因循旧贯更成大病乃至帝室姻亲诸司仓库悉委此属廉其过失广作威福公受货赂所爱则虽有大恶掩而不问所憎则举动语言皆见掎摭臣等常病国家择天下贤才以爲公卿百官而犹不可信顾任此厮役小人以爲耳目岂足恃哉今乃妄执平民加之死罪使人幽系囹圄横罹楚毒幸而不自诬服仅能辨明若更不听有司诘问元初巡察之人少加惩戒臣恐此属无复畏惮愈加恣横使京师吏民无所措其手足此岂合祖宗之意哉伏望朝廷指挥皇城司令送元初巡察人下开封府推问本情或别有仇嫌或察访卤莽各随其状依法施行仍自今後永爲定制庶可以塞欺罔之源絶侵冤之门以全国家至公之道取进止

论复置丰州劄子【嘉佑六年十二月十四日上】

臣等伏见国家复置丰州故城仍差人知州此诚河西险要之地修之甚便然其地势孤絶外

迫寇境邇者王氏知州之时所部蕃族甚衆有永安来远保宁三寨皆以蕃族守之庆历初拓跋元昊攻州城州民及三寨蕃族尽爲所虏扫地无遗今州城之中但有丘墟瓦砾环城数十里皆草莽林麓而已若建以爲州则须复设外寨备置官吏广屯兵马多积刍粮皆应调发内地之民以奉之劳费甚大此所谓徇虚名而受实弊也顷年朝廷欲修丰州城河东经畧司嫌其单外廼於其南数十里筑永宁堡其地洼下居两山间疏恶难守今既修丰州则永宁堡在腹内无所复用臣等以爲不若迁永宁堡於丰州故城其兵马刍粮不更增益但择使臣有材畧者使守之不必假以知州之名仍召募蕃汉之民使垦辟近城之田俟民物繁庶皆如其旧然後升以爲州亦未晚也取进止

论上元游幸劄子【嘉佑七年正月十二日上】

臣等伏见今岁以祈穀改日之故车驾并以十三十四日幸诸寺观臣等窃惟上元观灯本非典礼正以时和年丰欲与百姓同乐爲太平之荣观而已去岁四方诸州多罹水旱鰥寡孤独流离道路伏计陛下念此未尝去心窃恐有司不明大体务循故事无所减损不称陛下子爱元元之意又连日游幸在於圣体亦爲烦劳伏望陛下比之每岁特减游观之处以闵恤下民安养圣神天下幸甚取进止

论正家上殿劄子【嘉佑七年二月初四日上】

臣先曾上言爲前管句兗国公主宅内臣等过恶至大乞不召还近闻传宣入内内侍省令押上件内臣梁怀吉赴公主宅依旧句当外议諠譁无不骇异臣闻太宗皇帝时姚坦爲兗王宫翊善王有过失坦辄尽言谏正王及左右皆患之左右教王诈疾踰月不朝太宗甚忧之召王乳母入宫问王起居状乳母曰王本无疾但以翊善姚坦检束太严王举动不得自由郁郁成疾耳太宗怒曰朕选端士爲王僚属固欲导王爲善今既不能纳用规谏而又诈疾欲朕逐去正人以求自便其可得乎且王年少不知出此皆汝輩教之耳命捧至後园杖之数十召坦慰勉之太宗非不爱其子也诚以爱之则莫若纳之於善若纵其所欲不忍谴诃适所以害之也齐国献穆大长公主太宗皇帝之子真宗皇帝之妹陛下之姑於天下可谓贵矣然献穆公主仁孝谦恭有如寒族奉李氏宗亲备尽妇道爱重其夫无妬忌之行至今天下称妇德者以献穆公主爲首献穆公主岂不自知其身之贵哉诚以贵而不骄然後能保其福祿全其令名故也臣谓陛下教子以义宜以太宗皇帝爲法公主事夫以礼宜以献穆公主爲法则风化流於四方声誉施於後世今陛下曲徇公主之意不复裁以礼法使之无所畏憚入於恶触情任性以邀君父憎贱其夫不执妇道将何以形四方之风垂来世之则易曰家人嗃嗃悔厉吉妇子嘻嘻终吝此言家道尚严不可专用恩治也伏望陛下斥逐梁怀吉等复归前来贬窜之处其公主左右之人欲使陛下召还梁怀吉等者皆教导公主爲不善之人也悉宜治其罪而逐之别择柔和谨愿者以补其缺仍戒勅公主以法者天下之公器若屡违诏命不遵规矩虽天子之子亦不可得而私庶几有所戒惧率循善道可以永保福祿不失善名不然衆人所云甚可畏也取进止

乞优老上殿劄子

臣闻古之圣王尊礼黄髮属任以政者盖以其更历天下之事练习为治之体故也昔鬻熊年九十见文王文王曰老矣鬻熊曰君若使臣捕虎逐麋臣已老矣使臣坐而策国事臣年尚少也近岁以来大臣高年者皆不敢自安其位言事者又欲以击抔大臣爲名从而攻之此岂爲臣尽忠至公之道哉凡言事者当爲国家进贤退不肖使其人无可取虽少壮何爲果有益於时虽老何伤也臣窃见枢密副使张昇屡以老疾辞位臣平生与昇迹不相接无丝毫恩分然窃闻其爲人忠谨清直不可干以私臣不敢上避圣主之疑下畏世俗之谤隐忠不言以利其身伏望陛下深念宥密之地不可任非其人先以圣意揣度若未能得贤於昇者则使昇且居其位於事亦未有旷废也若昇必不可留则愿陛下慎选德望材器爲衆所服知政体晓兵畧者以代之不可以不择其人之可否使循资累叙而爲之也取进止

传家集卷二十三

卷二十四

<集部,别集类,北宋建隆至靖康,传家集>

钦定四库全书

传家集卷二十四 宋 司马光 撰章奏七

辞知制诰状【嘉佑七年三月十四日上】

右臣近蒙中书召试制诰窃闻圣恩已除臣本官知制诰续又令兼侍讲数日之间宠命相继在人爲荣於臣甚惧窃以二职文士之高选儒林之极致古之英隽尚或难兼况於微臣愚陋无比一身二任力所不堪岂敢冒居以取颠覆闻之震恐瞽愤失据臣自少及长章句之学粗尝从师至於文辞实爲鄙野曷者辞免修起居注非谓不能记录言动正恐循次而进典掌诰命取嗤四方爲国大辱是以披心自归至於四五诚慙不着不蒙开允虽黽勉就职而夙夜惶惧未尝少安近者被召之日再欲具此奏陈又以比来朝廷擢用数人虽辞避恳至未尝得请而或者不谅其心以爲采名恐复虚发如前所爲是以踌躇彷徨不免赴试除命既降强颜忍耻亦欲就职以俟疵咎布彰自当退黜今者窃闻天章阁侍讲吕公着与臣同时被召公着辞让不至朝廷已除公着天章阁待制兼侍讲臣迺始自悔恨辄以愚心妄意朝廷当伏重诛臣虽无知若使廉让有耻者弃置不收贪冒苟得者进受华显不惟亏圣朝风化亦使微臣受四海之责将不得单毙其死所有除知制诰勅告臣未敢祇受乞更择文学兼茂与职业相称之人以代臣庶几克叶远近之望寬愚臣之罪其侍讲恩命臣更不敢辞

辞知制诰第二状

右臣今月十四日曾有奏陈以知制诰之职非臣所堪乞更择人未蒙允许臣夙夜惶恐不知所措臣与吕公着同时召试公着固辞得请而臣独就职是公着廉让而臣无愧耻也臣虽甚愚诚不忍以身居下流蒙受衆恶为世污泽虽获美官将何荣之有且公着沈厚渊懿士林推服文学行能非臣之比名位宠禄臣安敢先之昔施氏卜宰皇句须吉施氏之宰有百室之邑与皇句须邑使为宰以让鲍国而致邑焉施孝叔曰子实吉对曰能与忠良吉孰大焉少室周为赵简子之右闻牛谈有力请与之戏弗胜致右焉简子许之臣今自知不材请释美官以授能者虽不足比迹大贤庶几得从皇句须少室周之後其荣多矣伏望朝廷察其区区特赐矜许其除知制诰勅告臣不敢祇受乞授公着或别择人不胜大幸

辞知制诰第三状

右臣今月十四日十七日两曾上奏辞免知制诰乞更择人未蒙开许臣闻明主商德而序位

忠臣量能而受职是以分不乱於上能不穷於下治辩之要莫尚於斯臣自知文字恶陋又不敏速若除拜稍多诏令填委必阁笔拱手不能供给纵复牵合鄙拙尤甚暴之四远为人指笑又貽圣朝愧耻谓之乏贤故为公家之谋则莫若用其所长营一身之私则莫若避其所短夕寐晨兴虑之已熟始敢披陈干浼天听剖肝沥胆莫非恳到自修注以来前後非一而昭昭之诚无由上达屡触报闻不蒙省察或者谓臣修起居注自应知制诰与吕公着不同公着当辞臣则当受凡自修注知制诰者非有祖宗法令着於方册特近岁相承之例耳祖宗之时但取庶官之中有辞藻者即知制诰不必皆以修注为之其修注或改佗官不必皆知制诰也夫以资涂用人不问能否比例从事不顾是非此最国家之弊法所宜革正者也又谓臣就试已毕不当复辞臣就试之日以为公着辞未必免臣试未必中是以不辞今公着获免而臣忝恩命则今日辞之亦未为晚也且过而能改犹愈於迷而不复见贤思齐犹愈於受爵不让况臣修注之初已尝辞免至於四五而朝廷不允伏望圣慈特赐哀察使臣服勤佗役惟力是视其知制诰勅告臣不敢祇受乞更赐择人

辞知制诰第四状

右臣昨三次上奏辞免知制诰乞更择人奉圣旨令依累降指挥不许辞让便受告勅臣竊者承乏諫官首曾上言以为致治之道任官最急人之材性各有所宜虽以稷契臯夔之贤皆守一官终身不易况今羣臣固非其比当度材而授任量能而试职奏牋具存事可案验今臣自知文辞鄙野不足以充知制诰之职若止以修起居注资涂相值循例序进恬而有之曾不愧畏是臣但能讥评佗人旷官窃位而受爵不让至於已斯亡此廼欺罔天聽静言庸违当伏共兇之诛以清唐虞之治臣虽甚愚决不敢为伏望圣慈察臣前後所奏特赐允从其知制诰乞别赐择人所有勅告不敢祇受

辞知制诰第五状

右臣先曾四次上奏乞免知制诰别赐择人奉圣旨依累降指挥不许辞让令便受告勅臣幼尝涉学粗知臧否岂敢以譎诈之心上欺君父顾人之材分各有所宜若贪荣冒居使职业废坠则探囊扠篋廼窃盗之微者皆不足诛也臣虽小人实不敢为是以竊者不辞於召试之初而辞於吕公着免试之後诚欲果於得请不为虚发故也今若因循苟且复往就职则臣进退之迹自可猜惑况於世人谁不讥笑如是则臣出入禁闥何心自安陪接搢绅何施面目顾视僮仆何以爲容是以违犯天威不敢避死决求自免而诏命愈坚终未置舍臣诚愚懵不识所谓意者朝廷以臣所言皆为矫伪不足听察邪若使臣言出於矫伪当正典刑以警奸回若出於至诚当从其所请使上无旷官下无窃位柰何前後奏章上者直加屏弃不复省察区区之志何以自明若以近例修起居注者必知制诰不可改易则臣窃观先朝以来修起居注不因罪累谴黜及亲嫌相避而去为佗官者刘鹭知卫【一本作衡】州潘慎修迁考功郎中许衮判吏部南曹刘?改工部员外郎兼侍御史知杂事丘雍充淮南都大制置发运使徐奭充两浙转运使蔡齐改礼部员外郎兼侍御史知杂事郑向充两浙转运【一本有副字】使高餗罢守本官陈诒充三司户部副使叶清臣充两浙转运【一本有副字】使赵槩充天章阁待制杨察充江南转运使蔡襄知福州以是观之虽近例亦不尽知制诰也臣今惓欵迫切无以复

加伏望圣慈特赐哀察若使臣得遂其志是去罪辱而就显荣虽日迁十官未足方其幸也所有知制诰勅告臣必不敢祇受乞别赐择人

辞知制诰第六状

右臣先曾五次上奏乞免知制诰别赐择人奉圣旨令臣依累降指挥不许辞让便受告勅者臣闻晋王述每受职不为虚让其有所辞必於不受及迁尚书令其子坦之谏以为故事应让述曰汝谓我不堪邪坦之曰非也但克让自美事耳述曰既云堪何爲复让臣窃重述知为人臣陈力就列之体心常慕之臣自胜冠以来投牒应举入朝求仕岂偃蹇山林不求闻达之人邪顾力有所不任则不敢盗国家禄位恐职事废阙於刑辟耳故自度材分可以策励虽高位不敢辞不可强勉虽小官不敢受羈者蒙圣恩除馆职谏官侍讲皆不敢以一言饰让盖以馆职掌比校文字谏官掌规正得失侍讲掌讲解经术皆不专以文辞为职故也今臣自修起居注以来前後辞免章十余上止为文辞鄙恶不堪典诰命而已终未蒙朝廷赐察是以奏牒颇多喋喋不已烦为时人所怪其爱臣者以为让荣利恶臣者以为饰虚诈要之二者皆未得臣之心夫有诸中而辞诸外然後谓之让若臣者无诸中而不敢为者也安得谓之让哉譬如使羸夫负百钧之重而予之千金羸夫必辞非不欲金也力不任故也夫饰者内欲之而外不取将以求有求也今臣不就美官屡违诏命上怒下怪将抵罪诛尚何求哉且苟能其官而固让不止则是朝廷百官皆无人可为非天下之通法也臣故谓如王述能则为之不能则止为得其宜臣虽才非古人愿附王述之志若始者可受则不若勿辞亦既辞之则不可复受伏望圣慈特加矜察其知制诰勅告臣必不敢祇受乞如前奏别赐择人

辞知制诰第七状

右臣先曾六次上奏辞免知制诰乞更择人奉圣旨令臣依累降指挥不许辞让便受勅告者臣天性朴駸无佗伎能惟守信诚是为操履平居与等辈语言犹不敢欺罔况以奏牒闻於朝廷苟有毫髮不实不惟陛下睿圣宪章严明天地鬼神亦所不容臣之愚意但以知制诰之职当取天下文章高妙逾衆絶伦者以充其选如臣野陋实不堪称竭恳自归前後非一而圣恩确然终未开察臣窃自伤悼幸生盛明之世而昭昭之心无以自列若龟勉包羞奉承诏旨则天下之人皆谓臣已试而复辞已辞而复就盖习知朝命重於改移因欲饰让以盗虚名如此则臣生负大罪死负余愧虽进极荣显不若啜菽饮水长为布衣也臣今若得请於朝则不肖之迹庶几犹有以自明如其不然则矫伪之名至於身没骨朽不可湔洗臣夙夜念此寢则不安食则失味进退遑遑身无所措是敢不避烦渎冒犯天威伏望圣慈哀其穷迫特寝恩命使得服役佗官以报万一死不敢辞若朝廷以臣顽蔽不恭乞治臣之罪削黜流放靡不甘心所有知制诰勅告臣必不敢祇受乞如前奏别赐择人

辞知制诰第八状

右臣先曾七次上奏乞免知制诰奉圣旨令臣依累降指挥不许辞让便受告勅者臣窃闻去岁权御史中丞王畴上言近年以来中外臣僚或因较量差遣或因论辨身计或因进以干誉

或因罪而觊免肆为妄谈辄形奏章皆心语两违情实交戾外示轻官爵之意以欺於衆内实计分铢之利而争於上遗义忘耻至於要君用诈而安为小人之行陛下圣度慈仁包荒盖愿悉置不问彼小人者亦岂识恩德之隆哉欲望朝廷应今後臣下有要君作伪如前所陈者并出宸断便赐听许如此则罔上邀利者知所畏而士之行已有耻事君以诚者少加劝矣奉圣旨今後臣僚所陈如有似此情涉诈慢者令中书枢密院取旨施行凡畴所言实近岁之大弊臣亦疾之如畴之志今臣自差修起居注以来前後辞免十有三次若朝廷以臣为诚则何惜曲回大恩从臣所欲使臣不肖之迹稍有以自明若以臣为诈则罔上邀利章奏烦多无臣为甚臣愿以身就遣谪以彰前令之必行庶为陛下清此颓俗亦臣报国之一效也所有知制诰勅告臣必不敢祇受乞别赐择人

辞知制诰第九状【寻蒙恩改天章阁待制】

右臣先曾八次奏陈乞免知制诰奉圣旨令臣依累降指挥更不许辞让便受告勅者臣以愚戆烦瀆天听前後非一圣朝确然终不听许臣诚戆昧不识所谓岂此职非臣不可为邪将从臣之请则隳紊纲纪败坏风俗邪何请之之勤而拒之之坚也若以为非臣不可为则方今辞臣满朝英俊比肩举而用之无不称职若以为隳紊纲纪败坏风俗则臣之微志正欲朝廷无旷官羣下无窃位而已於纲纪风俗亦无所亏损不然者臣之所为果諄理伤道朝廷令之不从谕之不入至於四五至於八九侮慢威命无此为甚则当投之四荒以御魑魅岂有但已者也臣不胜迫切之诚伏望圣慈察臣前後所奏或赐允从或加谴责其知制诰勅告臣必不敢祇受

除待制举官自代状

伏见三司度支判官尚书刑部郎中充集贤校理冯浩修己以谨与人以诚端良无邪恬淡不竞居常处衆敦大有容临义据正坚强不夺久在文馆屡更任使比材量德臣实不如今举自代

上殿谢官劄子【嘉佑七年五月十一日上】

臣光伏蒙圣恩除天章阁待制兼侍讲仍知谏院臣窃以为方今国家之得失生民之利病大要不过择人赏罚丰财练兵数事而已行道之人粗有智识者皆知之患在朝廷不尽闻虽闻不力行耳朝廷不尽闻此谏官之罪闻而不力行则非臣等之所及也凡此数事臣前忝谏官已尝畧为陛下言之今陛下寘臣於侍从之列留臣以谏争之职恩施愈隆责望愈重臣有生安敢爱有言安敢隐伏愿陛下择其事之要重者特留圣心则天下幸甚不然臣虽朝夕侍前徒污名位而费廩禄於公家之用果何益也取进止

上谨习疏【嘉佑七年六月二十九日上】

月日具位臣光谨昧死上疏尊号皇帝陛下臣以弩蹇之质再为谏官荷陛下宠禄之优责任

之重夙夜震恐不遑宁处思极竭愚忠以报塞万一顾琐琐细务皆不足以烦瀆圣听窃以国家之治乱本於礼而风俗之善恶繫於习赤子之啼无有五方其声一也及其长则言语不通饮食不同有至死莫能相为者是无佗焉所习异也至於古今亦然有服古之衣冠於今之世则骇於州里矣服今之衣冠於古之世则戮於有司矣衣冠乌有是非哉习与不习而已矣夫民朝夕见之其心安焉以为天下之事正应如此一旦驱之使去此而就彼则无不忧疑而莫肯从矣昔秦废井田而民愁怨王莽复井田而民亦愁怨赵武灵王变华俗效胡服而羣下不悦後魏孝文帝变胡服效华俗而羣下亦不悦由此观之世俗之情安於所习骇所未见固其常也是故上行下效谓之风薰蒸渐渍谓之化沦胥委靡谓之流衆心安定谓之俗及夫风化已失流俗已成则虽有辩智弗能谕也强毅不能制也重赏不能劝也严刑不能止也自非圣人得位而临之积百年之功莫之能变也周易履之象曰君子以辨上下定民志故天子之令必行於诸侯诸侯之令必行於卿大夫士卿大夫士之令必行於庶人使天下之势如身之使臂臂之使指莫不率从诗曰勉勉我王纲纪四方此体之本也昔三代之王皆习民以礼故子孙数百年享天之祿及其衰也虽以晋楚齐秦之强不敢暴蔑王室岂其力不足哉知天下之不已与也於是乎翼戴王命以威怀诸侯而诸侯莫敢不从所以然者犹有先王之遗风余俗未絶於民故也其後日已衰薄下陵上替晋平公之世鲁子服回如晋还谓季孙意如曰晋之公室将遂卑矣六卿强而奢傲将因是以习习实为常能无卑乎其後赵魏韩氏卒分晋国习於君臣之分不明故也降及汉氏虽不能若三代之盛王然犹尊君卑臣敦尚名节以行义取士以儒术化民是以王莽之乱民思刘氏而卒复之赤眉虽羣盗犹立宗室以从民望王郎矫托名氏而燕赵响应董卓之乱袁绍以诛卓为名而州郡云合曹操挟献帝以令诸侯而天下莫能与之敌操之心岂不欲废汉而自立哉然没身不敢为者畏天下之人疾之也自魏晋以降人主始贵通才而贱守节人臣始尚浮华而薄儒术以先王之礼为糟粕而不行以纯固之士为鄙朴而不用於是风俗日坏入於偷薄叛君不以为耻犯上不以为非惟利是从不顾名节至於有唐之衰麾下之士有屠逐元帅者朝廷不能讨因而抚之拔於行伍授以旄钺其始也取偷安一时而已及其久也则衆庶习於闻见以为事理当然不为非礼不为无义是以在上者惴惴焉畏其下在下者睽睽焉伺其上平居则酒肉金帛甘言屈体以相媚悦得间则鉅锋利刃狠心诡计以相屠脍成者为贤败者为愚不复论尊卑之序是非之理陵夷至於五代天下蕩然莫知礼义为何物矣是以世祚不永远者十余年近者四五年败亡相属生民涂炭及大宋受命太祖太宗知天下之祸生於无礼也於是以神武聪明躬勤万几征伐刑赏断於圣志然後人主之势重而羣臣慑服矣於是翦削藩镇齐以法度择文更为之佐以夺其杀生之柄擥其金穀之富选其麾下精锐之士聚诸京师以备宿卫制其腹心落其爪牙使不得陆梁然後天子诸侯之分明而悖乱之原塞矣於是节度使之权归於州镇员之权归於县又分天下为十余路各置转运使以察州县百吏之臧否复汉部刺史之职使朝廷之令必行於转运使转运使之令必行於州州之令必行於县县之令必行於吏民然後上下之叙正而纪纲立矣於是申明军法使自押官以上各有阶级以相临统小有违犯罪皆殊死然後行伍之政肃而士用命矣此皆礼之大节也故能四征不庭莫不率服汎扫九州以陟禹之迹至於真宗重之以明德继二圣之志夙夜孜孜宣布善化销铄恶俗以至於今治平百年顽民殄絶衆心咸安此乃旷世难成之业陛下当战战栗栗守而勿失者也臣窃见陛下有中宗之严恭文王之心而小大之政多谦让不决委之臣下诚使所委之人常得忠贤则可矣万一有奸邪在焉岂不危甚矣哉古所谓委任而责成功者择人而授之职业丛脞之务不身亲之也至於爵

禄废置杀生予夺不由已出不可也洪范曰惟辟作威惟辟作福臣之有作威作福害於而家凶於而国威福之柄一失於人而习以为常则不可复收矣此明主之所慎也又顷以西鄙用兵权置经畧安抚使總一路之兵得以便宜从事及西事已平因而不废其河东一路總二十二州军勦时节度使之权不能及矣唐始置沿边八节度亦如是而已以其权任太重故後世有跋扈之臣洛诰曰毋若火始焰焰厥攸灼叙弗其絕言慎其微也又将相大臣典诸州者多以贵倨自恃转运使欲振举职业往往故违戾而不肯从夫将相大臣在朝廷之时则转运使名位固相远矣及在外为知州则转运使统诸州职也乌得以一身之贵庇一州之事转运使不得问哉汉刺史以六百石吏督察二千石岂以名位之贵贱哉又自景佑以来国家怠於久安乐因循而务省事执事之臣颇行姑息之政於是胥史謹譁而斥逐御史中丞輦官悖慢而废退宰相卫士凶逆而狱不穷奸泽加於旧军人骂三司使而法官以为非犯阶级疑於用法朝廷虽特诛其人而已停之卒复收养之其余有一夫流言於道路而为之变令推恩者多矣凡此数者殆非所以习民於上下之分也夫朝廷者四方之表仪也朝廷之政如是则四方必有甚者矣於是元帅畏偏裨偏裨畏将校将校畏士卒奸邪怯懦之臣至有简省教阅使之骄惰保庇羸老使之繁冗屈挠正法使之纵恣诋訾粟帛使之愤惋甘言諂笑靡所不至於是士卒翕然誉之而归怨於上矣彼既为之则此效之下既言之则上从之前既行之则後袭之苟彼为而此不效下言而上不从前行而後不袭则怨怒聚於其身而祸乱生矣长此不已日滋月益民之耳目习而安之此有以异唐之季世乎後魏孝明帝时征西将军张彝子仲瑀上封事欲抑损武人不预清品羽林虎贲千余人焚彝第杀彝父子官为收捕凶强者八人斩之其余大赦以安之怀朔镇人高欢时奉使至洛阳见之归而散家财以结客曰朝政如此事可知矣於是始有飞扬之志由是观之纪纲不立则奸雄生心矣夫祖宗苦身焦思以变衰唐之俗而陛下高拱熟视以成後魏之风此臣之所为陛下痛惜也臣愚以为陛下当奋刚健之志宣神明之德凡羣臣奏事皆察其邪正辨其臧否熟问深思求合於道然後赏罚黜陟断而行之则天下孰不旷然悦喜诗曰君子如怒乱庶遄沮君子如祉乱庶遄已盖言无所臧否之为患大也经畧安抚使有征讨之事则置之无事则当废之傥未能废则军事迫急不暇奏知者使专之可也其余民事皆委之州县一断於法或法重情轻情重法轻可杀可徒可宥可赦并听本州申奏决之朝廷何必出於经畧安抚使哉转运使规画号令行下诸州而诸州违戾不从者朝廷当辨其曲直若事理实可施行而州将恃贵势故违之者当罪州将勿罪转运使将校士卒之於州县及所统之官或公卿大臣有悖慢无礼者明着阶级之法使断者不疑将帅之官有废法违道以取悦於下归怨於上者当随其轻重诛窜废黜公正无私御衆严整者当量其才能擢用褒赏如是则上之人难动而下用命矣上之人难动而下用命此所以尊朝廷也上下已明纲纪已定然後修儒术隆教化进敦笃退浮华使礼义兴行风俗纯美则国家保万世无疆之休犹倚南山而坐平原也臣光昧死再拜上疏

卷二十五

钦定四库全书

传家集卷二十五 宋 司马光 撰章奏八

论因差遣例除监司劄子【嘉佑七年七月九日上】

臣光窃以转运使提点刑狱转运判官等皆宣布国家诏令督察官吏善恶一方之民休戚所系事任至重不可轻以授人伏见近岁以来多以所历差遣循例得之不问其人贤与不肖有无绩效至如真楚泗州之类虽云繁剧然民事至少宾客实多大抵能饰厨传即为称职官满之日往往擢为监司若其人实有材能政迹则虽在他州亦当擢用若无以异於庸人则不当独以此数州为侥幸之津涂也臣欲乞应诸处知州军有政迹尤异及功效着明者特赐勅书獎谕仍令中书记録姓名若转运使提点刑狱转运判官等有阙即采择用之其余诸处差遣旧例得监司者今後亦皆寝罢得替日依旧入常程差遣如此则官吏有所劝监司皆得人矣取进止

论财利疏【嘉佑七年七月上】

月日具位臣光谨昧死上疏尊号皇帝陛下臣闻昔楚庄王以无灾为惧曰天岂弃不穀乎范文子曰唯圣人能外内无患然则岁小不登边鄙有警未必非国家之福也伏见今春天久不雨陛下忧劳於内公卿惶恐於外岂不以公私之积素不充实若遇饥饉将无以相恤乎一朝京师得雨远方未徧则君臣释然相庆不复以民食为念陛下安知来岁之旱不甚於今岁乎盖天降灾沴蛮夷猾夏寇贼奸宄此尧舜所不能免也即不幸有大水大旱方二千里戎狄乘间而窥边细民穷困而为盗军旅数起久未有功府库之蓄积已竭百姓之生业已尽陛下当此之时将以何道救之乎臣不知陛下与公卿大臣以此为必无而不足忧乎将以为有之而不为之备俟事至然後忧之也若俟事至然後忧之虽以陛下之圣明得益稷太公以为辅佐臣以为不及矣何则圣贤之治皆积以岁月然後有功欲天下之家给人足固不可一日具也周易既济之象曰君子以思患而豫防之思患而豫防之此其时矣失之愈远救之愈难柰何日复一日取适目前而已乎晋武帝时何曾谓其子孙曰吾每见主上所说皆平生常语未尝及经远大计吾子孙其及於乱乎其後五胡构乱中州覆没生民涂炭几三百年由是观之上下偷安不为远谋此最国家之大患也诗曰哀哉为猷匪先民是程匪大猷是经维还言是听维还言是争如彼筑室於道谋是用不溃于成方今之政何以异此此臣之夙夜所为痛心疾首者也古之王者藏之於民降而不能乃藏於仓?府库故上不足则取之於下下不足则资之於上此上下所以相保也今民既困矣而仓?府库又虚陛下傥不深以为忧而早为之谋臣恐国家异日之患不在於他在於财力屈竭而已矣今朝廷不循其本而救其末特置寬恤民力之官分命使者旁午四出争言便宜以变更旧制米盐靡密之事皆非朝廷所当预者张设

科条不可胜纪或不如其旧益为民患或朝三暮四移左於右其间果能利民者不过放散县官之物以予民耳是诚损上益下王者之仁政也然臣闻古之圣王养之有道用之有节上有余财然後推以予民是以上下交足而颂声作矣今入者日寡出者日滋是所谓厌其原开其渎其竭可立而待也公家既竭不取诸民将焉取之是徒有利民之名而无利民之实果何益哉夫宽恤民力在於择人不在立法若守令得人则民力虽欲毋宽其可得乎守令非其人而徒立苛法适所以扰民耳自置此官以来於今累年臣访之民间未闻其困弊小瘳於前也然则为今之术奈何曰在随材用人而久任之在养其本原而徐取之在减损浮冗而省用之何谓随材用人而久任之夫人之材性各有所宜虽周孔之材不能徧为人之所为况其下乎固当就其所长而用之今朝廷用人则不然顾其出身资叙何如耳不复问其材之所堪也故在两禁则欲其为严助司马相如任将帅则欲其为卫青霍去病典州郡则欲其为龚遂黄霸尹京邑则欲其为张敞赵广汉司财利则欲其为孔仅桑弘羊世岂有如此人哉故财用之所以匮乏者由朝廷不择专晓钱穀之人为之故也国初三司使或以诸卫将军诸司使为之判官则朝士晓钱穀者皆得为之不必用文辞之士也先朝以数路用人文辞之士寘之馆阁晓钱穀者为三司判官晓刑狱者为开封府推判官三者职业不同趣舍各异莫相涉也然後人主以时引对访问以察之使令以试之积久以观之核其真伪辨其臧否考其功效然後进之退之未必历其职者皆须进用不可复退也故羣臣各宣其用而万事交举矣夫官久於其业而後明功久於其事而後成是以古者世官相承以为氏姓先朝陈恕领三司十余年至今称能治财赋者以恕为首岂恕之材智独异於人哉盖得久从事於其职故也至於副使判官堪其事者亦未数易也是以先帝屡行大礼东封西祀广修宫观而财用有余者用人专而任之久故也近岁三司使副使判官大率多用文辞之士为之以为进用之资涂不复问其习与不习於钱穀也彼文辞之士习钱穀者固有之矣然不能专也於是乎有以簿书为烦而不省以钱穀为鄙而不问者矣又居官者出入迁徙有如邮舍或未能尽识吏人之面知职业之所主已舍去矣臣顷者判度支句院甫二年耳上自三司使下至检法官改易皆徧甚者或更历数人虽有恪勤之人夙夜尽心以治其职人情稍通纲纪粗立则舍之而去後來者意见各殊则曩之所为一皆废坏况怠惰之人因循苟且惟思便身不顾公家者乎如此而望太仓有红腐之粟水衡有贯朽之钱臣未知其期也凡百官莫不欲久於其任而食货为甚何则二十七年耕然後有九年之食今居官者不满三岁安得有二十七年之效乎臣愚以为朝廷宜精选朝士之晓练钱穀者不问其始所以进或进士或诸科或门?先使之治钱穀小事有功则使之权发遣三司判官事及三年而察之实效显着然後得权三司判官事又三年更有实效然後得为正三司判官其无实效者退归常调勿复收用其诸路转运使不复以路分相压使之久於其任有实效者或自权为正自转运副使为转运使无实效者亦退归常调勿复收用每三司副使阙则选三司判官及诸路转运使功效尤着者以补之三司使阙亦选於副使以补之三司使久於其任能使用度丰衍公私富实者增其秩使与两府同而勿改其职如此则异日财用之丰耗不離於已不得诿之他人必务为永久之规矣其文辞之士则自有资涂不必使为钱穀之吏以轻之也何谓养其本原而徐取之善治财者养其所自来而收其所有余故用之不竭而上下交足也不善治财者反此夫农工商贾者财之所自来也农尽力则田善收而穀有余矣工尽巧则器斯坚而用有余矣商贾流通则有无交而货有余矣彼有余而我取之虽多不病矣今之有司自谓能治财者臣见之矣冻馁其民而丰积聚者也扫土以市禄位而不恤後人者也捃拾麻麦而丧丘山者也保惜一钱而费万金者也不操白刃而为寇攘者也奸巧

簿书而罔君上者也必曰养其所自来而收其所有余则闻者以为笑矣夫使稼穡者饶乐而惰游者困苦则农尽力矣坚好使用者获利浮伪侈靡者不售则工尽巧矣公家之利舍其细而取其大散诸近而取诸远则商贾流通矣农工商贾皆乐其业而安其富则公家何求而不获乎夫农天下之首务也古人之所重而今人之所轻非独轻之又困苦莫先焉何以言之彼农者苦身劳力衣麤食粝官之百赋出焉百役归焉岁丰则贱贸其穀以应官私之求岁凶则流离冻馁先衆人填沟壑如此而望浮食之民转而缘南亩难矣彼直生而不知市井之乐耳苟或知之则去而不返矣故以今天下之民度之农者不过二三而浮食者常七八矣欲仓廩之实其可得乎臣愚以为凡农民租税之外宜无有所预衙前当募人为之以优重相补不足则以坊郭上户为之彼坊郭之民部送纲运典领仓库不费二三而农民常费八九何则儇利戇愚之性不同故也其余轻役则以农民为之岁丰则官为平糴使穀有所归岁凶则先案籍调贍农民而後及浮食者民有能自耕种积谷多者不籍以为家赆之数如此则谷重而农劝矣彼百工者以时俗为心者也时俗贵用物而贱浮伪则百工变而从之矣时俗者以在上之人为心者也在上好朴素而恶淫侈则时俗变而从之矣其百工在官者亦当择人而监之以工致为上华靡为下物勒工名谨考其良苦而诛赏之取其用不取其数则器用无不精矣彼商贾者志於利而已矣今县官数以一切之计变法更令弃信而夺之彼无利则弃业而从他县官安能止之哉是以茶盐弃捐征税耗损凡以此也然则县官之利果何得哉善治财者不然将取之必予之将敛之必散之故日计之不足而岁计之有余此廼白圭猗顿之所知岂国家选贤择能以治财其用智顾不如白圭猗顿邪患在国家任之不久责近效而遗远谋故也夫伐薪者刈其条枚养其本根则薪不絶矣若并本根而伐之其得薪岂不多哉後无继矣是非难知之道也然有司不为者彼其心曰吾居官不日而迁不立效於目前以自显顾养财以遗後之人使为功吾何赖焉是非特有司之罪也亦朝廷用人之法驱之使然也何谓减损浮冗而省用之昔太祖初得天下之时止有一百一十一州耳江南两浙西川富饶之土皆为异域又承五代荒乱之余府库空竭豪杰棊布於海内戎狄窥觐於边境戎车岁驾四方多虞当是之时内给百官外奉军旅诛除僭伪赏赐钜万未尝闻财用不足如今日之汲汲也陛下承祖宗之业奄有四百余州天下一统戎狄欵塞富饶之土贡赋相属承平积久百姓阜安是宜财用羡溢百倍於前柰何竭府库之所蓄罄率土之所有当天下无事之时遑遑焉专救经费而不足万一有不可期之灾患将何以待之乎夫以国初之狭隘艰难财用宜不足而有余今日之广大安宁财用宜有余而不足陛下亦尝熟思其所以然之理乎得非太祖所养者皆有功有用之人陛下所养者未必尽有功用乎臣窃见陛下天性恭俭不好侈靡宫室苑囿皆因祖宗之旧无所更造或隳顿荒翳不加修治饮饕衣服器皿帷帐适足供用不极精华或苦恶弊綻亦不更易虽唐虞之土阶三尺茅茨不翦殆无以过然左右侍御之人宗戚贵臣之家第宅园圃服食器用往往穷天下之珍怪极一时之鲜明惟意所欲无复分限以豪华相尚以俭陋相訾厌常而好新月异而岁殊是以费用不足则诛求无厌勾贷不耻甚者或依凭诏令以发府库之财假托供奉以糜县官之物真伪莫辨多少不会陛下圣度寛仁不欲拒塞恶闻人过不加案诘至於颁赐外廷之臣亦皆踰溢常数不循旧规如曩者皇女初生所散包子之类费用不可胜纪臣尝闻耆旧之人言先朝公主在宫中俸钱不过月五千其余後宫月给大抵仿此非时未尝轻有赐予虽有赐予亦不甚丰窃闻近日俸给赐予比於先朝何啻数十倍矣汉明帝曰我子岂宜与先帝子等乎夫等犹不可又况过之是以祖宗之积穷於赐予困於浮费臣不能知其详以外望度之什耗七八矣内藏已虚而浸淫於左藏矣夫府库者聚天下之

財以爲民也非以奉一人之私也祖宗所爲置內藏者以備飢饉兵革非常之費非以供陛下奉養賜予之具也今內藏庫專以內臣掌之不領於三司其出納之多少積蓄之虛實簿書之是非有司莫得而知也若皆以奉養賜予而盡之一旦有飢饉兵革之事三司經費自不能周內藏又無所仰斂之於民則民已困竭得無狼狽而不支乎此臣夙夜所懍懍也今陛下所以有唐虞之德而無唐虞之治者其失在於不忍而好予不忍則不誅有罪好予則不待有功不誅有罪則奸邪欺罔而不忌不待有功則貪佞徼幸而無厭治道之所以不格於上下者凡以此也昔韓昭侯有弊袴命藏之侍者曰君亦不仁者矣不賜左右而藏之昭侯曰吾聞明主愛一嚔一笑嚔有爲嚔笑有爲笑今袴豈特嚔笑哉吾必待有功者彼小國諸侯猶能慎賞如是而國以富強況以四海之主不行無功徼幸之賞杜塞甘言悲辭之請則唐虞之治何遠之有哉夫府庫金帛皆生民之膏血州縣之吏鞭撻其丁壯凍餒其老弱銖銖寸寸而誅之今以富大之州終歲之積輸之京師適足以供陛下一朝恩澤之賜貴臣一日飲宴之費陛下何獨不忍於目前之羣臣而忍之於天下之百姓乎夫以陛下恭儉之德擬乎唐虞而百姓困窮之弊鈞於秦漢秦漢竭天下之力以奉一身陛下竭天下之力以資衆人其用心雖殊其病民一也此臣之所以尤戚戚者也又宮掖者風俗之原也貴近者衆庶之法也故宮掖之所尚則外必爲之貴近之所好則下必效之自然之勢也是以內自京師士大夫外及遠方之人下及軍中士伍一畝農民其服食器用比於數十年之前皆華靡而不實矣曩之所有今人見之皆以爲鄙陋而笑之矣夫天地之產有常而人類日繁耕者浸寡而游手日衆嗜欲無極而風俗日奢欲財力之無屈得乎哉又府史胥徒之屬居無廩祿進無榮望皆以?民爲生者也上自公府省寺諸路監司州縣鄉村倉場庫務之吏詞訟追呼租稅徭役出納會計凡有毫厘之事關其手者非賂遺則不行是以百姓破家壞產者非縣官賦役獨能使之然也大半盡於吏家矣此民之所以重困者也又國家比來政令寬弛百職隳廢在上者簡倨而不加省察在下者侵盜而恣爲奸利是以每有營造貿買其所費財物十倍於前而所收功利曾不一二此國用之所以尤不足者也又自古百官皆有常員而國家用磨勘之法滿歲則遷日滋月益無復限極是以一官至數百人則俸祿有增而無損矣又近歲養兵務多不務精夫兵多而不精則力用寡而衣糧費衣糧費則府庫耗府庫耗則賜賚稀是以不足者豈惟民哉兵亦貧矣策之失者無甚於此也凡此數者皆所以竭民財者也陛下安得熟視而無所變更邪臣愚伏愿陛下觀今日之弊思將來之患深自抑損先由近始凡宗室外戚後宮內臣以至外廷之臣俸給賜予皆循祖宗舊規勿復得援用近歲徼幸之例其踰越常分妄有干求者一皆塞絕分毫勿許若祈請不已者宜嚴加懲遣以警其餘凡文思院後苑作所爲奇巧珍玩之物不急而無用者一皆罷省內自妃嬪外及宗戚下至臣庶之家敢以奢麗之物夸眩相高及貢獻賂遺以求悅媚者亦明治其罪而焚毀其物於四達之衢專用朴素以率先天下矯正風俗然後登用廉良誅退貪殘保佑公直消除奸蠹澄清庶官選練戰士不祿無功不食無用如此行之久而不懈臣見御府之財將朽蠹而無所容貯太倉之粟將弥漫而不可蓋藏農夫棄糧於一畝商賈讓財於道路矣孰與今日汲汲以應目前之求懍懍以忧將來之困乎夫食貨者天下之急務今窮乏如是而宰相不以為忧意者以為非已之職故也臣愿陛下復置總計使之官使宰相領之凡天下金帛錢穀隸於三司及不隸三司如內藏庫奉宸庫之類總計使皆統之小事則官長專達大事則謀於總計使而後行之歲終則上其出入之數於總計使總計使量入以爲出若入寡而出多則總計使察其所以然之理求其費用之可省者以奏而省之必使歲余三分之一以爲儲蓄備御不虞凡三司使副使判官轉運使及掌內藏奉宸?庫之官皆委總計使察其能否

考其功状以奏而诛赏之若總计使久试无效则乞陛下罢退其人更置之议者必以为宰相论道经邦燮理陰阳不当领钱穀之职是皆愚人不知治体者之言昔舜举八恺使主后土奏庶艰食贸迁有无地平天成九功惟叙周礼冢宰以九职九赋九式九贡之法治财用唐制以宰相领盐铁度支户部国初亦以宰相都提举三司水陆发运等使是则钱穀自古及今皆宰相之职也今译经润文犹以宰相领之岂有食货国之大政而谓之非宰相之事乎必若府库空竭闾閻愁困四方之民流转死亡而曰我能论道经邦燮理陰阳非愚臣之所知也臣不胜狂愚冒犯忌讳惟陛下裁察臣光昧死 拜上疏

传家集卷二十五

卷二十六

钦定四库全书

传家集卷二十六 宋 司马光 撰章奏九

乞施行制国用疏上殿劄子

臣近曾上疏以即今公私财用率皆穷窘专奉目前经费犹汲汲不足万一有大水大旱饥馑相仍戎狄侵边盗贼羣起发兵诛讨不时克定仓库已空百姓又竭其忧患不细必当早为之谋以救斯弊乞随材用人使久於其任务农通商以蓄息财物节省赐予裁损浮费又以宰相领總计使之职凡天下金帛钱穀属於三司不属三司者總计使皆领之岁终则校其出入之数若入少而出多则思其所以救补之术奏而行之常使岁余三分之一以备饥馑军旅非常之费其内外钱穀官之长皆委總计使察其能否考其功状以奏而诛赏之此诚当今之急务伏望陛下与公卿大臣定议早赐施行取进止

乞召皇侄就职上殿劄子【嘉佑七年七月二十七日】

臣伏见陛下以皇侄宗实知宗正寺宗实辞让多日不肯就职陛下两次遣使者召令受勅中外之人无不欣悦以为非陛下睿智聪明深谋远虑断自圣志确然不惑何以及此夫王者以大庇生民为仁安固基业为孝仁孝之道莫大於此今陛下一举而两有之天下闻之安得不喜又爵禄者人之所贪往往较量丝毫干求争讼不顾廉耻今宗实特受陛下简拔恩宠殊异而以荣为惧辞让恳切首尾十月尚未受诏其智识操行必贤於人益足彰陛下知人之明此天下所以尤喜也然陛下之於宗实属则父也尊则君也在礼父召无诺唯而起君命召不俟驾今陛下两遣使者召之宗实虽不受恩命亦当入见面自陈述岂可在家坚卧不起臣愚伏愿陛下更遣近上内臣往传圣意责以礼法彼宜不敢不来来则陛下面加敦谕使知圣心恳惻发於至诚彼宜不敢不受如此则陛下仁孝之德纯粹光大本末如一无以复加此皆陛下即今所行而臣复区区进言者诚欲陛下守之益坚行之不倦故也取进止

论覃恩劄子【嘉佑七年七月五日上】

臣光等伏覩今月三日御札取今年季秋择日有事於明堂所有合行诸般恩赏一依南郊例施行臣等窃见皇佑二年亲祀明堂是时以初行希阔之礼文武臣僚并转一官今国家修举旧礼乃是常典虽已诞告恩赏一依南郊例然窃虑贪冒无识之人尚有希觊流言云云动摇中外况今庶官滥溢经费窘竭岂可复踵往岁之失以增今日之弊伏望朝廷预先明降指挥言今岁所行明堂之礼更不覃恩转官使中外咸知以絕侥幸者之望取进止

请早令皇子入内劄子【嘉佑七年八月二十七日上】

臣等伏闻择今月二十五日差内臣宣皇子曙入内而曙犹复称病未入臣等窃以臣子有君命召不俟驾之礼使者有受命不受辞之义今曙但以恐惧不敢便当陛下非常恩宠而所差内臣亦合以臣子事君父之礼晓谕切责使即奉命岂得备礼致命默然往复殊不副陛下圣意其今月二十五日宣曙内臣伏乞特行责降以惩不职之罪况皇子之名本非官职无容避让今诏命已下二十余日而曙既为陛下之子礼当朝夕定省备人子之职不宜久处外宅伏望圣慈速赐选差都知御药谕以君父之命不可违臣子之职不可阙敦迫切责使即时入内并下太宗正司及本宫亦仰以礼敦遣不得更容迁延取进止

乞直讲不限年及出身劄子【嘉佑七年九月一日上】

臣伏见国子监直讲见缺数员久而未补盖以近制须年四十以上及进士九经出身方得为之臣愚以为学官正宜取德行经术可为师表之人不当限以苛法若不察其人之贤愚而惟年齿出身之间则虽有德行如顔回经术如王弼皆终身不可为学官也又旧制学官皆先试讲说然後就职近岁此法亦因循不行臣欲乞今後应国子监直讲有阙许本监或两制以上举京朝官选人有德行经术者具姓名闻奏更不问年纪及出身其国子监所举者委学士或舍人院试两制以上所举者委国子监试并须衆官聚厅互举疑义面试讲说择其义理精通者保明闻奏方降勅差除若德行邪僻经术荒谬而辄敢举荐保明者并乞严行朝典取进止

乞复夏倚差遣劄子【嘉佑七年九月十七日上】

臣先任通判并州事日准经畧司牒往麟州勾当公事伏见通判本州事夏倚通敏恪勤勇於忠义苟利公家不为身谋始与臣共议於屈野河西修堡以止西夏侵耕及见管干军马司公事郭恩恃勇轻敌倚与臣书称恩万举万败经畧司方行止约恩已覆没倚收抚散兵孤城获安既而倚与衆人一例获罪降充监当及今五年两经大赦应当时河西连累之人罪稍轻者并已复旧差遣惟倚尚合入知县资叙比於衆人独为困蹶诚可哀怜臣窃以倚当日知恩必败而力不能制恩之败绩实非倚罪兼其人公忠材智诚有可称不可专以一眚掩其衆善伏望圣慈特与复通判差遣庶使任职之臣知徇公获罪终不能久为身累有所劝慕取进止

乞推恩老臣劄子【嘉佑七年九月十九日上】

臣伏见皇佑二年陛下亲祀明堂曾召前两府杜衍任布二人陪位及礼毕陛下推恩特赐衍布子男各一人进士出身今陛下 举希阔之典亦曾召前宰相龐籍陪位臣窃以籍彞守西边宣力实多怀柔凶渠复归皇化其在宰府属蛮寇凭陵震惊二广翼賛圣谋廓清丑类及告老之年精力犹壮坚辞荣禄去位家居实朝家之硕臣方今之耆俊遇兹盛礼伏望陛下用杜衍任布前例特推恩於籍子男一人以慰其心足以示养老优贤增圣政之美

论董淑妃諡议策礼劄子【元佑七年九月二十三日上】

臣伏见充媛董氏薨追赠婉仪又赠淑妃陛下亲为之辍朝挂服羣臣进名奉慰又命有司为之定諡及行策礼於葬日仍给卤簿外廷之议皆以为董氏名秩本微病亟之日方拜充媛今送终之礼太为崇重臣按古者妇人无諡近世唯皇后有諡及有追加策命者妃嫔已下未之有也卤簿本以赏军功未尝施於妇人唯唐平阳公主有举兵佐高祖定天下之功方给鼓吹後至中宗时韦后建议始令妃主葬日皆给鼓吹非明主之令典不足法也臣愚伏念陛下恭俭寡欲近岁以来後宫之宠絶无大盛过分着闻於外者此四方之人所以咨嗟颂咏归仰圣德也不意今兹以既没之董氏而有司諂曲妄崇虚饰以隳紊制度瀆慢名器使天下之人疑陛下降於女宠甚非所以光益圣德也况礼数既崇则凡丧事所须用度必广今明堂大礼新毕帑藏空虚赋敛日滋元元愁困诚不宜更崇大後宫之丧以横增烦费夫亡者虽加之虚名盛饰岂能复知而足以仰累圣德臣窃惜之伏望陛下特诏有司悉罢议諡及策礼事其葬日更不给卤簿凡丧事所须务从减损不必尽一品之礼以明陛下薄於女宠而厚於元元也取进止

论寺额劄子【嘉佑七年十月四日上】

臣伏覩近降赦节文应天下系帐存留寺观院舍自来未有名额者特赐名其在四京管内者虽不系帐今日已前盖到舍屋及百间以上者亦赐名额窃以释老之教无益治世而聚匿游惰耗蠹良民此明识所共知不待臣一二言也是以国家明着法令有创造寺观一间以上者听人陈告科违制之罪仍即时毁撤盖以流俗蠢愚崇尚释老积弊已深不可猝除故为之禁限不使繁滋而已今若有人公违法令擅造寺观及百间已上则其罪已大幸遇赦恩免其罪罚可矣其栋宇瓦木犹当毁撤没入县官今既不毁而又明行恩命锡之宠名是劝之也臣闻为人上者洗濯其心壹以待民是以令行禁止而莫敢不从今立法以禁之於前而发赦以劝之於後则凡国家之号令将使民何信而从乎臣恐自今以往奸滑之人将不顾法令依凭释老之教以欺诱愚民聚敛其财以广营寺观务及百间以上以须後赦冀幸今日之恩不可复禁矣方今元元贫困衣食不赡仁君在上岂可复唱释老之教以害其财用乎事有微而患深令有近而害远者此之谓也伏望陛下追改前命应天下寺观院舍不系帐者不以舍屋多少并依前後勅条处分其昨来赦文内四京寺观院舍虽不系帐亦赐名额一节乞更不施行庶使号令为民所信而游惰不能为奸也取进止

言贾黯劄子【嘉佑七年十月十二日上】

臣伏见权知开封府贾黯本以文艺进身不闲吏事屨在流内銓三班审官院已无声迹可纪及尹京邑当繁剧之任尤非所长区断乖方怨嗟盈路伏乞朝廷量其所能授以佗职别选差人知开封府庶合衆心取进止

言王逵劄子【嘉佑七年十月十九日上】

臣窃闻监兗州景灵宫王逵近降勅差知莱州逵暴戾凶狡陵上虐下所至为害朝野具知今年齿已衰犹污仕籍若复授以一州使为长吏必恣行不法残害民物监司畏之莫敢诘问使

一境之人何所控告伏望朝廷检会逵年纪及察逵平生事迹勒令致仕或只与监当差遣永不得令亲民取进止

言王逵第二劄子【寻改除逵西京留台】

臣先曾上言新差知莱州王逵暴戾凶狡残害民物乞检会逵年纪及平生事迹勒令致仕或只与监当差遣至今未闻朝廷追改前命臣窃以善为政者视民如子见不仁者诛之如鹰鹯之逐鸟雀也故害民之吏患在不知知而不除使戕贼良善不爱一州而爱一酷吏岂为民父母之意哉伏望朝廷检会臣前来所奏早赐施行取进止

言陈烈劄子【嘉佑七年十二月十八日上】

臣等伏见朝廷擢以福州处士陈烈好学笃行动遵礼法乐道养志名闻京师故举之闾閻之中以为学官烈辞让未至今闻福建路提刑王陶奏据福州勘到烈为妻林氏疾病瘦丑遣归其家十年不视陶因言烈贪污险诈行无纖完乞尽追夺前後所受恩命臣等素不识烈不知其人果为如何惟见国家常患士人不修名检故举烈等以奖励风俗若烈平生操守出於诚实虽有底滞迂阔之行不能合於中道犹为守节之士亦当保而全之岂可毁坏挫辱疾之如讐书曰不协于极不罹于咎皇则受之古人所以礼九九市骏骨盖以此也若其内怀奸恶亏败名教外饰诈伪沽钓声利则朝廷擢者以为有道之士不次用之今乃丑行布於四方其为愧耻亦不细矣其始者荐举之人安可置其罪而不问臣等欲望陛下委邻路监司再行体量本人平生事迹善恶虚实或选差公正官吏通儒术识大体者覆勘前件公事若情理不至深重止於夫妻不相安谐则使之离絶而已湔洗其过庶几复伸眉於後又使四方节行之士不忧横辱得以安恬於闾里若实有丑恶之迹败乱名教则当严赐刑诛并治举者之罪以明至公

论赦劄子【嘉佑七年十月二十七日上】

臣伏见国家每下赦书辄云敢以赦前事言者以其罪罪之诚欲恩泽下究而号令必信也比见臣僚多以私意偏见奏赦前事乞不原赦或更特行编配重於不经赦之人朝廷皆从其请若其人情理巨蠹必不可赦者则国家当於约束勅及赦文内明白言之若所坐不至甚重而特不赦是恩泽有所不均而同罪之人有幸不幸也且今刼盗杀人不死及杂犯死罪犹赦之而微罪不赦是则罪之轻重不系於人主不刊之法令而决於人臣一人之私意也况使经赦之人仍就编配得罪重於不经赦者尤无谓也夫赦者诚非致治之道然朝廷若能永无赦令使有罪者必刑斯人知恐惧莫敢犯矣今既数下赦令而使大罪得免小罪被刑经赦者其罚重不经赦者其罚轻臧否纠纷使百姓何所取信哉臣愚欲望陛下自今犯罪之人情理巨蠹必不可赦者乞於豫降约束勅内明白言之其余并从赦文处分其有指赦作过情状显然不因臣僚奏请陛下圣意特不原免者止宜依法施行亦不可使重於赦前之罪应昨赦前犯罪不至编配而赦後特行编配者并乞放令逐便庶使恩泽均一号令明信

言壽星观御容劄子【嘉佑七年十二月三月上】

臣等前者伏覩陛下幸壽星观奉安真宗御容当是时臣等不知事之本末未敢进言自後方知本观旧日止有先帝时所画壽星近因本观管干内臣吴知章妄有奏陈称是先帝御容意欲张大事体广有兴修自为劳効别图恩赏陛下天性仁孝以为崇奉祖宗重违其请遂更画先帝御容以易壽星之像改为崇先观知章既得御容倚以为名奸诈之心不知纪极乃更求开展观地别建更衣殿及诸屋宇将近百闲制度宏侈计其所费踰数千万向去增益未有穷期臣等窃以祖宗神灵之所凭依在於太庙木主而已自古帝王之孝者莫若虞舜商之高宗周之文武未闻宗庙之外更广为象设然後得尽至诚也唯高宗祭祀亲庙微为丰数故傳說曰黷于祭祀时谓弗钦礼烦则乱事神则难祖已曰祀无丰于昵盖规之也後至汉氏始为原庙当时醇儒达礼者靡不讥之况画御容於道宫佛寺而又为壽星之服其为黷也甚矣且又太祖太宗御容在京师者止於兴国寺啓圣院而已真宗御容已有数处今又益以崇先观是亦丰于昵也无乃失尊尊之义乎原其所来止因知章妄希恩泽乃敢恣为诬罔兴造事端致陷朝廷於非礼今既奉安御容难以变更若只就本观旧来已修屋宇固足崇奉所有创添屋宇伏乞一切停寢止令有司以时侍奉所有知章诬罔圣聪依托御容妄有干请广兴力役乞下所司取勘穷治奸状明正其罪

论仪鸾失火劄子【嘉佑七年八月十一日上】

臣窃闻今月九日夜大庆殿前仪鸾司房内失火烟焰已起烧及屋宇侧近守宿之人知觉差早仅能救灭或闻圣恩欲寬贷失火之人窃以宫省之内火禁不可不严向使救之稍缓为灾不细伏望选差不干碍官一员子细检定火发踪由委开封府依公尽理根勘从初失火因依应干系人等严赐施行所贵戒励後人不敢懈怠

卷二十七

<集部,别集类,北宋建隆至靖康,传家集>

钦定四库全书

传家集卷二十七 宋 司马光 撰章奏十

论后妃封赠劄子【嘉佑七年十二月二十二日上】

臣伏闻学士院新定後宫封赠父祖制度皇后与妃皆赠三代臣窃以为不可夫礼之所慎在於尊卑之分别嫌明微故国君沐梁大夫沐稷士沐梁盖以大夫贵近於君故推而远之以防僭偪之端士贱远於君虽与之同物无所嫌也况后妃之际实治乱之本圣人於此尤兢兢焉皇后敌体至尊母仪四海六宫之内无与等夷妃品秩虽贵而皇后犹为女君今封赠之典混而为一臣实惧焉虽陛下圣明宫壺之政贵贱有伦必无僭偪之忧然非所以别嫌疑防萌兆垂法度示子孙也昔汉文帝幸郎署慎夫人与皇后同坐中郎将袁盎引却慎夫人席曰陛下既以立后慎夫人乃妾妾主岂可同坐哉文帝善其言彼少顷同席盎犹以为不可而犯顔力争况着之典策以为百世之法乎臣谨按天圣中遇南郊大礼皇太后追赠三代太妃止赠二代然则妃赠三代乃近岁之失不可以不正也议者或谓外廷之臣凡入两府者皆赠三代妃正一品礼不可以後之臣窃以为不然圣王制礼内外异宜不可均壹自宰相枢密副使名秩虽殊而比肩为臣共同职业俱赠三代不足为嫌皇后与妃位次相亚而有妾主之分以此尤宜分别名器使之着明以防後世之有僭差不可卤莽灭裂苟然而已也臣愚欲望陛下特降圣旨改定新制自今後唯皇后得赠三代自妃以下皆不过二代若以外廷之臣封赠太优则乞自今後唯宰相枢密使得赠三代自参知政事以下止於二代庶几得礼之宜取进止乞以假日入问圣体劄子【嘉佑七年三月二十一日上】

臣等窃以休假之令盖愍羣臣职事劳苦故因节序使得归家享祀宴乐尽其私恩今陛下圣体虽安然饮饕起居尚未复旧将来寒食节假顿经七日羣臣不奉天顔晓夕之心岂能自安欲乞自入假以後每隔日许两府及知杂御史以上一次问圣体仍乞召两府入对便殿所贵中外之人尽知陛下圣体康宁各获安心取进止

乞遣告哀使劄子【嘉佑八年四月九日上】

臣等窃见大行皇帝晏驾已近旬日其告哀於契丹使人尚未进发兼闻不曾素戒使者对答继嗣之辞臣等窃议深恐未便何则国家既与契丹约为兄弟遭此大丧立当讣告敌中刺探之人所在有之今天下缟素敌中岂得不知而讣告之人尚未到彼敌谓中国有何事故能不猜疑自古大宗无子则取於小宗以为後着在礼典岂为国恶若敌人有问尽以实对有何所

伤今问继嗣於使人而使人对以不知事体岂得便稳况陛下初为皇子之时诏书已布告天下敌中安得不知今若答以虚辞不足诈彼而适足取其笑侮耳国家自与契丹和亲以来五十有六年生民乐业令国有大故正是邻敌鬬伺之时岂可更接之失理自生间隙臣等愿朝廷早决此议令使人昼夜兼程进发若敌中问及继嗣皆以实告孔子曰言忠信虽蛮貊之邦行矣臣等愚意窃以如此为便取进止

上皇太后疏【嘉佑八年四月十三日上】

月日具位臣司马光昧死再拜上疏皇太后殿下羣生无福大行皇帝奄弃天下皇帝继统哀毁成疾未能亲政恭请殿下同决庶务臣愚伏计殿下念宗庙社稷之重为四海黎元之计不得已而临之非中心所欲也若皇帝圣体不日康宁殿下必推而不居若药石未效则殿下方且總览万几未暇自安故凡举措动静不可不戒慎留心焉方今天下之势危於累卵小大战战忧虑百端若非君臣同心内外協力夙夜勤劳以徇国家之急则祸难之生岂可胜讳哉夫安危之本在於任人治乱之机在於赏罚二者不可不察也若中外百官各得其人贤能者进不肖者退忠直者亲谗佞者疎则天下何得不安任职之臣多非其人贤能者退不肖者进忠直者疎谗佞者亲则天下何得不危赏不因喜罚不因怒赏必有所劝罚必有所惩则天下何得不治喜则滥赏怒则妄罚赏加於无功罚加於无罪则天下何得不乱然则天下安危治乱不在於佗在於人主方寸之地而已矣凡御下之道恩过则骄骄则不可不戢之以威威过则怨怨则不可不施之以恩恩威之道圣人所以制世御俗犹天地之有陰阳损之益之不失中和以生成万物者也夫恩者欲物之亲已也有时而生怨威者欲物之畏已也有时而生慢小人之性恩过则骄骄而裁之则怨矣爵禄赏赐妄加於人则其同类皆曰我与彼才相若也功相敌也彼得之而我独不得何哉是出一恩而召羣怨也故曰恩有时而生怨也威严太盛则人无所容刑罚烦苛则滥及无辜则其同类皆曰是过也人谁无之彼既不免行将及我於是乎穷迫思乱为其上者乃更畏恐而求姑息是始於严而終於慢也故曰威有时而生慢也如是则为人上者岂不至难哉盖善为人上者不然恩必施於有功而罚必加於有罪恩虽至厚而人不敢妒者何也衆人之所与也罚虽至重而人无所怨者何也衆人之所恶也大行皇帝天性至仁羣臣之功或未足言而赏之以厚罪或不可容而罚之至轻善则善矣而小人不识大恩者或几乎骄慢矣臣窃意殿下今兹继而为政必将紘之以严紘之以严诚是也然天下之人涵濡大行皇帝圣泽日久一旦暴加绳检恐骇而离心伏愿殿下徐以义理教之戒之有不听从而尤无良者然後加刑罚焉则谁敢不肃此善之善者也往者大行皇帝嗣位之初章献明肃皇太后保护圣躬纲纪四方进贤退奸镇抚中外於赵氏实有大功但以自奉之礼或崇重太过外亲鄙猥之人或忝污官职左右谗谄之臣或窃弄权柄此所以负谤於天下也今殿下初摄大政四方之人莫不观听以占盛德臣以为凡名体礼数所以自奉者皆当深自抑损不可尽依章献明肃皇太后故事以成谦顺之美副四海之望大臣忠厚如王曾清纯如张知白刚正如鲁宗道质直如薛奎者殿下当信之用之与共谋天下之事鄙猥如马季良谗谄如罗崇勲者殿下当疎之远之不可宠以禄位听采其言也臣闻妇人内夫家而外父母家况后妃与国同体休戚如一若赵氏安则百姓皆安况於曹氏必世世长享富贵明矣赵氏不安则百姓涂地曹氏虽欲独安其可得乎是故政者正也为政之道莫若至公臣愿殿下熟察羣臣之中有贤才则举之有功则赏之虽贱如厮役憎如仇讎远在千里之外皆不可弃遗如此

则人谁不劝矣羣臣之中职事不修则废之有罪则刑之虽贵为公卿亲为兄弟近在耳目之前皆不可宽假如此则人谁不惧矣夫为善者劝为恶者惧百官称职万民乐业天下之安犹倚泰山而坐平原也尚何忧哉然後俟皇帝圣体平寧授以治安之业自居长乐之宫坐享天下之养则殿下圣善之德冠絕前古光映後來虽周之文母汉之明德不足比也臣备国家侍从之臣以谏诤为职不胜区区之诚妄冒以闻伏惟殿下置之几席少加听察臣光昧死再拜上疏

言遗赐劄子【嘉佑八年四月十五日上】

臣伏覩圣恩颁赐羣臣以大行皇帝遗留物如臣所得已近千缗况名位渐高必沾赀愈厚举朝之内所费何啻钜万窃以国家用度素窘复遭大丧累世所藏几乎扫地传闻外州军官库无钱之处或借贷民钱以供赏给一朝取办逼以捶楚当此之际羣臣何心以当厚赐况将来山陵所须全未有备国信往来又当供亿万一更有水旱军旅之虞不知朝廷何以处之若国用不足必重斂於民民已困穷何以供命饥寒所驱必为盗贼此乃安危之本愿陛下深思熟虑勿以为细事而忽之也臣诚知乾兴之际曾有此例亦恐当时所赐不至如此之多况当时帑藏最为富实今事力耗竭十无一二岂可但云旧例不思损益况委质为臣共图国事股肱耳目譬犹一体安则俱安危则俱危岂待多得金珠然後输忠尽力恐非所以遇士大夫之道也今天崩地坼率土哀摧羣臣各迁一官不隔磨勘恩泽已厚诚不忍更受赐物因公家之祸为私室之利伏望圣慈许令侍从之臣各随其意进奉金帛钱物以助供山陵之费如此则君恩下流臣诚上达上下相爱洽於至和既可以少纾民力又不至有伤国体取进止

言遗赐第二劄子【嘉佑八年四月二十一日上】

臣於今月十五日曾具劄子上言乞许令侍从之臣进奉金银钱帛以助山陵之费至今未闻降出臣示曾与同辈具状诣客省进物蒙批降指挥以乾兴年中无此例不令收接其事理本末臣已於前来劄子内一一奏陈今更不敢重复有言窃以方今国家多虞人心危惧正是朝廷斟酌时宜损益变通之际岂可不究利害但询旧例而已况所赐羣臣之物比旧例过多几倍而羣臣有所进献则云旧例无之虽圣恩务在优隆然羣臣有廉耻之心者何面目以自安又州县鞭撻平民逼取钱物以济一时之急不知乾兴年中何尝有此例也以此见国家虚实缓急逐时不同岂可专执旧文不加裁损今大丧之後内外困穷凡百在位之臣皆当焦心刻已以救其患若受此非常之赐恬然有之曾不为愧则士衆必曰我辈劳苦而所得微薄羣臣安坐而专享厚利其心安得不怨百姓亦曰我辈剥肤椎髓以供赋斂而浩浩入羣臣之家如泥沙不惜其心安得不怒近者怨远者怒为国计者可以不深思远虑乎是以臣辈区区欲输此物非谓可以增帑藏之富助用度之急也其意盖以通上下之情慰远近之心塞无厌之怨解重斂之怒伏望朝廷留心省察知其为安危之本非臣夸小廉竞小忠也臣今来并前来所奏劄子共二道并乞早降付中书枢密院同共商量施行取进止

上皇帝疏【嘉佑八年四月二十七日上】

月日具位臣司马光昧死再拜上疏皇帝陛下臣愚窃惟大行皇帝春秋未甚高以宗庙社稷之重昭然远览确然独断知陛下仁孝聪明可守大业擢於宗族之中建为嗣子授以天下其恩德隆厚踰於天地固非微臣所能称述今不幸奄弃万国陛下哀慕泣血以夜继昼过於礼制以至成疾中外闻者无不感泣知大行皇帝能为天下得人治平之期企踵可待羣臣百姓不胜大幸今者圣体痊平初临大政四海之人拭目而视倾耳而听举措云为不可不慎易曰君子以作事谋始召诰曰王乃初服呜呼若生子罔不在厥初生自貽哲命夫为政之要在於用人赏善罚恶而已三者之得则远近翕然向风从化可以不劳而成无为而治三者之失则流闻四方莫不解体纲纪不立万事隳颓治乱之原安危之机尽在於是臣愿陛下难之慎之精心审虑如射之有的必万全取中然後可发也陛下思念先朝欲报之德奉事皇太后孝谨抚诸公主慈爱此诚仁厚之至过人远甚臣愿陛下虽天性得之复加圣心夙夜匪懈慎终如始以结亿兆之心形四方之化则福祿流於子孙令问垂於无穷矣古者人君嗣位必踰年然後改元臣愿陛下一循典礼勿有变更於中年也三年之丧自天子達於庶人一也自汉氏以来始从权制以日易月臣愿陛下虽仰遵遗诏俯徇羣情二十七日而释服至於宫禁之中音乐游燕吉庆之事皆俟三年然後复常以尽慎终追远之义焉礼为人後者为之子故为所後服斩衰三年而为其父母齐衰不杖期为所後者之亲皆如子而为已之亲皆降一等盖以特重於大宗则宜降其小宗所以专志於所奉而不敢顾私亲也汉宣帝自以为昭帝後终不敢加尊号於卫太子史皇孙光武起於布衣亲冒矢石以得天下自以为元帝後亦不敢加尊号於鉅鹿都尉南顿君此皆徇大义明至公当时归美後世颂圣至於哀安桓灵或自旁亲入继大统皆追尊其祖父此不足为孝而适足犯义侵礼取讥当时见非後世臣愿陛下深以为监杜絶此议勿复听也凡此数者伏计陛下聪明皆素知之然臣复区区进言者诚惧不幸有諂谀之臣不识大体妄有关说自求容媚陛下万一误加听从圣言一出布闻於外则足以伤陛下之义亏海内之望臣虽欲捐躯争之亦无及已是以不敢不先事而言庶几圣德纯粹完美不有秋毫之缺使一夫窃议於草莱者臣之志也轻冒宸严不胜惓惓惶悸之至伏冀留神裁察臣光昧死再拜上疏

言山陵择地劄子

臣窃闻大行皇帝欲以十二月【一本作十月】二十七日大葬而朝廷遣使案行山陵至今未知定处或云欲於永安县界之外广求吉地臣愚以为过矣夫陰阳之书使人拘而多畏至於丧葬为害尤甚是以士庶之家或求葬地择岁月至有累世不葬者臣常深疾此风欲乞国家禁絶其书而未暇也今山陵大事当守先王之典礼至於葬书出於世俗委巷之言司天陰阳官皆市井愚夫何足问也古者天子七月诸侯五月大夫三月土踰月葬於北方北首未尝问岁月相山冈然考其子孙之吉凶岂有异於今哉春秋书已丑葬恭嬴雨不克葬庚寅日中而克葬丁巳葬定公雨不克葬戊午日下昃乃克葬然则虽云卜日亦当临事制宜也周礼冢人掌公墓之地先王之葬居中以昭穆为左右明不择地形也然而周有天下三十六王八百六十七岁盖王者受命於天期运有常国之兴衰在德之美恶固不系葬地时日之吉凶也且葬者藏也本以安祖考之形体得土厚水深高敞坚实之地则可矣子孙岂可因以求福哉又勸者国家以谨於时日之故坚用八日大歛自尔以来圣躬有疾至今尚未平复陰阳无验亦已明矣况国家自宣祖以来葬於永安百有余年官司储侍素皆有备今改卜佗所不惟县邑

官司更須創置亦恐大行皇帝神灵眷戀祖宗未肯即安於新陵也凡科率之物期日遠則民力寬而事易辦期日近則費愈多而事不集塋石之類體重難移若山陵之處不使豫先知之則有司何以供辦百姓何以輸納至時暴加迫趣則一錢之物必直十錢疲羸之民將不勝其弊矣伏望朝廷特賜指揮案行山陵使等只於永安县界旧陵側近選擇善地旬日之內早定奪聞奏仍令有司豫先計度山陵的實合用之物降下本處寬設期限使之備辦不得大約虛數及妄立近限必使号令明信則事無不濟而民力不困矣取進止

傳家集卷二十七

卷二十八

钦定四库全书

传家集卷二十八 宋 司马光 撰章奏十一

论御药寄资劄子【嘉佑八年五月二十一日上】

臣伏见祖宗以来择内臣谨信者勾当御药院以其职任最为亲近恐名位寝崇岁月稍久则权势太重不可制御故常用供奉官以下为之转至内殿崇班则出为外官此乃祖宗深思远虑防微杜渐高出前古诒谋万世者也近岁以来颇隳旧法居此任者往往闇理官资请其俸给久而不去殊失祖宗之意深为不便今兹践祚之初所宜革去积弊率由旧章窃见勾当御药院刘保信等四人亦曾自陈乞因覃恩改任外官伏望皇太后殿下皇帝陛下各依逐人所请将应自来内臣闇理官资者并除正官授以外任别择供奉官以下素知心腹忠信谨慤之人使勾当御药院仍自今後凡转官至内殿崇班以上者并须出外以遵祖宗之制不得闇理官资依旧留任内廷差遣取进止

乞令皇子伴读官提举皇子左右人劄子

臣伏见陛下差直史馆王陶充皇子伴读秘阁校理孙思恭充本位说书此诚国家之首务圣哲之远图然臣闻三代令王置师傅保以教其子又置三少与之燕居至於左右前後侍御仆从之人皆选孝悌端良之士逐去邪人毋得在侧使之日见正事闻正言然後道明而德盛心愉而体安福被兆民功流万世此教之所以为益也今陶等虽为皇子官属若不日日得见或见而遽退语言不洽志意不通未尝与之论经术之精微辨人情之邪正究义理之是非考行己之得失教者止於供职学者止於备礼而左右前後侍御仆从或有佞邪谗巧之人杂处其间出入起居朝夕相近诱之以非礼导之以不义纳之以諂谀济之以诈伪虽皇子资性聪明端慤难移然亲近易习积久易迁諂谀易入诈伪易感如此则虽有硕儒端士为之师傅终无益也臣闻孟子曰虽有天下易生之物一日暴之十日寒之未有能生者也吾见亦罕矣吾退而寒之者至矣又曰一齐人傅之衆楚人咻之虽日挹而求其齐亦不可得也臣愚伏望陛下多置皇子官属博选天下有学行之士以充之使每日在皇子侧与皇子居处燕游讲论道义聳善抑恶辅成懿德其左右前後侍御仆从悉皆选小心端慤之人使所属官司结罪保明然後得入仍专委伴读官提举觉察若有佞邪谗巧之人诱导皇子为非礼之事者委伴读官糾举施行即时斥逐不令在侧若皇子自有过失再三规诲不从者亦听以闻如此则必进德修业日就月将善人益亲邪人益疎诚天下之幸也大理评事赵彦若孝友温良谨洁正固博闻强记难进易退国子监直讲李实好学有文修身慎行秘阁校理孟恂清纯恺悌始终如一此臣之所知也伏望陛下择此三人及广求其比以备皇子官属臣推心尽忠不敢形迹僭越妄言伏俟谴谪取进止

上两宫疏【嘉佑八年六月二十二日上】

月日具官臣司马光昧死再拜上疏皇太后殿下皇帝陛下臣闻天地交谓之泰天地不交谓之否天地者上下之象也施诸人事君仁而臣忠父慈而子孝兄爱而弟恭皆泰也君不仁臣不忠父不慈子不孝兄不爱弟不恭皆否也泰则上下之情通内外之志和国以之治家以之安否则上下之情塞内外之志乖国以之乱家以之危治乱安危之分不在於他在於审察否泰之端而已矣书曰立爱惟亲立敬惟长始於家邦终於四海自古圣王治天下之道未有不孝慈始者也恭惟先帝属籍之亲凡数百人独以天下之业传於圣明皇太后承顾命之际镇抚中外决定大策其恩德隆厚踰於天地何可胜言皇帝至性烝烝哀以执丧恭以致养夙夜忧劳以成疾疹其於慈孝之美可谓至矣然臣犹窃有所惧不可不过虑於万一先事而进言者臣闻金堤千里溃於蚁壤白璧之瑕易离难合况社稷之重非特金堤也骨肉之亲非特白璧也在於守之至谨执之至固完美无间然後福祿无疆也夫奸邪之人专闕主意苟有衅隙则因而乘之於是离间人君臣交构人父子使之上下相疾内外相疑已然後得奋其诈谋以盗其大权私其重利自古以来丧国败家未有不由此者也今虽睿圣在上朝廷清明中外之臣咸怀忠良然祸福之原其来甚微举措听纳不可不慎臣愚窃惟今日之事皇帝非皇太后无以君天下皇太后非皇帝无以安天下两宫相恃犹头目之与心腹也皇帝圣体平寧之时奉事皇太后承顺顏色宜无不如礼若药石未效而定省温清有不能周备者亦皇太后所宜容也孔子曰孝哉闵子骞人不间於其父母昆弟之言盖言诚信纯至表里着明而他人不能间也孟子曰父子责善贼恩之大者也盖言骨肉至亲止当以恩意相原不当较锱铢之是非也臣愚伏望皇帝常思孔子之言皇太后无忘孟子之戒万一奸人欲有开说涉於离间者当立行诛戮以明示天下使咸知谗佞之徒不能欺惑圣明也方今天地鬼神羣臣百姓鸟兽草木皆恃两宫以为安若两宫懽忻於上则天地鬼神得以歆其禋祀鸟兽草木得以遂其生息况羣臣百姓孰不保首领以乐太平之化哉臣狂瞽妄言不识忌讳惟知徇国不为身谋不胜区区迫切之诚臣光昧死再拜上疏

论夏国入吊劄子【嘉佑八年七月十四日上】

臣伏闻夏国所遣使人前日不肯门见固求入对朝廷不许勒归馆舍臣愚窃以陛下继统之初四夷之人皆欲奉望天表窥觐圣德又闻羣臣不安意谓未能视朝所以犬羊之心敢尔桀黠今若深闭固拒不听入见则必疑有所隐避益足使之骄慢况即日陛下已御正殿臣谓何惜紫庭数步之地使之稽首拜伏瞻仰清光庶几得识陛下神武之姿知必能镇服四海归至其国转相告语使其蠡蚁之衆心服气沮不敢窥边此所谓上兵伐谋不待战而屈敌者也取进止

论进贺表恩泽劄子【嘉佑八年七月二十六日上】

臣窃见诸路转运使提点刑狱知州军等各遣亲属进奉贺登极表至京师朝廷不问官职高下亲属远近一例推恩乃至班行幕职权知州军或所遣之人不系亲属者亦除斋郎及差使殿侍此盖国初承五代姑息藩镇之弊故有此例後來人主嗣位之初大臣因循故事不能革

正然以理推之国家爵禄本待贤才及有功效之人今使此等无故受官诚为大滥况近日官吏繁冗十倍於国初之时朝廷深知其弊所以数年前别定条制减省诸色奏?之数若进表之人皆得一官则并又增数百入仕之人曩来减省奏?悉为虚设今纵不能尽罢此等恩泽其进表人若系五服内亲者或乞等第授一官其五服外亲及不系亲属者并量赐金帛罢去庶几少救滥官之失取进止

乞简省细务不必尽关圣览上殿劄子

臣闻臯陶赞於舜曰元首明哉股肱良?庶事康哉盖言人君明则百官得其人百官得其人则衆事无不美也又曰元首丛脞哉股肱惰哉万事隳哉盖言人君细碎无大略则羣臣不尽力羣臣不尽力则万事皆废坏也此二者治乱之至要也荀子曰明主好要闇主好详主好要则百事详主好详则百事荒故为人君者自有职事固不当详察细务也然则人君之职谓何臣愚以为量材而授官一也度功而加赏二也审罪而行罚三也材有长短故官有能否功有高下故赏有厚薄罪有小大故罚有轻重此三者人君所当用心其余皆不足言也臣伏见国家旧制百司细事如三司鞭一胥史开封府补一厢镇之类往往皆须奏闻崇政殿所引公事有军人武艺国马刍秣之类皆一一躬亲阅视此盖国初艰难权时之制施於今日颇伤烦碎陛下龙兴抚运圣政惟新臣愚以为宜令中书枢密院检详中外百司自来公事须申奏取旨及後殿所引公事其间不系大体非人君所宜身亲者悉从简省委之有司陛下养性安身以专念人君之三职足以法天地之易简致虞舜之无为诚天下幸甚取进止

乞裁决机务上殿劄子【嘉佑八年八月二十七上】

臣闻王言惟作命不言臣下罔攸禀令陛下以明德令望龙飞受命四海之内延颈倾耳渴闻圣政自践阼以来於今五月而陛下深执谦逊端拱渊默羣臣奏事一无可否中外之情深为鬱邑曩者犹谓圣体未安今御殿听政已遵旧式出入起居皆复常度而独於万几未加裁决臣窃惑之诗曰弗躬弗亲庶民弗信弗问弗仕勿罔君子臣愚伏望陛下凡两府及羣臣奏事稍留神省察询访利害议论是非可则行之否则却之使四方翕然瞻仰圣德亿兆羣生不胜幸甚取进止

乞体量京西陕西灾伤劄子【嘉佑八年九月十二日上】

臣窃闻京西陕西两路自夏末以来殊少雨泽秋田丰稔者所收不过五分枯旱之处所得尤薄而官司或务为聚敛民有诉旱者不肯受接道路嗷嗷颇多怨讟已有流移就食他方者况此两路昨来供应山陵百姓最为劳苦朝廷尤宜优恤伏望特降诏旨下两路体量应有灾伤之处倍加存抚寬其租税敢有抑塞旱状不为收接者严加谴责庶使困穷之民有所赴诉取进止

言赵滋劄子【嘉佑八年九月二十三日上】

臣累曾上言赵滋刚愎狂妄不可管军及守边必将败事近闻朝廷益加宠任令再知雄州臣愚瞽之言诚不足采然窃闻曩时本路都转运使唐介安抚使彭思永皆曾言滋罪状今朝廷使之再任彼二人者必不肯同心協力以利公家但更相违戾窥伺得失虽容貌语言外相包容其中心岂能坦然全无猜忌是朝廷激之使交鬬也若监司将帅互相猜恶而欲使之安下民扞外敌臣窃以为难矣伏望朝廷念河北一路系国家安危察滋所为皆夸诞不实授滋别路一闲慢差遣使上下之情各获自安不唯边境保无他虑亦滋一身之福也取进止

言赵滋第二劄子

臣先曾上言赵滋为人刚愎不可管军朝廷不以为信臣亦自恐闻听未审不敢复有所陈自後又闻滋对契丹使人礼貌骄傲不遵旧式近者又闻本路帅臣奏滋任意行事恐致引惹窃以?德以前契丹未和亲之时戎车岁驾疆场日骇乘輿暴露於澶渊敌骑凭陵於齐郛两河之间暴骨如莽先帝深惟安危之大体得失之至计亲屈帝王之尊与之约为兄弟岁捐金帛以饵之聘问往来待以敌国之礼陛下承统一遵故约夫岂以此为不辱哉志存生民故也是以兵革不用百姓阜安垂六十年今契丹所以事中国之礼未有阙也为边臣者当训卒乘缮器械以戒不虞厚饗饬慎威仪以待使者内不失备外不失好以副朝廷之意而已今滋数乘客气以傲使人争小胜以挑强胡苟为夸大於目前以求一时之声名而不顾国家永久之患臣恐衅隙一开则朝廷未得高枕而卧也昔孙蒯毁鉞而曹卫构难鄆人沕营而鲁国丧邑涉佗援手而晋失诸侯女子争桑而吴师入郢故祸常起於细微而事或生於所忽凡二国所以相交之道不可以不慎也雄州当虏之冲平居则行李之所往来有事则戎马之所出入典州之将不可不精择其人滋稟性狂狠恐不可久置於彼乞落军职徙之内地母使边将相效为国生事实天下幸甚取进止

乞撤去福寧殿前尼女劄子【嘉佑八年九月二十九日上寻得旨依】

臣窃见大行皇帝梓宫在福寧殿自啓敢以来每日装饰尼女置於殿前傅以粉黛衣之绮绣状如俳優又类戏剧臣不知其说果何谓也羣臣见者无不骇异或叹其失礼或默有讥诮黷嫚威神莫甚於此殆非所以裨助丧容观示万方伏望圣慈速令撤去孔子曰葬之以礼此孝之大也臣愿陛下因此特降圣旨下有司应将来灵驾进发以至丧事凡仪仗送终之物有鄙俚无稽不合礼典如此类者悉宜撤去无使四方之人有所观笑取进止

言遣奠劄子

臣闻礼为人後者为之子也孔子曰人未有自致者也必也亲丧乎又曰丧事不敢不勉故天子即位之初天下所以瞻仰而归心者唯在执丧尽礼而已矣恭惟仁宗皇帝举天下而授之陛下明睿独断人莫能间父母能生陛下不能使陛下贵为天子富有四海至於万世子孙永膺天禄皆仁宗皇帝之厚德不可忘也今灵驾发引远就山陵天长地久永无还期痛毒惻怛无甚於此伏望陛下至日若圣体稍安行礼之际威仪容止动加矜慎擗踊哭泣过於哀毁以竭孝思之至报罔极之恩结四海之心耸万民之望盛德本基尽在於是不可以不严畏也此

虽圣明所自知然臣区区尚欲以尘露之微助山海之大庶几万一或有所益焉取进止

论後殿起居劄子

臣窃见国家从来以垂拱崇政为便殿乘輿每旦先御垂拱退御崇政是以侍从近臣已於垂拱起居者非有职事奏对更不复至崇政近岁以来乘輿间日一御垂拱有司不详事体本末遂令学士待制及两省官只赴垂拱不赴崇政起居近以山陵未毕乘輿不御垂拱将近旬月学士以下遂废起居之礼岂有名为侍从近臣而动踰旬月不得瞻望黼辰臣恐朝廷之仪由此相承寢益讹谬欲乞今後应乘輿不御前殿并令学士待制及两省官赴後殿起居或以为太烦即令两日一次起居取进止

论皇地祇劄子【嘉佑八年九月十九日上】

臣伏见今月十九日以大行皇帝諡号奏告天地宗庙社稷皇地祇止於圆丘望告臣闻王者父天母地其尊一也是故孝经曰事父孝故事天明事母孝故事地察今社稷之祀位为上公犹特遣官奏告而皇地祇寓於南郊下同膾食失尊卑之叙乖重轻之义考诸名体窃所未安欲乞今後凡祭告皇地祇并遣两府官一员诣北郊行事庶合礼意取进止

论虞祭劄子【嘉佑八年十一月三日上】

臣闻礼既葬而虞虞安也柩既藏矣孝子不忍一日离其亲恐精神彷徨无所依归故祭以安之也然则虞者孝子之事人主当亲其礼非臣下所得摄也臣窃见今月三日虞祭百官皆入就位而哭而陛下不亲其礼使宗正卿摄事臣窃惑之伏以永昭陵距京师犹五顿木主还未至之时不可一日不虞故使羣臣摄事今木主已达京师近在內殿而有司不根礼意尚如途中使羣臣行事於亲疏之序有所不称於哀恭之情有所未尽臣恐闻见之人不知有司之失而归责於陛下今未至卒哭尚有三虞欲望自来日以後陛下亲行其礼取进止

论虞祭第二劄子

臣昨日上言虞祭者孝子之事非臣下所能摄乞陛下亲行其礼陛下不以臣言为轻以为得礼已降圣旨依臣所奏今日礼仪既具百官在庭而陛下不出复使宗正卿摄事在列之臣无不愕然自失且昨日有司不为陛下设亲祭之礼犹可谓之有司之失若今日之事则咎将谁归此皆由臣蠢愚以彰陛下之过臣之罪重惟陛下裁之臣闻易曰不远复无祇悔元吉孔子曰过而不改是谓过矣伏望陛下来日虽圣体小有不康亦当勉强亲行其礼以解中外之惑取进止

传家集卷二十八

卷二十九

钦定四库全书

传家集卷二十九 宋 司马光 撰章奏十二

言医官劄子【嘉佑八年九月一日上】

臣伏见旧医官宋安道等四人昨以侍先帝医药无状降授诸州散官寻以陛下圣体不安大臣忧恐权留安道等诊候御脉今已百有余日陛下圣体终未平复安道等方术无验较然可知而其人皆得罪於先帝臣谓陛下不宜赦其罪戾留在京师并乞发遣令赴贬所僧志缘本不晓医但以妖妄惑人於江浙【别本作淮】之间称是诊人六脉能知灾福今亦出入禁庭叨忝章服察其疗疾实无所益伏乞夺去紫衣放归本州凡用医之道在谨择其人而专任之然後良工得尽其术而功效可见今闻诊御脉者常以十数工拙相杂是非混殽发言进药更相倚伏前跋後蹇左瞻右顾虽有俞扁之术将安所施於是强者自专弱者附会雷同比周共为诬罔不顾圣体但为身谋俱云脉气平和脏腑无疾然而旁侧衆人窃观形证岂得为安寧复旧如医官所言哉日月愈深根柢益固四海忧畏焦心坠胆臣愚伏望陛下思一身之安危系羣生之祸福深自重惜不可因循博访京邑四方通医术者精择一人使之专诊御脉听用其言服食其药若旬月之间全无应效则斥去不用别更择人如此必遇良医痊愈有日臣不胜区区伏望圣慈少加采察天下幸甚取进止

言医官第二劄子

臣先曾上言以医官宋安道等诊候御脉日久方术无验乞行降黜别择良医使专其事考其功效以行赏罚自後寂然不闻朝廷施行臣以为圣体已安不复敢言今覩陛下不亲虞祭乃知疾疢殊未痊平臣子之心何以自安臣窃闻宋安道等每奏皇太后及语大臣皆云陛下六脉平和体中无疾今乃疾状如此安道等不惟方术无效论其面谩之罪亦宜诛殛矣且安道等侍先帝疾至於今日而犹免於贬窜宜其无所惩戒不肯尽心也臣不知朝廷何意再三惜此数夫不为国家正赏罚之法快天下之志也夫以四海之广舍此数人之外岂无良医患在上之人不求求而不得得而不使使而不专故也臣闻擢者朝廷选医官数人皆委近臣试以难经素问考其通粗取合格者以为侍医亦有不试而使与安道等杂处共事者夫良医由性识敏達以平生所治之人考其得失探其精粹得之於心未必皆读古书也亦犹诵诗书者岂尽能治民读孙吴者岂尽能行兵今以难经素问试之是徒得记诵之人未尝得医人也安道等久在医局专利忌前交结贵近更相党庇使外方新进医人与之共处岂敢展其胸臆施其方术哉是以一概混同而久不见功也今若精择一人使之专诊御脉旬月之间考其应验有功则加以重赏无功则俟以严刑则术精者得尽其力术疎者不敢滥进矣臣又闻病人能自知其病者未甚病也憎良药而不受者病在内拒之也今窃闻陛下不安如此而常自谓无疾

则病已深矣医有良药而陛下不服则已为病所拒矣若陛下不早觉悟而更求名医强进良药纵陛下不自惜奈宗庙社稷何此臣所以痛心疾首前有鼎镬而不敢避者也伏望陛下察臣两次所奏罢黜医人有罪无功者召募四方名医委大臣精选一人使之专诊御脉听用其言服食其药以旬月之期察其能否如前所云以保养圣神为天下生民之福取进止

言张茂则劄子【嘉佑八年十一月七日上】

臣等窃闻祖宗旧制内臣年未五十不得充内侍省押班近除张茂则年方四十八今陛下践阼之初尤宜谨守祖宗法度以御左右之臣示天下至公若茂则果有才干可用虽更留此阙二年俟其年至然後授之又何晚也臣恐茂则一开此例则内臣攀援求进者多画一之法从此隳坏人人相效不可禁止不若正之於事初也臣等区区所为国家重惜在此而已取进止

乞放宫人劄子【嘉佑八年十一月十七日上】

臣伏见前代帝王升遐之後後宫下陈者皆放之出宫还其亲戚所以遂物情重人世省浮费远嫌疑也窃惟先帝恭俭寡欲清约执礼後宫侍左右承宠渥者至少而飨国日久岁增月积掖庭之间冗食颇衆陛下以哀恤之初未忍散遣今山陵祔庙大礼俱毕臣愚谓宜举前代故事应先帝後宫非御幸有子及位号稍贵并职掌文书之人其余皆给与粧奁放散出外各令归其亲戚或使任便适人书之史册亦圣朝一美事也取进止

上皇太后疏【嘉佑八年十一月二十六日上】

月日具位臣光谨再拜上疏皇太后殿下臣闻圣人之德使四海之外编户之民皆辐凑而归之如孝子之奉父母其故何哉推仁爱惻怛之诚以加之也故诗云恺悌君子民之父母夫四海至远也编户至微也诚之至也犹可以为之父母况闺门之内血气之亲乎昔汉明德马皇后无子明帝使养贾贵人之子烜以为太子且谓之曰人不必自生子但患爱养不至耳后於是尽心抚育劳悴过於所生及明帝崩太子即位是为章帝章帝亦孝性淳笃恩性天至母子慈爱始终无纖介之间前史载之以为美谈恭惟仁宗皇帝忧继嗣之不立念宗庙之至重以皇帝仁孝聪明选擢於宗室之中使承大统不幸践阼数日遽婴疾疹虽殿下抚视之慈无所不至然医工不精药石未效窃闻晷日疾势稍增举措言语不能自择左右之人一一上闻致殿下以此之故不能堪忍两宫之间微相责望羣心忧骇不寒而栗方今仁宗皇帝新弃四海皇帝久疾未平天下之势危於累卵惟恃两宫和睦以自安如天覆而地载也岂可效常人家争语言细故使有毫之隙以为宗庙社稷之忧哉臣是用日夜焦心陨涕侧足累息宁前死而尽言不敢幸生而塞嘿也伏以皇帝内则仁宗同堂兄之子外则殿下之外甥壻自童幼之岁殿下鞠育於宫中天下至亲何以过此又仁宗立以为皇子殿下岂可不以仁宗之故特加爱念包容其过失耶况皇帝在藩邸之时以至践阼之初孝谨温仁动由礼法此殿下所亲见而明知也苟非疾疹乱其本性安得有此过失哉夫心者神明之主也若其有疾则精爽迷乱冥然无知言语动作不自省记不识亲疎不择贵贱此乃有疾者之常不足怪也殿下聪明叡智天下之理无所不通岂可责有疾之人以无疾之礼邪今殿下虽日夕忧劳徒自困苦终何

所益以臣愚见莫若精择医工一二人以治皇帝之疾旬月之间察其进退有效则加之以重赏无效则威之以严刑未愈之间但宜深戒左右谨於侍卫其举措语言有不合常度者皆不得以闻庶几不增殿下之忧愤殿下惟寛释圣虑和神养气以安靖国家纲纪海内俟天地垂佑圣躬痊复然後举治平之业以授之不亦美乎古之慈母有不孝之子犹能以至诚惻隐抚养爱养使之内愧知非革心为善况皇帝至孝之性稟之於天一旦疾愈清明复初其所以报答盛德岂云细哉臣之愚虑苦言尽此而已乞殿下更赐裁择臣光昧死再拜上疏

上皇帝疏【嘉佑八年十一月二十六日上】

月日具位臣光昧死再拜上疏皇帝陛下臣先於四月二十七日及六月二十二日皆曾上疏以陛下受仁宗皇帝之天下欲报之德当奉事皇太后孝谨抚诸公主慈爱勿使奸邪之人有所离间致两宫有隙以上贻宗庙之忧下为羣生之祸叩心沥胆极其恳惻未审臣言得達圣听或万几之繁未尝奏御也此乃成败之端安危之本不可不察臣闻汉章帝乃贾贵人之子明帝使明德马皇后母养之后尽心抚育劳瘁过於所生章帝亦孝性淳笃恩性天至母子慈爱始终无纖介之间马氏三舅皆为卿校列侯贾贵人终不加尊号贾氏亲族无受宠荣者此前世美事今日所当法也诗云父兮生我母兮鞠我拊我畜我长我育我顾我复我出入腹我欲报之德昊天罔极然则父母之恩不独以其生已也拊畜长育居其大半焉陛下自髫髻之年为皇太后所鞠育恩亦至矣又况今日为仁宗皇帝之嗣承四海之大业乎臣谓陛下宜夙兴夜寐昏定晨省亲奉甘旨承顺顔色无异於事濮王与夫人之时也近者道路之言颇异於是纷纷籍籍深可骇愕臣窃惟陛下孝恭之性着於平昔岂容一旦遽肯变更盖羣圣体未安之时举动语言或有差失不能自省而外人讹传妄为增饰必无事实虽然此等议论岂可使天下闻之也周书曰小人怨汝詈汝则皇自钦德古人有言曰御寒莫如重裘弭谤莫如自修陛下疾疹未平固无如之何若既愈之後臣愚伏望陛下亲诣皇太后合克已自责以谢前失温恭朝夕侍养左右先意承志动无违礼使大孝之美纯粹光显过於未登大位之时如此则上下咸悦宗社永安今日道路妄传之言何能为损也古之至孝者虽有不慈之母犹能使之感悟欢悦回心易虑况皇太后圣善之德着闻四方自陛下有疾以来日夜泣涕禱於神祇忧劳困悴以冀陛下之安宁如耕者之望收涉者之求济陛下岂不思有以慰安之也臣不胜区区干冒以闻乞留神采择臣光昧死再拜上疏

乞开讲筵劄子【嘉佑八年十一月二十七日上有旨使开讲】

臣伏覩讲筵所告报依乾兴年故事讲论语读史记续奉圣旨直候来春臣闻传说曰王人求多闻时惟建事学於古训乃有获又曰念终始典于学厥德修罔觉然则学者帝王之首务不可忽也况今陛下初临大宝所宜朝夕延访羣臣讲求先王之至道览观前世之成败以辅益圣德缉熙大化不可但循近例以寒暑为辞如此使下情何以上通四方何以观望殆非所以广聪明宣令名也伏乞依前降圣旨择日开讲筵取进止

言程戡劄子【嘉佑八年十月三十日上】

臣伏觀制書宣徽南院使鄜延路經略安撫使程戡加安武軍節度使令再任臣聞官以待賢才賞以勳有功官非其人則職事廢缺賞不當功則羣臣解體程戡素無才術少壯之時歷職中外猶無名迹為人所稱況今老病昏懦尤甚在鄜延苟且偷安以度日月為吏兵所慢戎狄所輕臣謂朝廷當因其歲滿授以冗秩別擇能臣以代其任今乃寵以節鉞使居旧任外廷聞者無不駭愕臣竊以兩府之外官尊祿厚無若節度使者羣臣非有大功豈可輕授臣不知程戡在鄜延曾有何功遽授此官萬一臣有能立大功者朝廷當復以何官處之況陛下踐阼之初四方之人拭目傾耳觀听朝廷之賞刑以占聖政而戡首蒙濫賞臣竊為陛下惜之伏望聖慈追還前命別選賢才使守鄜延庶合中外之望取進止

言程戡第二劄子

臣近曾上言鄜延路經畧使程戡建節再任不合衆望乞追還前命事至今不聞施行臣竊以方今國家外患唯在西北二寇所以扞禦二寇唯在諸路經略安撫使居此任者豈可不精擇其人程戡在鄜延自以衰老畏人指目專務姑息取媚羣小僚屬軍伍尚無稟畏況於外夷固所輕侮比年以來趙諒祚數違旧制易姓建官妄有邀求不遵朝命戡不能式遏而容納其使事之可否盡諉於朝廷則御侮之臣將何所用事君不忠孰甚於此臣愚以為凡御羣臣之道若居官稱職衆所不及則當使之再任若立功立事為人所知則當加之品秩今語其稱職則軍政不修語其立功則戎狄驕慢而朝廷寵命益優委任益厚臣恐將帥之臣宣力者無所勸而懷奸者得其志如此而望疆場安寧四夷賓服臣竊以為難矣所有程戡新受恩命伏乞蚤賜追還取進止

言後宮等級劄子【嘉佑八年十二月二日上】

臣聞王化之興始於閨門故易基乾坤詩首關雎前世皆擇良家子以充後宮位号等級各有員數祖宗之時猶有公卿大夫之女在宮掖者其始入宮皆須年十二三以下醫工診視防禁甚嚴近歲以來頗隳旧制內中下陳之人竟置私身等級寢多無復限極監勒牙人使之雇買前後相繼無時暫絕致有軍營井市下俚婦女雜處其間不可辨識此等置之宮掖豈得為便臣嘗念此不勝憤惋今陛下即位之初百度惟新嫔嬙之官皆闕而未備臣謂宜當此之時定立制度依約古禮使後宮之人共為几等等有几人若未足之時且虛其員數既足之後不可更增凡初入宮皆須幼年未適人者若求乳母亦須選擇良家性行和謹者方得入宮傳之子孙為萬世法此誠治亂之本禍福之原不可以為細事而忽之取進止

傳家集卷二十九

卷三十

钦定四库全书

传家集卷三十 宋 司马光 撰章奏十三

乞延访羣臣上殿劄子【嘉佑八年十二月十五日上】

臣闻天尊地卑道之常也而周易乾下坤上谓之泰者盖言人君降心以接臣人臣竭忠以事君然後上下交而其志同也若人君骄亢以自专人臣怠慢以自疎则上下之情不通而否道成焉是以孔子语舜之德曰舜好问而好察迩言其斯以为舜乎窃见祖宗之时闲居无事常召侍从近臣与之从容讲论万事至於文武朝士使臣选人凡得进见者往往召之使前亲加访问委曲详悉无所不至所以然者一则欲使下情上通无所壅蔽二则欲知其人能否才器所任是以黜陟取舍皆得其宜太平之业由此而致恭惟陛下潜德藩邸踰三十年一旦龙飞奄有四海虽圣质英睿得于天纵然与当世士大夫未甚相接民间情伪未甚尽知臣谓宜诏侍从近臣每日轮一员直资善堂夜则宿於崇文院以备非时宣召若有事故请假则与以次官互换直宿其余羣臣进见及奏事者亦望圣慈稍解严重细加访问以开广聪明裨益大政取进止

乞延访羣臣第二劄子

臣先曾上言乞诏侍从近臣每日轮一员直资善堂夜则宿於崇文院以备非时宣召若有事故请假则与以次官互换直宿以开广聪明裨益大政至今未闻施行盖陛下谦谨以皇太后同听庶政未奉慈旨不敢擅召羣臣与之议论今皇太后尽以四海之事归於陛下出入起居颐指如意臣是敢重申前说乞少加采择凡人墙之外目不见也里之前耳不闻也而天子奄有四海一日万几民之忧乐事之本末虽有聪明叡智之性若不问之於人何从知之是以太祖太宗虽起於侧微犹日孜孜访问羣下至於小臣卒伍亦无所间絶故能纪纲四方创业垂统陛下生为帝王子孙未尝历试於外天下之事岂能细知况先朝置直学士待制等职以为侍从之臣若使之不得朝夕在左右备顾问将安用之所有每夜於崇文院轮宿自是旧制近年以来因循隳废举而行之有何所难伏望圣慈检会臣前来所奏劄子内事节特赐施行取进止

乞延访羣臣第三劄子

臣前者两次上言乞诏侍从近臣每日轮一员直资善堂夜则宿於崇文院以备非时宣召若有事故请假则与以次官互换直宿亦曾面奉德音云欲自以圣意宣谕政府施行此事自後至今未闻施行臣不避烦渎天听再三进言者盖以为国之要在於审察人材周知下情而已

审察人材之谓明周知下情之谓聪明则百官称其职聪则万几当其理百官称其职万几当其理治之极也贤不肖混殽之谓昏下情不上通之谓蔽昏则百职隳旷蔽则万几乖戾百职隳旷万几乖戾乱之至也治极则安乱至则危故聪明昏蔽者治乱之大本也今陛下即政之初厉精求治而不以此事为先欲以兴隆祖业垂裕後昆是犹却行而求及前人也故臣不得不勤勤恳恳为陛下再三言之书称尧之德曰稽於衆舍己从人称舜之德曰宾於四门明四目達四聪故能咸熙庶绩格于上下至今言圣人者无不以二帝为首何哉聪明故也秦二世纳赵高之谋恐遣举不当见短於大臣而深拱禁中汉灵帝惑赵忠之言谓人君登高则百姓散离而不敢登台榭北齐後主志度偷懦不喜见朝士非私昵未尝交语隋炀帝沈湎淫佚常在後宫盗贼满天下恐人言之是以上下怨叛至於杀身灭国而终不自知後世言无道者无不以四君为首何哉昏蔽故也太祖太宗起於側微天下艰难民间情伪无不备知然南面之日延访羣臣惟恐不及昼日不足继之以夜下至役夫田妇无不询察以尽其情用能创业垂统力致太平陛下以帝王子孙生长富贵朝士大夫素未相接耕织劳苦不经耳目当兹亲政之始虽孜孜下问朝夕不倦以察人情犹恐不尽况深居九重非视朝之时不见羣臣羣臣非官位职事有例上殿无由进见顯印渊默以严重自居将使幽远之民銜冤失职者何由上闻疏贱之臣怀材蕴德者何由自达哉国家安危之所分将於此乎在臣是以不胜愤懣区区尽忠重为陛下陈之伏望陛下察为国之要观唐虞之所以兴秦汉齐隋之所以亡继祖宗之志以守太平之业检会臣前来所奏两劄子内事节早赐施行实天下幸甚取进止

乞延访羣臣第四劄子【治平元年八月七日上】

臣屡曾上言乞诏侍从之臣每日轮一员直资善堂夜则宿於崇文院以备非时宣召亦曾面奉德音云候秋凉当频有宣召今已秋凉尚未闻有曾被召之人臣始者上言之时窃见陛下欣然开纳将谓即时施行自後迁延日久圣意渐以为难臣窃意内外之臣必有欺惑天听沮难此事欲陛下常居禁中不与羣下相接以壅蔽聪明专固权宠者此岂忠臣之所为而陛下之福邪臣愿陛下深察此情断自圣志使之更直陛下每日听政余暇宫中无事之时特赐召对与之从容讲论古今治体民间情伪使各竭其胸臆所有而陛下更加采择是者取之非者舍之忠者进之邪者黜之如此则下情尽達圣德日新矣若以资善堂体例稍生则学士待制於崇文院轮宿自有旧条只乞陛下传宣崇文院今後直宿者并须从早在彼祇候宣召其有事故请假者须与以次官互换直宿此事极不难行而所益甚大惟陛下留意取进止

言奉养上殿劄子【嘉佑八年十二月上】

臣窃闻近日陛下圣体甚安奉事皇太后昏定晨省未尝废阙非独羣臣百姓之福乃宗庙社稷之福也陛下既为仁宗皇帝之後皇太后即陛下之母今濮王既没陛下平生孝养未尽之心不施之於皇太后将何所用哉臣闻君子受人一饭之恩犹不忍负之必思报答况皇太后有莫大之德三陛下岂可斯须忘之先帝立陛下为嗣皇太后有居中之助一也及先帝晏驾之夜皇太后决定大策迎立圣明二也陛下践阼数日而得疾不省人事中外衆心惶惑失措皇太后为陛下摄理万几镇安中外以俟痊愈三也有此一德者则陛下子子孙孙报之不尽况兼三德而有之陛下所以奉养之礼若有丝毫不备四海之人其谓陛下为如何天地鬼神

其谓陛下为如何此不可以不留圣心也今陛下已能奉养如礼而臣复区区进言者诚欲陛下戒之慎之始终无倦外尽其恭内尽其爱使孝德日新令闻四達以叶天下之望保万世之祿而已若万一有无识小人以细末之事离间陛下母子不顾国家倾覆之忧而欲自营一身之利者愿陛下付之有司明正其罪使天下晓然皆知陛下圣明仁孝不负大恩而谗佞不能间也取进止

言奉养上殿第二劄子

臣累曾上言乞陛下加意奉养躬亲万几言辞拙讷未蒙采纳臣窃惟当今切务无大於是是敢不避斧钺重有敷陈至於奉亲之礼报德之义为君之职访善之道臣曩来文字叙述已详不敢复烦圣听独以目前利害言之陛下试详择焉窃以皇太后母也陛下子也皇太后母仪天下已三十年陛下新自藩邸入承大统若万一两宫有隙陛下以为谁逆谁顺谁得谁失又仁宗皇帝恩德在民藏於骨髓陛下受其大业而无以报之则何以慰天下之望若陛下上失皇太后之爱下失百姓之望则虽有大宝之位将何以自安凡人主所以保国家者以有威福之柄也故民畏之如神明爱之如父母今陛下即位将近朞年而朝廷政事除拜赏罚一切委之大臣未尝询访事之本末察其是非有所与夺臣恐上下之人习以为常威福之柄寢有所移则虽有四海之业将何以自固位则不安业则不固於陛下果何所利乎陛下必以为事皇太后之礼止如是亦不失矣亲万几之务止如是亦无阙矣臣窃以为不可臣闻陛下昔在藩邸事濮王承顺顏色备尽孝道凡宫中之事濮王皆委陛下干之无不平允陛下事皇太后当一如濮王然後可視天下之政当一如宫中之事然後可況濮王之亲以恩皇太后之亲以义其奉养之谨非特有所加则无以取信也宫中之事小天下之事大其听断之勤非特有所加则无以致治也倘奉养极其谨听断极其勤则陛下仁孝之名流於万世英叡之德達於四表宗庙永安子孙蒙福於陛下有何所害而久不肯为哉凡此利害之明有如白黑取舍之易有如反掌陛下今日回意易虑犹未为晚若固守所见终无变更臣恐日月寢久衅隙愈深不可复合威权已去不可复收後虽悔之亦无及已臣受国家累世大恩不敢爱死为陛下极陈社稷之计肝胆所蓄尽此而已伏望陛下少留意察之取进止

言奉养上殿第三劄子

臣近以私恳求乡便一州伏蒙圣恩令宰臣宣谕以臣曩所言事略皆施行令臣且在谏院供职未得求出臣以弩下之质生於盛明之世得备谏官为幸已大况陛下谦恭接下容受直言此乃愚臣千载一遇毕命报国之秋岂愿离去左右自弃於疎远之地诚以父母坟墓久不展省人子之心遑遑不安所以有此陈乞今忽奉圣旨宣谕如此臣惶恐慙懣无地自容夙夜循省进退维谷臣窃惟曩时所言欲陛下以事濮王之礼事皇太后又欲陛下延访羣臣躬亲政事今陛下虽奉事皇太后加於往日犹未及事濮王之时承顏顺意曲尽欢心也虽省览庶政犹未尝访问羣臣讲治乱之切务也陛下若以二者为止当如此则两宫之意无由和洽万几之务无由治办祸乱之原尚在太平之期尚远臣虽日侍丹扆有何所益陛下若奉养之礼日增月益访求治道勤劳不倦使慈母欢欣於上百姓安乐於下则臣虽在远方亦犹在陛下之侧也臣闻为人子者事其亲而亲不悦不敢怨也退而自责曰我之爱不至欵爱至矣而犹不

悦则曰我之礼不恭欤礼恭矣而犹不悦则曰我之诚不尽欤诚既尽矣则大孝之名達於四海通於神明神明且犹助之而况人乎臣又闻为人君者视天下有一事不治以为已过有一民失所以为已忧天下已安已治矣犹复思将来之患而豫防之天下未尝无事也在人君思与不思而已矣思之则治安不思则乱危陛下傥能以此二者自勉则臣安敢废公家之急而徇私家之务乎取进止

言奉养上殿第四劄子

臣伏见陛下躋者即位之初奉事皇太后?恭欵至皇太后抚爱陛下恩渥周备数日之间慈孝之誉達于中外播於远近闻者无不相庆自圣体不安旬月之间道路之人渐有异议皆云因任守忠等本不乐陛下为嗣故於皇太后之处则言陛下与中宫之短於陛下与中宫之处则言皇太后之失遂使两宫之心互相猜贰间隙一开猝难复合今陛下奋发英断屏黜谗邪守忠等皆降逐出外中外之人不胜忭悦然臣愚窃恐皇太后尚未能尽知奸人之情与陛下所以斥去之意伏望陛下与中宫亲诣皇太后合顿首陈谢具述从来为守忠等所误致屡有违忤皇太后之意今守忠等既去愿与皇太后母子之恩一如旧日然後朝夕与中宫侍养左右膳羞药餌躬亲进献承顺顏色皆如臣庶之家母子妇姑之礼若左右之人尚有敢相离间者愿陛下立行诛窜勿复有疑如此则谗慝黜远内外雍睦善气兴行灾沴消亡宗庙永安令闻长世若失此之际两宫之欢不能复旧则恐长无可复之期岂惟当今天下之人以陛下为非将传於史策取讥万世矣此皆圣明所自知而臣复区区进言者欲陛下深更留意取进止

言永昭陵建寺劄子【治平六年三月廿七日上】

臣窃闻近有圣旨於永昭陵侧别建一寺未知信否果如此窃恐不可何则宣祖太祖太宗三陵共有一寺若独於真宗仁宗各置一寺则是尊奉之礼踰於祖宗岂特於体理不顺为朝廷阙失亦是违先帝之孝心也议者或谓三陵共在一处永定永昭相去稍远以此须别建一寺凡臣僚之家无人守坟乃於坟侧置寺啗以微利使之守护种植而已至於国家守卫山陵有司备具置寺之处何较近远若云资荐求福则死生之际人不能知释氏所言虚实难验使亡者冥然无知则资荐之事有何所益果然有知如释氏所言则仁宗皇帝寬慈恭俭好生恶杀恩浹四海泽被万物岂待别置一寺更度僧然後得生天堂乐处也且仁宗皇帝晚年诏天下无名额寺屋及百间者并特与名额计创添寺额千有余处据此功德宜享壽考无疆之福而数月之间宫车晏驾以此验之佛不能为人之福岂不显然此皆皇太后与陛下所亲见也今自国丧之後支給赏赐供奉山陵帑藏空虚赋役烦多百姓罢弊京西去秋不稔春复少雨正是朝廷宵衣旰食存恤之时乃复兴此无名之役不急之费诚非中外所望也若万一有益於先帝羣臣岂敢爱惜今逆礼伤孝蠹财劳人但使僧徒监修之人因此为名妄求恩泽以广徼幸之路臣窃为朝廷不取也伏望陛下与皇太后深思当今切务汲汲於富国安民息此无益之事以副天下之望其永昭陵寺只乞依前来指挥更不别置取进止

乞车驾早出祈雨劄子【治平元年四月十七日上】

臣伏见权御史中丞王畴等建言乞陛下循真宗故事幸诸寺观祈雨朝廷虽从其所请而讲议选日已踰旬浹至今车驾未出衆论狐疑皆云事恐中辍臣愚窃以陛下践阼已踰朞年京城百姓未闻属车之音重以歳者圣体不安远方之人妄造事端讹言未息若闻车驾一出则远近释然莫不喜悦况今春少雨麦田枯旱禾种未入仓廩虚竭闾里饥愁陛下为民父母当与之同其忧劳祈祷羣神岂可晏然视之不以疚怀况诏命已降流闻四方若复迁延久而不出则道路之人愈增猜惑不若歳时初无此议也且王者以四海为家故称乘輿或称行在今车驾暂出近在京城之内亦何必拘瞽史之言选拣时日而忘万民朝夕之急殆非成汤桑林周宣云汉之意也臣愚伏望陛下断自圣志於一两日之间车驾早出为民祈雨以副中外喁喁之望取进止乞今後有犯恶逆不令长官自劾劄子【治平元年四月二十四日上】

臣窃以国家承百王之弊俗化陵夷不肖愚民犯谊侵礼无所不至此朝廷所宜留意不可忽也昔贾谊叹秦俗之薄恶以为借父耰鉏虐有德色母取箕帚立而谇语抱哺其子与公并偃妇姑不相说则反唇而相稽以今闾巷之民旦夕所为如彼数者皆何足言近闻开封府屡有子杀父母者相继事发以京邑之中犹有如此悖逆之民况於远方教化之所不及哉臣窃见刑部格勅百姓间有犯恶逆以上者州县长官量事贬降隐而不言委录事参军纠察闻奏刑统参详条部内有犯恶逆以上罪者今後刺史以上附表自劾以敦风教责与不责并听勅裁朝廷近年务行寛政更有故出人罪者率皆不问或小有失入则终身废弃以此民有谋杀及殴詈尊长者州县之吏专务掩蔽纵释惟恐上闻往往止从杖罪断遣少肯处以正法盖避自劾之耻务为身谋遂使顽民益无顾惮名敦风教其实坏之王者之政当善善恶恶若寛此悖逆之民以为仁政臣实愚浅未之前闻况教化之失风俗之弊任其责者岂特州县长吏而已若长吏隐而不言乃使录事参军纠察闻奏斯亦难矣臣愚伏望朝廷今後除去上件贬降长吏及附表自劬二条更不施行在京则委纠察刑狱畿内则委府界提点在外则委转运使提点刑狱常切觉察州县官吏如有敢将恶逆不孝不睦等罪寛纵隐蔽不依正法勘鞫断遣者并画时纠举闻奏随其轻重各以故出人罪论若上件诸司不纠举者委台諫官察访闻奏取进止

贡院定夺科場不用诗赋状【治平元年四月十四日上】

准中书送下天章阁待制判国子监吕公着劄子臣闻以言取人固未足以尽人之才今之科場格之以辞赋又不足以观言国家承平日久文物至盛学者莫不欲宗经向道至於浮华博习有不得已而为之者先帝察取士之弊尝集近臣之论形於诏文则曰本学校以教之然後可以求其行先策论则辨理者得尽其说简程式则闕博者颇见其才虽丁寧申谕而有司不能奉行窃闻昨来南省考校始专用论策升黜议者颇以为当臣犹恐四方疎远未知所尚有司各持所见则人无适从欲乞今来科場更不用诗赋如未欲遽罢即乞令第一場试论第二場试策第三場试诗赋每遇廷试亦以论压诗赋为先後升降之法庶成先帝之志永底人文之盛臣谬司学政盍进輿言如允所奏即乞预行告示令本院定夺闻奏者当院看详近世取人专用诗赋其为弊法有识共知今来吕公着欲乞科場不用诗赋委得允当然进士只试论策又似太简欲乞今後省试除论策外更试周易尚书毛诗周礼仪礼春秋论语大义共十道为一場其策只问时务所有进士帖经墨义一場从来不曾考校显是虚设乞今更不试御前

除试论外更试时务策一道如此则举人皆习经术不尚浮华若是依旧不罢诗赋之时即先试後试事归一体别无损益今若罢去诗赋仍乞依吕公着起请预行告示使天下学者早得闻知

传家集卷三十

卷三十一

<集部,别集类,北宋建隆至靖康,传家集>

钦定四库全书

传家集卷三十一 宋 司马光 撰章奏十四

言爲治所先上殿劄子【治平元年五月十八日上】

臣伏觀皇太后手书已罢听政陛下钦承慈旨独断万几臣闻易曰君子以作事谋始又曰正其始万事理差之毫厘谬以千里陛下虽践阼朞年於国家大政犹多所谦抑虽时有处分皆常式小事非天下所以望於陛下者也曩时外间议者皆曰陛下圣体未安倦於听览及知圣体已安又曰陛下上畏皇太后之严欲尽人子之礼避专命之嫌韬蘊聪明未敢施設今皇太后举国家大柄尽付之陛下则议者无复可言唯拭目倾耳以瞻望圣政而已矣陛下当此之际治身治国举措云爲不可不慎昔杨朱见衢涂而泣谓其可以左可以右所差甚微所失甚大也人主即政之初亦荣辱安危之衢涂也故臣愿陛下留圣心焉臣闻治身莫先於孝治国莫先於公孔子曰孝德之本也又曰不爱其亲而爱他人者谓之悖德不敬其亲而敬他人者谓之悖礼未有根絶而叶茂源涸而流长者也仁宗皇帝以四海大业授之陛下其恩德之大天地不足以爲比今登遐之後骨肉至亲独有皇太后与公主数人陛下所当日夜尽心竭力供承抚养以副仁宗皇帝之意曩者皇太后听政之时左右侍卫之人不敢不恪求须之物无敢不备既委去政柄臣窃虑有无识小人随势倾移侍奉懈怠供给有阙则天下之责皆归陛下此不可不留意朝夕省察者也又若有不逞之人於两宫之间刺探动静拾掇语言外如效忠内实求媚以相与构间者臣愿陛下逆拒其辞执付有司加之显戮诛一人则羣邪自退纳一言则百谗俱进此乃祸乱之机不可不深察也臣闻国事听於君家事听於亲臣愚以爲陛下在外朝之时刑赏黜陟之政当自以圣心决之至於禁庭之内取舍赐予事无大小不若皆禀於皇太后而後行陛下与中宫勿有所专如此则内外之体正尊卑之序明慈母懽忻於上臣民颂咏於下矣不然皇太后归政之後若侍卫之人稍有怠惰求须之物小失供拟加以谗邪妄兴离间万一有毫阙失流闻於外或皇太后忧思不乐内生疾疢则陛下何以胜此名於天下哉虽百善不能掩矣臣故曰治身莫先於孝也洪范於好恶偏党之际六反言之重之至也周任曰爲政者不赏私劳不罚私怨大学曰欲明明德於天下者必先正其心有所忿懣则不得其正有所好乐则不得其正陛下奋发宫邸入纂皇极爰自潜跃至於天飞旧恩宿怨岂能尽无然今日即政之初皆不可置於圣虑以害至正也凡人君之要道在於进贤退不肖赏善罚恶而已爵禄者天下之爵禄非以厚人君之所喜也刑罚者天下之刑罚非以快人君之所怒也是故古者爵人於朝与士共之刑人於市与衆弃之明不敢以已之私心盖天下之公议也今以四海之广百官之衆有贤有愚有善有恶比肩接迹杂遝并进臣愿陛下少留聪明详择其间苟有才德高茂合於人望者进之虽宿昔怨讎勿弃也有器识庸下无补於时者退

之虽亲昵姻娅勿取也有励行立功爲世所推者赏之虽意之所憎勿废也有怀奸犯禁爲衆所疾者罚之虽意之所爱勿赦也如此则野无遗贤朝无旷官爲善者劝爲恶者惧上下悦服朝廷大治百姓蒙福社稷永安不然陛下若专居深宫自暇自逸威福之柄尽委大臣取适目前不爲远虑贤愚不分善恶共贯否则所进者皆平生所亲爱所退者皆平生所不快所赏者皆谄谀而无功所罚者皆忠諒而无罪如此则中外解体纪纲隳紊羣生失所天下可忧矣臣故曰治国莫先於公也此二先者荣辱之大本安危之至要臣愿陛下审思而行之诗云亶亶文王令闻不已陛下诚能行此二者则盛德美誉滂沛洋溢近者传诵远者褒叹不过旬月之间徧於天下達於四夷後日之政如顺风吹毛乘高沃水可以不劳而成功矣取进止

论皇太后取索劄子【治平元年五月十九日上】

臣窃闻两府议定皇太后於诸处取索物色令本合使臣以皇太后旨申牒逐处有司再具牒子奏闻候见御宝即便供应臣熟思此一节事理恐未至稳便臣闻自来内中凡有所须止用御宝合同文字於诸司库务取索诸司库务即时供应过後方申三司覆奏及行磨勘今来皇太后有所取索若一一须待本合使臣申牒逐处再行覆奏候得御宝方敢供应臣愚窃虑行遣往复太爲迂回万一使者懈慢有司泥文皇太后缓急欲得药餌什器之类细小之物不能应时而至迁延经日有伤慈母之心则非陛下以四海奉养之意也事虽至微当此之际小有不足所系甚大礼王及后世子之膳不会盖优尊者不可限以多少之数故也臣愚欲望陛下再令两府大臣商量此事应皇太后所取物色并令本合使臣行文字与合同司一如陛下圣旨所取出御宝合同文字下诸司库务画时供应仍令合同司每日将本合使臣文字缴连实封别遣使臣进呈皇太后以防矫伪如此则尊卑之体正孝养之礼尽取进止

乞后族不推恩劄子【治平元年五月廿五日上】

臣窃闻陛下欲加曹佾使相皇太后再三不许又闻有圣旨令皇后本家分析亲的骨肉闻奏亦与推恩臣愚以爲皇太后既深执谦逊抑损外亲则后族亦恐未宜褒进伏望陛下宣谕两府后族恩泽并未可施行且俟佗时徐议其事一则示人子恭孝之心不敢使后族先於母党二则示人君即政之初不可以爵禄待贤之具独私椒房之亲其於圣德益有光荣取进止

上皇太后疏【治平元年五月廿八日上】

月日具位臣司马光谨昧死再拜上疏皇太后殿下去岁仁宗皇帝捐弃万方皇帝嗣统之初忧哀成疾殿下念社稷之重同听庶政以安羣情今圣体复初四方无事殿下推而不居自取安逸动静之节无不合宜率土臣民孰不称颂臣不自量度欲成殿下之全美犹以萤烛之微明仰裨日月之盛光伏惟殿下稍寬其罪而终听其辞臣窃以治家之道贵贱虽殊人情一也尝观天下士民之家其长幼羣居长者或恩意不备衣食不丰幼者或容貌不恭语言不逊若幼者孝恭而不怨长者慈惠而不责则上下雍睦家道以兴若幼者以爲怨长者以爲责则上下乖离家道以衰其始相失也甚微而终爲祸也甚大又加以谗人间之於是乎有父子相疑兄弟相疾乱虐并兴无所不至者矣凡闺门之内子妇中有以孝恭之心至者则尊亲当欢然

以慈爱之心接之若其有过则当以忠厚之心教之教之备矣而犹不听则虽责之可也罪之可也及其既改则又当复以欢心接之不可以一忤颜色而终身恶之遂不可解谢也故骨肉之间有威怒而无憎疾有诘责而无猜忌此自古圣人所以御其亲之道也臣窃惟皇帝皇后於殿下兼内外之亲幼蒙保育今日爲万民父母享天下富贵孰云非殿下之力臣谓殿下固宜抚存爱念情同所生周旋保护以终大惠不可偶以纖芥之失遂蓄久长之怒弃生成之厚恩取疎絶之深怨愚智所同知也皇帝去岁得疾之时礼貌言辞诚有可疑得罪於殿下者臣固已尝言於殿下云不可责有疾之人以无疾之礼也凡醉而有过醒犹可赦况有疾之人不自省知本非意之所欲爲岂可追数以爲罪咎邪皇后自童孺之岁朝暮游戏於殿下之怀分甘哺果拊循煦妪有恩无威今既正位中宫得复奉膳羞盥悅以事殿下其意恃昔日之爱不自疎外犹以童孺之心望於殿下故或有所求须不时满意则愠怼怨望不能尽如家人妇姑之礼殿下虽怒之责之固其宜也谁曰不可但事过之後殿下若遂弃之不复收恤憎疾如仇讎则臣以爲过矣臣在阙门之外无由知禁廷之事窃闻道路之言未详虚实皆言近日皇帝与皇后奉事殿下恭勤之礼甚加於往时而殿下遇之太严接之太简或时进见殿下虽赐之坐如待疎客语言相接不过数句须臾之间已复遣去如此母子之恩如何得達妇姑之礼如何得施所以使之疑惑恐惧不敢自亲者盖以此也臣窃惟殿下母仪天下踰三十年柔明之誉洽于中外皇帝龙潜藩邸进德修业仁圣之望光於远迩先帝以至公大义选贤建嗣海内之人皆谓继统之日慈孝之风必自家刑国诚不意闾巷之民忽有今兹异论推其本原盖由皇帝遇疾之际宫省之内必有谗邪之人造饰语言互相间构一则欲诈效小忠以结殿下之知徇求禄利二则自知过失素多畏嗣君之严有所不容三则欲窃弄权柄恶长君聪明使已不得自恣是以日夜闚覷拾掇丝毫之失无不纳於殿下之耳殿下虽至聰哲不能无疑虽至仁慈不能无怒皇帝以刚健之性屈於衆口无以自伸能不愤悒遂使两宫之间介然相失久而不解流闻于外致朝野之士有敢窃议其是非者深可惜也今天诱其衷殿下濬发慈旨卓然远览举天下之政归之皇帝此乃宗庙之灵生民之福然臣窃料谗邪之人心如沸汤愈不自安力谋离间彼皆自营一身之私非爲国家与殿下之计也臣愿殿下深察其情勿复听纳斥远其人勿置左右召谕皇帝以向来纷纷皆此属所爲自今以後母子之间当坦然无疑皇帝必涕泣拜伏感激摧谢然後两宫之欢一皆如旧凡皇帝皇后进见之际殿下宜赐以温顏留之从容来往无时勿加限絶或置酒语笑与之欣欣相待一如家人之礼如此则殿下坐享孝养何乐如之心平气和眉壽无疆国家乂安内外无患名誉光美垂於无穷与其信任谗慝猜防百端终日戚戚忧愤生疾国家不寧祸乱横生讥谤之言流於後世二者得失相去远矣且殿下既能以祖宗之业付皇帝又能以大政授之而独於恩礼之际终不能豁然回心息怒其故何哉方今宫闈之中殿下骨肉至亲止於皇帝皇后长公主及皇子公主数人而已其余皆行路之人於殿下何有若亲者尚不可结以恩信猜而远之则疎者独肯受殿下顾遇尽其死力终始无二乎夫贵莫贵於爲天子之母富莫富於受四海之养今殿下有此富贵而不能自乐亲其所可疎疎其所可亲使受恩之子妇彷徨而不自安蹢躅而不敢进虽内怀反哺之心而无以施展臣窃爲殿下惜之臣父子皆蒙先帝大恩擢於常调之中置之侍从之列心非木石岂能暂忘今先帝晏驾之後臣唯不避死亡以进忠直之言庶几殿下母子和悦国家安寧是臣所以爲报效也不胜区区激切之诚展布以闻惟留神幸察臣光昧死再拜上疏

言两府迁官劄子【治平元年閏五月四日上】

臣伏觀去歲陛下即位之初兩府臣僚已各遷官今茲甫及朞年一例又加恩命雖陛下褒優大臣務從豐厚而朝野竊議以爲近來國家官爵易得恩賞太頻柱石之臣當勦力同心共救此弊今若連年之內寵數便蕃恬然有之自以爲宜則何以率正佗人抑塞僥幸因此恐大失天下之望然則陛下愛之適所以傷之也臣竊料大臣亦不敢自安必當辭避願陛下因而听之以成其美取進止

言兩府遷官第二劄子

臣近曾上言兩府臣僚遷官太頻恐失天下之望乞陛下听其辭避以成其美未蒙採納臣非憎此數人嫉其遷官乃是欲全其令名使之輔佐陛下重惜大柄耳先帝親選聖明傳以天下今陛下乃欲歸功大臣臣固知其人必不敢當也借使當日實曾贊成先帝聖意乃是欲安宗廟社稷若今日受賞則是豫邀非常之福罪孰大焉然則陛下賞之是掩其盡忠之心使爲徇利之人何榮之有臣所謂欲全其令名者此也夫爵位者人主所以御羣臣之大柄也然品秩高下本皆虛名但以難得之故爲人所貴若其易得則爲人所賤譬如金玉珠玕若或道路階庭處處有之則與瓦礫無異矣近歲以來官冗賞濫兩府大臣豈不素知今遇陛下即政之初所宜開導聖聰以懲革斯弊今陛下以纂紹之際及聖體未安之時中外平寧爲兩府之功加以厚賞則宿衛將帥宗室外戚四方藩鎮內侍近臣皆有冀望若一一稱滿其意則國家官爵賤於泥土將無以役使羣臣若抑而不與則人不自知更生觖望是始於推恩而終於聚怨也且輔佐之臣自於朞年之間連并遷官而欲禁止佗人之幸進誠亦難矣臣所謂欲使之輔佐陛下重惜大柄者此也或者陛下以爲曹佾無功尚加之使相況輔弼大臣當國家艱難之際輸力盡瘁不可不賞臣愚以爲不然陛下所以賞曹佾者非以爲功也乃以皇太后之德至深至厚無以爲報故褒崇元舅以慰母心今若緣此推恩次及后族次及兩府次及佗人則是曹佾隨衆遷官不爲優異於皇太后之心何所慰哉然則陛下虛捐盛恩而衆人皆以大例遷官何足爲喜也臣豈不知陛下欲褒賞大臣而臣區區不量其力以橫議干之非身之利然爲朝廷忠謀無恤其佗惟陛下察之取進止

乞罷修感慈塔劄子【治平元年閏五月十五日上】

臣伏聞感慈塔已有聖旨坼修五層竊以開封府界京東京西河北河東陝西西川等路自去冬少雪今春少雨麥田已無所收昨得五月十三日雨方種秋田自後又經一月無雨萌芽始生隨復焦槁農民嗷嗷大率無食棄去鄉里流離道路顧妻賣子以接餓糧縣官倉廩素無蓄積贍給軍衆猶恐不足固無贏余可以賑貸陛下當此之際所宜側身刻意降服損膳以救其患而更修此佛塔以費國財臣竊以爲失緩急先後之務矣且此塔傾欹爲日已久借使更經數年不修於僧徒有何大害若百姓飢窮朝不及夕而國家不能收恤則老弱轉死溝壑壯者聚爲盜賊當是之時虽有千塔將安用之夫府庫之財皆生民膏血苟非事不得已安可輕費今有司既諂諛苟且曾不爲陛下愛惜陛下又不以介意一皆听之使四海蒼生將何所依仰臣愚欲望陛下親發德音宣諭有司以今歲旱災且罷修此塔及其餘不急之費有似此類者皆仰有司條奏以聞一切寢罷候佗年丰稔帑藏有余然後徐議其事於聖政之初亦足以彰愛民之意爲盛美之一事也取進止

乞罢近臣恩命上殿劄子

臣昨者上言近岁官冗赏滥两府大臣遇陛下即政之初宜开导圣聪以惩革斯弊今陛下以绍续之际及圣体未安之时中外平宁爲两府之功加以厚赏则宿卫将帅宗室外戚四方藩镇内侍近臣皆有冀望若一一称满其意则国家官爵贱如泥土将无以役使羣臣且辅佐之臣自於朞年之间连并迁官则难以禁止佗人之幸进伏蒙陛下面谕臣以两府大臣皆有大功所以迁官佗人无功何敢辄望臣再三敷奏以陛下若寢两府恩命则佗人自然不致侥求若见两府迁官则谁肯自谓无功不求荣进恐至时陛下亦不能裁抑两府亦不敢执奏当时陛下圣意确然终不开纳今两府才受恩命窃闻入内内侍省都都知任守忠等已一例迁官臣窃料向去其余臣僚互相形比继续迁官猝无穷尽盖官爵者人主之利器所以驱策羣臣制御四海今陛下曾不爱惜容易与人一至於此臣窃惜之凡政令之行必自贵近爲始前者滥恩已施之於贵臣不可复收若止之於近臣犹可救其大半所有任守忠等恩命伏望圣慈特赐追还以塞向去侥幸之路取进止

传家集卷三十一

卷三十二

钦定四库全书

传家集卷三十二 宋 司马光 撰章奏十五

陈治要上殿劄子【治平元年七月十八日上】

臣闻舜与皋陶赧歌相戒以明良爲美以丛脞爲非盖以王者奄有四海君临亿兆若事无巨细皆以身亲之则所得至寡所失至多矣古语有之曰察目睫者不能见百步察百步者亦不能见目睫非不欲兼之势不可也是以明王總其大体执其枢要精选贤能任以百职有功者赏有罪者诛故处躬不劳而收功甚大用此道也臣伏见陛下自亲政以来厉精求治孳孳不倦未明求衣日昃不食虽大禹之勤劳文王之懿恭无以过此然而政有本末事有细大举其纲则百目张挈其领则衆毛理臣愿陛下先其本後其末急其大缓其细择人而任之此政之本也赏善而罚恶此事之大也陛下当先察羣臣之邪正与其材能之所堪然後思天下有某事不治者当使某人治之其公忠勤恪功效显着者劝之以厚赏奸回惰慢无功败事者威之以严刑如是则万事无不举兆民无不安陛下可以高拱无爲而名配尧舜矣至於簿书之烦碎文法之微密钱穀之出纳体例之有无此乃羣臣百吏之所守非陛下所当留意也陛下若舍彼而取此则臣恐徒有大禹之勤劳而不获其功文王之懿恭而不见其治也臣以献替爲职遇陛下勤政之初虚心求谏此乃千载一时诚不敢以细末之事烦污聰明伏望陛下深思此道乃自古及今致治之大本勿以爲迂阔陈熟之言而忽之则天下幸甚取进止

言程戡施昌言劄子【治平元年七月二十八日上】

臣窃闻近者夏国屡起事端边境之变不可不备爲备之要在於择帅伏见鄜延路经略使程戡资性奸回泾原路经略使施昌言老病昏昧皆以斗筭罢懦之才当折冲御侮之任平居之时未见有阙一旦警急必败大事譬如开门揖盗以肉餒虎臣窃爲国家危之伏望朝廷早择智勇之将以代其任二人并除致仕以安边境之民戒偷禄之臣取进止

言任守忠劄子【治平元年七月十八日上】

臣窃闻入内内侍省都都知任守忠擅取奉宸库金珠数万两献遗中宫自以爲功仍受中宫赏赐外议籍籍无不骇愕伏以守忠从来罪恶极多不可遽数陛下体元继统圣政方新守忠曾无畏惮益恣巧谄公取官物自眩私恩赞导椒房首爲侈靡既求权宠又分厚利奸邪之臣无大於此伏望陛下特发神断以守忠付所司穷治所犯明正典刑以示天下取进止

言任守忠第二劄子

臣近曾上言任守忠奸邪事迹乞正典刑未闻施行臣案守忠怀奸罔上谄佞贪恡窃弄权柄固非一日专爲谗慝交构两宫狡诈反覆陛下所知若非先帝圣明皇太后仁慈则社稷可忧天位不安今又盗取库物曲求容媚教中宫爲不顺陷陛下爲不义此而不诛典刑安用据守忠罪恶臣久合奏陈但以陛下践阼之初天威未振欲望陛下亲发英断戮此大奸使内外之臣莫不震肃今圣恩容贷已及岁余外议皆言守忠以谄佞之故受陛下宠遇过於先帝之时臣备位谏官不敢塞默守忠职在宫禁久专威福若不早除恐别生事伏望陛下如臣前奏速以守忠付所司穷治所犯肆之市朝以副天下之望取进止

言任守忠第三劄子【次日守忠除保信军节度副使蕲州安置】

臣近者两次上言任守忠奸邪事迹乞正典刑至今未闻施行臣迫於忠恳不能自己窃见守忠早以小臣获事先帝幸蒙獎拔荣禄俱极日侍左右不能以忠言正道补益万分专以诌谐谄谀苟求悦媚其罪一也總领近侍委之差遣而陵忽同列与夺自恣附已则爱悦逆意则憎疾援引亲党排抑孤寒任情徇私略无顾避其罪二也从来所受俸禄赏赐亦爲不少而资性贪恡老而益甚盗窃官物受纳货赂金帛珍玩溢於私家第宅产业甲於京师聚敛之心曾无纪极其罪三也交结朋援专权据势纵逞胷臆妄行威福所爱者虽有大罪掩盖不言所恶者小有瑕疵纠擿成事使宫禁之内侧足屏息畏憚守忠无以爲比其罪四也濮王之薨守忠监护葬事卖弄国恩轻蔑皇族乘其有丧巧夺财物所得甚多终不满意遂诬长子宗懿以爲不孝使被谴谪感愤成疾以至没身不能自雪其罪五也先帝以春秋浸高未有继嗣深思宗庙生民之重属意圣明固非一日而守忠陰蓄奸心沮坏大策深忌国家立长立贤自欲於仓猝之际居中建议择幼弱昏懦之君以邀大利如有唐之季定策国老门生天子赖先帝聪明卓然远览断志不疑不然则太平之业几坠於地其罪六也及陛下既爲皇子守忠内怀忧惧日於先帝之前离间百端隔絶内外进对甚希使先帝爲陛下之父不得施爲父之恩陛下爲先帝之子不得展爲子之亲其罪七也及先帝晏驾陛下繼统不幸遇疾皇太后权同听政守忠乘此之际大逞奸谋闖伺语言撰造事迹往来革面进退异辞使皇太后以文母之慈不免投杼之疑陛下以曾闵之孝立有负恩之谤交构两宫遂成深隙计其陰谋无所不至赖皇太后聪明确然执义不可倾移不然祸变之兴岂可具道其罪八也及圣体既安皇太后恭还大政守忠不劝导陛下以勤修子道承顏顺意报答盛德恢广令誉而相时随势斗异炎凉欲诈输新忠以巧遮旧恶用昔时谗陛下之计爲今日谗皇太后之辞虽陛下未必听受而使皇太后闻之不能不以介意终日涕泣悒悒成疾守忠但欲左右反覆自爲身谋并不顾天下之人议陛下之善恶其罪九也皇后正位尚新天下聳观令德守忠輒爲皇后画策并不稟问皇太后矫传教旨开祖宗宝藏擅取金珠数万两以献皇后既取悦一时又坐享厚赐逆妇姑之礼开骄侈之源使皇后受其恶名而已身收其重利爲臣奸邪孰甚於此其罪十也守忠有大罪十皆陛下所亲见衆人所共知其余欺谩爲奸恣横不法事类繁多不可胜言诚国之大贼人之巨蠹伏望陛下尽发守忠之罪明示四方斩於都市以惩奸慝取进止

言内侍差遣上殿劄子【治平元年上】

臣曩时上殿伏见陛下宣谕以内臣差遣并一切委之都知司臣当时已曾奏陈以爲非便今

入内侍省都都知任守忠恃此权势背公立私奉之者坐获进擢忤之者立致排摈威福之柄尽在其手遂使宫禁之中畏憚其人过於人主罪盈恶积幸赖陛下神断已斥而去之然傥不收还威福之柄则是去一守忠生一守忠终无益也臣愚伏望陛下自今日已後除内臣常程差遣依旧令都知司定差外其勾当御药院内东门龙图天章阁後苑化成殿延福宫等处及非时差管勾里外要切公事之人并乞陛下亲加选擢试之以事观其爲人忠谨有功者则加赏拔奸邪不职者则加贬退不必一一勘会资序检寻体例如此则谁不怀德畏威输忠竭力岂独内臣而已虽外朝之人臣亦可用此道而治也取进止

贡院乞逐路取人状【治平元年上】

准中书批送下知封州柳材奏欲乞今後南省考试进士将开封国学鏤厅举人试卷袞同糊名其诸道州府举人试卷各以逐路糊名委封弥官於试卷上题以在京逐路字用印送考试官其南省所放合格进士乞於在京逐路以分数裁定取人所贵国家科第均及中外如允所请伏乞下两制详定者右谨具如前当院今将簿籍勘会近岁三次科场内嘉佑三年国子监得解及免解进士共一百一十八人及第者二十二人约五人中取一人开封府得解及免解进士共二百七十八人及第者四十四人约六人中取一人河北路得解及免解进士共一百五十二人及第者五人约三十人中取一人京东路得解及免解进士共一百五十七人及第者五人梓州路得解及免解进士共六十三人及第者二人并约三十一人中取一人广南东路得解及免解进士共九十七人及第者三人约三十二人中取一人荆湖南路得解及免解进士共六十九人及第者二人约三十四人中取一人广南西路得解及免解进士共三十八人利州路得解及免解进士共三十六人夔州路得解及免解进士共二十八人及第者各只一人河东路得解及免解进士共四十四人全无人及第嘉佑五年国子监得解及免解进士共一百八十八人及第者二十八人开封府得解及免解进士共二百六十六人及第者六十九人并约四人中取一人京东路得解及免解进士共一百五十人及第者五人约三十人中取一人荆湖南路得解及免解进士共六十九人及第者二人约三十四人中取一人广南东路得解及免解进士共八十四人及第者二人约四十二人中取一人河东路得解及免解进士共四十一人陕西路得解及免解进士共一百二十三人及第者各只一人荆湖北路得解及免解进士共二十四人广南西路得解及免解进士共六十三人夔州路得解及免解进士共三十二人并全无人及第嘉佑七年国子监得解及免解进士共一百一十一人及第者三十人约四人中取一人开封府得解及免解进士共三百七人及第者六十六人约五人中取一人荆湖南路得解及免解进士六十八人及第者二人约三十四人中取一人陕西路得解及免解进士共一百二十四人及第者二人约六十二人中取一人河北路得解及免解进士共一百五十四人河东路得解及免解进士共四十五人荆湖北路得解及免解进士共二十三人及第者各一人广南东路得解及免解进士共七十七人广南西路得解及免解进士共六十三人利州路得解及免解进士共二十八人并全无人及第以此比较在京及诸路举人得失多少之数显然大段不均盖以朝廷每次科场所差试官率皆两制三馆之人其所好尚即成风俗在京举人追趋时好易知体面渊源渐染文采自工使僻远孤陋之人与之爲敌混同封弥考较长短势不侔矣孔子曰十室之邑必有忠信如丘者焉言虽微陋之处必有贤才不可诬也是以古之取士以郡国户口多少爲率或以德行或以材能随其所长各有所取近自族

姻远及夷狄无小无大不可遗也今或数路之中全无一人及第则所遗多矣国家用人之法非进士及第者不得美官非善爲赋诗论策者不得及第非游学京师者不善爲赋诗论策以此之故使四方学士皆弃背乡里违去二亲老於京师不复更归其间亦有身负过恶或隐忧匿服不敢於乡里取解者往往私买监牒妄冒户贯於京师取解自间岁开科场以来远方举人憚於往还只在京师寄应者比旧尤多国家虽重爲科禁至於不用?赧然冒犯之人岁岁滋甚所以然者盖由每次科场及第进士大率是国子监开封府解送之人则人之常情谁肯去此而就彼哉夫设美官厚利进取之途以诱人於前而以苛法空文禁之於後是犹决洪河之尾而捧土以塞之其势必不行矣书曰无偏无党王道荡荡国家设贤能之科以俟四方之士岂可使京师诈妄之人独得取之今来柳材所起请科场事件若依而行之委得中外均平事理允当可使孤远者有望进達侨寓者各思还本土矣难者必曰国家比设封弥誊録以尽至公其诸路举人所以及第少於在京者自以文艺疎拙长短相形理宜黜退今若於封弥试卷上题在京逐路字号必虑试官徇私者因此得以用情是大不然国家设官分职以待贤能大者道德器识以弼谐教化其次明察惠和以拊循州县其次方略勇果以扞御外侮小者刑狱钱穀以供给役使岂可专取文艺之人欲以备百官济万事邪然则四方之人虽於文艺或有所短而其余所长有益於公家之用者盖亦多矣安可尽加弃斥使终身不仕邪凡试官挟私者不过徇其亲知乡党今虽题逐路字号若试官欲徇其亲知则一路之人共聚一处不知何者是共亲知若欲徇其乡党则一路之中所取自有分数岂敢偏於本路剩取一人以此言之虽题逐路字号试官亦无所容其私也今欲乞依柳材起请今後南省考试云云裁定取人若朝廷尚以爲有所嫌疑即乞令封弥官将国子监开封府及十八路临时各以一字爲偏傍立号假若国子监尽用乾字开封府尽用坤字京东路尽用离字京西路尽用坎字爲偏傍其余路分并依此例委知贡举官於逐号之中考校文理善恶各随其短长每十人中取一人奏名其不满十人者六人以上亦取一人五人以下更不取人其亲戚举人别试者缘人数至少更不分别立号只依旧条袞同封弥分数取人其合该奏名者更不入南省奏名数内如允所奏乞降指挥下贡院遵守施行

卷三十三

钦定四库全书

传家集卷三十三 宋司马光 撰

章奏十六

言讲筵劄子【治平元年九月三日上】

臣伏覩讲筵所告报奉圣旨令自九月初五日後逐日讲筵至重阳节住讲候将来开春别选日讲筵臣窃以国家本设经筵欲以发明道谊裨益圣德先帝时无事常开讲筵近岁因圣体不安遂於端午及冬至以後盛暑盛寒之时权罢数月今陛下始初清明方宜鋭精学问之时而五日开讲八日已罢臣恐议者以爲陛下非有意於求道但欲循故事备外事而已羣臣非有意於明道但欲塞职业求锡赉而已若果如此臣窃爲朝廷羞之且陛下近增置诸宫教授仍下诏戒勗宗室使之向学傥陛下不以身先之则宗室安肯奉诏哉臣愚以爲陛下若别有所爲未暇开讲则且俟佗时亦未爲晚若既开讲筵则恐数日之间未宜遽罢取进止

乞讲尚书劄子【治平元年上】

臣伏覩经筵所讲说论语将毕窃以尚书者二帝三王嘉言要道尽在其中爲政之成规稽古之先务也陛下新承大统留意万几欲求楷模莫盛於此臣不胜区区欲望陛下更以圣意裁酌将来论语既毕令讲说尚书取进止

言除盗劄子【治平元年十月十日上】

臣窃闻降勅下京东京西灾伤州军如人户委是家贫偷盗斛斗因而盗财者与减等断放未知虚的若果如此深爲不便臣闻周礼荒政十有二散利薄征缓刑弛力舍禁去几率皆推寛大之恩以利於民独於盗贼愈更严急所以然者盖以饥馑之岁盗贼必多残害良民不可不除也顷年尝见州县官吏有不知治体务爲小仁者或遇凶年有刼盗斛斗者小加寛纵则盗贼公行更相刼夺乡村大扰不免广有收捕重加刑辟或死或流然後稍定今若朝廷明降勅文豫言偷盗斛斗因而盗财者与减等断放是劝民爲盗也百姓乏食官中当轻徭薄赋开仓赈贷以救其死不当使之自相刼夺也今岁府界京东京西水灾极多严刑峻法以除贼盗犹恐春冬之交饥民啸聚不可禁御又况降勅以劝之臣恐国家始於寛仁而終於酷暴意在活人而杀人更多也凡号令之出不可不慎毫厘之失爲害实多若才知其失随即更张犹胜於有害及民迷而不复者也伏望陛下速令收还此勅严责京东京西转运司及州县应灾伤之处多方擘画斛斗救济饥民若有一人敢刼夺人斛斗者立加擒捕依法施行如此则衆知所

畏不敢轻犯所以保全愚民减省刑狱之道也取进止

言备边劄子

臣闻周书称文王之德曰大邦畏其力小邦怀其德盖言诸侯傲狠不宾则讨诛之从顺柔服则保全之不避强不陵弱此王者所以爲政於天下也臣伏见去岁先帝登遐赵谅祚遣使者来致祭延州差指使高宜押伴入京宜言语轻肆傲其使者侮其国主使者临辞自诉於朝臣当时与吕海上言乞加宜罪朝廷忽略此事不以爲意使其怨怼归国一国之人皆以爲耻今岁以来谅祚招诱亡命点集兵马窥伺边境攻围堡寨驱胁熟户八十余族杀掠弓箭手约数千人悖逆如此而朝廷乃更遣使臣齎诏抚谕彼顺从则侮之傲狠则畏之无乃非文王所以令诸侯乎若使臣至彼谅祚稽首伏罪禁止侵掠犹或可赦若复拒违王命辞礼骄慢侵掠不已未知朝廷将何以待之伤威毁重孰甚於此方今公私困竭士卒骄惰将帅乏人而戎狄犯边事之可忧孰大於此而朝廷上下晏然若无事者其故何哉岂朝廷自有其备而疎外之臣不得与知乎臣窃惑之所谓备者非但添屯军马积贮粮草而已也在於择将帅而修军政也二者皆阙何谓有备臣不胜愤懣伏望陛下博延羣臣访以御边之策择其善者而力行之方今救边之急宜若捧漏瓮沃焦釜犹恐不及岂可外示闲暇而养成大患也取进止

言蓄积劄子

臣闻国以民爲本民以食爲天国家近岁以来官中及民间皆不务蓄积官中仓廩大率无三年之储乡村农民少有半年之食是以小有水旱则公私穷匮无以相救流移转徙盗贼并兴当是之时朝廷非不以爲忧及年穀稍丰则上下之人皆忘之矣此最当今之深弊也先帝时臣曾上言乞将诸路转运使及诸州军长吏官满之日仓库之实比於始至增减多少以爲黜陟又令民能力田积穀者皆不以爲家费之数欲爲国家力救此弊自後不闻朝廷施行今岁开封府界南京宿亳陈蔡曹濮济郛等州霖雨爲灾稼穡之田悉爲洪流百姓羸弱者流转佗方饿死沟壑强壮者起爲盗贼吏不能禁朝廷欲开仓赈贷则军储尚犹不足何以贍民欲括取於蓄积之家则贫者未能赈济富者亦将乏食又使今後民间不敢蓄积不幸复有凶年则国家更於何处取之此所以朝廷虽寒心销志亦坐而视之无如之何者也臣窃思之盖非今日有司之罪乃曩时有司之罪也往日不可及来者犹可追陛下儆不於今日特留圣心速救此弊丰凶之期不可豫保若向去复有水旱螟蝗之灾饥馑相仍甚於今年则国家之忧何所不至乎臣又闻平糴之法必谨视年之上下故大熟则上糴三而舍一中熟则糴二下熟则糴一使民适足价平则止小饥则发小熟之所敛中饥则发中熟之所敛大饥则发大熟之所敛而糴之所以取有余补不足也今开封府及京东京西水灾之处放税多及十分是大饥之岁也官吏往往更行收糴所给官钱既少百姓不肯自来中糴则遣人编拦搜括无以异於寇盗之钞劫是使有穀之家愈更闭匿不敢入市穀价益贵人不聊生如此非独天灾亦由吏治颠倒之所致也臣愚欲望朝廷检会臣前次及今来所奏事理更加详酌择其可者少赐施行指挥开封府界及京东京西灾伤州军见今官中收糴者一切止住其有常平广惠仓斛斗之处按籍置历出糴赈贷先救农民告谕蓄积之家许行出利借贷与人候丰熟之日官中特爲理索不令逋欠其河北陕西河东及诸路应丰稔之处委转运司相度穀价贱者广谋收糴价平

即止如本路阙少钱物即委三司於佗处擘画那移应副仍自今以後乞朝廷每年谨察诸路丰凶之处依此施行臣窃料有司必言官无闲钱可以趁时收籴臣伏见国家每遇凶荒之岁缘边屯军多处常用数百钱籴米一斗若用此於丰稔之岁可籴一硕不知有司何故於凶荒之岁则有钱供亿至丰稔之岁则无钱也此无佗故患在有司偷安目前以俟迁移进用不爲国家思久远之计而已故臣惟愿陛下深留圣意取进止

言阶级劄子【治平元年十一月十五日上】

臣闻治军无礼则威严不行礼者上下之分是也唐自肃代以降务行姑息之政是以藩镇跋扈威侮朝廷士卒骄横侵逼主帅下陵上替无复纲纪以至五代天下大乱运祚迫蹙生民涂炭祖宗受天景命圣德聪明知天下之乱生於无礼也乃立军中之制曰一阶一级全归伏事之仪敢有违犯罪至於死於是上至都指挥使下至押官长行等衰相承粲然有叙若身之使臂臂之使指莫敢不从故能东征西伐削平海内爲子孙建久大之业至今百有余年天下太平者皆由此道也近岁以来中外主兵臣僚往往不识大体好施大惠以盗虚名军中有犯阶级者务行宽贷是致军校大率不敢铃束长行甘言悦色曲加煦妪以至懦怯兵官亦爲此态遂使行伍之间骄恣悖慢寢不可制上畏其下尊制於卑所谓下陵上替者无过於此臣闻圣王刑期於无刑今宽贷犯阶级之人虽活一人之命殊不知军法不立渐成陵替之风则所系乃亿兆人之命也臣愚欲望陛下特降诏旨申明阶级之法戒勅中外主兵臣僚令一遵祖宗之制如敢有辄行宽贷曲收衆心者严加罪罚以儆其余庶几纲纪复振基绪永安取进止

言举官上殿劄子【治平元年十一月二十五日上】

臣闻致治之本在於得贤天下至广羣臣至衆人主不能徧知必资荐举若荐举不得其实则邪巧并进官职耗废是故设连坐之法以惩之此百王不易之道也伏见近降诏书令中外臣僚於文资官内不以职位高下举行实素着官政尤异可备陞擢任使之人又於诸司使以下至三班使臣内举堪充将领及行陈任使之人此乃前世之令典当今之切务臣始闻之不胜庆拊既而议者皆言数年前亦曾有此诏书所举甚衆未闻朝廷曾有所陞擢今兹盖亦修故事饰虚名而已非有求贤之实也若果如此诚有何益臣愚欲望陛下尽将将来臣僚所举之人随逐人资叙各置一簿编其姓名留之禁中其副本降付中书枢密院若遇文臣转运副使提点刑狱转运判官知大藩府及武臣總管铃辖路分都监知州军等有阙除用旧资叙人外应系陞陟入上件差遣者并乞於将来举官簿内次等资叙人中陛下亲加选择点定一人其不系将来荐举之人不得差充上件差遣若陞陟以後佗日职事败阙不如所举及犯赃私罪其举主并依法施行虽见任两府亦乞不以恩例特放凡系举官不当降官及降差遣者未滿三年虽遇恩赦不得牵复如此则羣臣莫敢不尽公择人天下贤才皆可得而官使矣取进止

言陈述古劄子【治平二年正月十日上】

臣窃闻陕西都转运使陈述古昨因巡边妄奏朝廷称边鄙寧静不足爲虑後因权泾原路经

略司事闻副總管刘几称西人点集将谋入寇请出兵防扞述古恐与前奏相违因此怒几奏称不协军情张皇生事擅移几知凤翔府数日之间西人果大举犯边杀掠弓箭手及熟户蕃部述古亦不即时发兵救援致陷没数千户近者虽知朝廷已差台官勘述古罪状然窃闻所坐止於擅移刘几及奏状有不实之处若以文吏议之罪不至重若以国计言之爲害实深何则国家承平日久人不习战虽屯戍之兵亦临敌难用唯弓箭手及熟户蕃部皆生长边陲习山川道路知西人情伪材气勇悍不惧战鬪从来国家赖之以爲藩蔽今述古知西人欲来侵扰而自避翻覆之辜顺成欺罔之谋抑遏将官不许救护遂以数千户生民委於虎口使父子流离骨肉涂炭岂惟已陷没者深可哀痛臣恐自今以後诸路弓箭手皆不敢於极边居止熟户蕃部皆有叛国从贼之心以此观之其害岂小哉况述古出於门?材气庸鄙自历官以来所至之处纵恣胥臆残虐吏民不顾宪典轻侮王命骄暴狠狡天下共知屡曾坐事黜降旋复收用叨窃名位一朝至此诚过其分量故天夺之魄举措乖谬骇人视听陷败民命挫辱国威内外之人无不愤疾臣闻舜诛四凶而天下服如述古平生所爲亦可以谓之凶人矣陛下纵不欲明加斧钺以谢边民亦当投之荒裔以御魑魅庶使封疆之臣少加警惧取进止

言皮公弼劄子【治平二年正月十一日上】

臣伏觀近降诏书於初任第二任通判人中选人权发遣三司判官公事九年之後擢爲职司既使之久於其事又待以不次之位此诚用人之要术爲政之首务也然当兹选擢之初天下士大夫莫不延颈而望拭目而视若得清修孤直之人则皆劝慕爲善砥节砺行不肖者亦化爲贤矣若得贪污谄伪之人则皆倾巧干进饰貌盗名安恬者亦变而爲躁矣此乃风俗之本原政治之枢机不可以不慎自非有奇材异绩爲天下所知未可容易当此举也窃见尚书都官员外郎皮公弼爲吏之处以贪饕致富资性狡猾善爲进取在京师则造请不倦在外则书后相寻专用此术致举主三十余人一旦首膺兹选天下之人苟有知公弼所爲者但私议窃叹愤郁喑鸣莫敢发言此岂可以称陛下求贤之意副四方跂竦之望哉若所选之人皆如皮公弼之类乃是开此徼幸之门以爲佞邪躁进之涂恐非朝廷之福也所有皮公弼伏望圣慈追还前命勒归本任况今中外之官本资序合入三司判官者尚不啻数十人岂得其中全无可选择者愿且选以补即目三司判官之阙俟果有奇材异绩爲衆所知者然後依近降诏书举而用之天下幸甚取进止

言皮公弼第二劄子

臣近曾上言乞罢皮公弼三司判官公事未闻朝廷施行臣闻周礼小宰以六计弊羣吏之治曰廉善廉能廉谨廉正廉法廉辨盖言爲吏者虽有六事皆以廉爲本也翼奉曰人诚向正虽愚爲用若乃怀邪智益爲害盖言人操心不正者虽有材能无所用也今以公弼材能求於朝士之间不爲难得若其贪污谄伪则罕有其比陛下方欲简拔英贤待之不次以砥砺羣臣新美大化而得公弼之徒臣恐四方闻之无不解体使廉正之士沈抑而不显贪邪之人辐凑而竞进其於亏损圣政败坏风俗不爲细事伏望陛下早追还公弼前所授恩命勒归东明本任取进止

言王广渊劄子【治平二年正月十三日上】

臣伏见新除王广渊直集贤院外廷之人无不怪惑偶语族谈莫知其故或云广渊以唇舌便佞游走於公卿之门盖执政所荐也或云陛下龙潜之时广渊以文章因陛下故人自荐達素蒙知赏故特加拔擢此二者臣莫知其虚实若果有其一皆非朝廷之美也夫端士进者治之表也儉人进者乱之阶也臣窃闻广渊虽薄有文艺其余更无所长於士大夫之间好奔竞善进取称为第一若以此获公卿之知则其人固非端士矣曩以初任通判编排中书文字二年之间堂除知舒州搢绅已皆相与指目以为侥幸今又骤加美职安得不取外廷之怪惑乎陛下方蒞政之初欲简拔天下贤材寘诸不次之位以率厉羣臣而执事之臣不能称陛下之意前此用皮公弼权发遣三司判官今又用王广渊直集贤院将何以使天下之人尚廉耻之节崇敦厚之风乎若陛下龙潜之时广渊果曾以文章自达於左右此尤不可昔汉文帝时景帝为太子尝召上左右饮中郎将卫绾独称疾不往及即位宠待绾过於佗臣周太祖时世宗镇澶州张美为三司吏掌州之钱谷世宗私有求假美悉力应奉及即位衆皆称美材敏而世宗终薄其为人广渊若当仁宗之世私以文章献於陛下为臣忠谨者肯如是乎陛下今日当治其罪而又赏之将何以厉人臣之节也所有王广渊新直集贤院劄伏乞追还

言王广渊第二劄子

臣近曾上言乞罢王广渊直集贤院事未闻朝廷施行外议籍籍至今未已臣备位谏职不敢塞默窃见广渊儉邪便佞勤於造请以此之故自幕职入京数年之间得堂除知州今又以特旨直集贤院臣不知广渊有何才德过絶於人而受国家宠荣如此之速也议者皆言陛下在藩邸时广渊因时君卿以文章笔札私有献深自结纳故有今日之命若果如此大为非宜臣闻为人君者洗濯其心至公至正审察善恶明辨是非忠信者虽有怨讎而必用奸回者虽有私恩而必诛是以羣臣晓然各知所守一心同德以事其上今广渊若於仁宗之世私结陛下之知则陛下察其为人果为忠信果为奸回若以此获美官则奸回之臣欲求进身者将何所不为恐非陛下之利也自古以来惟英明之主能知此理伏望陛下追还广渊恩命仍严加窜谪以惩儉巧之臣用心不一者取进止

传家集卷三十三

卷三十四

<集部,别集类,北宋建隆至靖康,传家集>

钦定四库全书

传家集卷三十四 宋 司马光 撰章奏十七

乞罢陕西义勇劄子【治平元年十一月二十二日上】

臣传闻朝廷差陕西提点刑狱陈安石於本路人户三丁之内刺一丁充义勇不知虚实若果如此大爲非便臣窃意者必以爲河北河东皆有义勇而陕西独无近因赵谅祚寇边故欲广籍民兵以备缓急使之扞御也臣伏见康定庆历之际赵元昊叛乱王师屡败死者动以万数国家乏少正军遂籍陕西之民三丁之内选一丁以爲乡弓手寻又刺充保捷指挥差於沿边戍守当是之时间里之间惶扰愁怨不可胜言耕桑之民不习战鬪官中既费衣粮私家又须供送骨肉流离田园荡尽陕西之民比屋凋残至今二十余年终不复旧者皆以此也其谋策之失亦足以爲戒矣是时河北河东边事稍缓故朝廷但籍其民以充义勇更不刺爲军虽比之陕西保捷爲害差小然国家何尝使之扞御戎狄得其分毫之益乎今议者但怪陕西独无义勇不知陕西之民三丁之内已有一丁充保捷矣自西事以来陕西困於科调比於景佑以前民力减耗三分之二加之近岁屡遭凶歉今秋方获小稔且望息肩又值边鄙有警衆心已摇若更闻此诏下必大致惊扰人人愁苦一如康定庆历之时是贼寇未来而先自困弊也况即日陕西正军甚多不至阙乏何爲遽作此有害无益之事以循覆车之辙也伏望朝廷审察利害特罢此事减一方之大幸取进止

乞罢陕西义勇第二上殿劄子

臣近曾上言乞罢刺陕西义勇事未审朝廷曾与不曾别爲商量臣前次上殿乞陛下留意备边所谓备者非但添屯军马积贮粮草而已在於择将帅而修军政今将帅不才者未闻有所更改军政颓弊者未闻有所振举而忽取腹内州军之民尽刺以爲兵外人闻之无不骇愕今陕西沿边正军动以万数朝廷若能择有方略胆勇之人以爲将帅使之简去疲弱选取精锐勤加教习明行赏罚则虽欲取银夏而税其地擒赵谅祚而制其命有何所难况但止其钞盗乎今朝廷不孜孜以将帅军政爲急而无故籍耕桑之民使之执兵徒有惊扰而实无所用臣不知谁爲陛下画此策也昔康定庆历之间朝廷以元昊犯边官军不利已曾籍陕西之民以爲乡弓手始者明出勅榜云但欲使之守护乡里必不刺充正军屯戍边境榜犹未收而朝廷尽刺充保捷指挥令於边州屯戍当是之时臣丁忧在陕备见其事民皆生长太平不识金革一旦调发爲兵自陕以西间阎之间如人人有丧户户被掠号哭之声弥天亘野天地爲之惨凄日月爲之无色往往逃避於外官中繫其父母妻子急加追捕鬻卖田园以充购赏暨刺面

之後人員教頭利其家富百端誅剥衣糧不足以自贍須至取於私家或屯戍在邊則更須千里供送祖父財產日銷月銖以至於盡況其平生所習者惟桑麻耒耜至於甲冑弩槊雖日加教閱不免生疎而又資性慇愚加之畏懦臨敵之際得便即思退走不惟自喪其身兼更拽動大阵自後官中知其無用遂大加沙汰給與公凭放令逐便而惰游已久不復肯服稼穡之勞兼田產已空無所復歸皆流落凍餒不知所在長老至今言之猶長嘆出涕其爲失策較然可知足以爲後來之戒而不足以爲法也今朝廷雖云所籍之民止刺手背衣隙之時委州縣召集教閱只在鄉里不令戍邊而民間懲往年之事必大興訛言互相驚擾朝廷号令失信前後已多雖州縣之吏徧至民家面加曉諭亦終不肯信逃亡避匿刑獄必繁怨嗟之聲周徧一方足以動搖羣心感傷和氣若使分毫有益於國亦無所顧此有害無益顯然明白近在目前設使教習得成一旦諒祚大舉入寇邊臣不能扞禦而使之深入三輔東過潼關乃欲驅此烏合村民以拒之不亦難乎此適足以取戎狄之笑而已伏望陛下軫念生民深察得失其刺义勇事早賜寢罷取進止

乞罷刺陝西义勇第三劄子

臣累日前方聞朝廷有指揮令陝西路揀鄉村百姓充义勇臣即時有奏劄子言其非便昨日又上殿具劄子面有敷陳奉圣旨令送中書樞密院商量臣到中書樞密院方知此事擬議已久勅下本路已近旬日臣耳目疎淺聞之後時不能先事進言是臣之罪然臣聞之易曰不遠復無祇悔元吉說命曰無耻過作非今雖勅命已下若追而止之猶勝於遂行不顧不可避反汗之嫌而蹈迷復之凶也百姓一經刺手則終身羈縻不得左右人情畏憚不言可知康定年中差鄉弓手時元不刺手後至庆历年中刺充保捷之時富有之家犹得多用錢財雇召壯健之人充替今一切皆刺其手則是十余萬無罪之人永充軍籍不得復爲平民其爲害民尤甚於康定之時也臣竊料即今陝西之民已狼狽驚擾不聊生矣若朝廷晏然坐而視之曾不憫恤使赤子嗷嗷何所告訴爲民父母者固當如是乎古者國有大事謀及卿士謀及庶人謀及卜筮今籍一路之民以爲兵可謂大事矣而兩府之外朝士大夫無一人知者一旦勅書既下急如星火嚴如雷霆誰暇問其端倪況敢言其非也臣以備位諫官既聞之後不可畏避死亡不爲陛下力言之若又弃忽其言不爲改更則是今後朝廷号令有過誤者終不可復救也如此則恐非國家之福臣愚伏望圣慈速降指揮下陝西路其义勇且未得刺別听候朝廷指揮然後博延卿士大夫更熟議其可否果然有利於國無害於民徐復行之何晚之有取進止

乞罷刺陝西义勇第四劄子

臣近日已三次上言乞罷刺陝西义勇事未蒙朝廷採納臣欲止而不言則不忍坐視一路之民橫受困苦而自圖一身之安又恐迂延日久則無及於事是以不敢避斧鉞之誅繼上封奏爲陛下極陳其害臣比日以來熟思此事誠於民有世世之害於國無分毫之利何謂於民有世世之害臣竊見河北陝西河東自景佑以前本无义勇凡州縣諸般色役并是上有物力戶人支當其鄉村下等人戶除二稅之外更無大段差徭自非大飢之歲則溫衣飽食父子兄弟熙熙相樂自宝元庆历之間朝廷因趙元昊叛亂契丹壓境遂於三路鄉村人戶之中不問貧富等第但有三丁之家即揀一丁充鄉弓手及強壯其時西边事宜尤急尋將陝西一路鄉

弓手尽刺面充保捷指挥正军其河北河东事宜稍缓遂只将乡弓手及强壮刺手背充义勇自此三路之人始骚然愁苦矣其河北河东之民比於陕西虽免离家去乡戍边死敌之患然一刺手背之後则终身拘缀或欲远出干事余贱贩贵或遇水旱凶荒欲分房逐熟或典卖田产欲浮游作客皆虑官中非时点集不敢东西又当差点之际州县之吏寧无乞覓教閱之时人员教头寧无敛掠是於常时色役之外添此一种科徭也若果如议者之言无害於民则民皆乐从官中何必更刺其手背以防逃窜乎以此观之义勇爲害於两路之民已可知矣况陕西於庆历年中民家已各丧一丁刺充保捷流落不归今又取其次丁刺充义勇不亦甚乎朝廷近年分命朝臣徧往诸路减省诸般色役至於弓手壮丁解子驿子之类州县所不可阙者亦皆减放谓之寛恤民力今乃无故一旦刺一路之民十有余万以爲义勇何朝廷爱之於前而忍之於後悯之於小而忘之於大乎且今日既籍之後则州县义勇皆有常数每有逃亡病死州县必随而补之则义勇之身既羈縻以至老死而子孙若有进丁又不免刺爲义勇是使陕西之民子子孙孙常有三分之一爲兵也臣故曰於民有世世之害也何谓於国无分毫之利太祖太宗之时未有义勇至於正军亦不及今日十分之一然而太祖取荆湖平西川下广南克江南太宗取两浙克河东一统天下若振槁拾遗此岂义勇之力也哉盖由民政修治军令严肃将帅得人士卒精练故也康定庆历之间赵元昊负累朝厚恩无故逆命侮慢不恭侵犯边境朝廷竭天下之力以奉边鄙刘平任福葛怀敏之师相继覆没士卒死者动以万数正军不足益以乡兵外府不足继以内帑民力困极财物殫尽终不能出一旅之衆涉区脱之地以讨其罪而不免含垢忍耻假以宠名诱以重赂仅得无事当是之时三路新置乡兵共数十万何尝得一人之力乎以此观之义勇无用亦可知矣贾谊有言曰前车覆後车戒康定庆历御戎之策国家当永以爲戒今乃一一检当时体例而行之是後车又将覆也有难臣者必曰古之兵皆出民间岂民兵可用於古而不可用於今乎臣则对曰三代之时用井田之法以出士卒车马居则爲比閭族党州乡行则爲伍两卒旅师军爲之长者皆卿大夫也唐初府兵各有营府不属州县有将军郎将折冲果毅以相统摄是以令下之日数万之衆可以立具无敢逃亡避匿者以其纲纪素备故也今乡兵则不然虽有军员节级之名皆其郷党族姻平居相与拍肩把袂饮博鬪殴之人非如正军有阶级上下之严也若安寧无事之时州县聚集教閱则亦有行阵旗鼓关弓彊弩坐作叫噪真如可以战敌者彼若闻敌寇大入边兵已败边城不守敌骑杀掠蹂践卷地而米则莫不迎望风声奔波迸散其军员节级将鸟伏鼠窜自救之不暇岂有一人能爲县官率士卒而待寇乎以臣观之此正如儿戏而已安有爲国家计惊搔一路之民使之破家失业而爲儿戏之事乎臣故曰於国无分毫之利也凡此利害之明有如白黑伏望陛下不以臣愚贱而忽其言少留听察其刺陕西义勇事早赐寢罢则一方幸甚取进止

乞罢刺陕西义勇第五上殿劄子

臣近者已曾四次上言乞罢刺陕西义勇别白利害极其恳恻终未蒙省察方今陕西一路之民小大老幼如在汤火之中而朝廷晏然略无拯救之意臣职在箴谏安可塞默不敢广有援引以烦圣听请以目前显验言之今建议以义勇爲便者必曰即日河东河北不用衣粮而得胜兵数十万皆教閱精熟可以战敌又兵出民间合於古制臣请言其不然彼数十万者虚数也教閱精熟者外貌也兵出民间者名与古同而实异也何以言之河北河东州县既承朝廷

之意各?刺义勇只求数多据帐籍言之诚有数十万之衆矣若万一敌寇在近官中急欲点集之时则一人不可见矣岂非虚数乎平常无事州县教閱之日观者但见其旗号鲜明钲鼓备具行列有序进退应节即叹美以爲真可战敌殊不知彼皆队舞聚戏之类若闻胡寇之来则瓦解星散不知所之矣岂非外貌乎古者兵出民间民耕桑之所得皆以衣食其家故处则富足出则精銳今既赋敛农民之粟帛以贍正军又籍农民之身以爲兵是一家独任二家之事也如此民之财力安得不屈岂非名与古同而实异乎以臣愚见河北河东已刺之民犹当遣放况陕西未刺之民乎陛下欲知利害之实何不试召建议者而问之曰河北河东自置义勇以来敌寇凡几次深入至腹内州军用义勇拒战而敌寇败退今既有义勇之後三路正军皆可废而不用乎若果然敌寇曾深入因得义勇之力而败退今来刺义勇之後正军皆可废罢此乃万世之长策也愿陛下行之勿疑若自置义勇以来未尝经阵敌使用今来虽有义勇正军亦未可废罢则何忍以十余万无罪之赤子尽刺以爲无用之兵乎天生圣君以爲民也民今如此陛下岂可全不爲之动心乎臣之所言尽於此矣陛下若以爲稍有可采即乞早降指挥下陕西令罢刺义勇以救一方之民若以爲勅命已行不肯遽改即乞且免刺手背候边事寧息依旧放散则民虽有一时搔扰之劳犹免终身羈縻之苦若以臣所言皆孟浪迂阔不可施行则臣之智识愚闇无以勉强变更不可久污諫诤之列伏望圣慈特赐降黜别择贤才而代之取进止

乞罢刺陕西义勇第六劄子

臣昨日上殿爲言乞罢刺陕西义勇事陛下宣谕臣以爲命令已行臣退而思之不胜鬱悒终夕不寐深痛陛下此言之失臣案周易复之初九曰不远复无祇悔元吉祇大也盖言人谁无过虽圣贤亦不能免然圣贤皆能不远而复故虽有小悔不至於大而终保元吉也其上六曰迷复凶有灾眚用行师终有大败以其国君凶至於十年不克征盖言失之已远迷而不复无事不凶而人君尤甚故孔子赞之曰迷复之凶反君道也自古明圣之君闻一善言而立爲之变更号令者多矣不可悉数惟近岁大臣自知思虑不熟号令已失无以抑夺台諫之言则云命令已行难以更改此乃遂非拒諫之辞陛下新临大政当求善无厌从諫如流之时而亦有此言天下将何望焉且唐室以前諫议大夫拾遗补阙皆中书门下省属官日与中书令侍中侍於天子之侧议论大政苟事有阙失皆得随时规正今国家凡有大政惟两府大臣数人相与议论深严秘密外廷之臣无一人知者及诏勅已下然後台諫之官始得与知或事有未当须至论列又云命令已行难以更改则是国家凡有失政皆不可复救也如此岂惟愚臣一人无用於时諫诤之官皆可废也以臣所见但当论其事之得失言之是非不当云命令已行不可改也今陕西一路之民小大遑遑正如在汤火之中若忽得朝廷指挥云所有义勇且住?刺其已刺手背者并给与公凭放令逐便是得出汤火之中死而复生也其谁不欢呼鼓舞感戴圣恩岂有一人云命令已行不当复改邪陛下万民之父母万民陛下之赤子岂有父母误坠其子於井而曰吾已误矣遂忍不救邪昔舜称尧之德曰稽于衆舍已从人仲虺称汤之德曰用人惟已改过不吝臣愿陛下勿以先入之言爲主虚心平意以察臣浅识五次所言果然爲是爲非若其是欤即公平降指挥罢刺陕西义勇若其非欤即乞如臣前来所奏特赐降黜别择贤才而代之所有命令已行之言伏望陛下自今永以爲戒不可使天下闻之塞絶善言之路也取进止

乞降黜第一状【治平元年十二月五日上】

右臣近日累曾上言乞罢刺陕西义勇事朝廷以言无可采寢而不行臣性识庸昧不违大体妄以狂瞽烦渎圣明章奏相继至於五六终不能少以愚诚感动天听尸禄旷官孰甚於此臣实无顏尚居諫列伏望圣慈察其无堪早赐降黜

乞降黜第二第三第四状【阙】

乞降黜第五状

右臣近曾四次进状以言事不当乞赐降黜未蒙朝廷施行今伏见知制诰钱公辅因缴纳王畴除枢密副使词头责授滁州团练副使臣窃以公辅所坐止於枢密副使恩命臣邇来所言乃是沮宰相大议公辅密启於诏令未出之前臣露章争执於诏令已行之後公辅奏章止於一上臣凡六次进劄子五次进状以此校量公辅罪轻微臣罪重轻罪犹蒙严谴重罪安可不行伏望圣慈详臣前後所奏比钱公辅更於远小处责降所贵圣朝刑典行之均壹

乞降黜上殿劄子【治平二年正月九日上】

臣近曾五次进状以言事不当乞赐降黜未蒙朝廷施行陛下之意盖谓臣一言不从遽求引去太爲容易臣之愚心非敢独爲邇来一事而已臣闻爲士者苟得位於朝必能献可替否致君尧舜跻民仁壽今臣备位諫职三年有半不能悉心竭忠以补益明主使国家纲纪濇以隳紊百姓困穷衣食日蹙戎狄悖慢军旅骄惰比於臣未作諫官之时未见有分毫之胜然则臣之不材较然可见岂敢不自愧耻尚窃宠荣伏望圣慈依臣前奏早赐责降取进止

传家集卷三十四

卷三十五

钦定四库全书

传家集卷三十五 宋 司马光 撰章奏十八

言招军劄子【治平二年二月五日上】

臣近闻朝廷於在京及诸路广招禁军其灾伤之处又招饥民以充厢军臣愚以爲国家从来患在兵不精不患不多夫兵少而精则衣粮易供公私充足一人可以当十遇敌必能取胜兵多而不精则衣粮难赡公私困匮十人不足当一遇敌必致败北此利害之明有如白黑不爲难知也是以太祖皇帝之时天下兵数不及当今十分之一而犹日加选练简去羸老专取精锐故能征伐四克混壹区夏自景德以来中国既以金帛绥怀戎狄不事征讨至今六十余年是宜官有余积民有余财而府库殫竭仓廩空虚水旱小愆流殍满野其故何哉岂非边鄙虽安而冗兵益多之所致乎此乃天下所共知非臣一人之私言也庆历中赵元昊叛西边用兵朝廷广加召募应诸州都监监押募及千人者皆特迁一官以此之故天下冗兵愈衆国力愈贫近岁又累次大拣厢军以补禁军之数即日系籍之兵已爲不少矣何苦更复直招禁军及招饥民以充厢军臣不知建议之臣曾与不曾计较今日府库之积以养今日旧有之兵果爲有余爲不足乎此盖边鄙之臣庸愚怯懦无他材畧但求添兵在朝之臣又恐所给之兵不副所求他日边事或有败阙归咎於已是以不顾国家之匮乏只知召募取其虚数不论疲软无所他用此羣臣容身保位苟且目前之术非爲朝廷深谋远虑经久之画也谚曰多求不如省费此言虽小可以喻大今以十口之家衣食仅足一旦顿增五口必不能赡若不顾困中之粟笥中之帛所余几何而惟冗口是贪能无穷匮乎国家之势何以异此羣臣既不能爲陛下忠谋陛下又不自以爲忧则谁当忧之臣恐边臣之请兵无穷朝廷之募兵无已仓库之粟帛有限百姓之膏血有涯不知国家长此沉痾何时当瘳乎臣又闻即日灾伤之处军无见粮煮薄粥以饲饥民犹不能给况刺以爲兵将以何物养之终身乎且畎亩农民止因一时饥馑故流移就食若将来丰稔则各思复业今既刺以爲兵是使之终身失业也於官於民皆爲非便谋策之失孰甚於此臣愿陛下断自圣志速降指挥应在京及诸路并且罢招禁军但选择将帅使之训练旧有之兵以备御四夷不患不足其灾伤之处州县不得妄招饥民以充厢军但据所有斛斗救接农民俟向去稍丰使各复旧业则天下幸甚臣自陛下践阼以来不自知其狂愚见朝廷政令有未便差除有未当屡献瞽言浼渎天聪陛下未尝爲之变一政令改一差除如臣者亦可以不言矣然犹区区献言不已者诚耻居位而不言不耻多言而见厌也取进止

言钱粮上殿劄子【治平二年四月十九日上】

臣近蒙恩给假至陕州焚黄窃见缘路诸州仓库钱粮例皆阙絶其官吏军人料钱月粮并须遂旋收拾方能支給窃料其余诸州臣不到处亦多如此臣闻国无三年之蓄曰国非其国今

窘竭如此而朝廷曾不以爲忧若不幸有水旱蝗蝻方数千里如明道康定之时加之边鄙有急兴兵动衆不知朝廷何以待之臣伏见陈许颍亳等州止因去秋一次水灾遂致骨肉相食积尸满野此非今日官吏之罪乃曩时官吏之罪也何则曩时丰稔之岁其人但务偷安不爲远虑粟麦至贱不能储蓄及至凶荒之际官私俱竭上下狼狈何由相救虽使桑羊刘晏复生亦无如之何也今春幸而得雨麦田有望朝廷已置饥馑之事於度外不复以储蓄爲意矣万一天下州县复有灾伤则何以异於陈许颍亳之民也若饥馑相继盗贼必兴此岂可不早爲之深虑乎臣愚伏望陛下於天下钱谷常留圣心特降诏书明谕中外应文武臣僚有熟知天下钱谷利害能使仓库充实又不残民害物者并许上书自言陛下勿以其人官职之踈贱文辞之鄙恶一一畧加省览择其理道稍长者皆赐召对从容访问以方今食货俱乏公私皆困何故而然如何擘画可使上下丰足若其言无可取者则罢遣而已有可取者即爲之施行仍记录其姓名置於左右然後选其材干出羣者以爲转运使副判官及三司使副判官仍每至年终令三司撮计在京府界及十八路钱帛粮草见在都数闻奏以之比较去年终见在都数若增羨稍多即令勘会如别无奸巧欺谩及非理赋敛而致增羨其当职之人宜量行褒赏累经褒赏者即别加进用若减耗稍多即令诘问如别无大故灾伤及添屯军马而致减耗其当职之人宜量行责罚累经责罚者即未从黜废诚能如此行之不懈数年之後可使天下仓皆有余粟库皆有余财虽有水旱蝗蝻之灾及边鄙有急皆不足忧也

言西边上殿劄子【治平二年上】

臣窃见近年以来赵谅祚虽外遣使人称臣奉贡而内蓄奸谋窥伺边境陰以官爵金帛招诱中国不逞之人及熟户蕃部闻其亡命叛去及潜与交通者已爲不少而朝廷不能一一尽知也其熟户蕃部有违拒不从者谅祚辄发兵马公行杀掠弓箭手有住在缘边者谅祚皆迫逐使入内地将帅之臣但坐而视之不能救援遂使其余熟户皆畏憚凶威怨愤中国人人各有离叛之心及朝廷遣使齎诏责问则谅祚拒而不纳纵有所答皆侮慢欺谩之辞朝廷亦隐忍含容不复致诘谅祚又数扬虚声以惊动边鄙而将帅之臣率多懦怯别无才谋以折冲御侮只知多聚兵马以自卫其身一路有警则三路皆耸尽抽腹内州军下番兵士置在麾下使之虚食粮草数月之後寂无影响然後遣还未及休息忽闻有警又复抽去如此往还疲於道路讫无一事曾有施爲臣虽愚弩不习边事窃以私意料之谅祚所以依旧遣使称臣奉贡者一则利於每岁所赐金帛二十余万二则利於入京兴贩贸易三则欲使朝廷不爲之备也其所以招诱不逞之人者欲以采访中国虚实之事平居则用爲谋主入寇则用爲乡导也其所以诱胁熟户迫逐弓箭手者其意以爲东方客车皆不足畏惟熟户弓箭手生长极边强悍善鬪若先事翦去则边人失其所恃入寇之时可以通行无碍也其所以数扬虚声惊动边鄙者欲使中国之兵疲於奔命耗散储蓄公私贫困既而边吏习以爲常不复设备然後乘虚入寇也凡此诸事若不早爲之虑使奸谋得成窃恐其爲国家之患未可量也臣谓朝廷宜宵衣旰食以爲深忧而但见其遣使奉贡即以爲臣节未亏得其侮玩之语以爲恭顺得其欺谩之语以爲诚实盖朝廷非不知其本心且欲幸其未发止求目前之暂安不顾异时之深患臣日夜思之不胜愤悒何戎狄爲谋之深而中国虑事之浅也臣愚伏望陛下於边鄙之事常留圣心特降诏书明谕中外应文武臣僚有久历边任或曾经战阵知军中利害及戎狄情僞者并许上书自言陛下勿以其人官职之踈贱及文辞之鄙恶一一畧加省览择其理道稍长者皆赐召

对从容询问以即目治兵御戎之策何得何失如何处置即得其宜若其言无可取者则罢遣而已有可取者即爲施行仍记录其姓名置於左右然後选其中勇畧殊衆者擢爲将帅若能称职有功则劝之以爵赏昏懦败事则威之以刑诛加以选练士卒留精去冗申明阶级之法抑扬骄惰之气诚能如此行之不懈数年之後俟将帅得人士卒用命然後惟陛下之所欲爲虽北取幽蓟西收银夏恢复汉唐之疆土亦不足爲难况但守今日之封畧制戎狄之侵侮岂不沛然有余裕哉取进止

论修造劄子【治平二年五月十一日上】

臣伏见近日以来修造稍多只大内中自及九百余间以至皇城诸门并四边行廊及南薰门之类皆非朝夕之所急无不重修者役人极衆费财不少此盖陛下纘极之初禁廷之中诚有破漏不可居者陛下畧命整葺理亦宜然而左右之臣便谓陛下好兴土木之功遂广有经度虽不至损坏之处亦毁拆重修务以壮丽互相夸胜外以希旨求知内以营私规利万一陛下更因此赏之则营造之端猝无穷已国财必竭民力必殫臣窃惟陛下新临天下惠泽未孚於民而以好治宫室流闻四方非所以光益圣德也修造劳费不可胜数臣请且言诸州买木一事扰民甚多衙前皆厚有产业之人每遇押竹木纲散失陪填无有不破家者先帝躬履节俭宫室苑囿无有增饰故诸场材木皆有羡余屡因赦恩放免买木以寛民力自顷修造倍多诸场材木渐就减耗有司於外州科买百端营致尚恐不足而工匠用之贱如粪土者汉文帝惜十家之产罢露台而不作今诸场前後所积竹木何啻十家之产陛下至仁若察其所从来得不爲之爱惜乎况即今在京仓库踈漏甚多皆以上件数处兴功占使匠人物料未暇修葺致粟帛之类大有损败古者将营宫室宗庙爲先廡库爲次居室爲後今之所修缓急先後无乃未得其宜乎又皇子生而富贵年未及冠所宜示以朴素慎其所习今闻所修三位规摹侈大又复过於祖宗之时皇子所居汉明帝曰我子何得比先帝子此恐非所以纳之於义方也臣愚伏望陛下特降圣旨应大内里外舍屋即目不至大段损坏之处及不至要切如南薰门之类并罢兴修其皇子位只因旧屋夹截修整早令毕工不得过爲宏壮且令那减匠人物料修仓库之损坏者所有诸处监修之官自是本职更不与减年磨勘及转官酬赏以塞泰侈之源使天下皆知陛下去奢从俭仁民爱物不亦美乎取进止

爲宰相韩琦等议濮安懿王合行典礼状

伏以出於天性之谓亲缘於人情之谓礼虽以义制事因时适宜而亲必主於恩礼不忘其本此古今不易之常道也伏惟皇帝陛下奋乾之健乘离之明拥天地神灵之休荷宗庙社稷之重即位以来仁施泽浹九族既睦万国交欢而濮安懿王德盛位隆宜有尊礼陛下受命先帝躬承圣统顾以大义後其私恩慎之重之事不轻发臣等忝备宰弼实闻国论谓当考古约礼因宜称情使有以隆恩而广爱庶几上以彰孝治下以厚民风臣等伏请下有司议濮安懿王及譙国太夫人王氏襄国太夫人韩氏仙游县君任氏合行典礼详处其当以时施行

与翰林学士王珪等议濮安懿王典礼状

右臣等谨按仪礼丧服爲人後者传曰何以三年也受重者必以尊服服之爲所後者之祖父母妻妻之父母昆弟昆弟之子若子若子者言皆如親子也又爲人後者爲其父母传曰何以期也不貳斬也特重於大宗降其小宗也又爲人後者爲其昆弟传曰何以大功也爲人後者降其昆弟也以此观之爲人後者爲之子不敢复顾私亲圣人制礼尊无二上若恭爱之心分施於彼则不得专壹於此故也是以秦汉以来帝王有自旁支入承大统者或推尊父母以爲帝后皆见非当时取讥後世臣等不敢引以爲圣朝法况前代入继者多宫车晏驾之後援立之策或出母后或出臣下非如仁宗皇帝年齡未衰深惟宗庙之重祇承天地之意於宗室衆多之中简拔圣明授以大业陛下亲爲先帝之子然後继体承祧光有天下濮安懿王虽於陛下有天性之亲顾复之恩然陛下所以负展端冕富有四海子子孙孙万世相承者皆先帝之德也臣等愚浅不达古今窃以谓今日所以崇奉濮安懿王典礼宜一准先朝封赠期亲尊属故事高官大国极其尊荣譙国太夫人襄国太夫人仙游县君亦改封太国太夫人考之古今实爲宜称

言孙长卿劄子【治平二年五月十二日上】

臣伏闻前环庆路经畧使孙长卿加集贤院学士充河东路都转运使长卿前在环庆不晓边事举措烦苛致熟户蕃部叛亡几尽道路之人无不知之臣谓朝廷宜严加谴谪以儆羣帅不意今日更褒以宠名授以重任外廷闻之无不骇笑如此何以使羣臣举职边鄙获安伏望圣慈速改前命数其无状於远小处责降庶今後封疆之臣稍有所畏取进止

言孙长卿第二劄子

臣近言前环庆路经畧使孙长卿守边无状宜加谴谪不当更加集贤院学士充河东路都转运使不蒙朝廷省察臣窃见陛下近者面谕执政以中外臣僚多不修职业令降诏书严加戒谕此诚致治之本然臣愚以爲言之不如行之若言而不行徒使号令玩渎伤威毁信不若不言之爲愈也长卿本以钱谷常才骤蒙朝廷拔擢数年之中官爲丞郎位爲元帅智力浅薄用过其分不晓军政不达蕃情处事烦碎衆心不附是致熟户蕃部各思离叛受赵谅祚诱胁去者极多而长卿掩蔽欺谩不一一闻奏庆历中元昊背诞环庆所以独不被兵者以熟户盛壮爲之蕃蔽也今因长卿失於抚御散亡殆尽居官如此可谓失职而朝廷更加宠秩委之重任赏罚如此虽复日下诏书又何益也臣愚伏望陛下黜不职之人当以长卿爲始则羣臣无不悚栗不令而行矣取进止

言北边上殿劄子【治平二年六月二十八日上】

臣闻明主谋事於始而虑患於微是以用力不劳而收功甚大窃见国家所以御北边之道似未尽其宜当其安靖附顺之时则好与之计校末节争竞细故及其桀傲暴横之後则又从而姑息不能诛讨是使寇敌益有轻我国之心皆厌於柔服而乐爲背叛近者西戎之祸生於高宜北边之隙起於赵滋而朝廷至今终未省寤犹以二人所爲爲是而以循理守分者爲非是以边鄙武臣皆銳意生事或以开展荒弃之地十数里爲功劳或以杀畧老弱之敌三五人爲

勇敢朝廷称其材能骤加擢用既而敌心忿恨遂来报复屠翦熟户钞劫边民所丧失者动以千计而朝廷但知惊骇增兵聚粮其致寇之人既不追究而守边之臣亦无谴责如此而望戎狄宾服疆场无虞是犹添薪扇火而求汤之不沸也臣愚窃惟真宗皇帝亲与契丹约为兄弟仁宗皇帝赦赵元昊背叛之罪册为国主岁捐百万之财分遗二敌岂乐此而为之哉诚以屈已之愧小爱民之仁大故也今陛下嗣已成之业守既安之基而执事之臣数以争桑之小忿不思灌瓜之大计使边鄙之患纷纷不息臣窃为陛下惜之近者闻契丹之民有於界河捕鱼及於白沟之南翦伐柳栽者此乃边鄙小事何足介意而朝廷以前知雄州李中佑不能禁御为不材别选州将以代之臣恐新将之至必以中佑为戒而以赵滋为法妄杀敌民则战鬪之端往来无穷矣况今民力雕弊仓库虚竭将帅乏人士卒不练夏国既有愤怨屡求侵寇祸胎已成若又加以契丹失欢臣恐国力未易支也伏望陛下严戒北边将吏若契丹不循常例小小相侵如渔船柳栽之类止可以文牒整会道理晓谕使其官司自行禁约不可轻以矢刃相加若再三晓谕不听则闻於朝廷虽专遣使臣至其王庭与之辩论曲直亦无伤也若又不听则莫若博求贤才增修德政俟公私富足士马精强然後奉辞以讨之可以驱穹庐於幕北复汉唐之土宇与其争渔柳之胜负不亦远哉取进止

传家集卷三十五

卷三十六

钦定四库全书

传家集卷三十六 宋 司马光 撰章奏十九

上皇帝疏【治平二年八月十一日上】

月日具位臣光谨昧死再拜上疏皇帝陛下臣闻书曰面稽天若诗曰文王陟降在帝左右盖言王者爲天之子不敢不朝夕小心祇畏其命如在其上如在其左右也是故洪范九畴以五行爲本言王者当祇顺五行之性内谨五事以治身外修八政以治国正五纪以承天序折衷於皇极之道登用三德之人又参合以龟筮之谋察风雨寒燠之来以省得失知休咎导迎五福避远六极此万世不易之道也臣不胜狂愚忘生触死伏见陛下即位以来灾异甚衆日有黑子江淮之水或溢或涸去夏霖雨涉秋不止京畿东南十有余州庐舍沉於深渊浮苴栖於木末老弱流离捐瘠道路妻儿之价贱於犬豕许颍之间亲戚相食积尸成丘既而历冬无雪暖气如春草木早荣继以黑风今夏疠疫大作弥漫数千里病者比屋丧车交路至秋幸而丰熟百姓欣然庶获苏息未及收获而暴雨大至一昼之间川泽皆溢沟渠逆流原隰丘陵悉爲洪波一苗半穗荡无子遗都城之内道路乘桴城阙摧圯官府仓廩军垒民居覆没殆尽死於压溺者不可胜纪耆耄之人皆言耳目所记未尝睹闻此乃旷古之极异非常之大灾陛下安得不侧身恐惧思其所以致此之咎乎臣性愚学浅不足以窥测天意窃以书曰天聪明自我民聪明天明畏自我民明威又曰天视自我民视天听自我民听然则灾异之来不在於佗苟人心和悦则天道无不顺矣诗曰亶亶文王令闻不已又曰如珪如璋令闻令望古之圣王未有不先其令名而能行其政於天下者也臣伏见陛下践阼之初上自宰辅次及朝臣下逮闾閻细民士伍厮养无不翕然同辞称颂圣德如出一口皆云方今皇族奉朝谒者八百余人陛下仁孝聪明爲之首冠知人疾苦识其情僞节俭爱物刚果能断既美先帝知人之明又庆已身逢时之幸涕泣共谈悲喜相半臣愚以爲昔汉惠帝无子而得文帝仁俭恭百姓富饶几致刑措昭帝无子而得宣帝勤惠明断吏良民乐号称中兴然则国无嗣子而旁亲入继未必不爲天意福佑社稷而光启圣贤也私心自幸又甚於衆人俄而圣躬有疾上下之人思杀身爲牲粉骨爲药庶祈早瘳以观圣政不意数月之後道涂之议稍异於前颇有谤言不专称美逮乎周岁之外则颂者益寡谤者益多臣窃伏於阙门之外日闻衆论不胜怅恨痛心疾首昼而忘食夕而忘寝爲陛下深思其故终不能明意者陛下於举动循守之间万一有所未思乎敢以愚虑言之盖有三焉惟陛下寬其罪使得毕其辞窃以皇太后仁明之德爰自先朝布闻四方加之保育圣躬在於襁褓陛下入承大统不可谓全非皇太后之力当陛下初得疾之时外间传言皇太后於先帝梓宫之前爲陛下叩头祈请願爲之伤如此岂可谓无慈爱之心於陛下哉不幸爲谗贼之人交相离间遂使两宫之情介然有隙就使皇太后有不慈於陛下陛下爲人之子安可校量曲直遂生忿恨而於爱恭之心有所不备乎传曰大德灭小怨先帝擢陛下於衆人之中自防御使升爲天子唯以一后数公主属於陛下而梓宫在殡已失皇太后

之欢心长公主数人皆屏居闲宫希曾省见臣请以小喻大设有闾里之民家有一妻数女及有数亩之田一金之产老而无子养同宗之子以爲後其人既没其子得田产而有之遂踈母弃妹使之愁愤怨叹则邻里乡党之人谓其子爲何如人哉以匹夫而爲此行犹见贬於乡里况以天子之尊爲四海所瞻仰哉此陛下所以失人心之始也先帝天性寬仁重违物意晚年嬰疾厌倦万几遂以天下之事悉委之两府两府或见有所偏或意有所私取舍黜陟未必皆当又巧设幸门进拔所爱超资越级欺罔衆人抑压孤寒无所伸愬及陛下即位皆谓必能奋发乾刚昭明君德收取威福复还王室进贤退愚赏善罚恶使海内廓然立见太平而陛下益事谦逊深自晦匿凡百奏请不肯与夺动循旧例不顾事情谨於细务忽於大体知人之贤不能举知人不肖不能去知事之非不能改知事之是不能从大臣专权甚於先朝率意差除无所顾忌或非材而骤进或有罪而见寬此天下所以重失望也臣闻书曰木从绳则正后从諫则圣是以尧稽於衆舍己从人舜好问而好察迩言禹闻善言则拜汤用人惟已改过不吝此四圣人者岂其才智之不足哉然犹孜孜汲汲下询愚贱之人者盖以四海之广万几之衆非一人所能独知必资天下之耳目思虑然後能曲尽其理也陛下圣质虽美亦当取法於尧舜禹汤而即政以来或意有所见执之不移如坚守严城御敌外寇使羣臣之言皆无自而入殆非所以纳百川而成巨海也孔子曰人之言曰予无乐乎爲君唯其言而莫予违也如其善而莫之违也不亦善乎如不善而莫之违也不几乎一言而丧邦乎是故明君之於聽纳无彼无我无亲无疎无先无後唯其是而已矣若重我所有而轻彼所陈信其所亲而疑其所贱主先入之言而拒後来之议则虽有是者亦不可得而见矣夫人心之所好者视丑以爲美所恶者视善以爲恶苟能以平心察之则是非易见矣书曰有言逆于汝心必求诸道有言逊于汝志必求诸非道若必待合於圣意则悦而从之不合则怒而弃之臣恐谗谄日进方正日踈殆非所以增社稷之福也又国家置台諫之官爲天子耳目防大臣壅蔽朝廷政事皆大臣相与裁定然後施行而台諫或以异议干之陛下当自以圣意察其是非可行则行可止则止今乃复付之大臣彼安肯以已之所行爲非而以佗人所言爲是乎此乃陛下所以独取拒諫之名而大臣坐得专权之利者也夫以君相之重何啻泰山贱臣之轻何啻鷄卵乃欲相与校其胜负臣固知其不敌矣是以四方怀忠之士愿效区区者皆望风不进结舌沮气此天下所以又失望也凡此三者臣皆知其不可而上畏严诛下避怨怒莫敢以此极言闻於陛下使海内愤鬱之气积而不发宜其有以感动天地之和矣臣闻天意保佑王者故爲之下灾异以譴告之若王者恐惧修省则非徒免一时之害又将有福祿随之商之太戊武丁周之成宣是也若傲忽不顾非徒爲害於一时又将有危亡之祸汉之成哀桓灵是也今灾异之来意者皇天亦将保佑陛下以成商周之美乎臣愿陛下上稽天意下顺人心於此三者皆留圣念奉事皇太后愈加孝谨务得驩心诸长公主时加存抚无令失所总挈大柄勿以假人选用英俊循名责实赏功罚罪舍小取大剗塞弊幸一新大政延纳谏言虚心从善皆行之以至诚非特爲空言而已夫至诚可以动金石而况人乎不诚不足以感匹夫而况天乎诗云无曰高高在上陟降厥土日监在兹天虽至高视听甚迩人之所爲发於中心则天已知之固不待见其容貌形於声音也陛下果能尽诚於此则圣德日新令名四达人心既悦天道自和百谷蕃昌嘉瑞并至蛮夷率服福流子孙矣臣自知不才无补朝廷然不敢遂自塞嘿复有所陈惟陛下载察臣光昧死再拜上疏

乞节用上殿劄子【治平二年八月十四日上】

臣窃见国家公私穷窘固非一日今兹复遇大灾畿内秋田荡无子遗仓廩储蓄率多败坏府库钱帛散用将尽必恐今冬饥馑甚於去年军民嗷嗷无以赈救经费不足重以郊礼此乃国用危急之时不可不早以爲忧今取之於内帑则内帑已虚收之於外方则外方已尽敛之於下民则下民已竭不知朝廷将何以爲计臣愚以爲若非陛下侧身克己痛自节约则无以应答天意感慰民心使昏垫者忘其悲愁馁死者无所怨嗟也臣闻节用之道必自近始伏望上自乘舆服御之物下至颖王公主婚嫁之具悉加裁损务从俭薄勿信主者以旧例爲言出六宫冗食之人使之从便罢後苑文思院所造淫巧服玩止诸处不急之役然後命有司考求在外凡百浮费之事皆一切除去羣臣非有显然功效益国利民者勿复滥加赏赐将来南郊自非牺牲玉帛供神之物其余青城仪仗之类止於奉车驾备外饰者亦令有司与礼官同共参详减省臣闻国有凶荒则杀礼事天者贵於内诚而贱外物是故器用陶匏席用橐秸况於青城仪仗之类何爲不可减乎凡此数者唯在圣意断而行之固不可与庸俗之人执文泥例者谋之也取进止

乞令朝臣转对劄子

臣窃见祖宗之时累曾令朝臣转对或遇灾异更广求直言真宗咸平景德之间询访尤切其诏书云涉诋讦者固可优容乏词藻者许其直致是时羣臣上书言事者日不下百余封每戒敕合门令疾速进入诏枢密直学士冯拯陈尧叟令详定以闻所以然者不惟考时政之得失亦以观羣臣之能否也是故太宗时得寇準真宗时得张知白皆因上书言事骤加擢用後爲宰相俱着名迹景德元年六月内出朝士边肃等二十四人姓名令於崇政殿引对在外者驿召赴阙其後稍稍进用多爲名臣此皆近事易法者陛下践阼未久羣臣能否恐未徧知欲乞依祖宗旧制每遇内殿起居日常令朝臣两人转对其余在京及外处臣僚有欲上书言事者所在官司皆不得壅滞彼必欣然承命各竭所怀然後陛下亲加省览必有所得若上书者稍多陛下不能一一徧观即乞择近臣识虑明达用心公正者二人先次看详但求理道切当不取文辞华美分爲数等各以贴黄节出事宜置之於前然後奏御陛下更以圣意择其善者特令引对面加询访若实有可采其所言之事即爲施行仍於禁中籍记姓名每遇有重难公事试委之干办後果有功效乃加进用如此则天下之才尽在目前可以器使虽尧舜之世嘉言罔攸伏野无遗贤亦不是过也不然若但循故事止作虚名所上之书未必省览虽复省览亦无施設则无益於事不如不爲也取进止

乞不受尊号劄子【治平二年九月五日上由是羣臣五上表终不允】

臣闻谦德之美尊而益光施之神人无不悦顺窃见陛下将有事于南郊羣臣循袭故事请上尊号以陛下叡智聪明徽柔懿恭享兹鸿名云何不可正以属者暴雨爲灾五稼漂没编户失业吁嗟之声盈於道路迄今未息陛下当此之际正宜深自抑损以承答天譴慰释衆心况尊号非古近出有唐陛下受而有之不足以褒大圣功推而不居足以发挥盛德所有羣臣上尊号表伏乞陛下拒而勿受仍令更不得上表此亦区区微诚欲裨益万分之一也取进止

言濮王典礼劄子【治平二年八月十七日上】

臣闻圣人举事与衆同欲故能下协人心上顺天意洪范曰三人占从二人言盖国有大疑则决之於衆自上世而然矣臣伏见曩者诏羣臣议濮安懿王合行典礼翰林学士王珪等二十余人皆以爲宜准先朝封赠期亲尊属故事凡两次会议无一人异辞所以然者盖欲奉濮王以礼辅陛下以义也而政府之意独欲尊濮王爲皇考巧饰词说误惑圣听不顾先王之大典蔑弃天下之公议使宗室疎属皆已受封赠而崇奉濮王之礼至今犹未施行此衆人所以怫鬱而未爲称愜者也或者恐陛下未能决知二议是非臣请更爲陛下别白言之政府言仪礼令文五服年月勅皆云爲人後者爲其父母即出继之子於所继所生皆称父母臣按礼法必须指事立文使人晓解令欲言爲人後者爲其父母之服若不谓之父母不知如何立文此乃政府欺罔天下之人谓其皆不识文理也又言汉宣帝光武皆称其父爲皇考臣按宣帝承昭帝之後以孙继祖故尊其父爲皇考而不敢尊其祖爲皇祖考以其与昭帝昭穆同故也光武起布衣诛王莽亲冒矢石以得天下名爲中兴其实创业虽自立七庙犹非太过况但称皇考其谦损甚矣今陛下亲爲仁宗之子以承大业传曰国无二君家无二尊若复尊濮王爲皇考则置仁宗於何地乎政府若以二帝不加尊号於其父祖引以爲法则可矣若谓皇考之名亦可施於今日则事理不侔矣设使仁宗尚御天下濮王亦万福当是之时命陛下爲皇子则不知谓濮王爲父爲伯若先帝在则称伯没则称父臣计陛下必不爲此行也以此言之濮王当称皇伯又何疑矣今举朝之臣自非狭奸佞之心欲附会政府误惑陛下者皆知濮王称皇考爲不可则衆志所欲亦可知矣陛下何不试察羣臣之情羣臣谁不知濮王於陛下爲天性至亲若希旨迎合不顾礼义过有尊崇岂不於身有利而无患乎所以区区执此议者但不欲陛下失四海之心受万世之讥耳以此观之羣臣之忠佞邪正甚易见矣臣愿陛下上稽古典下顺衆志以礼崇奉濮安懿王如王珪等所议此亦和天人之一事也取进止

乞改郊礼劄子【治平二年八月上】

臣闻古者天子亲祀上帝一岁有九国朝之制天子三岁一郊仍於其间改用他礼者甚衆岂奉天之意有所倦畧哉盖事有不得已者也臣窃见国家帑藏素空重以暴雨为灾圆丘之侧流潦尚深青城之材颇多散失仪仗法物损败非一今若悉加完葺恐难猝备加以冬寒将近诸营漂没失其生业屋宇败坏衣褐俱尽陛下傥欲别加振救亦恐力所不支昔太宗太平兴国九年下诏东封寻以火灾而止更用郊礼又淳化三年下诏祀圆丘亦以事故更用明年祈谷今灾变至大国用不足臣谓不可不小有变更若因兹天譴随时损益以九月十月之间於大庆殿恭谢天地亦足以展纯洁之诚昭寅畏之志减省大费安慰衆心事无便於此者陛下傥以为可愿决意早行之

辞龙图阁直学士状【治平二年十月六日上】

右臣准阁门告报已降勅命除臣依前尚书吏部郎中充龙图阁直学士散官差遣并依旧者臣尘忝谏职於今累年曾无丝毫裨益盛德自非圣度含容岂免诛责每自循省心不遑安曩亦屡曾奏陈乞补外任天听未允黽勉至今不敢频有祈请以取烦渎之罪岂意大恩复加褒进慙惧失措若坠冰炭臣虽庸愚何敢膺受伏望圣慈矜悯曲从所欲许臣只以旧职知河中府或襄虢晋绛一州使竭其弩蹇之分以酬天地生成之施臣不胜大幸所有龙图阁直学士

勅告不敢只受

辞龙图阁直学士第二状

右臣近曾进状乞以旧职知河中府或襄虢晋绛一州所有龙图阁直学士勅告不敢祇受自後未奉指挥者臣伏覩真宗皇帝天禧元年初置谏官诏书节文俟及三年或职业无闻公言罔覩移授散秩仍遣监临臣自嘉佑六年七月初入谏院供职到今已涉五年智能浅薄志气庸懦不能阐发大猷补助圣政窃禄偷安虚损岁月譴黜之典已为後时今乃使之叨冒宠名仍留旧任臣犹自愧况於侏人是以前陈庶几烛察若朝廷矜其愚昧未用天禧诏书特行责降伏乞依臣前奏许以旧职知河中府或襄虢晋绛一州所有除龙图阁直学士勅告不敢只受

辞龙图阁直学士第三状【寻得旨免谏职余依前降指挥】

右臣近两次进状乞以旧职知河中府或襄虢晋绛一州准中书劄子奉圣旨不许辞免便令受告勅者臣承乏谏职首尾五年自国朝以来居此官者未有如臣之久臣资性愚戆惟知报国竭尽朴忠与人立敌前後甚衆四海之内触处相逢常恐异日身及子孙无容足之地以此朝夕冀望解去如处沸鼎之中思寒泉之救但以职当言路不敢无故求出盘桓强留以至今日不意朝廷更加獎擢授以美职仍居旧任既荷宠禄则猝无得去之期祸败罪诛必不可免是以人用为喜臣独为忧人用为荣臣独为惧四顾徊徨无所伏窜进退失图诚可矜哀惋不诉於君父使之何所依投伏望圣慈悯其久在谏职使得息肩於外依臣前奏则以旧职知河中府或襄虢晋绛一州所有新除龙图阁直学士勅告更不敢只受

传家集卷三十六

卷三十七

<集部,别集类,北宋建隆至靖康,传家集>

钦定四库全书

传家集卷三十七 宋 司马光 撰章奏二十

乞经筵访问上殿劄子【治平二年十月上】

臣以弩朽得侍劝讲窃见陛下天性好学孜孜不倦然於经席之中未尝发言有所询问臣愚意陛下欲护羣臣之短恐於应对之际仓猝失据不能开陈稠人之中受其愧作此诚圣心仁恕之极羣臣捐躯无以报塞然臣闻易曰君子学以聚之问以辨之论语曰疑思问中庸曰有弗问问之弗知弗措也有弗辩辩之弗明弗措也以此言之学非问辨无由发明今陛下若皆默而识之不加询访虽爲臣等踈浅之幸窃恐无以宣畅经旨裨助圣性伏望陛下自今讲筵或有臣等讲解未尽之处乞赐诘问或虑一时记忆不能详备者许令退归讨论次日别具劄子敷奏庶几可以辅稽古之志成日新之益取进止

乞令选人试经义上殿劄子【治平二年十二月十七日上】

臣窃见国家旧制资?出身人初授差遣者并令审官院流内铨试省格诗或赋或论一首或五经墨义十道各从其便其赋论墨义徒有其名无人愿试大率皆乞试诗其间甚有假手於人真偽难辨就使自能作诗辞采高妙施於治民亦无所用不可以此便爲殿最臣欲乞今後应资?出身人初授差遣者并委审官院流内铨试孝经论语大义共三道仍令主判臣僚更将所对义面加询问使之口说若义理精通者特爲一等并所试大义卷子保明闻奏京官与减一任监当选人并与家便差遣合入家便者与先次其义理稍通者依常调不通者且令修学候一周年外再试必须试中方得出官若年四十以上者即听依旧制只写家状读律如此则公卿大夫子弟皆向学知道亦近於先王教胄子之术也取进止

论追尊濮安懿王爲安懿皇劄子【治平三年正月二十三日上】

臣闻诸道路未知信否或言朝廷欲追尊濮安懿王爲安懿皇审或如此窃恐不可陛下既爲仁宗後於礼不得复顾私亲臣先时言之已熟不敢复烦圣听今臣不知陛下之意固欲追尊濮王者欲以爲荣耶以爲利耶以爲有益於濮王耶前世帝王以旁支入继追尊其父爲皇者自汉哀帝爲始其後安帝桓帝灵帝亦爲之哀帝追尊其父定陶恭王爲恭皇今若追尊濮安懿王爲安懿皇是正用哀帝之法也陛下有尧舜禹汤不以爲法而法汉之昏主安足以爲荣乎仁宗恩泽在人沦於骨髓海内之心所以归附陛下者爲亲受仁宗之命爲之子也今陛下

既得天下乃加尊号於濮王海内闻之孰不解体又安足以爲利乎夫生育之恩昊天罔极谁能忘之陛下不忘濮王之恩在陛下之中心不在此外饰虚名也孝子爱亲则祭之以礼今以非礼之虚名加於濮王而祭之其於濮王果有何益乎三者无一可而陛下行之臣窃惑之此盖政府一二臣自以臯者建议之失已负天下之重责仍欲文过遂非不顾於陛下之德有所亏损陛下从而听之臣窃以爲过矣臣又闻政府之谋欲托以皇太后手书及不称考而称亲虽复巧饰百端要之爲负先帝之恩亏陛下之义违圣人之礼失海内之心政府之臣祇能自欺安能欺皇天上帝与天下之人乎臣愿陛下急罢此议勿使流闻达於四方则天下幸甚臣今虽不爲諫官然臯日已曾奏闻身备近臣遇国家有大得失不敢不言取进止

留吕海等劄子【治平三年三日八日上】

臣闻人主患在不闻其过人臣患在不能尽忠是故忠直敢言之臣国家之至宝也夫以人主之尊下临羣臣和顔色以求諫重爵赏以劝之羣臣犹畏懦而不敢进又况憚之以威惩之以刑则嘉言何从而至哉窃闻侍御史知杂事吕海侍御史范纯仁监察御史里行吕大防因言濮王典礼事尽被责降中外闻之无不骇愕臣观此三人忠亮刚正忧公忘家求诸羣臣罕见其比今一旦以言事太切尽从窜逐臣窃爲朝廷惜之臣闻人君所以安荣者莫大於得人心今陛下徇政府一二人之情违举朝公议尊崇濮王过於礼制天下之人已知陛下爲仁宗後志意不专怅然失望今又取言事之臣羣辈逐之臣恐累於圣德所损不细闾里之间腹非窃叹者多矣况纯仁大防皆陛下简拔於衆人之中任以爲耳目之臣盖取其忠直非取其阿諛也纯仁大防亦欲竭诚尽节以报陛下之知故敢不附政府侃然正论今更以此获罪则陛下於羣臣之中尚谁亲哉若使忠直日退阿諛日进则陛下何以复知臣下之善恶政事之得失如此殆非国家之福也伏望圣慈亟令海等还台供职则天下翕然皆歌陛下之圣明虽禹之乐闻善言汤之改过不吝不是过矣不则且爲之别改近地一官亦可以少慰外人之心也取进止

留傅尧俞等劄子【治平三年三月八日上】

臣近曾上殿蒙圣恩宣谕以濮王称亲事云此亲字官家亦本不欲称假使只称濮王与仙游县君有何不可臣乃知陛下至公本无过厚於私亲之意直爲政府所误以致外议纷纭必谓旦夕下诏罢去亲名其已出台官当别有除改见在台官亦优加抚谕使之就职昨日忽闻侍御史知杂事傅尧俞知和州侍御史赵鼎通判淄州赵瞻通判汾州中外之人无不惊愕此盖政府欲闭塞来者使皆不敢言然後得专秉大权逞其胷臆臣窃惟陛下春秋方壮圣德钦明而今日独取拒諫之名受孤恩之谤违天下之望失人主之权止於遂政府数人狠心而已不知於陛下有何所利而爲之臣不胜区区深爲陛下痛惜伏望陛下勿复询於政府特发宸断召还尧俞等下诏更不称亲如此则可以立使天下愤懣之气化爲驩欣诽谤之语更爲讴歌矣取进止乞与傅尧俞等同责降上殿劄子【治平三年三月十一日上】

臣昨任諫官日与其余台官等同共论列濮王典礼不宜称尊号及皇考事前後非一臣等蒙恩改龙图阁直学士臣屡曾辞免乞以旧职知河中府等一处朝廷不许止免諫职今同知諫

院傅尧俞侍御史知杂事吕诲侍御史范纯仁赵鼎赵瞻监察御史里行吕大防并已责降若所言濮王事合於典礼则尧俞等不当窜逐若所言非是则臣不宜独免况同时台谏官窜逐已尽臣实无颜尚居故位同罪异罚有累公朝伏乞与傅尧俞等一例责降取进止

乞责降第二劄子【治平三年三月十四日上】

臣於今月十一日上殿以先任谏官日论列濮王事不当乞赐责降陛下令纳下劄子不送中书臣以负罪在身不可苟免若不得臣劄子中书无以进呈行遣遂於次日具録劄子副本缴申中书臣又有此固违圣旨之罪乞付外施行早赐责降取进止

乞责降第三劄子

臣於今月十一日上殿乞与傅尧俞等一例责降十三日又曾自陈固违圣旨之罪至今未奉指挥臣竊於陛下即位之年四月二十七日已曾上疏豫戒追尊祖父之事及政府请议濮王典礼陛下令候过仁宗大祥别取旨臣与傅尧俞甫过大祥即诣政府白以爲人後者不得顾私亲之议及诏两制礼官同共详定之日臣又独爲衆人手撰奏章若治其罪臣当爲首其吕诲等并系後來论列已蒙遣逐况如臣者岂宜容恕纵陛下至仁特加保庇臣能不愧於心伏望圣慈依臣前奏早赐责降其竊所上疏窃虑年月稍久禁中遗失今别録进呈取进止

乞责降第四劄子【次日中使刘温直宣赴迓英阁上面谕令供职】

臣自今月十一日以来已曾三次奏乞与傅尧俞等一例责降未蒙开允今又准中书劄子以侍讲钱象先奏乞催臣依旧赴经筵供职奉圣旨令疾速朝参供职者臣仰荷大恩所宜奔走奉承诏旨然臣退循义理有所未安是以不敢苟贪荣禄须至重有敷陈臣与傅尧俞等七人同爲台谏官共论濮王典礼凡尧俞等所坐臣大约皆曾犯之今尧俞等六人已蒙圣恩尽得外补独臣一人尚留阙下使天下之人皆谓臣始则唱率衆人共爲正论终则顾惜禄位苟免刑章臣虽至愚粗惜名节受此指目何以爲人非徒如是而已又使讥谤上流谓国家行法有所偏颇臣是用昼则忘餐夕则忘寝入则愧朝廷之士出则慙道路之人藐然一身措之无地虽知违犯天威负罪愈重岂敢更复朝参供职伏望圣慈曲垂矜察依臣前奏早赐责降取进止

请不受尊号劄子【治平三年十一月十七日上】

臣闻王者父天母地子育黎元严恭鬼神畏惧灾异故能安靖国家飨有多福自生民以来不易之道也天虽至高视听甚迓朝夕不离王者左右顺吉逆凶应若影响此乃诗书所载圣人所言岂可谓之漠然无知而简忽不顾哉臣伏见陛下践阼以来太阳侵色中有黑子大风昼晦冬温无水连年大水漂没庐田以至今岁灾异尤甚彗星彰见光炎隆炽朝东暮西连月乃灭飞蝗害稼日有食之加之陕西河东夏秋乏雨禾既不收麦仍未种妇子恟惶流离满路西戎内侮边鄙未安当此之际羣臣宜劝导陛下以祇畏天命勤恤民隐克已谦约博求至言以

消复变咎延致善祥而朝廷晏然曾不爲意或以爲自有常数非关人事或以爲景星嘉瑞更当有福今者又有佞臣建议请上尊号其爲欺蔽上天罔诬海内孰甚於此是使上帝鬼神怫鬱不悌自拜表以来陛下嬰此疾疹久而未愈此皆羣臣谄諛之罪陛下岂得不省寤而深思哉臣不胜区区忘生触死伏望陛下自以圣意止羣臣所上表章却尊号而勿受更下诏书深自咎责咨谋四方广开言路求所以事天养民转灾爲福之道俟圣体康复政化流通天时丰穰人心悦豫然後推崇徽称何晚之有如此庶几上帝收还威怒福祿大来圣躬和平勿药有喜羣生百姓莫不幸甚况陛下薨者郊礼之前辞尊号不受天下称诵盛德至今未已然则是弃虚名而得实名舍虚美而取实美也於陛下何损焉臣荷国大恩承乏侍从诚见近日羣臣皆以言爲讳入则拜手稽首请加鸿名出则错立族谈腹非窃笑终无一人爲陛下正言其不可者臣窃痛之是敢妄进狂瞽惟圣明采察取进止

议祧迁状【治平四年闰三月上】

右臣准学士院告报以大行皇帝神主祔庙僖祖神主当迁夹室准朝旨令待制以上同议者臣先於禧佑八年仁宗祔庙之时已曾与龙图阁直学士卢士宗上言僖祖当迁夹室当时议臣皆不以爲然朝廷遂从衆议臣谨按王制称天子七庙三昭三穆与太祖之庙而七明太祖之外止有三昭三穆而已是以前代帝王於太祖未正东向之时大率所祀不过六世若僖祖於今日方议祧迁则是太祖之外更有四昭三穆与太祖之庙而八不合先王典礼难以施於後世臣愚以爲仁宗祔庙之时僖祖已当迁於夹室今大行皇帝祔庙顺宗亦当迁於夹室臣既承诏旨令得与议不敢不尽所见以对伏乞朝廷更赐详择今録嘉佑八年奏议一本谨具状缴连奏闻

辞翰林学士第一状【治平四年闰三月二十九日上】

右臣窃闻已降勅告在合门除臣翰林学士者臣闻人臣之义陈力就列不能者止臣自从仕以来佩服斯言不敢失坠顷事仁宗皇帝蒙恩除知制诰臣以平生拙於文辞不敢滥居其职沥恳固辞仁宗皇帝察其至诚遂赐开许今翰林学士比於知制诰职任尤重固非愚臣所能堪称闻命震骇无地自处况臣於先皇帝时以久宦京师私门多故累曾进状乞知河中府或襄虢晋絳一州後值国有大故及所修君臣事迹并未经奏御以此未敢更上文字日近方欲再有陈乞不意忽叨如此恩命臣虽顽鄙粗能自知非分之荣必不敢受伏望圣慈察臣非才不堪此任特赐哀矜遂其微志许以旧职知河中府或襄虢晋絳一州若此数处未有阙即乞於京西陕西路除一知州差遣如此则上不累公朝之明下不失私家之便诚爲大幸干冒宸严臣无任惶恐恳切之至

辞免翰林学士第二状

右臣近於闰三月二十九日曾进状辞免新除翰林学士恩命乞一知州差遣至今未奉朝旨者臣窃以唐室以来士人所重清要之职无若翰林自非天下英才声称第一详识典故富有文章虽欲冒居岂厌衆意臣禀赋顽钝百无所堪在於属辞尤爲鄙拙安敢强顔辄爲此职人

虽不言能不内愧是用输肝沥胆贡实自归惟仁圣鉴其中愀力少任重慙惧交攻坐炭履冰未足爲谕特遂所志使之自安天地至恩无以过此所有翰林学士勅告臣不敢祇受伏乞依臣前奏只以旧职於晋絛或京西陕西路除一知州差遣干冒宸严无任惶恐恳切之至

辞免翰林学士上殿劄子【治平四年四月十三日上】

臣近蒙圣恩除翰林学士已曾两次进状辞免乞一知州差遣奉圣旨不允令便受勅告者臣非不知美官难得诏旨难违然所以须至再三烦渎天听者诚以人之材性各有短长人君当量能授官人臣当陈力就列如此则事无旷废上下得宜臣自幼小以来虽稍曾读书而稟性愚钝拙於文辞若使之解经述史或粗有所长至於代言视草最其所短今若苟贪荣宠安居此职万一朝廷有大号令或除拜稍多臣才思竭涸必至阁笔纵使勉强得成其鄙恶必甚以之宣布四方使共传笑岂惟彰微臣之丑亦恐爲朝廷之羞此臣所以宁犯谴怒之诛而不敢当清华之选者也陛下若察其至诚知非矫饰特赐哀矜寝罢新命则是掩臣所短全臣所长生成之恩孰大於此况臣自通判并州得替住京十有余年去岁兄里身亡孤遗无人照管臣累曾奏先帝乞家便一官亦蒙圣恩许候修书畧成规矩即除外任无何先帝奄弃天下臣哀荒失图未敢叙陈近方欲具所修前汉纪三十卷先次进呈然後以私恳上干陛下圣听不期忽有今兹恩命诚非愚臣本心所愿忧惶局蹐无所容措伏望圣慈依臣前奏只以旧职於晋絛州或京西陕西路除一知州差遣所有翰林学士勅告臣不敢祇受取进止

乞王陶只除旧职劄子【治平四年四月二十二日上】

臣昨日召对蒙恩赐示以吴奎所上劄子爲直除王陶翰林学士家居待罪事臣寻已曾据所见敷奏陛下始欲止还陶旧职後又欲与陶侍读学士臣当时忽遽未有以对退爲陛下经宿思之侍读学士与翰林学士资级畧同若授陶此职臣恐奎尚未肯起陛下新即尊位大臣屡有不安其位者奎素有质直之名万一因此激发举动更有过当若亟行罢免则深失士大夫之望若屡诏不起则愈损陛下之威况陶本以言事不听辞免台职待罪之际若更加以美官臣窃料陶亦不敢受欲望圣慈止还陶未作御史中丞时旧职则奎前者已经商量不敢不起陶既是旧职受之亦安庶免更有纷纭重伤朝廷大体臣蒙陛下虚已下问愚虑窃以此爲便不敢不奏乞赐详择取进止

传家集卷三十七

卷三十八

钦定四库全书

传家集卷三十八 宋 司马光 撰章奏二十一

留吴奎劄子【治平四年四月二十四日上】

臣窃闻王陶除枢密直学士知陈州吴奎除资政殿学士知青州外议籍籍皆以爲奎不当去所以然者盖由奎之名望素重於陶虽今者封还诏书径归私第举动语言颇有过差然外廷之人不知本末但见陛下爲陶之故罢奎政事其罚太重能不怪骇如此臣恐其余大臣皆不自安各求引去陛下新登大宝先帝梓宫在殡若举朝大臣纷纷尽去则於四方观听殊似非宜臣愚欲望陛下收还奎青州勅告且留奎在政府以慰士大夫之望安大臣之意陛下以奎违诏而黜之威令已行嘉奎质直而留之用意尤美奎始负大谴慑服陛下之英断终蒙开释衔戴陛下之深恩上下驩悦诚无所损昔汉高帝疑萧何受贾人金械系於狱感王卫尉一言赦令复位君臣恩礼相待如初况於出入之间何爲不可复留也陛下素知臣非朋附大臣之人故敢不避形迹极意尽言但爲朝廷惜大体耳乞赐裁察取进止

初除中丞上殿劄子

臣闻澄其原则流清固其本则末茂臣蒙陛下圣恩拔於衆臣之中委以风宪天下细小之事皆未足爲陛下言之敢先以人君修心治国之要爲言此诚太平之原本也臣闻修心之要有三一曰仁二曰明三曰武仁者非姬煦姑息之谓也修政治兴教化育万物养百姓此人君之仁也明者非烦苛伺察之谓也知道义识安危别贤愚辨是非此人君之明也武者非强亢暴戾之谓也惟道所在断之不疑奸不能惑佞不能移此人君之武也故仁而不明犹有良田而不能耕也明而不武犹视苗之秽而不能耘也武而不仁犹知获而不知种也三者兼备则国治强阙一焉则衰阙二焉则危三者无一焉则亡自生民以来未之或改也治国之要亦有三一曰官人二曰信赏三曰必罚夫人之才性各有所长官之职业各有所守自古得人之盛莫若唐虞之际然稷契臯陶垂益伯夷夔龙各守一官终身不易苟使之更来迭去易地而居未必能尽善也故人主诚能收采天下之英俊随其所长而用之有功者劝之以重赏有罪者威之以严刑譬如乘轻车驾骏马总其六辔奋其鞭策何往而不可至哉昔仁宗皇帝之时臣初爲諫官得上殿首曾敷奏此语先皇帝时臣曾进历年图又以此语载之後序今幸遇陛下始初清明之政虚心下问之际臣复以此语爲先者诚以臣平生力学所得至精至要尽在於是愿陛下勿以爲迂阔试加审察若果无可取则臣无所用於圣世矣取进止

乞罢详定宰臣押班劄子【治平四年上】

臣窃闻宰臣复有文字乞下礼官详定合与不合押班臣闻王者设官分职譬犹一体以宰相爲股肱以台諫爲耳目固当同心协力以佐元首若各分彼此互争胜负欲求其身之安何由可得近者御史中丞王陶请宰相依旧制赴文德殿押班宰相若从其所请岂有後來纷纭乃坚执不行迭相激发遂致王陶语言过差今王陶既补外官宰相已赴押班臣谓朝廷可以无事矣而宰臣复有此奏万一礼官有希旨迎合者以爲宰相不合押班台司欲默而不言则朝廷之仪遂成隳废欲辨论是非则与前日之事有何所异是鬪讼之端无时休息也陛下新即天位四方之人举首倾耳以观大化而朝廷不闻肃雍济济之风数有变色分争之丑臣窃爲陛下惜之况今灾异屡降饥饉洊臻官多而用寡兵衆而不精冗费日滋公私困竭戎狄桀傲边鄙无备百姓流亡盜賊将起朝廷夙夜所忧宜以此数者爲先而以余事爲後伏望陛下特降圣旨令宰臣依国朝旧制押班所有下礼院文字乞更不令详定取进止

留韩维吕景劄子【治平四年五月十二日上】

臣窃闻已有指挥龙图阁直学士韩维差知颍州侍御史吕景与堂除通判未知信否臣愚窃见韩维沈静方雅於陛下畴昔宫僚之中最有美誉今者无故称病求出外人皆不知其故吕景浑厚刚直於今日言事之臣亦爲难得其人身爲台官坐言事罚铜诚使羞辱难以立朝不若得贬窜之爲快也然二人者皆陛下腹心耳目之良臣一旦俱从外补於二人甚爲私便臣窃爲陛下惜之伏望圣慈更赐详度或且留之左右使拾遗补阙诚有所裨益必若不可留者其台官乞更不举人只於旧台官吕大防郭源明马默等数内断自圣意选择一人以补其阙所贵得质直之人克厌衆心取进止

乞御殿劄子【治平四年五月十五日上】

臣窃见今月十五日陛下以服药不受慰羣臣无不忧疑臣窃惟万乘之主起居动静系天下安危况今国家多事之际尤宜深思远虑若来日圣体全未得安臣不敢言若稍得痊愈伏望陛下勉强御前殿或後殿暂见羣臣若有奏事久不退者虽谕以近新服药难爲久坐使之且退亦无所害但使羣下畧得瞻望清光则中外之心自然安帖取进止

论宰臣押班劄子

臣伏觀今月七日勅文准四日手诏今後宰臣赴文德殿押班自春分後或遇辰牌上秋分後遇辰正牌上垂拱殿视事未退止令传报宰臣更不过令御史台一面放班余日并依祥符勅命指挥永爲定制所有前降下太常礼院详定文字更不施行者臣窃见从来垂拱殿视事比至中书枢密院及其余臣僚奏事毕春分以後少有不过辰初秋分以後少有不过辰正自陛下临御以来惟近因服药曾於辰牌以前驾起入内自余皆在辰牌以後然则自今以往无事之日宰臣永不赴文德殿押班也臣窃惟文德殿爲天子正衙宰臣爲百僚师率百僚既在彼常朝则宰臣理当押班斯乃前世旧规自祖宗以来未之或改今陛下即位之始事非有大利害者恐未须更张伏望陛下特降圣旨令宰臣一依国朝旧制押班若陛下以前者已降手诏必欲限以时刻者即乞自春分後遇辰正牌上秋分後已牌上并依今月四日指挥施行犹庶

几此礼不至遂废取进止

乞访四方雨水劄子【治平四年五月十九日上】

臣窃见陛下近以久旱爲灾分命使者徧祈岳渎靡神不举精诚感通甘雨降集诚中外之大庆然暑月暴雨多不广远臣窃虑四方州县尚有未沾足之处王者以天下爲家无有远迩当视之如一不可使惻隐之心止於目前而已今者京城虽已得雨伏望陛下不可遽以爲秋成可望怠於忧民凡内外臣僚有新自四方来者进对之际皆乞访以彼中雨水多少苗稼如何谷价贵贱闾阎忧乐互相参考以验虚实既可以开益陛下聪明日新盛德又使远方百姓皆知陛下烛见幽远无所遗忽衔戴上恩倾心归附又使州县之吏皆知陛下悯恤黎元留心稼穡不敢自恃僻远残民害物陛下一发德音而收此三善非独可以行之今日亦愿陛下永久行之诚天下幸甚取进止

乞简省举御史条约上殿劄子【治平四年五月二十二日上】

臣闻法制之设贵於简要而失在烦苛官人之道以得贤爲本而资序爲末昔东汉之衰立三互之法婚姻之家及两州人士不得对相监临以是幽冀二州久缺不补蔡邕尝上疏极陈其弊然则详其末而遗其本非治世之政也伏见国家每选御史官须中行员外郎以下太常博士以上差遣须通判资序其余条约甚多是以百僚之中可举者至少举而得中者尤稀近日以来爲弊益甚盖以屡有覃恩官品多高而差遣未至幸而有资序相值者则又未必贤矣夫御史之职但当求忠亮方正之人区区资序何足比较臣愚欲望朝廷自今每举御史其前行员外郎以上即以本官兼侍御史三丞以下及知县资序即且充里行不复更须逐次陈请庶几取人路广有可选择取进止

上听断书【治平四年五月二十四日上】

月日具位臣光昧死再拜上书皇帝陛下臣材识弩钝陛下过聽擢备宪司臣夙夜尽心以思厥职陨首捐躯无足爲报窃见近岁以来政府言职迭相攻毁分爲两朋有如讎敌所以然者盖由人臣各务逞其私志互争胜负不顾已之是非人主不忍违逆人情两加全护不肯判其得失是以羣下纷纷日鬪於前而朝廷爲之多事者也臣伏见陛下天性聪明仁孝恭俭践阼之初孜孜求治此诚尧舜之资羣生之福也羣臣幸得遭遇此时不务将顺圣德纪纲治体革政事之久弊救百姓之疾苦而各爲私鬪不知穷极诚可罪也臣闻人君之尊与天地同体以刚健爲德以重厚爲威照微当如日月发言当如雷霆昔汉武帝谓田蚡曰君除吏尽未吾亦欲除吏又谓卫青曰郭解布衣权至使将军自言此其家不贫人君之言若皆切当如此羣臣安得不畏服哉夫心知其非而面徇其情口顺其说依违两可此最人君之大患也今国家政事未有不先经两府相与商议然後施行关防秘密外人莫得而知及诏令已下台谏方得闻之若事有未便从而论列陛下还复下之两府人之常情自非大贤谁肯以已之所谋爲非而以他人之言爲是哉必须排摈沮抑以爲难从此人主之所以独取拒谏之名而大臣私得专权之便者也臣愚伏望陛下自今应有臣僚上言朝廷阙失者陛下当清心审虑自以大公至

正之道决之若大臣所谋果是不必顾恤言者言者所陈果当不必曲顺大臣之意位无高下言无先後惟是之从又何纷纭之足患哉必若其人等固有争执者陛下亦当再加审察更以理道往返与相诘难以尽其情果有可取勿憚改爲若汉宣帝之於赵充国则万事无不当矣必若理道是非显然在目而其人执迷文过强很不已者虽加罪黜天下岂以爲不可哉如此则岂惟事得其正亦使威福之柄尽归帝室矣凡天下之事是非未明则不可不慎是非既明则在陛下决而行之臣前日所谓惟道所在断之不疑奸不能惑佞不能移者正谓此也伏惟圣明俯加裁察臣光昧死再拜

乞更不责降王陶劄子【治平四年上】

臣窃闻政府以王陶谢上表言辞狂率恣爲诋毁多过其实欲有敷奏乞重加责降审或如此恐不可许何则自仁宗皇帝以来委政宰辅宰辅之权诚爲太重加以台谏官被贬者多因指大臣之过失少因犯人主之颜色是威福之柄潜移於下陛下方将奋乾刚之盛德伸元后之威断收还利器以救其弊今者王陶肆其?心失於详审言语不密流布远近虽实有罪然陶前者出知陈州陛下盖以先帝梓宫在殡特爲大臣屈意行之今若又以表文诋毁大臣重加责降臣恐人主之权益去大臣之势遂成兴衰之机於此乎在不可不察也臣愚伏望陛下於执政进呈王陶谢上表之际但谕以躁人之辞不足深罪前已左迁在外岂可更加贬责若其再三执奏陛下当正色语以王陶前作中丞讥切朕躬非无过当之言朕亦未尝加怒欲以开广言路岂可触犯卿等则必欲再三责降方爲快意耶若犹执奏不已者陛下但不复应答彼当自退所以然者非以保全王陶盖欲使其余臣僚知陛下英武可恃万一他日大臣有欺罔聪明爲大罪者羣臣敢言之耳凡此皆陛下圣智所能自知臣复屑屑尽言者诚荷陛下不世之恩贪於报効不复自顾形迹之嫌故也取进止

言王广渊劄子【治平四年六月三日上】

臣闻明君之政莫大於去奸忠臣之志莫先於疾邪陛下不知臣无似使待罪宪府受任以来於今踰月而寂无所纠诚负大恩伏见直龙图阁兼侍读王广渊以小人之质有倾巧之材苟求进身无所不至外依政府内结近习数年之间致位清显国家本以龙阁宠贤彦还英待儒雅皆非广渊所宜滥处陛下即位以来未闻放黜奸邪以警羣臣广渊於朝列之中爲奸邪之尤者伏望陛下奋发乾刚首加斥逐夺去职名除一远地监当亦足以醒天下之耳目取进止

言王广渊第二劄子

臣近曾上言直龙图阁兼侍读王广渊倾巧奸邪乞尽夺去职名除一远地监当差遣至今未闻指挥臣窃惟广渊所爲布闻海内陛下昔在宫邸岂不备知何假微臣更有详述书曰任贤勿贰去邪勿疑此大舜所以成天功也陛下若未知广渊之爲贤与不肖尚容致疑若果知广渊奸邪之状则岂可复置之左右而不速去之哉夫佞人者巧於求合变故万端虽圣贤所不能察是以帝尧畏巧言令色孔壬而孔子教顔渊以远佞人夫尧与顔渊非不明也苟不畏而远之则有时而惑之矣伏望陛下依臣前奏其王广渊早赐黜逐取进止

言王广渊第三劄子

臣前两次上言王广渊倾巧奸邪乞尽夺去职名与远地监当近闻本人带旧职知齐州仍赐章服如此乃是赏之非黜之也曩使广渊自改京官以来谨身守分不爲奸谄以至今日不过作第二任通判今所得乃如此岂可谓爲奸谄无益哉孔子称惟器与名不可以假人今之章服所谓器也职名所谓名也二者皆无用之物然而天下贵之者爲其非贤才则不能得之故也唐宣宗重惜章服不轻以与人有司制绯紫衣以备赐与经年不用三两领故当时服绯紫者人以爲贵夫名器者譬如珠玉若使之易得如瓦砾尚安足贵乎近岁两次覃恩服绯紫者已爲泛滥今又如陈铸王广渊辈皆赐章服是使今後受赐章服者皆以爲耻不以爲荣也且陛下使广渊出补外官者必已知其奸邪之迹也今又复以职名章服宠之是劝人使效广渊所爲也臣窃恐非国家之福伏望圣断依臣前奏尽夺去广渊职名并比来章服与远地监当使赏善罚恶皦然明白取进止

言郭昭选劄子【治平四年上】

臣窃闻陛下曩时直省官郭昭选等四人近有特旨并除合门祇候衆言籍籍颇谓饶忝国初草创天步尚艰故祖宗即位之始必拔擢左右之人以爲腹心羽翼岂以爲永世之法哉乃遭时不得已而然也自後嗣君守承平之业继圣考之位亮陰未言之间有司因循踵爲故事凡东宫僚吏一槩超迁谓之随龙以此昭选之徒得自厮役直除班行其爲幸已多矣乃敢妄有攀援邀求无已曾不自省有何功勲小人之心终无厌极不可纵也且合门祇候祖宗所以蓄养贤才以待任使之地也其班序差遣事事不同譬诸文臣则馆阁之流也岂可使厮役之人爲之哉况东宫其余吏卒甚衆苟一人得之则皆有冀望之心此书所谓启宠纳侮者也陛下既承大统则率土之滨谁不爲臣而独私於东宫之人则所与亲者至狭矣臣昨除御史中丞初上殿之日首以官人赏罚爲言誠以三者致治之本自上世以来不易之道也今昭选等以贱隶而叨美职是官不择人也无横草之劳而数月之间恩命相继是无功受赏也奸慝明着如高居简等尚保而庇之是有罪不罚也陛下始初清明方励精求治而乃轻其官爵慢其赏罚如此将以兴太平之功犹适楚而北辕也今臣所以区区进言者但爲陛下惜此而已所有昭选等新除合门祇候乞赐追寝取进止

贴黄

或闻昭选等因告昌王入言得此特旨未知虚的审或如此尤爲不可陛下之於昌王但当极其友爱至於官爵刑赏乃陛下政柄须决之圣心昌王亦不当关预陛下亦不当聽从如此则兄弟之恩全君臣之分正矣汉馆陶公主爲子求郎明帝不许赐钱十万曰郎官上应列宿出宰百里有非其人民受其殃是以难之彼爲其子犹不可况爲他人乎

传家集卷三十八

卷三十九

<集部,别集类,北宋建隆至靖康,传家集>

钦定四库全书

传家集卷三十九 宋 司马光 撰章奏二十二

言赈贍流民劄子【治平四年六月十七日上】

臣窃见朝廷差官支拨粳米於永泰等门遇有河北路流民逐熟经过即大人每人支与米一斗小人支与米五升仰子细告谕在京难以住泊令速往近便丰熟州军存活者臣窃思之如此处置欲以为恤民之名掩人耳目则可矣其实恐有损无益何以言之曩者或闻河北有人讹传京师散米者民遂襁负南来今若实差官散米恐河北饥民闻之未流移者因兹诱引皆来入京京师之米有限而河北流民无穷既而无米可给则不免聚而饿死如前年许颍二州是也今禾苗既伤於旱蝗蝻日益滋生秋田丰歉殊未可知一斗五升之米止可延数日之命岂能济其饥馑之厄哉凡民之情见利则趋之见害则避之若京师可以住泊虽驱之亦不肯去若外州可以存活虽留之亦不肯止固非数人口舌所能告谕故臣以为有损无益也臣闻民之本性怀土重迁岂乐去其乡里舍其亲戚弃其丘垄流离道路乞丐於人哉但以丰稔之岁粒米狼戾公家既不肯收采私家又不敢积蓄所收之谷随手糜散春指夏熟夏望秋成上下偷安莫为久计是以稍遇水旱螽螟则糗粮已绝公私索然无以相救仰食县官既不能周假贷富室又无所得此乃失在於无事之时不在於凶荒之年也加之监司守宰多不得人视民之穷曾无矜悯增无名之赋兴不急之役吏缘为奸蠹弊百出民捥手计穷无以为生则不免有四方之志矣意谓他处必有饶乐之乡仁惠之政可以安居遂伐其桑枣撤其庐舍杀其耕牛委其良田累世之业一朝破之相携就道若所诣之处复无所依使之进退失望彼老弱不转死沟壑壮者不起为盗贼将安归乎是以圣王之政使民安其土乐其业自生至死莫有离散之心为此之要在於得人以臣愚见莫若谨择公正之人为河北监司使之察灾伤州县守宰不胜任者易之然後多方那融斛斗各使赈济本州县之民若斛斗数少不能周徧者且须救土着农民各据版籍先从下等次第赈济则所给有限可以预约矣若富室有蓄积者官给印历听其举贷量出利息候丰熟日官为收索示以必信不可诳诱则将来百姓争务蓄积矣如此饥民知有可生之路自然不弃旧业浮游外乡居者既安则行者思返若县县皆然岂得复有流民哉臣前曾上言王者以天下为家不可使惻隐之心止於目前而已此特河北流民路过京师者耳窃闻其他灾伤之处流民亦为不少若臣言可采伏望圣慈依此行之取进止

言施行封事上殿劄子【治平四年六月十七日上】

臣伏以大舜举贤敷纳以言明试以功汉武帝详延特起之士待以不次之位终获其用威加胡越真宗皇帝总览羣臣章奏用其言而显其身以成咸平景德之治凡察言所以知人知人所以立政自古及今其道一也今陛下即政之初首开言路令中外臣民皆得上封事海内欣欣咸毕精竭思以承休德若於此际能采其嘉谋举其贤材而用之则太平之基可指日而望也若徒备外饰废其言而不用弃其人而不取则天下颓弊之事当何时而振起乎臣与张方平先受诏详定中外所上封事虽已尽心料简合於义理可施行者一一奏闻更望陛下择其精者决自圣意必令行之其有识虑稍出於衆者愿陛下特赐召对面加询访考其虚实果有可采密籍姓名遇有差遣随材授任俟其实有显效然後可以不次拔擢如此则嘉言罔攸伏野无遗贤矣取进止

言高居简劄子【治平四年六月十一日上】

臣闻古人有言堂上不粪则郊草不赡旷芸言近者不治则不暇及远也窃见勾当御药院高居简资性奸回工谗善佞久处近职罪恶甚多臣谨按祖宗旧制勾当御药院官至内殿崇班以上即须出外盖以日月寢久官资稍高则防其凭恃威灵窃弄权柄远鉴汉唐之祸深为子孙之虑故也陛下即位之初内臣以覃恩迁官者尽补外职独留御药院四人天下首以此一事讥陛下之失况居简於衆人之中最为狡猾而陛下特加宠信待以腹心中外指目大玷圣德臣职在绳纠不敢不言伏望圣慈遵祖宗令典应勾当御药院官至崇班以上者尽授以向外差遣其高居简乞远加窜逐以解天下之惑取进止

言高居简第二劄子

臣近曾上言勾当御药院高居简工谗善佞乞远加窜逐未蒙施行昔周公以立政戒成王至虎賁缀衣趣马小尹左右?仆百司庶府亦皆择人穆王命伯冏为大仆正曰昔在文武侍御仆从罔匪正人又曰慎简乃僚无以巧言令色便辟侧媚其惟吉士仆臣正厥后克正仆臣谏厥后自圣自古圣帝明王虽左右小臣未尝不谨择端良之人以自防逸豫之生也况陛下嗣膺宝命圣德惟新善恶兴衰於此乎分而使谗佞如居简者旦夕常在左右又宠而信之此乃异日祸乱之根腹心之疾也臣职在去邪不敢不再三上言伏望圣明依祖宗旧制应勾当御药院官至崇班以上者并令出外其高居简仍乞远加窜逐取进止

言高居简第三上殿劄子

臣近曾两次上言勾当御药院高居简工谗善佞乞远加窜逐至今不蒙降出施行居简顷在先朝已窃弄权柄依凭城社玷辱圣明物论汹汹切齿侧目及陛下继统必谓首行诛窜以警邪臣不意居简狡猾多端先自结於陛下使陛下宠爱信任更过於先帝之时朝廷公忠之士无不愤懣深为陛下惜之方今内侍之臣小小谨慎可以备陛下左右使令者何可胜数陛下足以择而用之何必违祖宗旧典负天下讥谤独保护居简坚如金石臣窃惑之伏望圣慈取台谏官前後所言居简文字尽付所司明治其罪以彰至公之义顺合衆心其余勾当御药院者亦乞遵旧制官至内殿崇班以上并授以向外差遣取进止

言高居简第四劄子

臣累日前上殿言勾当御药院高居简自先帝时窃弄权柄陛下复宠而信之大为圣德之累乞治其罪陛下许臣送枢密院施行至今未闻有指挥不知居简以何道结陛下能如此之深也居简所能止於谗佞者不过巧言令色希意迎合快人主之欲以市其权使人主溺於荒宴而不自知也谗者不过离人君臣间人骨肉惑人主之心以固其恩使人主陷於倾危而不自寤也有是二者又可近乎彘使陛下即位岁久功业已成而有谗佞之臣始得幸天下有识者犹当寒心何则知其必为祸乱之阶也况今初承大统当锐精求治之时而遽留居简於左右仍加宠信根?已牢则异日之忧可胜道哉此臣所以不避死亡而必当力争者也或闻陛下欲待居简自求引退然後遣去臣诚戇愚未晓所谓若国之大臣耆年有德闻望素高一旦偶有小失未为外人所知陛下务存终始使自引去以全其名则可矣其挟奸作慝者犹宜明正刑书况居简闺闼小臣罪恶盈积所宜肆诸市朝宣示四方以戒儆人而尚足为之隐乎且居简奸邪播闻远近陛下今日虽为之隐天下耳目庸可蔽乎凡居简所以能为恶者以其自托宫禁譬如狐鼠依凭城社彼惟恐离去左右岂肯自陈求退乎伏望陛下尽出羣臣前後所言居简事状送居简付所司明治其罪以彰至公之道取进止

言高居简第五上殿劄子【当日罢居简御药院除供备库使】

臣闻邪正不可同朝犹冰炭不可同器陛下不知臣不肖使待罪御史中丞臣四次上言勾当御药院高居简工谗善佞不宜宠信置於左右所言无取不蒙省录臣实无颜尚居风宪若陛下以臣为拙直则居简为奸邪若以居简为忠良则臣为谗慝臣与居简势难两留况臣守官京师十有一年自先帝时累曾陈乞外任伏望圣慈罢臣御史中丞除一外任差遣取进止

言王中正劄子【治平四年七月二十七日上】

臣伏见陛下前者尽罢寄资内臣高居简等令补外官中外欣然无不称颂圣德寻闻复留陈承礼刘有方二人又以王中正勾当御药院衆颇失望臣窃惟祖宗之意以御药一职最为亲密过供奉官以上辄令罢去者乃以防微杜渐诒谋万世忧深思远诚自古帝王之所不及子孙所宜谨守不许失坠者也近岁以来左右之臣既恋权势又贪禄位遂求闇理资序豫支俸给名曰寄资以欺诳外人此岂祖宗之意邪今陛下欲振举纪纲一新治道必当革去久弊一遵正法夫法如堤防常应完固乃得无患一有蚁壤泄之则渐致溃败不可复救近习之臣朝夕在侧因缘祈恩无有穷极不以祖宗旧法制之恐陛下他日亦将厌之也况王中正素闻奸猾颇好招权今处之要职是去一居简得一居简也伏望陛下一依前降指挥尽罢寄资者令补外官以成圣德之美别择内供奉以下朴直廉谨者使勾当御药院以存祖宗之法取进止

言王中正第二劄子

臣窃闻陛下好令内臣采访外事及问以羣臣能否臣愚窃以为非宜陛下内有两府两制台諫外有提转牧守皆腹心耳目股肱之臣也陛下诚能精择其人使之各举其职荐举贤能纠

案奸慝论政事得失述民间利病皆令列於奏牒明白启陈其有尸禄偷安及挟私欺罔者小则罪黜大则诛窜谁敢不尽公竭诚以承休德如此则天下之事犹一堂之上陛下何患於不知哉今若深处九重之内询於近习之臣采道听涂说之言纳曲躬附耳之奏不验虚实即行赏罚臣恐谗邪得以逞其爱憎而陛下为之受其讥谤也近闻王中正差往陕西勾当公事有知泾州刘涣等曲加谄奉鄜延路钤辖吴舜臣违失其意俄而涣等进擢舜臣降黜衆人皆言中正所为审或如此则是中正弄权已有明验今陛下又置之肘腋委以腹心臣恐天下之人将重足一迹而畏之與金鞶璧而奉之矣外议又言山陵礼毕韩琦必求引退两府当有迁补臣窃虑两制以上万一有无廉耻之人或陰结此属以求进用者夫以尧之聰明咨於四岳衆言佥同然後用人犹失之於鯨况可决於近习之口乎凡公忠正直之士必不肯借誉左右以求自售齐威王所以赏即墨大夫而烹阿大夫正谓此也昔汉唐之衰宦官所以能坏乱纲纪倾覆国家者皆由人主与之谋议帷幄进退羣臣故也此乃治乱安危之本不可不察伏望圣慈详思臣言凡欲知天下之事当询访外廷之臣其王中正不可令勾当御药院或奸佞之臣豫设机谋以经营两府者必不可用则天下幸甚取进止

言王中正第三劄子

臣伏奉手诏节文问王中正等事得之於何人可密奏来臣以非才误受陛下圣知擢为御史中丞惟惧旷职孤忝大恩每与宾客语言无不询访时事稍有毫发裨益盛德率皆奏陈此事臣得之於宾客前後非止一人诚恐玷累公朝所以有此论述中正有无此事惟陛下可以知之臣在阙门之外何由知其虚实若其果有此事陛下得以为戒若其无有臣敢避妄言之辜但外人有此议论臣不敢不令陛下知之万一有益圣明皆微臣之幸也取进止

言石椁劄子【治平四年九月八日上】

臣伏见永厚陵皇堂卷輦石四重其二重并寄於枋木之上陛下孝心深远以为异日枋木终归朽腐石若陨坠於梓宫非便发自圣谋欲为石椁其修奉山陵都护宋守约钤辖张若水以策非已出百端沮难苟欲修饰目前自营私计不为梓宫万世之虑为人臣子不忠如此乃敢令石匠作头供状称八月二十七日进入梓宫後连夜造作计二十四时辰了毕如蒙别差人定夺却不依今来所定时辰先得了当甘军令不辞公列奏牒诬惑朝廷是致掩闭皇堂及虞祭并木主到京之日皆曾改移臣昨充山陵仪仗使目覩内臣黄怀信用夷牀澁牀等下梓宫数刻之间安厝已毕乃知守约若水等欺罔聪明轻侮邦宪若不惩戒则不公挟诈之人将何所忌憚伏望陛下治守约若水等罪严行责降若升祔毕有赦守约若水等缘修奉山陵得罪特乞不原其黄怀信等宜优与酌獎贵使赏罚明白人知耸畏取进止

辞赐金劄子【治平四年七月二十日上】

臣先奉勅充山陵仪仗使已蒙圣恩赐绢一百匹钱二百贯文充盘纏於今月二十九日又降中使赐臣箔金五十两并银合重三十两臣不敢仰违诏旨虽已奏谢讫然窃闻嘉佑八年永昭陵时不曾有此例私心惶恐深不自安臣闻人君不行无功之赏则羣下劝人臣不受非分

之赐则廉耻立今臣等虽备位五使犹在京城跬步之劳亦未尝有以何勲效再受重赐况臣职在执宪当抑絕侥幸而身自为之将何以纠其他人其箔金并银合伏望圣慈许令回纳入库庶使下臣有以自容取进止

辞赐金第二劄子【治平四年八月二日上】

臣前日蒙恩赐金五十两并银合臣以所赐过厚寻问永昭陵礼仪使范镇知旧例所无不敢当受遂具奏陈乞许令回纳伏蒙圣慈特降中使宣谕令受臣上荷恩遇至深至重蝼蚁微命不足为报愧惧流汗无所容措然臣窃闻昔韩昭侯有弊袴命藏之侍者曰君仁君也不以赐左右而藏之昭侯曰吾闻明主爱一嚬一笑嚬有为嚬笑有为笑今袴岂特嚬笑哉吾必待有功者彼一弊袴犹不可以与无功之人况数十两之金乎魏太祖之为政有功宜赏不吝千金无功妄施分毫不与我太祖太宗之御臣下亦然故能驱驾英豪光启大业夫明主之不妄赏赐非吝之也诚以赐一无功则天下无功之人皆有徼觊之心有功之人皆怀怨望故也借使一人有功而人主赐之一金无功者不得其有功者必喜何则衆人不得而我独得之是人主知我之功也其荣多矣如是则智者献其谋勇者竭其力虽使之赴汤火犹将甘而乐之若有功者赐千金无功者亦赐千金其有功者必不悦何则彼无功而我与之均是人主待我无以异於彼也其辱深矣如是则有功者莫不解体谁肯竭其智力触冒死亡以徇国家之急哉故官爵金帛者人主所以鼓舞羣情使之奔走左右而不自知者也然则明主爱一嚬一笑岂为过论哉仁宗皇帝天性寛仁承累世余烈府库充实身虽节俭而好施於人羣臣左右贪求无厌赐予之例因兹寢广府库之积日益减耗不幸又於五年之中再遭大丧左藏内藏奉宸等库率皆空竭当此之时旧例所有犹宜?减以救其弊况可以例外横赐无功之人乎且陛下以国用不足之故永厚陵犹遵遗制比永昭陵事事裁减而所赐羣臣之物反更多於永昭陵之时臣虽小人贪昧财贿揣循此理能自安乎此臣所以夙夜忧惶无以自处者也况府库之物乃天下万民之物也自非有功於民者皆不宜得之臣所以仰违诏命坚辞赐物至於再三者非自以饰小廉也廼欲助陛下成治道也伏望圣慈察其诚恳依臣前奏许令将所赐金并银合回纳入库取进止

卷四十

钦定四库全书

传家集卷四十 宋 司马光 撰章奏二十三

议谋杀已伤案问欲举而自首状【知登州许遵奏妇人阿云於母服内与韦阿大定婚成亲後嫌韦阿大夜间就田中用刀斫伤县尉令弓手勾到阿云问是你斫伤本夫实道来不打你阿云遂具实招通合作案问欲举减二等大理寺不合作谋杀已伤绞罪断遣下刑部定得大理寺允当遵不服诏下光与安石定夺安石以为遵议是後朝廷竟从安石议】

右臣窃以为凡议法者当先原立法之意然後可以断狱窃详律文其於人损伤不在自首之例注云因犯杀伤而自首者得免所因之罪仍从故杀伤法所谓因犯杀伤者言因犯他罪本无杀伤之意事不得已致有杀伤除为盗之外如刼囚略卖人之类皆是也律意盖以於人损伤既不得首恐有别因余罪而杀伤人者有司执文并其余罪亦不许首故特加申明云因犯杀伤而自首者得免所因之罪然杀伤之中自有两等轻重不同其处心积虑巧诈百端掩人不备者则谓之谋直情径行略无顾虑公然杀害者则谓之故谋者尤重故者差轻今此人因犯他罪致杀伤人他罪虽得首原杀伤不在首例若从谋杀则太重若从鬪杀则太轻故酌中令从故杀伤法也其直犯杀伤更无他罪者惟未伤则可首但系已伤皆不可首也今许遵欲将谋之与杀分为两事案谋杀故杀皆是杀人若将谋之与杀分为两事则故之与杀亦是两事也且律称得免所因之罪彼刼囚略人皆是已有所犯因而又杀伤人故刼略可首而杀伤不原若平常谋虑不为杀人当有何罪可得首免以此知谋字止因杀字生文不得别为所因之罪也若以刼鬪与谋皆为所因之罪从故杀伤法则是鬪伤自首反得加罪一等也遵所引苏州洪祚断例案律疏云假有因盗故杀伤人而自首者盗罪得免故杀伤罪仍科疏既指言故杀伤人则是因盗谋杀伤人者自从谋杀法当时法官误断不可用例破条遵又引编敕谋杀伤人伤与不伤罪不至死者并奏取敕裁以为谋杀已伤而罪不至死者即是自首之人按尊长谋杀卑幼之类皆是已伤而罪不至死不必因首也遵又引律疏问答条云谋杀凡人乃云是舅又云谋杀之罪首尽显是谋杀许令自首案彼皆谓谋而未伤方得首免若其已伤何由可首凡议罪制刑当使重轻有叙今若使谋杀已伤者得自首从故杀伤法假有甲乙二人甲因鬪殴人鼻中血出既而自首犹科杖六十罪乙有怨讐欲致其人於死地暮夜伺便推落河并偶得不死又不见血若来自首止科杖七十罪二人所犯絶殊而得罪相埒果然如此岂不长奸况阿云嫌夫丑陋亲执腰刀就田野中因其睡寐斫近十刀断其一指初不陈首直至官司执录将行桎梏势不获已方肯招承情理如此有何可悯朝廷贷命编管已是寬恩而遵更稽留不断为之伸理欲令天下今後有似此之类并作减二等断遣窃恐不足劝善而无以惩恶开巧伪之路长贼杀之原奸邪得志良民受弊非法之善者也臣愚以为大理寺刑部所定已得允当难从许遵所奏作案问欲举减等而科今来与王安石各有所见难以同共定夺伏乞朝廷特赐裁酌施行

议贡举状【熙宁二年五月上】

臣准御史台牒准勅节文天下学校贡举之法宜令两府两省待制以上御史台三司三馆臣僚各限一月具议状闻奏者臣闻诗云无竞惟人四方其训之言欲立强於天下者无如得人得人而任之以事则四方斯顺之矣臣窃惟取士之弊自古始以来未有若近世之甚者也何以言之自三代以前其取士无不以德为本而未尝专贵文辞也汉氏始置茂才孝廉等科皆命公卿大夫州郡举有经术德行者策试以治道然後官人故其风俗敦尚名节降及末世虽政衰於上而俗清於下由取士之术素加獎厉故也魏晋以降贵通才而贱守节习尚浮华旧俗益败然所举秀孝犹以经术取之州郡皆置中正以品其才行一言一动之失或终身为累士犹兢兢不敢自放隋始置进士唐益以明经等科而秀孝遂絶止有进士明经二科皆自投牒求试不复使人察举矣进士初但试策及长安神龙之际加试诗赋於是进士专尚属辞不本经术而明经止於诵书不识义理至於德行则不复谁何自是以来儒雅之风日益颓坏为士者狂躁险薄无所不为积日既久不胜其弊於是又设誊录封弥之法盖朝廷苦其难制而有司急於自营也夫欲搜罗海内之贤俊而掩其姓名以考之虽有顔闵之德苟不能为赋诗论策则不免於遭摈弃为穷人虽有跼蹐之行苟善为赋诗论策则不害於取高第为美官臣故曰取士之弊自古始以来未有若近世之甚者非虚言也今幸遇陛下圣明心知贡举之极弊慨然发愤深诏羣臣使得博议利病更立新规是千载一时也议者或曰古人乡举里选今欲知士之德行宜委知州知县者采察其实保而荐之臣独以为不然古者分地建国自卿大夫士皆以其国人为之犹患处士之德行不可得而详也故又择其乡之贤者使为闾胥比长自幼及长朝夕察其所为然後士之德行美恶莫得而隐也今夫知州知县杂四海九州之人远者三岁而更近者数月而更或初到官即遇科場遽责之知所部士人之德行诚亦难矣又应开封府举者常不减数千人而开封府狱讼之繁知府者自旦至暮耳不暇听目不暇视又有余裕可使之察数千人之德行乎议者又曰宜去封弥誊录委有司考其文辞参以行实而取之臣独以为不然夫士之德行知州县者尚不能知而有司居京师一旦集天下之士独以何术知之其术不过以衆人之毁誉决之孔子曰衆好之必察焉衆恶之必察焉夫衆之毁誉庸詎足以尽其实乎必如是行之臣见其爱憎互起毁誉交作请托公行贿赂上流谤讟并兴狱讼不息将纷然殽乱朝廷必厌苦之而复用封弥誊录矣夫封弥誊录固为此数者而设之也譬犹筑防以鄣洧水也今不絶其源而徒去其防则横流之患愈不可救矣臣虽至愚平生固尝竭其思虑欲以少救其弊今敢陈二策乞陛下俯加裁择臣闻上之所为下之所归也国家从来以赋诗论策取人不问德行故士之求仕进者日夜孜孜专以习赋诗论策为事惟恐不能胜人父教其子兄勉其弟不是过也今若更以德行取人则士之力於德行亦犹是也诚风化清浊之原历代讹谬而不寤必待圣朝然後正之者也夫德行修之於心藏之於身虽家人有所不知况於乡党况於州县况於朝廷将何从知之故必待明哲公正之臣知而举之然後四海之士皆可得而官使也然举荐之法既行则干求属请诚所不能无也要在所举非其人者国家以严法绳之勿加恩贷则苟且徇私之人皆知惧矣且国家既以德行取士则彼贪猾轻躁之人依附权要枉道求进者皆为清议所贬见弃於时虽有举者必不多矣臣愚欲乞今後应系举人令升朝官以上岁举一人提点刑狱以上差遣者岁举二人谏议大夫或待制以上岁举三人不以所部非所部乡里非乡里除自己亲戚及曾犯真刑或私罪情理重曾经罚赎及不孝不友盗窃淫乱明有迹状者不得举外其余皆得举之仍於举状内明言臣今保

举某州某科某人学术节行乞赐召试若举状既上之後却有前後诸般违碍事发其举主并依律文贡举非其人分故失从公私罪定断受赃而举者以枉法论其举状逐时送下礼部贡院置簿记录若应举人而不举者岁终委贡院勘会姓名开奏乞严加朝典每遇三年一开贡举委贡院截自诏下之日勘会选择举主最多者从上取之【举主数同则以举状到省月日先後为次其举主曾有?罪及见停闲身亡或在合举人数外者并不使】倍於每次科場南省奏名人数具姓名闻奏乞下本贯发遣赴阙其本贯更不考试即具申状解送赴贡院仍出公凭给付逐人令赴贡院照会限十一月内取齐十二月内引见正月内委贡院考试【其试官或朝廷临时添差】进士试经义策三道子史策三道时务策三道更不试赋诗及论明经及九经等诸科试本经及论语孝经大义共四十道明经加试时务策三道其帖经墨义一切皆不试对策及大义但取义理优长不取文辞华巧唯所对经史乖僻时务疎濶者即行黜落其奏名人数并依科場旧制【若合格者少不满旧数亦听】至御试时进士明经各试时务策一道九经等诸科试本经大义十道所有名字高下并只以举主多者为上举主数同则以举状到省月日先後为次其举人所纳家状及授官後吏部所给告身并须开坐元初举主人姓名若及第後犯私罪情理重及赃罪其举主并減一等坐之未及第者減三等皆不以去官及赦原如此则羣臣不敢挟私妄举士人皆崇尚经术重惜操履风俗丕变矣朝廷若不能行此保举之法其次莫若修学校之法以取之臣伏见自庆历以来天下诸州虽立学校大抵多取丁忧及停闲官员以为师长藉其供给以展私惠聚在仕官员及井市豪民子弟十数人游戏其间坐耗粮食未尝讲习修谨之士多耻而不入间有二千石自谓能兴学者不过盛修室屋增置庄产广积粮储多聚生徒以采虚名师长之人自谓能立教者不过谋其出入节其游戏教以钞节经史剽窃时文以夜继昼习赋诗论策以取科名而已此岂先王立学之意邪於以修明圣道长育人材化民成俗固已疎矣臣欲乞自今天下州学只许置教授一人委本州长吏於本处命官中选择无过犯有节行能讲说为衆所服者举奏补充若本州无人则奏乞下铨司选差委铨司於见在铨选人内拣选进士明经诸科出身人历任无赃私罪能讲说经书者奏补充逐州教授【仍令国子监试讲说经书】应举人初入学者为外舍生唯赴听讲及公试外不得於学中宿食其教授每日讲书毕取在学诸生姓名书於籤上杂置箒中抽取三人问以听过书中疑义三条使对衆解说通者置簿记录粗者不问不者有罚每月中两次公试各试所习举业委教授考校定优劣等第具姓名出榜示讫亦置簿记录其有过犯者小过则罚钱中过则降等【谓自内舍高等降为中等中等降为初等初等降为外舍生外舍生无等可降者勒出学】大过则斥出学亦置簿记录每遇春秋释奠毕委教授选择外舍生到学及半年以上自前次释奠以来说书多通公试多在优等【姓名近上即为优等】过犯情轻少即升入内舍为初等生始听於学中宿食又选择初等生升为中等生中等生升为高等生皆如外舍生之法其有二人已上比较难决者即特令说书及试所业以决之皆须具状申本州委知州通判更加审覆委得公当然後给牒补之如後來有过降等者其牒即行抽取毁抹其教授选择纠举升降等第若有不公委知州通判觉察取勘闻奏乞行冲替其开封府举人旧无府学并令寓教於国子监其国子监举人须实是品官子弟方得依条入学其教试选升之法并於外州同以直讲比教授判监同判监比知州通判凡国子监开封府及诸州军内舍高等生额并用本处解额之半【解额有奇数者入高等生额假若解额三人则以二人为高等生额】其中等倍高等初等倍中等若人数未足则阙之不得溢额补人若遇诏下开贡举委本处判监同判监知州通判截自其日勘会高等生补及半年以上者具姓名结罪

保明闻奏【开封府举人只委判监同判监保明】仍给与公凭许令免解直就省试其高等生占不尽解额方许本处其余举人取解其中等初等生於取解时仍别立号常比其余举人多取分数所有高等生至省试亦别立号每七人中取一人奏名如此则举人亦稍向经术敦行义矣夫经术深浅非程试所能知行义美恶非朝夕所能察今使之处於学校经二三年累经选择升至高等又占解额妨衆人进取之路若其行义少有过差必不为衆人所容矣由此观之其高等生经术则讲说常通文艺则屡入优等过犯则全然轻少行义则为衆所服比之糊名誉录考其一日所试赋诗论策偶有所长而取之者相去远矣况近年举人或一无行能横遇恩泽幸得免解者不可胜数今高等生行能如此裁免一解岂足惜哉此学校之法也若朝廷又不能如此只於旧条之中毛举数事微有更张则於取士之道并无所益徒更烦苛不若悉循旧贯之为愈也

议系宫亲人鑠应状【治平元年上】

先准嘉佑三年八月二日中书劄子供系宫亲授班行人云云右看详系宫亲人并是三代食禄之家有人保任方得充避比於工商杂类纳财授官之人流品殊胜其中固有奇才异行可以进用岂可止以连姻帝族遂同赃私罪犯之人不得鑠厅应举求诸义理全无意谓欲乞今後应与宗室女为亲补转班行者如别无事节违碍科場条贯并许依其他武臣例鑠厅应举以广求贤之路

卷四十一

钦定四库全书

传家集卷四十一 宋 司马光 撰章奏二十四

论衙前劄子【治平四年九月上】

臣伏见近者陛下特下诏书以州郡差役之烦使民无敢力田积谷求致厚产至有遗亲背义自求安全者令中外臣庶条陈利害委官详定以闻此诚尧舜之用心生民之盛福也臣窃见顷岁国家以民间苦里正之役废罢里正置乡户衙前又以诸乡贫富不同东乡上户家业千贯亦为里正西乡上户家业百贯以为里正应副重难劳逸不均乃立定衙前人数每遇有阙於一县诸乡中选物力最高者一户补充行之到今已逾十年民间贫困愈甚於旧议者以为一州一县利害各殊今一概立法未能尽善又里正止管催税人所愿为衙前所管官物乃有破坏家产者然则民之所苦在於衙前不在里正今废里正而存衙前是废其所乐而存其所苦也又曷者每乡止有里正一人借使有上等十户一户应役则九户休息可以晏然无事专意营生其所以劳逸不均盖由衙前一概差遣不以家业所直為準若使直千贯者应副十分重难直百贯者应副一分重难则自然均平今乃将一县诸乡混同为一选物力最高者差充衙前如此则有物力人户常充重役自非家计沦落则永无休息之期矣有司但知选差富户为抑强扶弱寛假贫民殊不知富者既尽赋役不归於贫者将安适矣借使今日家产直十万者充衙前数年之後十万者尽则九万者必当之矣九万者尽则八万者必当之矣自非磨消耗至於困穷而为盗贼无所止矣故置乡户衙前以来民益困乏不敢营生富者返不如贫贫者不敢求富日削月朘有减无增以此为富民之术不亦疎乎臣尝行於村落见农民生具之微而问其故皆言不敢为也今欲多种一桑多置一牛蓄二年之粮藏十匹之帛邻里已目为富室指挾以为衙前矣况敢益田畴葺庐舍乎臣闻其言怒焉伤心安有圣帝在上四方无事而立法使民不敢为久生之计乎凡为国者患在见目前之利不思永久之害故初置乡户衙前之时人未见其患及今然後知之若因循不改日益久则患益深矣臣愚欲望圣慈特降指挥下诸路州县相度上件里正衙前乡户衙前各具利害奏闻随其所便别立条法务令百姓敢营生计则家给人足庶几可望矣取进止

言横山劄子【治平四年九月十七日上】

臣窃闻陕西边臣有上言欲招纳赵谅祚国内人户渐图进取者臣窃惟谅祚骄僭之罪宜伏天诛为日固久今国家所遭大忧陛下初承宝命公私困匮军政未讲恐征伐四夷之事未易轻议也况谅祚虽内怀桀骜而外存臣礼方遣使者奉表吊祭尚未还国而遽令边臣诱纳其亡叛之民臣恐未足以亏损谅祚而失王者之体多矣伏望陛下具以拊循百姓为先以征伐四夷为後速诏边臣务敦大信勿纳亡叛专谨斥候防其侵轶而已候谅祚咎恶既熟中国兵

谷有余然後奉辞伐罪不为晚也取进止

论横山疏【治平四年九月二十四日上】

月日具位臣光昧死再拜上疏皇帝陛下臣闻王者之於戎狄或怀之以德或震之以威要在使之不犯边境中国获安则善矣不必以蹙葱岭诛大宛絕沙漠禽颉利然後为快也窃闻有边臣言赵谅祚部将轻泥嚙侧欲以横山之衆攻取谅祚归命圣德朝廷已有指挥许令招纳臣近者虽曾论列以为非宜尚惧语言疎略未尽本末不敢不再为陛下陈之今进谋者但言其利不言其害臣请试言其害虽逆盛意愿陛下勿遽加弃置略赐周览与进谋者参校其是非焉臣闻戎狄之俗自为儿童则习骑射父子兄弟相与羣处未尝讲仁义礼乐之言也唯以诈谋攻战相尚而已故其民习於用兵善忍饥渴能受辛苦乐鬪死而耻病终此中国之民所不能为也是以圣王与之校德则有天地之殊与之校力则未能保其必胜也以舜禹之明征三苗而三旬逆命商高宗之贤伐鬼方三年乃克汉高祖之雄杰为冒顿所围七日不火食国朝以太宗之英武北举河东南取闽浙若拾地芥加之猛将如云谋臣如雨天下新平民未忘战当是之时继迁背诞太宗以郑文宝为陕西转运使用其计策假之威权以讨之十有余年卒不能克发関中之民飞刍挽粟以馈灵州及清远军为虏所钞略及经沙磧饥渴死者什七八白骨蔽野号哭满道长老至今言之犹歔歔酸鼻及真宗即位会继迁为罗潘友所杀真宗因洗滌其罪吊抚其孤赐之节钺使长不毛之地讫於天圣明道四十余年为不侵不叛之臣関中户口滋息农桑丰富由是观之征伐之与怀柔利害易见矣及元昊背恩国家发兵调赋以供边役关中既竭延及四方东自海岱南踰江淮占籍之民无不萧然苦於科敛自其始叛以至纳款才五年耳天下困弊至今未复仁宗屈己赐以誓诰册为国主岁与之物凡二十五万岂以其罪不足诛而功可赏哉计不得已也曷者谅祚虽时有偃蹇礼节不备或诱掠熟户惊扰边民然犹称臣奉贡未敢显然自絶也今乃诱其叛臣以图之纵使诚能梟谅祚之首复灵夏之土以王者之兵言之犹可耻也况其成败未可知乎臣恐边事之兴生民之苦由此而始也王者之於诸侯叛则讨之服则抚之是以诸侯怀德畏讨莫不率从去岁谅祚攻大顺城杀掠吏民今春朝贡之使不以时至当是时不能讨也今朝廷既赦其罪与其赐物受其使者纳其贡献又从而诱其叛臣激其忿心是常欲其叛而不欲其服也信义赏罚将安在乎议者或以为彼诱我民我诱彼臣何为不可是特閭閻小人之语非知国家大体者也彼僻陋小羌窃诱我民以益其衆乃欲以天子亿兆之富而效其所为邪譬如邻人窃已之财已以正议责之可也岂可复窃彼之财以相报邪臣闻谅祚陰蓄奸谋为日固久招纳不逞之人以为谋主诱胁熟户以撤中国之藩篱常有据关中窥河东之心虽未必能然若纵其毒蠱亦足以为亭彰之患未可以小种之羌孱弱之人待之也国家不幸比遭大忧帑藏空竭关中之民自经西事以来仍苦铁钱财力雕弊熟户屡经杀掠亡失大半纵其在者亦怀贰心非复得如景佑宝元之时也当此之际陛下深诏边吏敦信誓保分界严守备明斥堠以待之犹惧谅祚狼子野心不识恩义乘我衅隙侵噬疆场又况彼不动而扰之不来而召之乎臣又闻虏中间谍所在甚多中国动静毫髮皆知其嚙侧自程戡在鄜延时已有声闻云欲归降自是至今已经数年朝廷屡召边臣与之谋议外人往往知之亦有邸吏传报四方安有虏中独不觉寤寂然无事曾无诛讨之意乎臣窃疑其内挟诈谋未可信也或者谅祚久怀逆计以朝廷待之恩礼优厚无因而发故遣其部将诈降以卜之若朝廷受之则将归曲而责直得以为背叛之名或者使

其部将诈言势孤力微不能独制谅祚乞朝廷遣将出师为助而陰设伏兵以徼大利此二者皆未可知也若万一有之则今日受之正堕其计中矣纵使囁侧实有降心盖亦私有忿恨或别负罪恶反侧不安欲倚大国之威以逼其主其所部之民未必肯尽从也虽其自言权势之强甲兵之盛有谋善战为民所附尽欲自夸以求售耳未必然也借令实能举兵以与谅祚为敌战而胜之则是灭一谅祚生一谅祚也若其不胜必引其余衆南奔中国谅祚悉其境内之兵以追之怒气直辞长驱入塞当是之时非口舌文移所能解也臣恐朝廷不惟失信於谅祚又将失信於囁侧也若囁侧余衆无几犹可以缚而送之以缓谅祚之兵然形迹已露谅祚必叛无疑也若囁侧余衆尚多还北不可入南不受穷无所归必不肯如山遇束手就死将突据边城以救其命更为中国之患未有涯也陛下不见侯景之事乎臣闻羽翼未成不可以高飞近者未悦不可以来远自尧舜禹汤文武之王下至齐桓晋文之霸未有不先治其内而能立功於外者也故孔子曰善人教民七年亦可以即戎矣又曰以不教民战是谓弃之今陛下新即大位尚未逾年朝廷之政未尽修也封域之中未尽治也内郡无一年之蓄左帑无累月之财民间贫困十室九空小有水旱则化为流殍承平日久戎事不讲将帅乏人士卒骄惰上下姑息有如儿戏教阅稍频则愠怩怨望给赐小稽则扬言不逊被甲行数十里则喘汗不进遇乡邑小盗则望尘奔北此乃衆人所共知非臣敢为欺罔也兵法曰知彼知己百战不殆不知彼知己一胜一负不知彼知己每战必殆陛下视今天下如此而欲谋境外之事起兵革之端挑陆梁之虏冀难立之功此臣所为寒心者也为今之计莫若收拔贤俊随材受任以举百職有功必赏有罪必罚以修庶政慎择监司澄清守令以安百姓屏絶浮费沙汰冗食以实仓库询访智略察验武勇以选将帅申明阶级剪戮桀黠以立军法料简骁锐罢去羸老以练士卒完整犀利变更苦窳以精器械俟百職既举庶政既修百姓既安仓库既实将帅既选军法既立士卒既练器械既精然後惟陛下之所欲为复灵夏取瓜沙平幽蓟收蔚朔无不可也今八者未有一而欲纳边吏之狂谋信黠虏之诡辞臣恐不能得其降者数百而虏骑大至覆军杀将边城昼闭朝廷乃为之宵衣旰食焦心劳思兴兵运财以救其急使天下愁困如康定庆历之时已而卒无可奈何然後忍耻以招之卑辞以谕之尊其名以悦之增其赂以求之其为损也不亦多乎斯乃国之大事安危所系非特边境之忧而已愿陛下深留圣思勿为後悔乃天下之福也彼进谋者皆非能实为国家斩将搴旗拓土辟境建卫霍甘陈之功也但以利口长舌虚辞大言一时诳惑圣聰欲盗陛下之官职耳他日国家有患不预其忧是岂可哉凡边境有事则将帅迁官士卒受赏无事则上下寂寂无因徼幸此乃人臣之利非国家之利陛下不可不察也臣光昧死再拜上疏

言横山上殿劄子【治平四年九月二十七日上】

臣近曾上言赵谅祚即今称臣奉贡朝廷不宜纳其叛臣以兴边事未审圣意以为如何臣之所言非谓谅祚无罪不可讨也又非能保其不叛也但以国家今日内政未修不可遽谋外事故也伏望陛下察臣所言八事举百職修庶政安百姓实仓库选将帅立军法练士卒精器械然後观四夷之衅乱者取之亡者侮之何患不能复大禹之故迹雪祖宗之宿愤也取进止

论不得言赦前事上殿劄子【治平四年九月二十七日上】

臣伏觀今月二十二日手詔應官吏黎庶犯罪在赦前者并依前後勅條施行內外言事按察官司更不得依前舉劾具案取旨如違并科違制之罪者臣竊惟按察之官以赦前事興起獄訟枉系平民及以輕淺之罪奏乞不原聖恩禁之誠為大善至於言事之官事體稍異恐難以一例指揮何則御史之職本以繩案百僚糾摘奸邪奸邪之狀固非一日所為國家素尚寬仁數下赦令或一歲之間至於再三若赦前之事皆不得言則其可言者無幾矣萬一有奸邪之臣朝廷不知誤加進用御史欲言則違今日之詔若其不言則陛下何從知之臣恐因此言者得以箝口偷安奸邪得以放心不懼此乃人臣之至幸而非國家之長利也伏望聖慈追改前詔除去言事兩字勿使羣臣得以壅蔽聰明也取進止

言張方平劄子【治平二年九月二十七日上】

臣伏見陛下用翰林學士承旨張方平參知政事方平文章之外更無所長奸邪貪猥眾所共知兩府大臣系國安危苟非其人為害不細臣職在繩糾不敢塞嘿伏望聖慈追寢方平新命以協輿論取進止

言張方平第二劄子【治平四年十月一日上】

臣近曾上言張方平參知政事不協眾望臣識淺材下其言固不足采擢者仁宗時包拯最名公直與台諫官共言方平奸邪貪猥事迹甚多陛下倘欲知方平為賢為不肖乞令檢取包拯等言方平章奏及開封府陳升之兩處推勘劉保衡公案并方平在秦州所奏邊上事宜狀即知臣所言非一人之私論也今所言之事尚未蒙施行尋聞除臣翰林學士兼侍讀學士若臣所言果是則方平當罷政事若其非是則臣為譖毀忠賢亦當遠貶今兩無所問而臣復遷翰林仍加美職臣誠愚懵未曉所謂伏望聖慈察臣前言方平事為是為非早賜施行所有新命未敢祇受取進止

除兼侍讀學士乞先次上殿劄子【治平四年十月二日上】

臣累日前曾上殿論列張方平事後來續聞除臣翰林學士兼侍讀學士臣智識頑闇不達聖心以為朝廷大政必當辨是与非人臣事君不可辭難就易是以不勝狂狷復有奏陳伏蒙聖恩曲賜手詔過加獎待諭以至意溫密織悉提耳諄諄臣雖木石亦將開悟況含氣血得為人類自咎愚迷九死難贖伏地流汗無所容入愧感之極涕泗滂沱誠宜即時奔赴闕廷祇受詔命然臣尚有私懇須當面陳欲望聖恩先許上殿敷奏稟取聖旨然後退受勅告不勝死生幸甚取進止

乞免翰林學士劄子【治平四年十月二日上】

臣今日上殿曾有敷奏以聖旨令讀資治通鑑其書卷帙尚少須至日逐接續編修史籍煩多恐難以應副禁林文字乞免翰林學士一職伏蒙聖恩宣諭但令權免學士院文字臣退自惟念若取學士之名以自榮而不供學士之職竊位素餐孰甚於此在臣愚分深不自安況侍讀

学士与翰林学士资序一同俸给仍优伏望圣慈俯赐矜察许臣只以侍读学士专修资治通
监如此则材器稍宜职业无旷遂其私愿粗免愧心不胜幸甚取进止

传家集卷四十一

卷四十二

<集部,别集类,北宋建隆至靖康,传家集>

钦定四库全书

传家集卷四十二 宋 司马光 撰章奏二十五

辞免馆伴劄子【熙宁元年二月二十一日上】

臣近为差馆伴北朝人使曾进状辞免今日蒙圣恩差中使宣谕以人使将至有合商量事节令臣不得辞免早诣中书枢密院看详文字者臣窃惟馆伴北使乃两制常程差遣臣所以辄违诏旨再三固辞者非敢避事偷安诚以人之才性各有能否不可牵强陛下以臣讲读经史粗有可采而使之应对宾客此实非臣所长夫以郑国区区将有诸侯之事犹使裨谋草创世叔讨论子羽修饰子产润色然後接四方之宾客故鲜有败事况圣朝包戈偃革专以文德怀抚北朝信使往来议论国事折冲御侮呼吸成变一言差忒实系安危臣岂敢不自揣量安居其任臣竊以名犯北朝讳元不曾接伴亦不曾奉使两朝事体正如墙面彼中情伪分毫不知加以稟性昏憒遇事褊直今若使之馆伴恐语言之际必有遗忘差错或漏泄机事或抵触使人万一如此以貽朝廷之忧虽加臣以重诛终无所益伏望圣慈矜察於两制中别选差才敏之人馆伴北使贵无阙误取进止

辞免裁减国用劄子【熙宁元年四月三日上有旨只委三司差官】

臣近曾乞别选差官裁减国用奉圣旨不许辞免臣以非材叨忝美职月受厚俸常自愧恐无有报称若果能有益於国臣何敢辞窃惟方今国用所以不足者在於用度太奢赏赐不节宗室繁多官职冗滥军旅不精此五者必须陛下与两府大臣及三司官吏深思其患力救其弊积以岁月庶几有效固非愚臣一朝一夕所能裁减也若但欲知庆历二年裁减国用制度比见今支费不同数目只下三司令供祈闻奏立可尽见臣愚以为不必更差官置局专领此事况臣所修资治通监委实文字浩大朝夕少暇难以更兼钱谷差遣取进止

请不受尊号劄子【熙宁元年七月十七日上】

臣今月十七日准内降曾公亮等上尊号第三表检会旧例合降不允批答已具榜子审取圣旨去讫臣窃惟上尊号之礼非先王令典起於唐武后中宗之世遂为故事因循至今伏见太祖开宝元年羣臣上尊号有一统太平字太祖以燕晋未平却而不受以是见圣人之志苟无其实终不肯有其名也太宗端拱二年诏自前所加尊号尽从省去且曰以理言之皇帝二字亦未可兼称朕欲称王但不可与诸子同耳羣臣恳请乃受法天崇道四字而已其後终身遂

不复增益先帝治平二年辞尊号不受天下莫不称颂圣德不幸次年有谄谀之臣建言国家与契丹常有往来书彼有尊号中国独无臣为深耻於是羣臣复以非时上尊号论者甚为朝廷惜之昔汉文帝遗单于书以尺一牍单于答以尺二寸牍自称天地所生日月所置匈奴大单于未闻文帝复为胜大之名以加之也学者至今称文帝谦德之美未尝以为可耻也此乃不识大体之言诚不足信耳今羣臣以故事上尊号臣愚以为陛下聪明睿智虽宜享有鸿名然践阼未久又在亮陰之中考之事体似未宜受陛下诚能断以圣意推而不居既不允所请仍令更不得上表则颂叹之声将洋溢四海此所谓一谦四益後其身而身先可以舍虚名而得实誉者也伏望陛下更加详择取进止

手诏

览卿来奏深谅忠诚朕方以频日淫雨甲申地震天威彰着日虞倾祸实忧彼此鸿名有慙面目况在亮陰亦难当是盛典诚如卿言今已批降指挥可善为答辞使中外知朕至诚实乃内顾惭惧非是欺衆以邀虚名

批答

省表具之朕荷祖宗之休抚有四海永惟烛理之不明举措之不中元元困穷未获厥所夙夜悼惧如涉春冰属以美报之礼不敢堕旷故欲躬执牺牲祇见上帝固非昭告成功自营福祿也羣公卿士猥见褒誉欲归以溢美增其徽称抗章勤请至於再三朕乏馨香之德不能媚于神祇乃甲申地震淫雨为灾天威彰着日虞罪悔尚何盛烈之可述鸿名之敢当心焉愧惕流汗沾足况尚在谅闇哀素未忘何宜此时亟举盛典若斯之议非所敢闻宜体予至诚勿复为奏所请宜不允仍断来请

乞听宰臣等辞免郊赐劄子【熙宁元年八月九日上】

臣伏覩宰臣曾公亮等奏以河朔菑沴调用繁冗欲望将来大礼毕两府臣寮更不赐银绢奉圣旨送学士院取旨议者或以为两府所赐无多纳之不足以富国而於待遇大臣之礼太薄颇为伤体臣愚窃以为不然古者豕宰制国用视年之丰耗量入以为出固不可於饥饉之时守丰登之法也是故岁凶年谷不登君膳不祭肺大夫不食梁士饮酒不乐明君臣上下皆当深自贬损以救民急也臣窃惟国家帑藏素已空虚重以今岁河北之地灾害特甚曩者庆历之末河决商胡民田虽伤官仓无损而河北父子相食饥殍蔽野今河决之外加以地震官府民居荡为粪壤继以霖雨仓粟腐朽军食且乏何暇及民冬春之交民必大困甚於庆历之时国家岂可坐而视之不加赈救乎况复城櫓须修河防应塞百役并兴所费不貲当此之际朝廷上下安得不同心協力痛加裁损以徇一方之急凡宣布惠泽则宜以在下为先撙节用度则宜以在上为始今欲裁损诸费不先於贵者近者则疎远之人安肯甘心而无怨乎必若为臣有大勲于天下虽锡之山川土田附庸何为不可若止因郊礼陪位而受数百万之赏臣窃有所不安矣臣前所谓赏赐无节者此亦其一也虽臣下不辞犹应裁减况其自辞裁之何损乎倘若但务因循姑息度日欲裁损乘輿供奉之物则曰減於制度大为削弱非所以华国欲

裁损大臣无功之赏则曰所减无多亏伤大体非所以养贤欲裁损羣下浮冗之费则曰人情不悦恐致生事非所以安衆如此则是国用永无可省之日下民永无苏息之期必至於涸竭穷极然後止也且君子之所尚者义也小人之所徇者利也为国者当以义褒君子以利悦小人今大臣以灾害之故辞锡賚以佐百姓之急义之可褒者也陛下从而听之乃所以为厚非所以为薄也虽然两府银绢止於二万匹两未足以救今日之灾又国家旧制每遇郊禋大賚四海下逮行伍无不沾洽不可於公卿大夫全无赐予臣愚以为文臣自大两省以上武臣及宗室自正任刺史以上内臣自押班以上将来大礼毕所赐并宜减半俟他年丰稔自依旧制其文武朝臣以下一切更不减似为酌中臣亦知此物未能富国诚冀国家因此渐思减损其余浮费自今日为始耳臣素愚戇识虑肤浅所言者皆目前之实状非奇伟之高论也伏望陛下更赐裁察若果有可取乞断自圣志勿为衆言所移则天下幸甚取进止

举谏官劄子【熙宁元年八月十一日上】

臣今日面奉圣旨令臣采访可为谏官者密具姓名闻奏臣辞不获命退而惶恐默自思忖凡择言事官当以三事为先第一不爱富贵次则重惜名节次则晓知治体具此三者诚亦难材臣愚何足以识别贤能窃谓已试之人差为可信伏见三司盐铁副使吕海累居言职不畏强御再经谪降执节不回侍御史吕景外貌和厚内守坚正见得知耻临义不疑於臣所知之中此两人似堪其选更乞陛下博访衆臣裁以圣意取进止

论召陕西边臣劄子【熙寧二年六月】

臣擢任御史中丞日闻国家招纳夏国降民曾上言方今百职未举庶政未修百姓未安仓库未实将帅未选军法未立士卒未练器械未精八事不完不可兴兵智虑远疎不合圣心俄而种諤等起绥州之役杨定为夏虏所杀陕西骚然困於馈戍朝廷悔前之失故谪降种諤等以谢夏虏再三招抚方能得其称臣奉表复遵旧约朝廷特遣使者以誓诏册命及金帛杂物赐之尚未返命今窃闻陛下复召种諤等诣阙引对不知陛下欲何所兴为中外闻者无不寒心夫布衣不守信义犹见轻於乡党况王者临御四方当叛则威之服则怀之使信义之明皎如日月若外域幸而臣服无故扰之及其背诞则从而姬煦之得其臣服又从而扰之其於信义威怀如何哉国家以信义威怀边庭百有余年前日种諤等举而弃之兴兵掩其不备以邀一时之功仅能得不食之地百余里饥虏万余人耳今地则归之虏庭民则逃散略尽朝廷有何所得而发兵守卫转粟馈饷公私之费以钜万计其为失策岂不昭然今疮痍未复忧患未弭臣前所言八事一无所修虏疑忌中国警备已严怨毒之心蓄而未发諤等乃欲复为前日所为臣见其无复绥州之功而必有大败覆没之事兵连祸结不可救解公私困竭盗贼将生此乃社稷之忧非独边鄙之患也孔子曰过而不改是谓过矣伏望陛下留神深念至於再至於三当先修内政未可轻议用兵实天下幸甚取进止

论风俗劄子【熙寧二年六月上】

臣闻国之致治在於审官官之得人在於选士士之向道在於立教教之归正在于择术是知

选士者治乱之枢机风俗之根原也窃见近岁公卿大夫好为高奇之论喜诵老庄之言流及科场亦相习尚新进後生未知臧否口传耳剽翕然成风至有读易未识卦爻已谓十翼非孔子之言读礼未知篇数已谓周官为战国之书读诗未尽周南召南已谓毛郑为章句之学读春秋未知十二公已谓三传可束之高阁循守注疏者谓之腐儒穿凿臆说者谓之精义且性者子贡之所不及命者孔子之所罕言今之举人发口秉笔先论性命乃至流荡忘返遂入老庄纵虚无之谈骋荒唐之辞以此欺惑考官猎取名第禄利所在衆心所趋如水赴壑不可禁遏彼老庄弃仁义而絶礼学非尧舜而薄周孔死生不以为忧存亡不以为患乃匹夫独行之私言非国家教人之正术也魏之何晏晋之王衍相与祖述其道宅心事外选举者以此为贤仕官者以此为业遂使纪纲大坏胡夷并兴生民涂炭神州陆沈今若於选士之际用此为术臣惧向去任官之士皆何晏王衍之徒则政事安得不隳风俗安得不坏正始永嘉之弊将复见於今矣伏望朝廷特下诏书以此戒励内外公卿大夫仍指挥礼部贡院豫先晓示进士将来程试若有僻经妄说其言涉老庄者虽复文辞高妙亦行黜落庶几不至疑误後学败乱风俗取进止

论责降刘述等劄子【熙寧二年九月十一日上】

臣窃闻知杂御史刘述集贤校理丁諷审刑详议官王师元皆以执守谋杀刑名差官取勘侍御史刘琦钱顗皆以论列政府公事除员外郎降监酒税中外闻之无不惊愕臣闻孔子曰守道不如守官孟子曰有言责者不得其言则去此古今之通义人臣之大节也彼谋杀已伤自首刑名天下皆知其非今朝廷既违衆议而行之又罪守官之人臣恐重失天下之心也夫继食鷹鷂求其鷂也鷂而烹之将何用哉陛下践阼以来待臣下以寛仁至如皮公弼陛下明知其贪阎充国陛下明知其猥也二人皆以知县权发遣三司判官公事及得罪而出皆为知州今钱顗所坐不过狂直止以连犯大臣遂降为监当然则狂直之罪重於贪猥得罪大臣甚於得罪陛下也臣不胜拳拳窃恐来者侧目箝口以言为讳威福移於臣下聰明有所壅蔽非国家之福也臣备位近臣亲被明诏覩朝廷政事之阙不敢不言伏望圣慈深察愚衷早赐指挥赦刘述等更不取勘其刘琦等别除一般资序差遣庶几稍息羣议取进止

再举諫官劄子【熙寧二年十月七日上】

臣昨日面奉圣旨令臣采访可任諫官者密具姓名闻奏臣窃见龙图阁直学士陈荐旧事陛下於藩邸其忠厚质直陛下必素知之直史馆苏轼制策入优等文学富赡晓達时务劲直敢言职方员外郎王元规自少至长志操坚正所居之官皆着风迹集贤校理赵彦若师民之子强学懿行不减於父平居恂恂如不胜衣遇事刚劲人莫能夺此四人者臣所素知窃谓可备諫职伏乞圣明更赐裁择取进止

乞优赏宋昌言劄子【熙寧二年十月七日上】

臣闻国家大政在於赏罚若赏罚明当功无不成臣去冬奉勅与张茂则相度二股河及生堤利害当时都水监丞宋昌言建议欲於二股河口西岸新滩上置立土约擗栏水势令入东流

候向去东流渐深北流淤浅即闭塞断北流放出御河葫芦河下流以除恩冀深瀛以西诸州军水患臣等因得其言寻具此利害奏闻蒙朝廷听许令修置土约自後昌言同列提举修生堤者以策非已出百端沮毁以为二股河必不可成不如并力修生堤及李立之赴阙上殿所言陛下所亲闻也赖陛下圣明断在不疑必使之修置土约今秋擗栏得水势一并入东流其北流寻已闭断虽颇漂溺损近东沧德等州民田庐舍然恩冀深瀛以西州军蒙利亦为不少其宋昌言不可谓之无功今若与同列称二股河不可成者一例受赏臣窃恐当官之人覩之无所沮劝况昌言因去岁职当在外河决枣强独夺一官今若止复旧官则是衆人受赏而昌言独不得赏也设使曩者修置土约不成或背了二股并入北流其同列岂肯分昌言之罪伏望圣慈察昌言建议之功特与复旧官外更与董役之人等第别加酌獎庶使向去用心向公者朝廷必不负之也取进止

再乞资?人试经义劄子【熙宁三年二月六日上】

臣先曾起请应资?出身人初授差遣者更不试诗只委审官院流内铨试孝经论语大义共三道仍令主判臣僚更将所对义面加询问若义理精通者特保明闻奏优与差遣稍通者依常调不通者且令修学候一周年外再试必须试中方得出官若年四十以上听依旧制只写家状读律自後不蒙朝廷施行臣今复差知审官院窃见资?人初授差遣者令试诗一首实为无益不惟其间有墙面者假手於人徒长奸伪就使自作诗得如曹刘沈宋其於立身治民有何所用古者二帝三王皆立太学之官以教公卿大夫子弟其故何哉盖以其人将嗣守官业苟无德行道艺则必害及於民故也今若欲使公卿大夫子弟尽肄业於大学则其父兄不常在京师固难齐壹若但使之习业於家而考校於初授差遣之际业不习者不得出官则不烦劝督而人人自勉於学矣此乃事之易行者也向若使之尽通诗书礼乐则中材以下或有所不及今若使之习孝经论语倘能尽朞年之功则无不精熟矣此乃业之易习者也然孝经论语其文虽不多而立身治国之道尽在其中就使学者不能践履亦知天下有周公孔子仁义礼乐其为益也岂可与一首律诗为比哉臣窃以为兹事用力不勤更张甚易而为益稍大别无所损伏望圣慈详察或有可取乞检臣前奏特赐施行取进止

乞不拣退军置淮南劄子【熙宁三年二月十一日上】

臣窃闻道涂之言未审虚实或云朝廷欲拣在京禁军年四十五以上微有呈切者尽减下请给并其妻孥徙置淮南以就粮食若实有此议臣窃以为非宜何则在京禁军及其家属率皆生长京师亲姻聯布安居乐业衣食县官为日固久年四十五未为衰老微有呈切尚任征役一旦别无罪负减其请给徙之淮南是横遭降配也诸军之内沙汰甚多必恐人情惶惑大致愁怨虽国家承平无事纲纪具张此属恟恟不安亦无能为患然诏书一下若万一有道路流言惊动百姓朝廷欲姑务省事复为收还则顿失威重向去无以复号令骄兵若遂推而行之则衆怒难犯专欲难成意外之变不可不防梁室分魏博之兵致张彦之乱此近事之可监者也故臣愿朝廷更当深思熟议未宜遽下此诏也夫水未至而虚为之防水虽不至亦无所害谓水不足忧而不为之防一旦水至则防无所及矣故君子贵於思患而豫防之也且国家竭天下之财养长征兵士本欲备御边陲今淮南非用武之地而多屯禁兵坐费衣食是养无用

之兵置诸无用之地也又使边陲常无事则已异日或小有警急主兵之臣必争求益兵京师之兵既少必须使者四出大加召募广为拣选将数倍多於今日所退之兵旧兵尚请衣粮未去而新兵更添衣粮是弃已教阅经战之兵而收市井畝亩之人本欲减冗兵而冗兵更多本欲省大费而大费更广窃恐非计之得者也臣愚伏愿朝廷且依旧法每岁减禁军有不任征战者减充小分小分复不任执役者放充百姓听其自便在京居止但勿使老病者尚占名籍虚费衣粮人情既安於所习皆无怨嗟国家又得其力用不为虚设冗兵既去大费自省在理甚明於事为便臣备位近臣兹事系国安危不敢不言取进止

迓英奏对【熙宁元年八月十一日上】

熙宁元年八月十一日迓英进读已上问河北灾变何以救之光对曰河北大水仓廩漂没所难得者莫先於食朝廷若降金帛令配卖於民以糴谷则重增烦扰且禾稼荡尽糴之亦无所得故饥馑之岁金帛无所用惟食不可一日无耳上曰已令漕五十万石以賑之可足乎对曰臣闻瀛州所损自百五十万石所漕者裁能补瀛州三分之一耳上曰然则奈何对曰臣闻河北东西路水所不及州县颇稔可糴又汴流未絕宜多漕江淮之谷以济之上又问諫官难得人谁可者对曰臣贱官何敢荐人上固问之对曰臣仓猝不能记容臣退而密奏上因论治道言州县长吏多不得人政府不能精择对曰人不易知天下三百余州责其精择诚难但能择十八路监司使之择所部知州而进退之知州择所部知县而进退之得多矣今之提转古方伯州牧之任系一路休戚当慎择天下贤才不可但取资叙及酬獎为之也上又问两府辞郊饗劄子何不呈对以同僚有假故上问兹事何如对曰臣已有奏状臣所见止如此更乞博访近臣裁以圣意上曰谁不同对曰独臣有此愚见他人皆不以为然上曰朕意亦与卿同听其辞赏乃所以成其美非薄之也然减半无益大臣恳辞不若尽听之对曰今郊饗下至卒伍皆有之而公卿更无恐於体未顺上曰已有带马矣对曰求尽纳者人臣之志赐其半者人主之恩也後数日光与王珪禹玉王安石介甫同进呈郊饗劄子於延和殿光言方今国用不足灾害荐臻节省冗费当自贵近为始宜听两府辞赏为便介甫曰国家富有四海大臣郊饗所费无几而惜不之与未足富国徒伤大体昔常袞辞赐饗时议以为袞自知不能当辞禄今两府辞郊饗正与此同耳且国用不足非方今之急务也光曰常袞辞禄位犹知廉耻与夫固位且贪禄者不犹愈乎国家自真庙之末用度不足近岁尤甚何得言非急务邪介甫曰国用不足由未得善理财之人故也光曰善理财之人不过头会箕敛以尽民财如此则百姓困穷流离为盗岂国家之利耶介甫曰此非善理财者也善理财者民不加赋而国用饶光曰此乃桑羊欺汉武帝之言司马迁书之以讥武帝之不明耳天地所生货财百物止有此数不在民间则在公家桑羊能致国用之饶不取於民将焉取之果如所言武帝末年安得羣盗蜂起遣绣衣使者逐捕之乎非民疲极而为盗邪此言岂可据以为实介甫曰太祖时赵普等为相赏赉或以万数今郊饗匹两不过三千岂足为多光曰普等运筹帷幄平定诸国赏以万数不亦宜乎今两府助祭不过奏中严外办沃盥奉帨巾有何功勤而得比普等乎与介甫争论久之禹玉曰司马光言省费自贵近始光言是也王安石言所费不多恐伤国体安石言亦是也惟陛下裁之上曰朕亦与司马光同今且以不允答之可也是日适会介甫当制遂以上前所言意章批答引常袞事以责两府两府亦不复辞明日迓英讲读罢上独留介甫与语两府不敢先出以俟之至晡後乃出不数日介甫参知政事

传家集卷四十二

卷四十三

钦定四库全书

传家集卷四十三 宋 司马光 撰章奏二十六

上体要疏【熙寧二年八月五日上】

月日具位臣司马光谨昧死再拜上疏皇帝陛下臣准御史台牒伏奉四月二十日诏勅传曰近臣尽规以其荣耻休戚与上同也今在此位者视朕过失与朝廷政事之阙默而不言乃或私议窃叹若以为其责不在已夫岂皆习见成俗以为当然其亦有含章怀宝待唱而发者也今日百度隳弛风俗偷惰薄恶灾异谴告不一此诚忠贤助朕忧惕以剏制改法救弊除患之时宜令侍从官自今视朕过失与朝廷政事之阙无有巨细各具章奏极言无隐噫言善而不用朕有厥咎导之而弗言尔为不恭朕将用此考察在位所以事君之实明黜陟焉臣以弩下之材自仁宗皇帝时蒙擢在侍从服事三朝恩隆德厚陨身丧元不足为报虽访问所不及犹将披肝沥胆以効其区区之忠况圣意采纳之勤督责之严谆谆如此臣敢营私避怨匿情爱已不为陛下别白当今之切务庶几少补万分之一邪臣闻为政有体治事有要自古圣帝明王垂拱无为而天下大治者凡用此道也何谓为政有体君为元首臣为股肱上下相维内外相制若网之有纲丝之有纪故诗云勉勉我王纲纪四方又云岂弟君子四方之纲古之王者设三公九卿二十七大夫八十一元士以纲纪其内设方伯州牧卒正连帅属长以纲纪其外尊卑有叙若身之使臂臂之使指莫不率从此为政之体也何谓治事有要夫人智有分而力有涯以一人之智力兼天下之衆务欲物物而知之日亦不给矣是故尊者治衆卑者治寡治衆者事不得不约治寡者事不得不详约则举其大详则尽其细此自然之势也益稷曰元首明哉股肱良哉庶事康哉言君明则能择臣臣良则能治事也又曰元首丛脞哉股肱惰哉万事堕哉言君亲细务则臣不尽力而事废坏也立政曰文王罔攸兼於庶言庶狱庶慎惟有司之牧夫是训用违庶狱庶慎文王罔敢知于兹言文王择有司而任之其余皆不足知也康诰曰庸庸祗祗威威显民言文王用其可用祗其可祗刑其可刑专明此道以示民也是故王者之职在於量材任人赏功罚罪而已苟能谨择公卿牧伯而属任之则其余不待择而精矣谨察公卿牧伯之贤愚善恶而进退诛赏之则其余不待进退诛赏而治矣然则王者所择之人不为多所察之事不为烦此治事之要也臣窃见陛下日出视朝继以经席将及日中乃还宫禁入宫之後窃闻亦不自闲省闕天下奏事羣臣章疏逮至昏夜又御灯火研味经史博观羣书虽中宗高宗之不敢荒宁文王之日昃不食臣以为不能及也然自践阼以来孜孜求治於今三年而功业未着者殆未得其体要故也祖宗创业垂统为後世法内则设中书枢密院御史台三司审官审刑等在京诸司外则设转运使知州知县等衆官以相统御上下有叙此所谓纲纪者也今陛下好使大臣夺小臣之事小臣侵大臣之职是以大臣解体不肯竭忠小臣谄上不肯尽力此百官所以弛废而万事所以隳颓者也而陛下方用为致治之本此臣之所大惑也臣微贱不得尽知朝廷之事且以耳目所接近日数事臣所知者言之其余陛下可以

类求也昔汉文帝问陈平天下一岁决狱及钱谷出入几何平曰陛下即问决狱责廷尉问钱谷责治粟内史必也使卿大夫各得任其职此乃宰相事也若平者可谓能知治体矣今之两府皆古宰相之任也中书主文枢密主武若乃百官之长非其人刑赏大政失其宜此两府之责也至於钱谷之不充条例之不当此三司之事也陛下苟能精选晓知钱谷忧公忘私之人以为三司使副判官诸路转运使各使久於其任以尽其能有功则进无功则退名不能乱实伪不能掩真安民勿扰使之自富处之有道用之有节何患财利之不丰哉今乃使两府大臣悉取三司条例别置一局聚文士数人与之谋议改更制置三司皆不与闻臣恐所改更者未必胜於其旧而徒纷乱祖宗成法考古则不合适今则非宜吏缘为奸农商失业数年之後府库耗竭於上百姓愁困於下衆心离骇将不复振矣且两府於天下之事无所不總若百官之职皆使两府治之则在上者不胜其劳而在下者为无所用矣又监牧使主养马四园苑主课利今乃使监牧使不属羣牧司四园苑不属三司提举司则在下者各得专权自恣而在上者为无所用矣陛下方欲纳天下於大治而使百官在上者不委其下在下者不禀其上能为治乎若此之类臣窃恐似未得其体也凡天下之事在一县者当委之知县在一州者当委之知州在一路者当委之转运使在边鄙者当委之将帅然後事乃可集何则久任其位识其人情知其物宜赏罚之权足以休戚所部之人使之信服故也今朝廷每有一事不委之将帅监司守宰使之自为方略责以成效而施其刑赏常好别遣使者衔命奔走旁午於道所至徒有烦扰之弊而於事未必有益不若勿遣之为愈也夫事之利害吏之能否皆非使者所能素知不免临时询采於人所询者或遇公明忠信之人犹仅能得其一二或遇私闇奸险之人则是非为之倒置矣此二者交集於前而使者不能猝辨也是以往往害事而少能为益非将帅监司守宰皆贤而使者皆愚也累岁之讲求与一朝之议论积久之采察与目前之毁誉精粗详略其势不同故也其有居官累岁而不知利害临人积久而不知能否或虽知利害而不能变更虽知能否而不能黜陟此乃愚昧私曲之人朝廷当察而去之更择贤者以代其位不当数遣使者扰乱其间使不得行其职业也又庸人之情苟策非已出则媚嫉沮坏惟恐其成官吏若是者十常五六借使使者所规画曲尽其宜在彼之日其当职之人已怏怏不悦不肯同心以助其谋協力以成其事曰朝廷自遣专使治之我何敢与知及返命之日彼必败之於後曰使者既谋而授我我今竭力而成之功悉归於首谋之人我何有哉此所以谓不若毋遣使者而属任当职之人为愈也夫使者所以通远迩之情固不可无然今之转运使即古使者之任苟得人而委之贤於暂遣使者远矣若监司自为奸慝贪纵或有所隐蔽欺罔或为部内之人所讼或所谋画之事未得其宜朝廷欲察其罪恶审其虚实判其曲直决其是非然後别遣使者案之若案得其实监司有罪则当刑不才则当废岂有但已者也今每有一事朝廷辄自京师遣使者往治之是在外之官皆无所用也使者既代之治事而当职之人亦无所利无所废是只使之拱手旁观偷安窃禄者矣若此之类臣窃恐似未得其体也今朝廷之士左右之臣皆曰陛下聪明刚断威福在已太平之功可指日而致臣愚窃独以为未也臣闻古之圣帝明王闻人之言则能识其是非故谓之聪观人之行则能察其邪正故谓之明是非既辨邪正既分奸不能惑佞不能移故谓之刚取是而舍非诛邪而用正确然无所疑故谓之断诛一不善而天下不善者皆惧故谓之威赏一有功而天下有功者喜故谓之福今陛下聪明刚断则诚体之矣欲收威福之柄则诚有其志矣然於所以为之之道尚或有所未尽故臣以为太平之功未可期也夫帝王之道当务其远者大者而略其近者小者国之大事当与公卿议之而不当使小臣参之四方之事当委牧伯察之而不当使左右覘之倘公卿牧伯尚不能择贤者而任

之小臣左右独能得贤者而使之乎若苟为不贤则险詖私谒无不为已今陛下好於禁中出手诏指挥外事非公卿所荐举牧伯所纠劾或非次迁官或无故废罢外人疑骇不知所从此岂非朝廷之士左右之臣所谓聪明刚断威福在已者邪陛下闻其言而信之臣窃以为过矣夫公卿所荐举牧伯所纠劾或谓之贤者而不贤谓之有罪而无罪皆有迹可见责有所归故不敢大为欺罔若奸臣密白陛下令陛下自为圣意以行之则威福集於私门怨谤归於陛下矣安得谓之威福在陛下邪且陛下曩时中诏所指挥者率非大事至於两禁美官边藩将帅省府职任诸路监司此皆衆人之所希求治乱之所系属当除授之际窃恐未必一一出圣志也若乃奸邪贪猥之人陛下所明知而黜去者或更改官而升资或不久复进用然则威福之柄果不在陛下而陛下偶未之思也以此观之面誉陛下聪明刚断威福在已太平可立致者非愚则谀不可不察也陛下必欲威福在已曷若谨择公卿大臣明正忠信者留之愚昧阿私者去之在位者既皆得其人矣然後凡举一事则与之公议於朝使各言其志陛下清心平虑择其是者而行之非者不得复夺也凡除一官亦与之公议于朝使各举所知陛下清心平虑择其贤者而用之不肖者不能复争也如此则谋者举者虽在公卿大臣而行之用之皆在陛下安得谓之威福不在已邪陛下此之不为而顾彼之久行臣窃恐似未得其要也夫三人羣居无所统一不散则乱是故立君以司牧之羣臣百姓势均力敌不能相治故从人君决之人君者固所以决是非行刑赏也若人君复不肯决当使从谁决之乎夫人心不同如其面焉国家凡举一事朝野之人必或以为是或以为非凡用一人必或以为贤或以为不肖此固人情之常自古而然不足怪也要在人主审其是非而取舍之取是而舍非则安荣取非而舍是则危辱此乃安危荣辱之所以分也是以圣王重之故博谋羣臣下及庶人然而终决之者要在人君也古人有言曰谋之在多断之在独谋之多故可以观利害之极致断之独故可以定天下之是非若知谋而不知断则羣下人人各欲逞其私志斯衰乱之政也诗云谋夫孔多是用不集发言盈庭谁敢执其咎如匪行迈谋是用不得於道哀哉为猷匪先民是程匪大猷是经维迹言是听维迹言是争如彼筑室於道谋是用不溃於成此言周室之衰人臣不知先王之大道务争近小之事人君不能定其可否而事终无成也汉世国家有大典礼大政令大刑狱大征伐必下公卿大夫博士议郎议其议者固不能一必有参差不齐者矣於是天子称制决之曰丞相议是或曰廷尉当是而羣下厌然无有不服者矣今陛下听羣臣各尽其情以议事此诚善矣然终不肯以圣志裁决遂使羣臣有尚胜者以巧文相攻辩口相挤至於再至於三互相反覆无有限极臣愚深恐亏朝廷之政体损陛下之明德流闻四方取轻夷狄非嘉事也夫天下之事有难决者以先王之道揆之若权衡之於轻重规矩之於方圆锱铢毫忽不可欺矣是以人君务明先王之道而不习律令知本根既殖则枝叶必茂故也近者登州妇人阿云谋杀其夫重伤垂死情无可愍在理甚明已伤不首於法无疑中材之吏皆能立断事已经审刑院大理寺刑部断为死罪而前知登州许遵文过饰非妄为巧说朝廷命两制定夺者再命两府定夺者再勅出而复收者一收而复出者一争论纵横至今未定夫以田舍一妇人有罪在於四海之广万几之衆其事之细何啻秋毫之末朝廷欲断其狱委一法吏足矣今乃纷纭至此设更有可疑之事大於此者将何以决之夫执条据例者有司之职也原情制义者君相之事也分争辨讼非礼不决礼之所去刑之所取也阿云之事陛下试以礼观之岂难决之狱哉彼谋杀为一事为二事谋为所因不为所因此苛察缴绕之论乃文法俗吏之所争岂明君贤相所当留意邪今议论岁余而後成法终於弃百代之常典悖三纲之大义使良善无告奸凶得志岂非徇其枝叶而忘其本根之所致邪若此之类臣窃恐似未得其要也此皆衆人之

所私议窃叹而莫敢明言者臣独以受恩深重不顾斧钺为陛下言之惟圣明裁察臣光昧死再拜上疏

辞枢密副使劄子【熙宁三年二月十二日上】

臣准合门告报已除臣枢密副使续准勾当御药院陈承礼传宣令臣即今受勅告者臣赋分朴愚不通时务近日以来加以衰疾恪居旧职犹恐隳败况乃拔擢待之不次窃惟宥密之地日侍諝谟内训六师外抚四海用人当否系国安危岂臣无似所能堪称伏望圣慈更择贤材俾居其任听臣且守旧职取进止

辞枢密副使第二劄子【熙宁三年二月十二日上】

臣准勾当御药院黎永德奉宣圣旨令臣即今入见者臣屡违严诏当伏重诛但以闻命以来揣分已熟自幼及长颇读经史舍此之外一无所长当世之务懵不通晓常日置之闲官仅脱旷败尚以属文不工剽剧非长翰林审官每欲辞免况於枢府要地任重责大一日失职则死及之臣虽至愚粗知自爱陈力就列古人所韪是以宁冒违诏之罪不敢当窃位之讥伏望圣慈察其惓款决非虚饰特赐寝罢新命止守旧职天地更生之惠下臣莫大之幸也取进止

辞枢密副使第三劄子【熙宁三年二月十九日上】

臣前者两曾辞免枢密副使未奉俞旨窃虑区区之诚未能上达须至详悉复有奏陈臣闻人之材性各有能有不能人主量材然後授官人臣审能然後受事是以官不旷而事无败也臣幸生承平之时家世为儒臣自髫髻至於弱冠杜门读书不交人事仕宦以来多在京师少历外任故於钱谷刑狱繁剧之务皆不能为况於军旅固所不习独於解经述史及以愚直补过拾遗不避怨怒则庶几万一或有可取是以每於拜官之际辞所不能而不辞其所能彘者除开封府推官以繁剧曾辞後除修起居注知制诰翰林学士以文采不工曾辞除龙图阁直学士以久在諫职无效曾辞再除翰林学士兼侍读学士以言事未了曾辞除史馆修撰以方修资治通鉴恐朝廷修国史难以两处供职曾辞自余除国子监直讲馆阁校勘史馆检讨集贤校理直秘阁起居舍人同知諫院天章阁待制兼侍讲知諫院权御史中丞此皆朝廷清要之职除书始下臣即时受命未尝辄辞所以然者自度驽钝可以策励不至旷败故也天下之人见臣屡辞恩命或以为不慕荣贵或以为饰诈邀名是皆不知臣者也臣自幼习赋诗论策应举就试每三年一次投状乞磨勘岂不慕荣贵者邪臣若陰有营求阳为辞避乃可谓之饰诈邀名陛下察臣何尝如此岂饰诈邀名者邪臣之愚心正欲辞所不能而已今二府之任自非天下英杰之士不可轻处岂臣愚浅下材所能堪称或遇国家大事参陪末议有毫厘之差使陛下有盱眙之忧以累知人之哲臣虽伏质横分不足塞责加之素有目疾不能远视近日以来颇多健忘居常供职犹惧废阙况以衰病当兹重任是用披肝沥胆昧冒上陈违犯诏旨至於再三触法抵罪不自知觉伏望圣慈特赐矜察依臣前奏追还新恩俾守旧职不胜忧慙危切之诚临纸叩头俯伏俟命取进止

辞枢密副使第四劄子【熙宁三年二月二十一日上】

臣准勾当御药院陈承礼传宣令臣即今入见者臣仰烦圣恩重沓如此虽顽如木石亦当迁变然臣固守愚志不移者诚以荷盛德者必有以酌报居重位者不可以无功臣自惟立朝材器短浅一无所用独有补过拾遗可裨万一方今为天下患者唯有制置三司条例司及诸路提举勾当常平广惠仓使者若陛下朝发一诏罢之则夕无事矣故臣不量力势轻用上陈倘陛下以臣言为是乞早赐施行若以为非则臣乃狂愚之人於今英俊满朝而擢用狂愚之人使污宥密之地岂不为圣政之累也伏望圣慈追还枢密副使恩命令臣且供旧职取进止

辞枢密副使第五劄子【熙宁三年二月二十二日上】

臣准勾当御药院李舜举传宣令臣即今赴合门受勅告者陛下圣恩无穷愚臣辞避不已尽下之德愈盛慢上之罪愈深忧惶失图无地自处臣窃惟陛下今兹不次用臣必以识虑为小有可采臣亦以受陛下非常之知不可以全无报效是以乞罢制置三司条例司及诸路提举勾当常平广惠仓使者若陛下果能行此胜於用臣为两府臣若得此言果行胜於居两府之位倘或所言皆无可采臣独何颜敢当重任伏望圣慈矜察更不复遣使臣宣召追还枢密副使恩命庶使贱臣差获自安取进止

贴黄

李舜举传圣旨谕臣以枢密院本兵之地各有职分不当更引他事为辞臣今若已受枢密副使勅告即诚如圣旨不敢更言職外之事今未受恩命犹是侍从之臣於朝廷阙失无可言者所以区区贪进小忠庶几少补圣政之万一况所言二事并是去年已曾上言以其无效所以不敢当今日新恩非为侵官乞圣明裁察兼臣右膝下见患一疮有妨拜起入见未得伏望圣慈更不差使臣宣召臣只候膝疮稍愈自乞入见面奏恳诚辞枢密副使第六劄子【熙宁三年二月二十七日上寻得旨听许】

臣伏准勾当御药院刘有方传宣抚问兼问臣取几日出见令早入者圣恩深厚不忘微贱存恤勤至臣蝼蚁之命无足报塞惶恐无措伏念臣即今膝疮虽稍减可尚未全愈有妨拜起未知可以入见之日不独如此兼为臣近曾上疏言乞罢制置三司条例司及追还诸路常平广惠仓使者未闻朝廷少赐采录但闻条例司愈用事催散青苗钱愈急中外人情愈遑遑不安臣当此际独以何心敢当高位故寧被严谴未敢辄出臣闻古者国有大事谋及卿士谋及庶民参酌下情与衆同欲是以事无不当令无不行未尝有四海之内卿士大夫农商工贾异口同辞咸以为非独信二三人之偏见而能成功致治者也伏望陛下出臣近所上疏宣示中外臣庶使共决是非若臣言果是乞早赐施行若臣言果非乞更不差使臣宣召早收还枢密副使勅告治臣妄言及违慢之罪明正刑书庶使是非不至混殽微臣进退有地不为天下之所疑怪取进止

卷四十四

<集部,别集类,北宋建隆至靖康,传家集>

钦定四库全书

传家集卷四十四 宋 司马光 撰章奏二十七

乞罢条例司常平使疏【熙寧三年二月二十日上】

月日具位臣司马光谨昧死再拜上疏皇帝陛下臣蒙圣恩除枢密副使仍屡遣陈承礼等趣臣就职德泽汪洋天隆地厚非臣陨身糜骨所能报称然臣窃惟陛下所以用臣之意盖察臣狂直庶几有补於国家臣所以事陛下之心亦不过竭其愚衷以裨圣德之万一若陛下徒以禄位荣臣而不取其言则是以天官私非其人臣徒以禄位自荣而不能救生民之患则是盗窃朝廷名器以私其身诚恐上累陛下之至公下丧微臣之素守此臣所以屡违诏命不敢祇受者也臣伏见陛下天纵英明厉精求治思得嘉谋以新美天下而建画之臣不能仰副圣意思虑未熟讲议未精徒见目前之小利不顾永久之大害忧政事之不治不能辅陛下修祖宗之令典乃更变乱先王之正刑患财利之不足不能劝陛下以恭俭节用乃更遣聚敛之臣诛剥齐民设官则以冗增冗立法则以苛益苛使四海危骇百姓骚然犹且坚执而行之不肯自以为非也臣先曾上疏言不当设制置三司条例司又言天下之事当委之转运使知州知县不当别遣使者扰乱其间又尝因经筵侍坐言散青苗钱不便自後朝廷更遣使者四十余人分行天下以提举勾当常平广惠仓相度差役农田水利为名其实专使之散青苗钱臣窃自疑智识浅短不足以知天下变通之务又疑因臣之言激怒建画之臣使行之更力由是闭口不敢复言今行之才数月中外鼎沸皆以散青苗钱为不便然後臣乃敢发口复言彼言青苗钱不便者大率但知所遣使者或年少位卑倚势作威陵轹州县搔扰百姓止论今日之害耳臣所忧者乃在十年之後非今日也夫民之所以有贫富者由其材性愚智不同富者智识差长忧深思远寧劳筋苦骨恶衣菲食终不肯取债於人故其家常有赢余而不至狼狈也贫者眚窳偷生不为远虑一醉日富无复赢余急则取债於人积不能偿至於鬻妻卖子冻馁填沟壑而不知自悔也是以富者常假贷贫民以自饶而贫者常假贷富民以自存虽苦乐不均然犹彼此相资以保其生今县官乃自出息钱以春秋贷民民之富者皆不愿取贫者乃欲得之提举官欲以多散为功故不问民之贫富各随户等抑配与之富者与债仍多贫者与债差少多者至十五緡少者不减千钱州县官吏恐以逋欠为负必令贫富相兼共为保甲仍以富者为之魁首贫者得钱随手皆尽将来粟麦小有不登二税且不能输况於息钱固不能偿吏督之急则散而之四方富者不去则独偿数家所负力竭不逮则官必为之倚阁春债未毕秋债复来历年寢深债负益重或值凶年则流转死亡幸而丰稔则州县之吏并催积年所负之债是使百姓无有丰凶长无苏息之期也贫者既尽富者亦贫臣恐十年之外富者无几矣富者既尽若不幸国家有边隅之警兴师动衆凡粟帛军须之费将从谁取之臣不知今者天

下所散青苗钱凡几千万缗若民力既竭加以水旱之灾州县之吏果有仁心爱民者安得不为之请於朝廷乞因郊赦而除之朝廷自祖宗以来以仁政养民岂可视其流亡转死而必责其所负其势不得不从请者之言也然则官钱几千万缗已放散而不返矣官钱既放散而百姓又困竭但使闾胥里长於收督之际有乞取之资此可以谓之善计乎且常平仓者乃三代圣王之遗法非独李愷耿壽昌能为之也穀贱不伤农穀贵不伤民民赖其食而官收其利法之善者无过於此比来所以隳废者由官吏不得人非法之失也今闻条例司尽以常平仓钱为青苗钱又以其穀换转运司钱是欲尽坏常平专行青苗也国家每遇凶年供军仓自不能足用固无羨余以济饥民所赖者止有常平仓钱穀耳今一旦尽作青苗钱散之向去若有丰年将以何钱平糴若有凶年将以何穀调贍乎臣窃闻先帝尝出内藏库钱一百万缗助天下常平仓作籴本前日天下常平仓钱穀共约一千余万贯石今无故尽散之佗日若思常平之法复欲收聚何时得及此数乎臣以谓散青苗钱之害犹小而坏常平仓之害尤大也今国家每有大费三司所不能供者陛下辄取内藏库物以给之彼内藏库者乃祖宗累世之所蓄聚以备军旅非常之用也使其物常如泉源流出於库无有穷竭之时则可矣若本皆敛之於民以实之则有时而空矣昔汉文帝欲作露台召匠计之直百金上曰百金中人十家之产也吾何以台为太宗时兗王尝作假山召僚属置酒观之翊善姚坦独俛首不视王强使视之坦曰坦惟见血山耳不见假山王惊问其故坦曰坦在田舍时见州县督税里胥临门捕人父子兄弟送县笞挞血流满身愁苦之声不可忍闻此假山皆民租赋所为非血山而何是时上亦自为假山闻之遽命毁之今陛下令薛向於江淮为贸易以三百万缗界之又散青苗钱数千万缗其余五十万三十万者固不足数尔其为露台假山之费不亦多乎陛下聰明仁俭固不減於汉文帝及太宗然而视弃财物如粪土者盖未知其所从来皆出於生民之膏血耳陛下若终信条例司所言推而行之不肯变更以循旧贯十年之外富室既尽常平已坏帑藏又空不幸有方二三百千里之水旱饿殍满野加以四夷侵犯边境羽书猝至戎车塞路攻战不已转饷不休当是之时民之羸者不转死沟壑壮者不聚为盗贼将何之矣秦之陈胜吴广汉之赤眉黄巾唐之黄巢皆穷民之所为也大势既去虽有智者不能善其後矣臣窃惟太祖太宗躬擐甲胄栉风沐雨跋履山川蒙犯矢石以为子孙成光明盛大之业如此其美也陛下试取臣所进历年图观之自周末以来至于国初一千三百六十有二年其间乱离板荡则固多矣至於中外无事不见兵革百有余年如国朝之盛者岂易得乎此臣所以尤为陛下痛惜者也书曰民不静亦惟在王宫邦君室臣窃观方今四夷亲附边鄙不耸五穀和熟盗贼稀简是宜为天下和乐无事之时而中外恟恟人不自安者无佗故也正由朝廷有制置三司条例司诸路有提举勾当常平广惠仓使者争献谋画各矜智巧变更祖宗法度侵夺细民常产掊敛财利以希恩宠非独此青苗一事而已至於欲计亩率钱顾人充役决汴水以种稻及浇灌民田及欲泄三十六陂水募人耕佃若此之类不可悉数道路之人共所非?而条例司自以为高奇之策书以授常平使者必欲行之天下恐其兴作之不已皆如青苗为害於民也故小大遑遑不敢自安苟不罢废此局则生民必无休息之期矣陛下诚能昭然觉悟采纳臣言罢制置三司条例司及追还诸路提举勾当常平广惠仓使者其官员并送审官院与合入差遣青苗钱已散者令州县候丰熟日催收本钱更不取利未散者毋得更散其常平仓钱穀依旧封桩令提点刑狱司管勾则太平之业依然复故矣兹事明如白黑易如反掌陛下何憚而不为也如此臣虽尽纳官爵但得为太平之民以终余年其幸多矣苟言不足采陛下虽引而寘诸二府徒使天下指臣为贪荣冒宠之人未审陛下将何所用之不胜悽悽狂愚之诚惟圣明裁处臣光昧

死再拜上疏

请自择台谏劄子【熙寧三年四月十六日上】

臣窃见近日台谏上言制置三司条例司害民及吕惠卿奸邪者率被责降或更加以恶名如吕公着告辞云乃诬方镇有除恶之谋中外闻者无不骇愕窃惟朝廷之意无佗止欲惩戒来者使不敢复言耳国家置台谏官以为天子耳目唯恐政事有阙失百姓有疾苦大臣专恣左右奸邪天子深居九重不能得闻故也今台谏官稍有怀刚直之志畏天下公议忧念朝廷哀闵百姓忤犯大臣刺讥左右者陛下辄罪而逐之更使大臣自择所亲以代其任万一又为公论则又逐之是必得庸懦阿谀不知廉耻附下罔上背公死党之人然後止耳若言路皆此等之人则禁闕之外陛下耳目之所不及者虽有至大之事迫切之祸陛下何从知之如此岂宗庙社稷之福也晏子曰君所谓可臣亦曰可君所谓否臣亦曰否若以水济水谁能食之今陛下使大臣自择台谏官大臣又取同於已者存之异於已者去之然则陛下独与大臣为天下足矣何必更置台谏官也且条例司之害民吕惠卿之奸邪天下之人谁不知之独陛下与王安石未之寤耳岂可更为之黜逐台谏以长其威福成其气势臣窃为陛下寒心今台谏官已被逐者臣不敢留唯愿陛下自择公正刚直者布之言路以明四目達四聰勿使为羣下所欺蔽则天下幸甚臣受陛下过分之恩不敢塞默虽死怨讎之手犹贤於窃禄偷生者也取进止

论李定劄子【熙寧三年五月二日上】

臣窃见近者朝廷除秀州推官李定为监察御史里行知制诰李大临苏颂等累次封还词头数日来外间皆言朝廷已为之寢罢今日复闻劄下舍人院须令草词臣窃意朝廷知大临等既累次封还词头今复草之则为反覆必难奉诏因欲以违命之罪罪之使今後凡朝廷所行政令羣下无敢立异者若果如此则百执事之人自非偷合苟容者皆不得立於朝政令或有得失陛下复何从知之晏婴所谓以水济水贾山引秦之季世以戒汉文帝者正患其如此耳臣前论逐台谏官今又论大临等非敢私此数人正为国家惜言路之絕耳伏望陛下审思而慎行之勿使聰明遂至壅蔽则天下幸甚取进止

贴黄

国家不次用人固无常法然必使衆心厌服然後为美是以尧舜非不聰明也其命官皆先谋岳牧既衆言金同复明试以功而後用之故举不失能而上下雍熙也臣素不识李定实不知其行能何如陛下果知其贤何不且试之以渐俟其功效显着衆皆知之然後不次擢用则谁曰不可何必今日与臣下力较胜负殆非人君广大之体也

乞免永兴军路苗役钱劄子【熙寧三年十一月二日上】

臣奉勅差充永兴军一路安抚使臣窃见陕西百姓自城绥州以来供应诸般科配及支移税赋往近边州军日近复有环庆事宜加之今年亢旱五稼不熟人户流移者已间不少国家所

宜汲汲存恤使人户安集臣伏见先所散青苗钱贫破百姓为患不细臣已曾累次上言不敢重烦圣聽今又闻议者欲令州县将诸色役人一时放罢官为顾人祇应却令人户均定免役钱随二税送纳乃至单丁女户客户寺观等并令均出若果行此法其为害必又甚於青苗钱何则上等人户自来更互充役有时休息今岁岁出钱是常无休息之期也下等人户及单丁女户等从来无役今尽使之出钱是孤贫鰥寡之人俱不免役也若钱少则不足以顾人若钱多则须重斂於民顾人不足则公家阙事重斂於民则衆心愁怨自古以来徭役皆出於民今一旦变之未见其利也且受顾者皆浮浪之人使之主守官物则必侵盜使之干集公事则必为奸事发则挺身逃亡无有田宅宗族之累建议者亦自知其不可乃云若顾召人不足即依例轮差支与逐处所定顾钱足了役事则自当有人应募今既无人应募必是钱少不足充役是徒有免役之名而役犹不免但无故普增数倍之税也彼青苗钱以债与民可取其息已是困民之法今又使横出数倍之税民安有不困蹙者哉以富庶之域犹不能堪况陕西累岁奉边民力雕弊岂可复为无益之事以扰之乎伏望圣慈特免永兴军一路青苗免役钱以爱惜民力专奉边费其余路分则系自朝廷裁酌取进止乞不令陕西义勇戍边及刺充正兵劄子【熙寧三年十一月上】

臣先任諫官日伏见国家栋刺陕西义勇臣累曾论列以为徒使百姓愁苦无益於用近闻环庆路用义勇与西贼战鬪望风奔溃死伤甚多致主将陷没此义勇不可用之明验也臣窃闻议者犹欲教閱义勇以抗西贼若止令州县教閱守护郷土犹於人情不至大扰若发以戍边或如庆历中刺为正兵则衆人覩环庆二败譬如无罪往就死地恐於人情大有不安国家既重赋斂以尽其财又逼之战鬪以絶其命是驱良民使为盜賊也彼为官军则惜生故望风退走彼为盜賊则必死自可以一敌百臣恐今日教之挽射击刺乃佗日为盜之资也庙堂之议臣所不得知万一有之诏下之日臣论列不及况当远离朝廷故不得不先事而言也取进止

乞留诸州屯兵劄子【熙寧三年十一月上】

臣奉勅充永兴军一路兵马都總管安抚使臣窃闻本路十州所管屯驻禁军至少大率皆是缘边就粮兵士常时分为上下番有一半在逐州或遇边上稍有警急则尽皆抽去逐州并无守把兵士臣窃惟天下事不可忽必须思患豫防戎狄犯边虽当竭力扞御然腹内州军岂可全无武备况逐州皆有军资甲仗市邑民居万一犬羊奔突间谍内应或盜賊乘虚奸人窃发其本州官吏手下无兵虽有智勇将安所施臣愚以为逐州宜各添一指挥禁军屯驻内永兴军为关中根本宜添两指挥若朝廷别无兵士可以差拨只乞於缘边就粮兵士内依此数目皆留在逐州屯驻边上更不得勾抽所贵缓急不至失备取进止

传家集卷四十四

卷四十五

钦定四库全书

传家集卷四十五 宋 司马光 撰章奏二十八

谏西征疏【熙寧四年正月一日上】

月日具位臣光谨昧死再拜上疏皇帝陛下臣以不材误承朝廷委用待罪长安兼领一路十州兵民大柄朝辞之日伏蒙陛下面谕以凡边防事机及朝廷得失有所闻见令一一奏闻臣受命以来且愧且惧所愧者圣知深厚责任至重所惧者智识浅短无以堪称夙夜疚心不敢寧居臣自入境以来见流移之民道路相望询问里皆云今夏大旱禾苗枯瘁河渭以北絕无所收独南山之下稍有所存而入秋霖雨经月不霁禾虽有穗往往无实虽有实往往无米虽有米率皆细黑一斗之粟舂簸之後不过得米三四升穀价踴贵民间累年困於科调素无积蓄不能相贍以此须至分房减口就食西京襄邓商虢等州或庸赁客作或烧炭采薪或乞匄剽窃以度朝夕当此之际国家惟宜镇之以静省息诸事减节用度则租税自轻徭役自少逋负自寬科率自止四患既除民力自足民财自饶闾里自安流亡自还固不待陛下忧勤於中宰相劬劳於外然後人人得其所也苟或不然国家虽欲轻租税寬逋负其所费之财何由可得虽欲少徭役止科率其所营之事何由可成四患不除虽日下恩泽之诏民犹不免於流移转死也盖欲止沸者莫若絕薪欲安民者莫若省事此目前之验非难知也臣到官以来伏见朝廷及宣抚等司指挥分义勇作四番欲令以此於缘边戍守选诸军骁锐及募闾里恶少以为奇兵造乾粮皱饭布囊力车以备馈运悉取岁赐乘常之物散给缘边诸路又竭内地府库甲兵财物以助之且以永兴一军【一作路】言之所发人马甲八千副钱九万贯银二万三千两银盃六千枚其余细琐之物不可胜数动皆迫以军期上下相驱急於星火官吏狼狽下民惊疑皆云国家将以今春大举六师长驱深入以讨乘常之罪臣以疎贱不得预闻庙堂之议未知兹事为虚为实昨者亲承德音以为方今边计唯宜谨严守备俟其入寇则坚壁清野使之来无所得兵疲食尽可以坐收其弊臣退而思念圣谋高远深得王者御戎狄之道实天下之福及到关中乃见凡百处置皆为出征调度臣不知有司在外不谕圣意以致有此张皇将陛下默运神算不令愚贱之臣得闻其实也臣不胜惶恐昼则忘食夜则废寝心寒股栗窃为陛下危之夫兵者凶器圣人不得已而用之自古以来国家富强将良卒精因人主好战不已以致危乱者多矣况今公私困竭将愚卒懦乃欲驱之塞外以捕狡悍之虏其无功必矣岂惟无功兼後患甚多不可尽言也若朝廷初无出征之意则何为坐散府库之财疲生民之力讫无分毫之事万一将来虏骑入寇府库已竭民力已困将何以御之臣前任御史中丞日朝廷将兴绥州之役臣曾上言国家先当举百职修庶政安百姓实仓库选将帅立军法练士卒精器械八事皆备然後可以征伐四夷今此八事未有一者胜於曩时而况关中饥饉十室九空为盗贼者纷纷已多县官仓库之积所余无几乃欲轻动大衆横挑猛敌此臣之所大惧也或者又云国家未讨乘常先欲试兵诛一小族若果如此尤为不可何则今者竭关中之财

力大兴师衆乃舍有罪之强寇诛无辜之小种胜之不武不胜为笑将无以复号令戎狄矣此二策者皆为不可伏望陛下深鉴安危之机消之於未萌救之於未形速下明诏抚谕关中之民以朝廷不为出征之计其义勇更不分番於缘边戍守亦不选募奇兵凡诸调发为馈运之具者悉令停罢爱惜内地仓库之储以备春深赈救饥穷之人如此岂惟生民之幸亦社稷之福也臣不胜忧迫直输赤诚惟陛下裁察臣光昧死再拜上疏

应诏言朝政阙失状【熙寧七年四月十八日上】

右臣准西京牒准三月三十日诏勅朕涉道日浅晦于致治政失厥中以干陰阳之和乃自冬迄春旱暵为虐四海之内被灾者广间诏有司损常膳避正殿冀以塞眚消变历日滋久未蒙休应嗷嗷下民大命近止中夜以兴震悸靡寧永惟其咎未知攸出意者朕之听纳不得於理欤狱讼非其情欤赋敛失其节欤忠谋谏言鬱於上闻而阿諛壅蔽以成其私者衆欤何嘉气之久不效也应中外文武臣寮并许实封直言朝政阙失朕将亲览考求其当以辅政理三事大夫务悉心交儆成朕志焉臣伏读诏书喜极以泣昔成汤以六事自责今陛下以四事求諫圣人所为异世同符凡诏书所言皆即日之深患陛下既已知之羣臣夫复何云曾子曰尊其所闻则高明矣行其所知则光大矣陛下诚知其如是复能断志无疑不为左右所移则安知今日之灾沴不如太戊之桑穀高宗之雉成王之雷风宣王之旱魃更为宗庙生民之福乎然自诏下以来臣不知中外之臣亦有以当今之急务生民之疾苦力为陛下别白言之者乎盖必有之矣而臣未得闻也臣窃不自揆伏念父子受国厚恩备位侍从擢在朝廷屡以狂瞽尘浼圣聪间以衰疾自求闲官不敢复预国家之议四年於兹矣幸遇陛下发不世之诏问以朝政阙失斯实千载一时古人虽在畎亩犹不忘君况居位食禄者乎是以不敢畏当涂避衆怒爱微躯保妻子心知时事之可忧而塞嘿不言也窃观陛下英睿之性希世少伦即位以来鋭精求治耻为继体守文之常主高欲慕尧舜之隆下不失汉唐之盛擢俊杰之才使之执政言无不听计无不从所誉者超迁所毁者斥退垂衣拱手听其所为推心置腹人莫能间虽齐桓公之任管仲蜀先主之任诸葛亮殆不及也执政者亦悉心竭力以副陛下之欲耻为碌碌守法循故事之臣每以周公自任是宜百度交正四民丰乐颂声旁洽嘉瑞沓至乃其效也然六年之间百度纷扰四民失业怨愤之声所不忍闻灾异之大古今罕比其故何哉岂非执政之臣所以辅陛下者未得其道欤所谓未得其道者在於好人同己而恶人异己是也陛下既全以威福之柄授之使之制作新法以利天下是宜与衆共之舍短取长以求尽善而独任己意恶人攻难羣臣有与之同者则擢用不次与之异者则祸辱随之人之情谁肯弃福而取祸去荣而就辱於是天下之士躁於富贵者翕然附之争劝陛下益加委信顺从其言严断刑罚以絶异议如是者往往立取美官比年以来中外执事权者皆此属矣其怀忠直守廉耻者皆摈斥废弃或罹罪谴无所容立至於台諫之官天子耳目所以规朝政之阙失纠大臣之专恣此陛下所当自择而亦使执政择之彼专用其所亲爱之人或小有违忤即加贬逐以惩後來必得佞諛之尤者然後使为之如是则政事之愆谬羣臣之奸诈下民之疾苦远方之冤抑陛下何从得闻见之乎又奉使询访利害於四方者亦其所亲爱之人皆先禀其意指凭其气势以驱迫州县之吏善恶系其笔端升黜由其唇吻州县之吏承迎奉顺之不瞻何暇与之讲利害立同异哉其入奏则云州县守宰咸以为便经久可行陛下但见其文书粲然可观以谓法之至善询谋僉同岂知其在外之所为哉或者更增为条目务求新巧互陈利病各事改张使

画一之法日殊月异久而不定吏民莫知所从盖由袭故则无功出奇则有赏彼皆进身之私计非有益国便民之志也又令使者督责所在监司监司督责州县上下相驱竞为苛刻奉行新法稍不尽力则谓之非才不职及沮坏新法立行停替或未熟新法误有违犯皆不理赦降去官与犯赃者罪同而重於犯私罪者州县之吏唯奉行文书救免罪戾之不暇民事不复留心矣又潜遣逻卒听市道之人谤议者执而刑之又出榜立赏募人告捕诽谤朝政者臣不知自古圣帝明王之政固如是耶昔尧稽于衆舍已从人舜戒羣臣予违汝弼汝无面从退有後言此其所以为帝王称首者也秦恶闻其过杀直谏之士禁偶语之人及其祸败行道之人皆知之而已独不知此所以为万世戒者也子产相郑郑人游于乡校以论执政然明请毁之子产曰何为夫人朝夕退而游焉以议执政之善否其所善者吾则行之其所恶者吾则改之是吾师也若之何毁之我闻忠善以损怨不闻作威以防怨岂不遽止然犹防川大决所犯伤人必多吾不克救也不如小决使道不如吾闻而药之也何今之执政异於古之执政乎齐景公谓梁丘曰惟我与夫晏子对曰亦同也焉得为和和如羹焉水火醯醢盐梅以烹鱼肉宰夫和之齐之以味济其不及以泄其过君子食之以平其心君臣亦然君所谓可而有否焉臣献其否以成其可君所谓否而有可焉臣献其可以去其否是以政平而不干民无争心今不然君所谓可亦曰可君所谓否亦曰否若以水济水谁能食之今朝廷之臣对扬啓沃亦有异於梁丘者乎卫君言计非是而羣臣和者如出一口子思曰以吾观卫所谓君不君臣不臣者也人主自臧则衆谋不进事是而臧之犹却衆谋况和非以长恶乎夫不察事之是非而悦人赞已闇莫甚焉不度理之所在而阿谀求容谄莫甚焉君闇臣谄以在民上民不与也若此不已国无类矣子思言於卫侯曰君之国事将日非矣出言自以为是而卿大夫莫敢矫其非卿大夫出言自以为是而士庶人莫敢矫其非君臣既自贤矣而羣下同声贤之贤之则顺而有福矫之则逆而有祸如此则善安从生今执政主新法羣下同声贤之有以异於卫国之政乎是以士大夫愤懣鬱结视屋窃叹而口不敢言庶人饥寒憔悴怨嗟号泣而无所控告此则陛下所谓忠谋谏言鬱於上闻而阿谀壅蔽以成其私者也苟忠谏退伏阿谀满侧而望百度之正四民之乐颂声之洽嘉瑞之臻固亦难矣方今朝之阙政其大者有六而已一曰广散青苗钱使民负债日重而县官实无所得二曰免上户之役敛下户之钱以养浮浪之人三曰置市易与细民争利而实耗散官物四曰中国未治而侵扰四夷得少失多五曰结保甲教习凶器以疲扰农民六曰信狂狡之人妄兴水利劳民费贮若其他琐琐米盐之事皆不足为陛下道也舍其大而言其细舍其急而言其缓外有献替之迹内怀附会之心是奸邪之尤者臣不敢为也凡此六者之为害人无贵贱愚智莫不知之乃至陛下左右前後之臣日誉新法之善者其心亦知其不可但欲希合圣心附会执政盗贵富耳一旦陛下之意移则彼之所言亦异矣臣今不敢复费简札叙利害以烦圣听但愿陛下勿询阿谀之党勿徇权臣之意断志罢之必有能为陛下言其详者矣此六者之中青苗免役钱为害尤大夫力者民之所生而有也穀帛者民可耕桑而得也至於钱者县官之所铸民不得私为也自未行新法之时民间之钱固已少矣富商大贾藏镪者或有之彼农民之富者不过占田稍广积穀稍多室屋修完耕牛不假而已未尝有积钱巨万於家者也其贫者蓝缕不蔽形糟糠不充腹秋指夏熟夏望秋成或为人耕种资采拾以为生亦有未尝识钱者矣是以古之用民各回其所有而取之农民之役不过出力税不过穀帛及唐末兵兴始有税钱者故白居易讥之曰私家无钱鑪平地无铜山言责民以所无也今有司为法则不然无问市井田野之民由中及外自朝至暮唯钱是求农民值丰岁贱糶其所收之穀以输官比常岁之价或三分减二於斗斛之数或十分加二以求售

於人若值凶年无穀可糴吏责其钱不已欲卖田则家家卖田欲卖屋则家家卖屋欲卖牛则家家卖牛无田可售不免伐桑枣撤屋材卖其薪或杀牛卖其肉得钱以输官一年如此明年将何以为生乎故自行新法以来农民尤被其患农者天下之本农既失业余民安所取食哉今货益重物益轻年虽饥穀不甚贵而民倍困为国计者岂可不少思其故哉此皆歛钱之咎也北尽塞表东被海涯南踰江淮西及邛蜀自去岁秋冬絶少雨雪井泉溪涧往往涸竭二麦无收民已絶望孟夏过半秋种未入中户以下大抵乏食采木实草根以延朝夕若又如是数月将如何哉当此之际而州县之吏督迫青苗助役钱不敢少缓鞭笞縲绁唯恐不迨妇子遑遑如在汤火之中号泣呼天无复生望臣恐鸟穷则啄兽穷则攫民困穷已极而无人救恤羸者不转死沟壑壮者不聚为盗贼将何之矣若东西南北所在啸聚连羣结党日滋月蔓弥漫山泽蹈藉城邑州县不能禁官军不能讨当是时方议除去新法将奚益哉緑林赤眉黄巾黑山之徒自何而有皆疲於赋敛复值饥馑穷困无聊之民耳此乃宗庙社稷之忧而庙堂之上方晏然自得以为太平之业八九已成此臣所为痛心疾首昼则忘食夜则忘寝不避死亡欲默不能者也易复之初六曰不远复无祇悔元吉言过而能改虽悔不大也其上九曰迷复凶有灾眚用行师终有大败以其国君凶至于十年不克征言迷而不复凶且有灾於君道尤不利也昔秦穆公败於殽作秦誓曰唯古之谋人则曰未就予忌唯今之谋人姑将以为亲虽则云然尚猷询兹黄髮则罔所愆盖悔弃老成之远虑用利口之浅谋以取覆败而思补其过也故能终雪前耻强霸西戎汉武帝征伐四夷中国虚耗贼盗羣起又丧贰师之军乃下哀痛之诏曰廼者以缚马书徧示丞相御史二千石诸大夫郎为文学者皆以虏自缚其马不祥甚哉公车方士太史太卜皆以为吉今计谋卦兆皆反谬盖始寤公卿方士之谄谀对不以诚致误国事有悔于心也故禁苛暴止擅赋力本农天下复安自国家行新法以来天下之人心祈口祷唯冀陛下之觉悟而拯救其失以苏疲民如望上天之膏泽日复一日以至于今及今改之犹可救也过是则民力屈竭一旦涣然离散乃始劳心安集岂不难哉窃观陛下诏书寅畏天灾深自咎责丁寧恳恻以求至言是陛下已知前日之失而欲有所改为也若徒着之空文而於新法无所变更是犹临鼎烹鱼之烂而益薪不已将何补哉陛下诚能垂日月之明奋乾刚之断放远阿谀勿使壅蔽自择忠谏为台谏官收还威福之柄悉从已出诏天下青苗钱勿复散其见在民间逋欠者计从初官本分作数年催纳更不收利息其免役钱尽除放差役并依旧法罢市易务其所积货物依元买价出卖所欠官钱亦除利催本罢拓土开境之兵先阜安中国然後征伐四夷罢保甲教閲使服田力穡所兴修水利委州县相度凡利少害多者悉罢之如此则中外謏呼上下感悦和气薰蒸雨必沾洽矣彼阿谀之人附会执政者皆缘新法以得富贵若陛下以为非而舍之彼如鱼之失水必力争固执而不肯移愿陛下勿问之也臣窃闻陛下以旱暵之故避殿撤膳其焦劳至矣而民终不预其泽不若罢此六者立有溥博之德及於四海也又闻京师近虽获雨而畿甸之外旱气如故王者以四海为家无有远近皆陛下之赤子愿陛下虽徇羣臣之请御正殿复常膳犹兢兢业业忧劳四方不遽自觉以为无复灾也又诸州县奏雨往往止欲解陛下之焦劳一寸则云三寸三寸则云一尺多不以其其实不可不察也又闻青苗之法灾伤及五分则倚阁其间官吏不仁者至有抑遏百姓止放四分以下税此尤可罪者也臣在冗散之地若朝政小小得失臣固不敢预闻今坐视百姓困於新法如此将为朝廷深忧而陛下曾不知之又今年以来臣衰疾寝增恐万一溘先朝露齎怀忠不尽之情长抱恨於黄泉是以冒死一为陛下言之傥陛下犹弃忽而不之信此则天也臣不敢复言矣干冒宸扆臣无任恳切惶惧之至

荐范祖禹状【元丰七年十二月上】

右臣伏以报国之忠莫如荐士负国之罪莫如蔽贤臣伏见奉议郎同编修资治通监范祖禹智识明敏而性行温良如不能言好学能文而谦晦不伐如无所有操守坚正而圭角不露如不胜衣祖禹乃今正议大夫致仕范镇兄孙自祖禹年未二十为举人时臣已识之今年四十余行义完固常如一日祖禹所为本末无如臣最熟知臣於熙寧三年奏祖禹自前知资州龙水县事同修资治通监至今首尾一十五年由臣顽固編集此书久而不成致祖禹淹回沉沦不得早闻達於朝廷而祖禹安恬静默如可以终身下位曾无滯留之念臣诚孤陋所识至少於士大夫间罕遇其比况如臣者远所不及凡臣所言莫非据实不敢溢美今所修书已毕祖禹应归吏部别授差遣臣窃为朝廷惜此良宝委弃榛莽伏望皇帝陛下特赐采拔或使之供职秘省观其述作或使之入侍经筵察其学行自余进用系自圣忠如蒙朝廷擢用後有不如所举臣甘与之同罪

再乞西京留台状【元丰八年二月上】

右臣先於元丰五年九月二十六日受勅提举西京嵩山崇福宫候满三十个月不候替人发来赴阙至今月此任当满伏念臣性虽至愚粗尝从学平生所守不敢忘信虽遇布衣未尝妄语况於朝廷岂敢欺罔臣今年六十有七耳目手足虽未全衰数年以来昏忘特甚举错云为动多差繆使之临繁处剧实所不堪非敢爱身必恐败事但臣前後提举崇福宫已经四任坐享俸给全无所掌今复有求勾实自愧心窃见西京留司御史台及国子监比於宫观粗有职业伏望圣慈俯加矜察特於上件两处差遣内除授一任庶使窃禄庇身以养残年则陛下爱物曲尽始终之赐微臣陈力两遂公私之便

乞奔神宗皇帝丧状【元丰八年三月十七日上】

右臣先任提举西京嵩山崇福宫於今年二月任满臣以数年以来昏忘特甚临繁处剧实所不堪寻具状奏陈乞於西京留司御史台及国子监内除授臣一任未奉朝旨间於今月七日忽奉遗制大行皇帝奄弃天下臣哀荒摧絕无地自处伏念臣自先帝践阼以来过蒙知待特出伦辈首寘翰苑继处宪台亦尝承乏俾佐枢府臣自知非才不敢冒居力辞事任愿就冗散亦荷矜容曲从所欲养以俸禄不责职业优游自便十有五年近者书成又叨进职褒嘉赐赉皆踰等比圣恩汪洋天隆地厚未足为谕奉讳之初即欲号哭奔走径詣京师奉望梓宫展臣子之诚万分之一又念国朝故事如昭厚二陵未尝有近臣奔丧之例加以前已乞留台国子监未奉进止彷徨疑虑不敢辄行今窃闻观文殿学士孙固资政殿学士韩维已至阙下臣方自咎责不敢寧居已於今月十七日起离西京欲乞亦赴阙廷随百官班入临见於前路听候指挥

申宣抚权住制造乾粮皱饭状【熙寧三年十二月一日上】

准都转运司牒准宣抚使衙劄子节文制造乾粮州军将一斗变造乾粮五斤仍量支与柴钱

勘会近准宣抚使衙劄子节文指挥沿边四路十四州军并近里永兴军河中府同耀乾州凤翔府等州军变造饼皱饭当司已两次牒逐州军疾早变造施行去讫今又准前项宣抚使衙劄子已牒逐州将一斗变造乾粮五斤仍量支与柴钱如阙即疾速计置收采变造乾粮所是柴钱斟量支給施行去讫牒请照会施行者

右具如前勘会先准中书劄子节文奉圣旨今後起发义勇赴沿边战守并令自齎备一月口食与折将来本户税物若不能自备只乞於起发州军预请一月口食齎往者亦听又勘会永兴军近准都转运使司牒准宣抚使衙劄子近准朝旨义勇上番令附带乾粮一秤至屯戍州军须合预行变造乾粮准备支遣附带前去右劄送陕西转运司检会近降义勇分番条贯指挥沿边四路十四州军并近里永兴河中同耀乾凤翔六州府速行勘会义勇所居县分近便省仓斛斗内有粟或白米便约义勇合附带乾粮秤数中停变造饼皱饭如见在数不多即一色变造皱饭仍趁此时月造下两番令附带数目免致非时蒸易为损恶仍每乾粮一秤破系官布造袋子封印如法收将来义勇上番日依数附带者光窃详义勇戍守之时每人逐日给米二升半其一月口食七斗五升若更加乾粮一秤并器械衣装盘缠等物窃虑一人之力难以胜任兼今来变造乾粮皱饭须至差配百姓当此饥馑民间不易之际虽云量支柴薪亦不能全无搔扰况即今诸县官仓米至少昨准朝旨散支第四等第五等阙食人户各二石尚未有备若更造乾粮皱饭即将来二三月间正当阙食之际更将何物可以救济必见大段失所窃见庆历年中议欲出兵讨伐元昊亦曾令陕西诸州制造乾粮皱饭万数不少后来既不出兵其乾粮皱饭所在堆积经年朽腐不可复食尽为弃物今官中钱穀比於庆历年尤更难若复造此物徒使公私劳费卒无所用诚为可惜又国家备边若止於戍守则沿边自有仓廩无用乾粮皱饭今来承准指挥制造上件乾粮皱饭仍令十日一申仓卒取办窃虑百姓猜疑以为国家又欲出兵必致远近惊忧无由解谕至时不为便稳光已指挥本路前项五州军且未令造乾粮皱饭更听候宣抚使衙指挥去讫谨具状申宣抚使衙伏望裁酌早赐指挥

乞罢修腹内城壁楼櫓及器械状【熙寧四年正月三日上寻得旨依奏】

准熙寧三年十一月初七日准枢密院劄子节文检会近为麟府路丰州及外堡寨官吏弛慢不职不修完城池楼櫓器甲等已奉圣旨降官等第断遣及劄与三路转运司徧牒辖下沿边州军知委去讫近又据陕西路提刑宣抚司奏华州甲仗库弓弩不堪盖是监官并本州官员全不用心点检有误缓急使用其铃辖卢戴坐受优俸空占当直兵士略不营职朝廷已令鄜延路经略司举官差替卢戴其华州甲库弓弩不堪本州当职官员全不用心点检仍宣抚司差官取勘闻奏窃虑诸路亦有不修完城壁器甲等去处奉圣旨令河东河北陕西经略安抚司指挥辖下州军委官吏子细点检须管日近修完城壁楼櫓坚固器甲精利如将来朝廷专差官点检得却有未修城壁楼櫓器甲等其应干官吏必当依此重行断遣劄付本司者寻依准朝旨行下本路诸州军施行近准虢州申州司勘会本州虽系陕西路却不系近边州军其州城从来并不曾有敌楼战棚为自来霖雨损坏摧塌及无兵功累年不曾修筑今来亦不敢专擅役夫修筑已牒在城兵马都监吕士宣重行检计损坏城邑去处才候检计到合使人功物料别具状供申乞差兵夫次及据解州申准兵马监押状申准州牒备録到安抚使司牒内坐到圣旨指挥修完城壁楼櫓等寻将带壕寨木匠作头等检计外罗城面上只有更屋二十

三座并系年深倒塌及城壁坠倒久来亦不曾泥补修完伏乞据状申上衙乞差官计料修城人工及剏添楼櫓免致将来朝廷差官检视见并不修完城壁及剏盖楼櫓虚负责降停替州司勘会旧来城上并无楼櫓即目城面上濶处只及四五尺以来今若指挥使行剏造又缘合使人工材料数目不少今来未敢擅剏修伏候指挥

右谨具如前勘会管下永兴等一十州军城壁内有久来已行安置楼櫓完备亦有城壁低下薄怯全未有楼櫓去处其逐州官吏既准上项朝旨及见麟府丰州官吏以不修完城壁楼櫓器甲降官等第断遣并华州官吏差替取勘仍恐朝廷非时差官点检例各畏惧争欲日近兴功完葺以避谴责伏缘营造楼櫓须藉城基厚濶方可安置今来解虢两州城壁皆称濶处只及四五尺似此之类须是先贴筑城基方可剏修楼櫓若非大段兴功无以办济况今本路州军全阙厢军应急差使官库亦阙见钱收买材料若是差役人夫配率材料又缘陕西州军已是去岁夏麦薄收秋苗旱损当此饥馑人户流移之际若更如此差扰必是转难存济兼永兴军一路州军尽在腹里去沿边絶远设若蕃贼入寇亦未能即到逐州军城下其楼櫓修下数年不用不免损坏今来若尽令与沿边州军一例须管日近修完城壁楼櫓坚固器甲精利显见官私虚有劳费欲乞朝廷特降指挥其沿边及次边州军即一依近降朝旨修完所有腹内州军城壁楼櫓并候将来丰熟以渐营葺其器甲即不堪数目逐旋勒作院人匠依程课修整务令精利所贵公私皆得办济

乞不添屯军马【熙寧四年正月八日上】

今月七日准熙寧三年十二月二十九日陕西河东路宣抚使司劄子本司近已具奏闻乞於永兴军邠州河中府三州军易得粮草之处别添屯军马选差将官专切训练逐路不得勾抽专听宣抚司节制内一项乞於永兴军驻劄兵马差本司准备差使庄宅使赵瑜充永兴军路都钤辖与知府专管训练者

右具如前臣勘会永兴军所管今年正月一日见在军粮麤细色斛斗共三十六万九千七百石二斗四升据即日本府见驻泊及就粮并本城兵员粮食及官僚请俸等共约支得向去一十七个月半马料三万七千六百五十二石四斗二升约支得向去一十五个月有余秆草四十万六千二百二十二束约支得一十三个月半有余此只是据见在军马约度即不知今来所添屯军马计多少数目若只添一倍之时其人粮只约支得八个月有余马料只约支得七个月有余秆草只支得六个月有余所添更多所费尤广又先准中书劄子奉圣旨令体量应灾伤人户委的饥乏不能自存者仰发省仓斛斗据第四第五以下人户各借二石今勘会永兴军诸县第四等以下阙食人户约及十余万户若每户支二石共计合支二十余万石其外县虽有粮草亦是数目不多更难支充贷粮若并令在府省仓请领又更减却此数即军粮约支更不及得上项月数况去年陕西经夏大旱入秋霖雨五穀例皆不熟其永兴军放税多者至七八分即今每斗白米价钱一百文足秆草每束价钱二十七文足虽差官开场采买只采得白米九百余石秆草全无兼勘会军资库日近杂支钱尽底支絶准转运司牒将三司提刑司盐马司封桩钱尽数充杂支钱止及四万余贯除支每月料钱及军府诸般使用并不住准转运司牒支拨往沿边州军及应副收买军期物色见今无钱支与和采场采买粮草岂得谓

之易得粮草之处臣窃谓大凡添屯军马先须约度本处粮草可以赡养与否今来关中饥馑仓库空虚赡养旧兵犹恐不足更添新者何以枝梧虽朝廷更於左藏库内藏库支拨银紬绢等降下本路添助支费亦不免令州县配卖与百姓转增贫困况粮草是重滞之物不可从远处兴贩得来须本处土地所生方可计置今饥馑如此虽多积金银高估物价令转运司与州县多方擘画其日下所要粮草何由可得况即今民间阙食流移死亡者已为不少诸县处处申报惊劫若至向前二三月後旧穀已尽新麦未熟民间必转更饥乏若官中爱惜仓库坐视不救窃恐流移转多死亡转衆盗贼转烦深为不便窃以戎狄扰边手足之疾百姓离散腹心之忧岂可重外轻内逐末忘本兹事得失所系不细伏望朝廷先将陕西诸州军粮草约度合赡得若干军马一年支费仍须於十分中量留二三分救济目下饥民外如有剩数然後据数添屯军马若苦无剩数之时伏乞朝廷更不添屯傥以边鄙未寧须至量添军马之时即乞分散往诸州军就粮各委逐处兵官精加训练不须聚在永兴军邠州河中府三处更特置都钤辖三员候边事稍定即乞速发遣归住营处所贵公私稍得办济若不如此先约度粮草但务添屯军马窃恐一旦仓库俱竭别有不虞至时悔无所及臣职在守藩不敢不言所有先准朝旨令第四等以下人户借支斛斗二石未审今来支与不支若支与则军粮转更不足不支则人户正当饥乏伏愿圣慈早降指挥臣不胜迫切之诚

奏乞兵官与赵瑜同训练驻泊兵士状【熙寧四年正月十九日上】

右臣准今月三日宣命差下在京及外处拱圣等十四指挥计五千余人赴永兴军权驻泊准备宣抚司抽差使及差庄宅使赵瑜充本路都钤辖与臣专管勾训练臣本书生叨忝两制军旅之事素所不知加以近准宣抚司劄子坐到教閱新法令排日各习事艺臣所管永兴军一十三县民事至多及应副沿边军须物色文案填委每日自旦至暮未尝暂闲实无余力与赵瑜同监教閱又不可专委赵瑜独行训练又永兴军旧管屯驻驻泊就粮兵士自来并是钤辖刘斌路分都监李应之同共管勾今来所添兵士准宣命指挥只令赵瑜与臣专管勾训练所有旧来兵士不知赵瑜管与不管若令通管之时其新来兵士既在永军驻泊其刘斌李应之并是本路钤辖都监岂可却管辖不得窃虑向去新兵士不宾服旧兵官旧兵官不应副新兵士各分彼我则致生事深为不便所有上件新差来永兴军权驻劄兵士臣欲乞令本路兵官与赵瑜同共训练所贵公共同心管勾得办谨具状奏闻伏候勅旨并申宣抚相公更赐敷奏乞早降指挥

卷四十六

<集部,别集类,北宋建隆至靖康,传家集>

钦定四库全书

传家集卷四十六 宋 司马光 撰章奏二十九

乞开言路劄子【元丰八年三月三十日上】

臣闻周易天地交则为泰不交则为否君父天也臣民地也是故君降心以访问臣竭诚以献替则度政修治邦家乂安君恶逆耳之言臣营便身之计则下情壅蔽衆心离叛自生民以来未有不由斯道者也夫道犹歧路近差跬步远失千里今皇帝陛下新临大宝德性高明太皇太后同断万几圣谟光大初发号令不可不慎斯乃治乱之歧涂安危之所分也当以要切为先以琐细为後臣窃见近年以来风俗颓弊士大夫以偷合苟容为智以危言正论为狂是致下情蔽而不上通上恩壅而不下达闾阎愁苦痛心疾首而上不得知明主忧勤宵衣旰食而下无所诉公私两困盗贼已繁犹赖上帝垂休岁不大饥祖宗诒谋人无异志不然者天下之势可不为之寒心乎此皆罪在羣臣而愚民无知往往怨归先帝此臣所以日夜愤痛焦心泣血不顾死亡思有开发於朝廷者也臣愚以为今日所宜先者莫若明下诏书广开言路不以有官无官之人应有知朝政阙失及民间疾苦者并许进实封状尽情极言仍颁下诸路州军於所在要闹处出榜晓示在京则於鼓院检院投下委主判官画时进入在外则於州军投下委长吏即日附递奏闻皆不得取责副本强有抑退其百姓无产业人虑有奸诈则责保知在奏取指挥放令逐便然後陛下於听政之暇略赐省览其义理精当者即施行其言而显擢其人其次取其所长舍其所短其狂愚鄙陋无可采取者报闻罢去亦不加罪如此则嘉言日进羣情无隐陛下虽深居九重四海之事如指诸掌举措施为惟陛下所欲斯乃治安之源太平之基也陛下若以臣言为可取伏乞决自圣意下学士院草诏书施行羣臣若有沮难者其人必有奸恶畏人指陈专欲壅蔽聰明此不可不察取进止

进修心治国之要劄子状【元丰八年四月十九日上】

右臣伏闻本固则末茂源浊则流浑昔仁宗皇帝擢臣知谏院臣初上殿即言人君之德三曰仁曰明曰武致治之道三曰任官曰信赏曰必罚英宗皇帝时臣曾进历年图其後序言人君之道一其德有三其志亦犹所以事仁宗也 大行皇帝新即位擢臣为御史中丞臣初上殿言人君修心治国之要其志亦犹所以事英宗也 今上天降灾大行皇帝奄弃天下皇帝陛下新承大统太皇太后同听万几不知臣愚猥蒙访落臣且愧且惧无以塞责谨复以人君修心治国之要为献其志亦犹所以事大行皇帝也 所以然者臣历观古今之行事竭尽平生之思虑质诸圣贤之格言治乱安危存亡之道举在於是不可移易是以区区首为累朝言之不知臣

者以臣为进迺阔陈熟之语知臣者以臣为识天下之本源也夫治乱安危存亡之本源皆在人君之心仁明武所出於内者也用人赏功罚罪所施於外者也出於内者虽有厚有薄有多有寡稟之自天然好学则知所宜从力行则光美日新矣施於外者施之当则保其治保其安保其存不当则至於乱至於危至於亡行之由已者也所以能当在於至明所以能明在於至公是以明君善用人者博访远举拔其殊尤德行高人谓之贤智勇出衆谓之能贤不必能不必贤各随所长授以位任有功则赏有罪则罚其人苟贤能虽讎必用其人苟庸愚虽亲必弃赏必有所劝罚必有所惩赏不以喜罚不以怒赏不厚於所爱罚不重於所憎必与一国之人同共好恶是以古者爵人於朝与士共之刑人於市与衆弃之如此安有不当者乎臣故曰所以能当在於至明所以能明在於至公也昔齐桓公置射钩而使管仲相汉高祖知人善任使苟为不才虽见喜弃之苟才矣虽负贩酒徒亡将戍卒亦用之此所以能奋布衣取天下也馆陶公主为子求郎明帝不许而赐钱千万郎贱官也犹惜之况其贵者乎故永平之治至今称之宋高祖事萧太后甚孝太后欲以子道怜为扬州刺史高祖以其贪愚不许故功业之高冠於南朝唐太宗杀建成元吉而用其官属魏郑公王珪等与房杜无异卒得其效宣宗事郑太后甚谨问舅郑光以政事不能对罢其方镇故时人称美谓之小太宗此用人之公明者也韩昭侯惜弊袴不以赐左右之无功者汉高祖深怨雍齿而不忘其功魏太祖勲劳宜赏不吝千金无功望施分毫不与唐宣宗重惜服章故当时得绯紫者以为荣此赏功之公明者也僮牛杀孟丙仲任立叔孙昭子昭子数其罪而杀之孔子善其不怀丁公脱汉祖於厄高祖以为不忠而斩之武帝妹隆虑公主且死属其子昭平君昭平君杀人武帝流涕而诛之唐明皇弄臣黄?掀捕盗官坠马明皇杖杀之宣宗谓乐工汝惜罗程艺我惜高祖太宗法此罚罪之公明者也臣略举此数者以为明验其余在陛下博览载籍以考之知臣所言不为谬妄臣以一夫之愚不能周知天下之务近曾上奏乞下诏书开言路伏望圣慈早赐施行今并治平四年五月三日上殿劄子具録进呈乞陛下留神幸察乞去新法之病民伤国者疏【元丰八年四月二十七日上】

月日具官臣司马光谨昧死再拜上疏太皇太后陛下皇帝陛下臣窃见先帝聰明睿智励精求治思用贤辅以致太平委而任之言行计从人莫能间虽周成王之任周公齐桓公之任管仲燕昭王之任乐毅蜀先主之任诸葛亮殆不能及斯不世出之英主旷千载而难逢者也不幸所委之人於人情物理多不通晓不足以仰副圣志又足已自是谓古今之人皆莫已如不知择祖宗之令典合天下之嘉谋以啓迪清衷佐佑鸿业而多以已意轻改旧章谓之新法其人意所欲为人主不能夺天下莫能移与之同者援引登青云与之异者摈斥沈沟壑专欲遂其狠心不顾国家大体人之常情谁不爱富贵而畏刑祸於是搢绅大夫望风承流竞献策画务为奇巧舍是取非兴害除利名为忧民其实病民名为益国其实伤国作青苗免役市易除贷等法以聚敛相尚以苛刻相驱生此厉阶迄今为梗又有边鄙之臣行险徼幸大言面欺轻动干戈妄扰蛮夷夫兵者国之大事废兴存亡於是乎在而其人苟荣一身之官赏不顾百姓之死亡国家之利病轻虑浅谋发於造次御军无法仅同儿戏深入敌境坐守孤城粮运既竭狼狽奔溃筑寨极边功犹未毕轻敌不备阖城涂地使兵夫数十万暴骸於旷野资仗臣亿弃捐於异域又有生事之臣欲乘时干进建议置保甲户马保马以资武备变茶盐铁冶等法增家业侵街商税等钱以供军须遂使九土之民失业穷困如在汤火此皆羣臣躁於进取迷惑先帝使利归於身怨归於上非先帝之本志也臣荷先帝大恩常思报效羣在朝廷之时屡言

新法非便触忤权贵冒犯衆怒争辩非一先帝怜其孤忠不以为罪仍蒙宠擢寘之枢廷臣以所言未行力辞不受臣非恶富贵而好贫贱正欲感寤先帝知臣为国不为身庶几采纳狂瞽使百姓获安基层永固而已既又自乞冗官退伏闾里虽身处于外区区之心晨夕寤寐何尝不在先帝之左右所以不敢自赴阙廷如此之久者亦犹辞枢廷之志也熙寧七年历时不雨先帝遇灾而惧深自刻责诞布诏书广开言路臣当是时不胜踊跃极有开陈而建议之臣知所立之法不合衆心天下之人必尽指其非恐先帝觉寤而已受误国之罪伏欺罔之刑乃劝先帝继下诏书言新法已行必不可动臣之所言正为新法若新法不动臣尚何言自是闭口不敢复预朝廷论议十有一年矣然每覩生民之愁怨忧社稷之阽危於中夜之间一念及此未尝不失声拊心也葵藿之志犹望先帝一赐召对访以外事得吐心极言退就斧钺死无所恨不意上天降祸先帝升遐臣之寸诚无由披露鬱抑愤懣自谓终天及奔丧至京乃蒙太皇太后陛下特降中使访以得失是臣积年之志一朝获伸感激悲涕不知所从顾天下事务至多臣思虑未熟不敢轻有条对但乞下诏使吏民皆得实封上言庶几民间疾苦无不闻達既而闻有旨罢修城役夫撤調遄之卒止御前造作京城之人已自欢跃及臣归西京之後继闻斥退近习之无状者戒飭有司奉法失当过为烦扰者罢物货专场及民所养户马又寬保马年限四方之人无不鼓舞圣德传布一日千里颂叹之声如出一口溢于四表乃知太皇太后陛下深居禁闕皇帝陛下虽富於春秋天下之事靡不周知民间衆情久在圣度四海羣生可谓幸甚凡臣所欲言者陛下略已行之臣稽慢之罪实负万死夫为政在顺民心苟民之所欲者与之所恶者去之如决水於高原之上以注川谷无不行者苟或不然如逆阪走丸虽竭力以进之其复走而下可必也今新法之弊天下之人无贵贱愚智皆知之是以陛下微有所改而远近皆相贺也然尚有病民伤国有害无益者如保甲免役钱将官三事皆当今之急务厘革所宜先者臣今别具状奏闻伏愿决自圣志早赐施行议者必曰孔子称孟庄子之孝其他可能也其不改父之臣与父之政是难能也又曰三年无改於父之道可谓孝矣彼谓无害於民无损於国者不必以己意遽改耳必若病民伤国岂可坐视而不改哉易曰干父之蛊有子考无咎象曰干父之蛊意承考也蛊者事有蛊弊而治之也干父之蛊迹似相违意则在於承继其业成父之美也又曰裕父之蛊往见吝象曰裕父之蛊往未得也裕者饶益之名也若不忍违异益父之过往而不返未为得宜也昔汉文帝除肉刑斩右趾者弃市答五百者多死景帝元年改之答者始得全武帝作盐铁酤均输等法天下困弊盗贼羣起昭帝用贤良文学之议而罢之後世称明唐代宗纵宦官公求赂遗置客省拘滯四方之人德宗立未三月悉禁止罢遣之时人望致太平德宗晚年有宫市五方小儿暴横为民患盐铁月进羨余顺宗即位皆罢之中外大悦是皆改父之政而当者人谁非之哉况先帝之志本欲求治而羣下干进竞以私意纷更祖宗旧法致天下籍籍如此皆羣臣之罪非先帝之过也为今之计莫若择新法之便民益国者存之病民伤国者悉去之使天下晓然知朝廷子爱黎庶之心吏之苛刻者必变而为忠厚民之离怨者必变而为亲誉德业光荣福祚无穷岂不盛哉夫天子之孝在於得万国之欢心以事其亲傥措置如此欢心孰大焉事亲孰备焉今幅员之内所在嗷嗷有倒垂之急延颈倾耳以俟改法庶得苏息若朝廷不以爲意日复一日万一遇数千里之蝗旱公私匱竭无以相救失业之民蜂起为盜安知无奸雄乘之而动则国家有累卵之危申屠刚曰未至豫言固常为虚及其已至又无所及朝廷当此之际解兆民倒垂之急救国家累卵之危岂假必俟三年然後改之哉况今军国之事太皇太后陛下权同行处分是乃母改子之政非子改父之道也何憚而不为哉惟圣明裁察臣光昧死再拜上疏

乞罢保甲状【元丰八年四月上】

右臣窃以兵出民间虽云古法然古者八百家才出甲士三人步卒七十二人闲民甚多三时务农一时讲武不妨稼穡自上世相承习以为常民不惊扰自两司马以上皆选贤士大夫为之无侵渔之患故卒乘辑睦动则有功今籍乡村之民二丁取一以为保甲皆投以弓弩教之战阵是农民半为兵也三四年以来又令河北河东陕西置都教场无问四时每五日一教特置使者比监司专切提举州县不得关预每一丁教閱一丁供送虽云五日而保正保长以泥墁除草为名日聚之教场得赂则纵之不则留之是三路耕耘收获稼穡之业几尽废也自唐开元以来民兵法坏戍守战攻尽募长征兵士民间何尝习兵哉夫兵者凶器也圣人不得已而用之国家承平百有余年四夷顺服戴白之老不识兵革一旦畎亩之人忽皆戎服执兵奔驱满野见者孰不惊骇耆旧叹息以为不祥事既草创调发无法比户搔扰不遗一家又巡检指使按行乡村往来如织保正保长依倚弄权坐索供给多责赂遗小不副意妄加鞭撻蚕食行伍不知纪极中下之民罄家所有侵肌削骨无以供亿愁苦困弊靡所投诉流移四方緇属盈路又朝廷时遣使者徧行按閱所至犒设赏赍糜费金帛以巨万计此皆鞭撻平民铢两丈尺而敛之一旦用之如粪土而乡村之民但苦劳役不感恩泽臣不知设保甲於农民之劳既如彼为国家之费又如此终将何所用哉若使之捕盗贼卫乡里则何必如此之多若使之戍边境征戎狄则彼戎狄之民以骑射为业以攻战为俗自幼及长更无佗务中国之民生长太平服田力穡虽复授以兵械教之击刺在教场之中坐作进退有似严整必若使之与戎狄相遇填然鼓之鸣镝始交其奔北溃败可以前料决无疑也是犹驱羣羊而战豺狼也当是时岂不误国事乎又悉罢三路巡检下兵士及诸县弓手皆易以保甲令主簿兼县尉但主草市以里其乡村盗贼悉委巡检而巡检兼掌巡按保甲教閱朝夕奔走犹恐不办何暇逐捕盗贼哉又保甲中往往有自为盗者亦有乘保马行劫者然则设保甲保马本欲除盗乃更资盗也书曰民惟邦本本固邦寧又曰可畏非民夫川涸鱼逝林燔鸟飞民丧其生业无以自存赴诉不受失其所依安得不去而为盗哉自教閱保甲以来河东陕西京西盗贼已多至敢白昼公行入县镇杀官吏官军追讨经历岁月终不能制况三路未至大饥而盗贼已昌炽如此万一遇数千里之蝗旱而失业饥寒武艺成就之人所在蜂起以应之其为国家之患可胜言哉此非小事不可以忽夫夺其衣食使无以为生是驱民为盗也使比屋习战劝以官赏是教民为盗也又撤去捕盗之人是纵民为盗也谋国如此果为利乎害乎且擲者干进之士说先帝以征伐四夷开边拓土之策故立保甲户马保马等法近者登极赦书节文云应缘边州军仰逐处长吏并巡检使臣钤辖兵士及边上人户不得侵扰外界务要静守强场勿令搔扰此盖圣意欲惠绥殊俗休息中国华夷之人孰不归戴然则保甲户马保马复何所用哉今虽罢户马寬保马而保甲犹存者盖未有以其利害之详奏闻者也臣愚以为宜悉罢保甲使归农召提举官还朝量逐县户口每五十户置弓手一人略依缘边弓箭手法许?本户田二顷悉免其税役除出贼地分严加科罚及令出赏钱外其贼发地分更不立三限科校但令捕贼给赏若获贼数多及能获强恶贼人者各随功大小迁补职级或补班行务在优假弓手使人劝募然後募本县乡村人户有勇力武艺者投充计即今保甲中有勇力武艺者必多愿应募若一人阙额有二人以上争投者即委本县令尉选武艺高强者充或武艺衰退者许佗人指名与之比较若武艺胜於旧者即令充替其被替者更不得?田如此则不必教閱武艺自然精熟一县之中其壮勇者既为弓手其羸弱者虽使为盗亦不能为患仍委本州及提点刑狱常切按察令佐有

取舍不公者严行典宪若召募不足即且於乡村户上依旧条权差候有投名者即令充替其余巡检兵士县尉弓手耆长壮丁逐捕盗贼并乞依祖宗旧法

乞开言路状【元丰八年四月上】

右臣昨在京师伏蒙太皇太后不以臣愚疎无取遣使访以得失岂惟微臣有千载一遇之幸中外闻之踊跃相庆以为言路将开下情得以上通太平之期指日可待也当是时臣未暇备论天下之事先陈所急於三月三十日上言以近岁风俗颓弊士大夫以偷合苟容为智以危言正论为狂致闻阁愁苦而上不得知明主忧勤而下无所诉公私两困盗贼已繁宜下诏书不以有官无官之人有知朝政阙失及民间疾苦者并许进实封状鼓院检院州军长吏不得抑退其义理精当者行其言而显其人狂愚鄙陋者报闻罢去亦不加罪又於四月二十一日复上言皇帝陛下初即政於用人赏罚尤不可不当夫谏诤之臣人主之耳目也不可一日无之说命曰若跣弗视地厥足用伤设有人闭目而塞耳跣足而疾趋前遇险阻能无伤乎贾山有言人主之威非特雷霆也势重非特万钧也开道而求谏和颜色而受之用其言而显其身士犹恐惧而不敢自尽况震之以威压之以重乎顷者王安石秉政欲蔽先帝聪明专威福行私意由是深疾谏者过於仇讎严禁诽谤甚於贼盗是以天下之人以言为讳百姓愁苦无聊靡所控告致怨谤之语上及先帝臣尝痛心泣血思救其失是故首乞下诏开言路以通下情臣谓羣臣苟有肯进言者陛下必加褒擢以劝来者此乃古人市骏骨揖怒蛙之意也召诰曰王乃初服呜呼若生子罔不在厥初生自贻哲命今皇帝陛下新即位太皇太后初垂帘天下之人莫不属目倾耳臣自到西京以来朝夕伏听朝廷惟新之政以为必务明四目達四聰以发天下积年愤鬱之志今开言路之诏既不闻颁於四方而太府少卿宋彭年言在京不可不并置三衙管军臣僚水部员外郎王谔乞令依保马元立条限均定逐年命买之数又乞令太学增置春秋博士使诸生肄业朝廷以非其本职而言各罚铜三十斤臣忽闻之怅然失图愤邑无已臣非私於二人直为朝廷惜治体耳夫阿意箝口容身窃禄此小臣之利也威福在已人不敢言此大臣之利也然民怨於下而不闻国家阽危而不知於陛下有何利哉彼宋彭年王谔臣素不识不知其人为贤为不肖但惜陛下临政之初而二臣首以言事获罪臣恐中外闻之忠臣解体直士挫气欲仕者敛冠藏之欲谏者咋舌相戒则上之聪明犹有所不照下之情伪犹有所不達太平之功尚未可期也宋彭年所言虽不识事体但当废而不行亦不宜加罪至如孔子作春秋为万世法王安石秉政辄黜之使不得与诸经并列於学官学者毋得习以为业王谔所言未为不当乃以越职为罪古者置谏鼓设谤木询于刍蕘未闻有位於朝而以言事为越职者也若当职之人既不肯言不当职之人又不得言则以四海之广兆民之衆其政治利病天子深居九重何由得闻之哉昨日进奏院递到告身差臣知陈州然则臣自今於一州之外言及佗事亦为越职何敢言矣今二臣之罚既不可追伏望陛下如臣前奏下诏不以有官无官当职不当职之人皆得进言择其可取者微加旌赏使天下之人知朝廷乐闻善言不恶论事无可取者寝而勿问庶几愿纳忠之人犹肯源源而来也臣稟赋愚戆文学政事皆出人下惟不识忌讳不阿权贵遇事妄言无所顾避以此苟知於累朝见称於衆人若亦不得言则无所复用於圣世矣上幸太皇太后陛下下问之意下负微臣平生愿忠之心内自痛悼死不瞑目臣久忝便安今朝廷授以名藩义不敢辞见牒本州索远接公人起发赴任次到官之日但勉竭疲弩恪勤本职苟力所不逮伏领罪戾而已

谢御前劄子催赴阙状【元丰八年五月十五日上】

右臣今月十五日平明准入内侍省递到太皇太后御前劄子一道令臣早至阙廷者臣狂瞽妄言宜从诛谴曲荷开纳仍叨奨饰并以臣羸老抱疾过形矜恤蝼蚁命微何阶报谢臣专候陈州远接兵士到即起发赴阙次臣无任瞻天望圣激切屏营之至

奏乞所欠青苗钱许重叠倚阁状【熙寧四年正月上】

勘会永兴军准提举陕西路常平广惠仓司牒准司农寺牒检会近准熙寧二年九月四日勅节文所借过青苗钱斛令随省税日限送纳如遇本户灾伤五分已上合随夏税纳者展至秋税合随秋税纳者展至次年夏税寺司看详上件勅意人户合随夏税送纳者如本户灾伤五分已上即展至当年秋税若秋料内更遇灾伤自合送纳夏料钱斛了足不许再行倚阁若本户更曾借过秋料钱斛即令倚阁秋料数目展至次年夏料送纳切虑内有州县并不详认上件勅条一例重叠倚阁牒当司请详此及备録上件勅条徧下诸州军如是夏料合纳青苗钱斛本户灾伤五分以上展至秋料送纳如秋料内更遇灾伤即却合催夏料数目仍将本路借过秋料钱斛展至次年夏料送纳了足即不得将两次灾伤重叠倚阁免至人户积欠数多难为了纳别致违悞如有昨来夏料系灾伤倚阁展至今秋送纳者如今秋本户更遇灾伤便请疾速催纳了足具数申寺仍关报提刑转运司准此施行者

右谨具如前臣窃详朝廷所散青苗钱斛本为救接穷困阙用之民使得至夏秋成熟所以春散夏敛夏散秋敛或遇本户灾伤五分以上即展至次料送纳盖以寛假饥民使有以自存非为乘此艰食规求利息今司农寺乃令不得将两次灾伤重叠倚阁如有昨来夏料灾伤倚阁展至今秋送纳者今秋本户更遇灾伤便令疾速催纳了足臣窃恐此事不合勅意盖缘一次灾伤民间犹有旧来蓄积未至困穷其青苗钱尚许倚阁岂有连并两次灾伤百姓转更不易之时却令须得送纳旧来蓄积既尽新穀又复不收更将何物可以供输其逐州县为见司农寺有此指挥不知有无务行督促严加科责使贫下百姓何以为生窃惟朝廷为民父母必不肯如此况灾伤倚阁税赋并借贷过斛斗准条并候丰熟日令分作料次送纳如更遇灾伤亦权住催理何故青苗钱斛最为紧急独不许重叠倚阁臣已指挥本路灾伤地分永兴军河中陕府同华耀乾解八州军请勘会去岁夏料如系灾伤倚阁青苗钱斛展限至秋送纳去处若去秋本户更遇灾伤其夏料钱斛未得依司农寺指挥催理更听候朝旨伏望圣慈特赐采察早降指挥谨具状奏闻伏候勅旨奏去讫及牒提举陕西路常平广惠仓司奉圣旨宜令提举陕西路常平广惠仓司疾速关牒永兴军本路州军令详司农寺牒一依修贯指挥即不得施行司马光牒致误百姓及时送纳割付司农寺仍仰关牒合属去处准此【次日乞留台】奏为乞不将米折青苗钱状【熙寧四年正月上】

准提举陕西常平广惠仓司牒

右谨具如前本司勘会朝廷元散青苗钱指挥取利不得过二分今来提举常平广惠仓司乃依见今饥馑之岁在市贵价将本仓陈次斛斗纽作见钱支散与人又豫定将来粟麦之价粟

每斗二十五文足小麦每斗四十文足本司看详向去夏秋五穀有丰有俭其穀麦之价固难豫定今将陈色白米每斗组作见钱七十五文若折计作小麦价钱支俵每斗四十文共折计得小麦一斗八升七合半则是贫民於正二月间请得陈色白米一石却将来纳着新好小麦一石八斗七升五合若折计作粟钱支俵每斗二十五文足计支则一斗白米价钱七十五文足共折得粟三斗则是贫民阙乏之时只请得陈色白米一石却将来共纳着新粟三石若只送纳见钱即又须贱斛斗以偿官中本利使贫下之民寒耕热耘竭尽心力所收斛斗於正税之外更以巧法取之至尽不问岁丰岁俭常受饥寒显见所散青苗钱大为民害窃惟朝廷从初散青苗钱之意本以兼并之家放债取利侵渔细民故设此法抑其豪夺官自借贷薄收其利今以一斗陈米散与饥民却令纳小麦一斗八升七合五勺或纳粟三斗所取利约近一倍向去物价转贵则取利转多虽兼并之家乘此饥馑取民利息亦不至如此之重国家为民父母置此二仓名为常平广惠岂当如此今边鄙用兵军粮阙乏既无余剩可以赈贷伏望朝廷悯此农民遭值凶饥困穷憔悴邻於死亡直将上件常平广惠仓斛斗依先降朝旨借贷与第四等以下人户更不取利若不能如此须欲作青苗钱俵散之时即乞不以元榷价贵贱更不组作见钱只据所散与人户石斗至将来成熟令出息二分每散得一斗米者纳一斗二升细色或依仓式例折作粗色如此细民犹不至穷困官中取利虽薄亦不减二分元数如允所请伏乞早降指挥谨具状奏闻伏候勅旨

乞以除拜先後立班劄子【元丰八年六月四日上】

臣於前月二十七日夜准阁门告报已降告身授臣守门下侍郎二十八日三省枢密院同奉圣旨除知枢密院外门下中书侍郎左右丞同知枢密院事班次等并以除拜先後为序今月四日延和殿进呈窃见张璪等奏乞推臣在上今後依新得指挥伏缘臣以不才误蒙朝廷拔擢寘诸执政之末已为忝窃况超越伦辈特出其右在臣愚分何以克堪兼臣在二十八日已前伏乞依新得圣旨以除拜先後为序在安燾之下取进止乞以除拜先後立班第二劄子【元丰八年六月五日上】

臣今月四日曾奏乞依新得圣旨以除拜先後为序至今未奉指挥臣器能学术素出人下执政之中最为後來一旦超居衆人之上诚所未安伏望圣慈依臣前奏班在安燾之下取进止

传家集卷四十六

卷四十七

钦定四库全书

传家集卷四十七 宋 司马光 撰章奏三十

请更张新法劄子【元丰八年五月二十八日上】

臣闻诗云毋念尔祖聿修厥德故夏遵禹训商奉汤典周守文武之法汉循高祖之律唐行太宗之制子孙享有天禄咸数百年国家受天明命太祖太宗拨乱反正混一区夏规模宏远子孙承之百有余年四海治安风尘无警自生民以来罕有其比其法可谓善矣先帝以睿智之性切於求治而王安石不达政体专用私见变乱旧章误先帝任使遂致民多失职闾里怨嗟陛下深知其弊即政之初变其一二欢呼之声已洋溢於四表则人情所苦所愿灼然可知陛下何憚而不并其余悉更张哉譬如有人误饮毒药致成大疾苟知其毒斯勿饮而已矣岂可云姑少少减之俟积以岁月然後尽舍之哉臣曩曾上言教阅保甲公私劳费而无所用之斂免役钱寛富而困贫以养浮浪之人使农民失业穷愁无告将官专制军政州县无权无以备仓猝万一饥饉盗贼羣起国家可忧此皆所害者大所及者衆先宜变更借令皇帝陛下独览权纲犹当早发号令以解生民之急救国家之危收万国之欢心复祖宗之令典况太皇太后陛下同断国事舍非而取是去害而就利於体甚顺何为而不可哉取进止

乞改求谏诏书劄子【元丰八年上】

臣先於三月三十日上言乞下诏书广开言路不以有官无官之人并许进实封状仍颁下诸路州军於要闹处出榜晓示鼓院检院州军长吏不得抑退臣昨奉圣旨令入见於今月二十三日在京蒙降中使以五月五日诏书赐臣看阅臣狂瞽妄言曲荷采纳岂独微臣之幸抑亦天下之幸此乃圣主之先务太平之本原也然臣伏读诏书其间有愚心未安者不敢不冒万死极竭以闻窃见诏书始末之言固尽善矣中间有云若乃陰有所怀犯非其分或扇摇机事之重或迎合已行之令上则观望朝廷之意以徼幸希进下则徇惑流俗之情以干取虚誉审出於此苟不惩艾必能乱俗害治然则黜罚之行是亦不得已也臣闻明主推心以待其下而无所疑忌忠臣竭诚以事其上而无所畏避故情无不通言无不尽今诏书求谏而又逆以六事防之臣以为人臣惟不上言上言则皆可以六事罪之矣其所言或於羣臣有所褒贬则可以谓之陰有所怀本职之外微有所涉则可以谓之犯非其分陈国家安危大计则可以谓之扇摇机事之重或与朝旨暗合则可以谓之迎合已行之令言新法之不便当改则可以谓之观望朝廷之意言民间之愁苦可闵则可以谓之徇惑流俗之情然则天下之事无复可言者矣是诏书始於求谏而終於拒谏也臣恐天下之士益箝口结舌非国家之福也又止令御史台出榜朝堂自非趋朝之人莫之得见所询者狭伏望圣明於诏书中删去中间一节如臣三月三十日所奏颁布天下使天下之人晓然知陛下务在求谏无拒谏之心各尽所怀不忧黜

罚如此则中外之事远近之情如指诸掌矣取进止

辞门下侍郎劄子【元丰八年五月二十八日上】

臣准合门告报已降告命除臣守门下侍郎者臣先於熙宁三年蒙先帝除臣枢密副使臣以才力短拙固辞得免自是至今十有六年臣齿发愈衰精力愈耗忽被恩诏力少任重非所克堪岂敢爱身实恐累国伏望圣慈特寝新命听臣赴陈州本任所有告身臣不敢祇受取进止

辞门下侍郎第二劄子【是日中使梁惟简赐手诏云赐卿手诏深体予怀更不多免嗣君年德未高吾当同处万务所赖方正之士赞佐邦国想宜知悉再宣谕前日所奏乞引对上殿讫赴任其日已降指挥除卿门下侍郎切要与卿商量军国政事早来所奏备悉卿意再降诏开言路俟卿供职施行遂止不上】

臣伏蒙圣恩差御药吴靖方宣诏臣令受新除门下侍郎告身者圣恩重复惶愧愈深臣性质愚鲁学术浅短徒以素仗忠信窃慕公直偶为时俗被以虚名误蒙累朝甄奭承乏侍臣熙宁初王安石说导先帝置三司条例司始议新法臣以为财聚则民散下怨则上危力曾开陈称其不可言语拙讷不能感悟蒙圣恩除枢密副使臣贪爱富贵无异於人顾以君无虚授臣无虚受先帝用臣必以为有益国家苟言无足采臣何敢叨居其位是以累上章奏终辞不拜既而请补外郡又乞散官两任留台四任崇福臣区区之心惟望先帝察其何故辞贵就贱一赐召对访以新法於民间果为利害臣得输肝沥胆极竭以闻退就鼎镬死且不朽饮食寤寐不忘此志幽明难欺天实知之不图先帝奄弃天下臣陨心泣血谓积年所怀生死莫伸及来奔国丧伏蒙太皇太后特降中使宣谕令无惜奏章臣不意愚诚复有所摅发千载一遇不胜踊跃遂首以开言路为请及其他新法之不便者略举数条今蒙恩差知陈州又诏令过阙入覲到城之日蒙降中使以开言路诏书赐示臣刍蕘之言遽荷采纳且喜且惧无地自容然详读诏书中间六事有所未安似名为求谏其实拒谏恐士民见者未达圣意莫敢进言方欲上殿论列不意忽奉恩命俾贰左省臣以非才未敢祇受及以言路不通新法为患皆当今切务遂於今早入一劄子辞免恩命并所准备上殿劄子二道同於通进司投下未审圣意以臣前後所言果为何如若稍有可采乞特出神断力赐施行则臣可以策励疲弩少佐万一若皆无可采则是臣狂愚无识不知为政岂可以污高位尸重任使朝廷获旷官之讥微臣受窃位之责他日有误国事罪不容诛伏望圣慈特寝新命使得自安其分取进止

乞申明求谏诏书劄子【元丰八年六月十四日上】

臣伏见皇帝陛下初临太宝太皇太后陛下同断万几侧身虚已渴於求谏特下诏书大开言路此诚明主之先务太平之本原也窃见中间有若廼陰有所怀至是亦不得已也一节天下见者未达圣心咸以为朝廷虽名求谏实恶人论事豫设科禁有上言者皆可以此六事罪之是以盘桓犹豫未敢尽言如此则上恩不得下下情不得上通上下否闭万事乖失又前来诏书止榜朝堂所询不广见者甚少臣愚欲望圣慈下学士院别草诏书除去中间一节务在勤求说言使之尽忠竭诚无有所讳仍乞徧颁天下在京於尚书省前及马行街出榜在外诸州

府军监各於要閤处晓示不以有官无官之人应有知朝政阙失及民间疾苦者并许进实封状言事在京则於登闻鼓院检院投下委主判官画时进入在外则於州府军监投下委长吏即日附通闻奏不得取责副本强有抑退其百姓无家业人虑有奸诈即令本州责保知在奏取指挥放令逐便候有上件实封奏状进入至内中伏望陛下以万几之暇畧赐省览其所论至当者当用其言以显其身其是非相半者舍短取长其言无可采事不可行者亦当矜容不可加罪如此则下情无不通嘉言罔攸伏聪明周四远海内如指掌矣或虑奏状繁多难以亲览即乞降付三省委三省官看详择其可取者用黄纸签出再进入或乞留置左右以备规戒或乞降付有司施行取进止

看阅吕公着所陈利害劄子

臣今月一日夜蒙降到吕公着劄子一道付臣看阅所陈更张利害有无兼济之才直书当与未当具悉奏来者臣自公着到京止於都堂衆中一见自後未尝私相见及有简帖往来今公着所陈与臣所欲言者正相符合盖由天下之人皆欲如此臣与公着但具衆心奏闻耳臣闻书曰有废有兴出入自尔师虞庶言同则绎言国家政事欲有所改更必先谋於衆人所言皆同然後行之则无失也传曰上酌民言则下天上施言为人上者当采酌民言从其所欲则在下之人戴上如天受其恩施也伏望陛下察公着所陈参以臣民所上实封奏状若与之同者断志行之勿复有疑臣见太平之功不日可成矣公着一言而天下受其利可谓有兼济之才所言无有不当惟有保甲一事欲就农隙教习臣愚以为朝廷既知其为害於民无益於国便当一切废罢更安用教习容臣续具劄子奏闻次其公着劄子谨同封上取进止

乞罢保甲劄子【元丰八年七月三日上】

臣窃见先帝以戎狄骄傲侵据汉唐故地有征伐开疆之志故置保甲令开封府界及河北陕西河东三路皆五日一教阅京东西两路保甲养马仍各置提举官权任比监司既而有司各务张皇以希功赏其提举官专护本局不顾他司事干保甲州县皆不得关预管内百姓不得处治其巡检指使保正保长竟为侵扰蚕食无厌稍不如意擅行捶挞其保丁习於游惰不复务农或自为刼掠或侵陵乡里其本家耕种耘获率皆妨废供送不办率敛无穷货产耗竭无以为生弱者流移四方壮者亡为盗贼行之数年先帝浸知其弊申勅州县令保甲应有违犯并巡教官指使违法事件并许州县觉察施行及陛下践阼听政首令京东西路保甲养马并依元降年限收买其剩买过数目并以充次年之数又令开封府界三路团教已及半年经朝廷按阅者每月并教两日未经按阅者并教三日陕西团教未及半年者每月两次并教三日又令见教人身材弱小或久来疾病及本家止有一丁病患不堪营作并第五等已下地土不及二十亩者并许州县保明提举司审验放免又令一县不得放免过二分此皆圣泽矜宽民力於保甲劳费虽什减五六然保甲保马向去点择买养补填尚犹如旧其巡教指使保正保长名目犹在於所辖保甲恐不免须有陵逼侵渔其四时教阅虽减日数未免妨农臣愚以为此保甲若使之逐捕贼盗则近已有指挥巡检县尉及弓手兵级人数并令依保甲未上番以前人数复置其保甲更不令管勾捕盗若使之攻讨四夷则此皆畎亩白徒教阅虽熟未尝见敌与戎狄战鬪必望风奔溃登极诏书戒勅边吏令不侵扰外界务要静守疆场然则此保甲

保马的实有何所用徒令府界及五路农民不堪愁苦幸赖社稷之灵适值累年丰稔犹流民甚多盗贼充斥若遇如明道年之蝗康定年之旱至和年之水则其为国家大患岂可尽言近者羣盗王冲乘保马诸处行劫置保马本欲逐盗今更为盗资又获鹿县保甲斫射毆伤提勾孙文巡检张宗师以下陵上是乃大乱之源渐不可长凡保甲保马有害无利天下之人莫不知之臣不知朝廷何憚而久不废罢伏乞断自圣志尽罢诸处保甲保正保长使归农依旧置耆长壮丁巡捕盗贼户长催督税赋其所养保马拣择勾收太仆寺量给价钱分配两骐驎院坊监及诸军召提举官还朝其勾当公事巡检指使并送吏部与合入差遣如此则开封府界及五路之民孰不欢呼鼓舞荷戴圣德若以保甲中武艺已成之人可惜使之归农即乞令逐县户数每五十户置弓手一人略依缘边弓箭手法许?本户田二顷与免二税或税轻者与免若干石斗税及户下诸般科役本户田不足听?亲戚田务在优假使人劝募然後召募本县乡村户有勇力武艺者投充弓手计即今保甲中有勇力武艺者必多愿应募若一人阙额有二人以上争投者即委本县令佐拣试武艺高强者充若见充弓手人有勇力武艺衰退许他人指名比较若胜於旧者即令充替如此则不须教阅武艺自然常得精熟一县之中其勇壮者既充弓手其羸弱者虽使之为盗亦无能为患仍委本州及提点刑狱常切按察令佐有取舍不公者重加刑典若无人投名乞更议优法若尚召募不足即且於乡村户上依旧雇人候有投名者即令充替若弓手数多即令分番更互在县祇应一年一替其余各分定地分巡捕贼盗每获贼勘得赦後住止及窝藏去处其本地分严行科责及令出赏钱与获贼之人其贼发地分更不作三限科校只令捕贼给赏如此则贼发之处捕盗之人不复掩蔽住止窝藏之处捕盗人不肯庇匿盗贼无所容身自然稀少取进止

乞罢免役钱状【元丰八年上】

右臣窃以百姓出力以供在上之役盖自古及今未之或改熙宁中执政者以为百姓惟苦差役破产不憚增税乃请据家赀高下各令出钱雇人充役按因差役破产者惟乡户衙前有之自余散从承符弓手手力耆户长壮丁未闻破产者也其乡户衙前所以破产者盖由山野愚戇之人不能干事使之主管官物或因水火损败或为上下侵欺是致欠折备偿不足有破产者至於长名衙前久在公庭勾当精熟每经重难差遣积累分数别得优轻场务酬獎往往致富何破产之有夫差役出於民钱亦出於民今使民出钱雇役何异割鼻饲口朝三暮四於民何所利哉又募者役人皆上等户为之其下等单丁女户及品官僧道本来无役今更使之一槩输钱则是赋敛愈重非所以寛之也故自行免役法以来富室差得自寛而贫者困穷日甚殆非所抑兼并哀惻独均赋役也又监司守令之不仁者於雇役人之外多取羨余或一县至数万贯以冀恩赏规进取不顾为民世世之患又国家旧制所以必差青苗户充役人者为其有庄田家属有罪难以逃亡故颇自重惜今雇浮浪之人充役常日恣为不法一旦事发单身窜匿何处州县不可投名又农家所有不过谷帛与力自古赋役无出三者自行新法以来青苗免役及赋敛多责见钱钱非私家所铸要须贸易外求丰岁谷贱已自伤农况迫於期限不得半价尽粍所收未能充数家之餽粮不暇更留若值凶年则又无谷可粍人人卖田无所可售遂至杀牛卖肉伐桑鬻薪来年生计不敢复议此农民所以重困也又钱者流通之物故谓之泉布比年以来物价愈贱而闾阎益困所以然者钱皆聚於官中民间乏钱货重物轻借使有人鬻薪粍米米价虽贱薪价亦贱故也臣愚以为宜悉罢免役钱其州县诸色役人并依旧

制委本县令佐揭簿定差替见雇役人其衙前先召募人投充长名召募不足然後差乡村人户每经历重难差遣依旧以优轻场务充酬獎所有见在免役钱拨充州县常平本钱以户口为率常存三年之蓄有余则归转运司凡免役之法纵富强应役之人征贫弱不役之户利於富者不利於贫者及今耳目相接犹可复旧若更年深富者安之民不可复差役矣

传家集卷四十七

卷四十八

<集部,别集类,北宋建隆至靖康,传家集>

钦定四库全书

传家集卷四十八 宋 司马光 撰章奏三十一

乞罢将官状【元丰八年上】

右臣伏以州县者百姓之根本长吏者州县之根本根本危则枝叶何以得安故自古以来凡置州郡必严其武备设长吏必盛其侍卫非以重其权骄其人也乃所以安百姓卫朝廷也秦惩周室干弱枝强之弊既灭六国以为天下不复用兵虽分三十六郡置郡守更以御史监之隳名城销兵器束以苛法举动施为皆不得自专是以陈胜吴广以匹夫奋臂大呼郡县莫能制多杀长吏以应之虽由其残虐取亡亦守令无权无兵之所致也晋武帝平吴亦以为天下既一兵无所用悉去州郡兵陶璜山涛皆言州郡武备不可废帝不听及永宁以後盗贼羣起州郡无备不能擒制天下遂大乱夫兵者所以威不轨而昭文德谁能去兵州县无虞则国家安矣州县不守则国家危矣臣切见国朝以来置总管钤辖都监监押为将帅之官凡州县有兵马者其长吏未尝不兼同管辖盖知州即一州之将知县即一县之将故也先帝欲征伐四夷患诸州兵官不精勤训练士卒懈弛於是建议者请分河北陕西河东京东京西等路诸军若干人为一将别置将官使之专切训练其逐州总管以下及知州知县皆不得关预及有差使量留羸弱下军及剥员以充本州官白直及诸般差使其余禁军皆制在将官专事教阅臣愚以为职事修举在於择人不在设官苟得其人虽总管等皆能训练士卒不得其人虽将官亦何所为况今之将官即擢之为总管等者也岂为总管等则不能举职为将官乃能举职乎此徒变易其名无益事实非惟无益兼复有害凡设官分职当上下相维如身之使臂臂之使指纪纲乃立今为州县长吏及总管等官而於所部士卒有不相统摄不得差使殆如路人者至於仓库守宿街市巡逻亦皆乏人虽於条许差将下兵士而州县不得直差须牒将官将官往往占护不肯差拨万一有非常之变州县长吏何以号令其衆制御奸宄哉又顷岁以来自转运使知州以下白直及迎送之人日朘月减出入导从太为萧条供承荷担有所不给观望削弱无以威服吏民臣略举目覩一事以证其余西京城郭周数千里卑薄颓缺犬豕可踰又灋洛二水交贯其中每夜诸门扃鐍虽严而滩流之际人皆可以平行往来其属水南北巡检下所管兵士除出军外余数不多通判以下诸官白直来往防送仓库守宿街市巡逻尽出其间擢者先帝建豫勅西京留守亲诣嵩山起建道场其将下禁军充白直者於条皆不得出城经宿所敢留者剩员七八人而已西京天子别都也其守御不固如此留守前宰相重官也其侍卫单寡如此况僻小州县其守御之备侍卫之衆可知矣万一有凶校之贼驱乌合之衆突入城邑或刼质戕贼畏吏以焚烧庐舍杀掠吏民将何以制之哉此特天下太平之久习俗淳厚羣心安固贼不测虚实胆智怯弱故未敢为之耳岂可忽略谓之必无而不为之备哉今

独缘边州军城隍完固士卒衆多可以守御自余腹内州县既无深沟高城又乏士卒羣盜猝至何以责其竭节守义不弃城窜匿或以酒食迎贼以甲兵献贼敛民财以赂贼者乎羣盜尚尔况敌人倾国大举长驱而来者哉易曰君子安不忘危存不忘亡治不忘乱兵法曰不恃敌之不我犯恃我之不可犯国家岂可恃即日平宁晏然高枕不以为虑谓其必不敢来乎臣愚以为河北陕西河东京东京西等路腹内州县宜以渐候丰年农闲之际委提点刑狱与本处长吏相度各修筑所治之城州城稍高县城次之不必广大所以然者高则难踰小则易守故也其缘边屯驻兵士遇春夏无事之际委经略安抚使与转运使公共商量减放归住营州军或於内地就粮勿听怯懦将帅多有虚占以自守卫其腹内州军量其大小紧慢大藩常留千余人小州亦留数百人不得差发往别州军见兵不足即行招添悉罢将官其逐州县禁军并委长吏与总管等官同共提举教阅及诸多差使其有不能精勤致士卒懈弛者委提点刑狱常切按察闻奏严行责降仍令逐县各选有勇力武艺之人充弓手以守卫城邑讨捕盜贼其州县吏所给白直迎送之人皆如嘉佑编勅以前之数如此力可以守然後遇寇盜之至责其弃城等罪而诛之彼亦甘心矣

乞降臣民奏状劄子【元丰八年七月十四日上】

臣伏见陛下诏开言路至今已涉旬月必有臣寮民庶上言朝廷阙失民间疾苦奏状已多未见有付外令三省或枢密院商量施行者如此则徒烦听览何所裨益昔汉昭帝时吏民上书言便宜有异辄下杜延年平处复奏先帝初即位诏中外上言得失亦令臣与张方平同详定选择可取者与元奏状同进入内或降付三省枢密院施行臣窃计今来臣民所上文字其间是非臧否虽错杂嘉谋长策不可谓无以睿明所烛谅毫发无遗岂可一概弃置全不采用欲乞选其可从者降出施行或以万几之繁未暇遍加省览即乞依臣前奏降付三省委执政官分取看详择其可取者用黄纸签出再进入或留置左右或降付有司施行取进止

乞降封事签帖劄子【元丰八年八月八日上】

臣闻舜明四目达四聪王者视四海之内皆如户庭闾阎之间皆如指掌然後能治其天下恭惟太皇太后陛下深居九重皇帝陛下富於春秋四海之广大闾阎之隐微未尝身亲而目覩也非采听臣民之言虽以天纵睿智之性何由知之陛下近诏天下臣民皆得上封事言朝政阙失民间疾苦仍降出令臣与诸执政官看详其第一次降出者三十三卷臣谨与诸执政选择其中除无取及冗长之辞外其可取者已用黄纸签出进入乞伏陛下取签出者更赐详览或留置左右以备规戒或降付有司商议施行如此则忠言日进聪明日广诚生民之厚幸社稷之盛福也竊者执政请听臣寮上殿陛下谦退以为国家政事多未习知臣寮欲言事者自有章疏何必上殿今臣民章疏举集於前若非陛下勤加省览则朝政阙失民间疾苦何由上闻国家政事无时而习知也其间亦有一事而衆人共言者臣亦重复签出盖欲陛下知天下所共患衆情所同欲也夫为政在顺民心民之所欲者行之所恶者去之则何患号令不行民心不附国家不安名誉不荣哉惟在陛下断志而力行之耳取进止

乞省览农民封事劄子【元丰八年九月三日上】

臣伏觀近降农民诉疾苦实封奏状王嗇等一百五十道除所诉重复外俱已签帖进入窃惟四民之中惟农最苦农夫寒耕热耘沾体涂足戴星而作戴星而息蚕妇育蚕治茧续麻纺纬缕缕而积之寸寸而成之其勤极矣而又水旱霜雹蝗 间为之灾幸而收成则公私之债交争互夺谷未离场帛未下机已非已有矣农夫蚕妇所食者糠粃而不足所衣者绌褐而不完直以世服田亩不知舍此之外更有可生之路故其子弟游市井者食甘服美目覩盛丽则不复肯归南亩矣至使世俗俳谐共以农为嗤鄙诚可哀也又况聚敛之臣於租税之外巧取百端以邀功赏青苗则强散重敛给陈纳新免役则刻剥穷民收养浮食保甲则劳於非业之作保马则困於无益之费可不念哉夫农蠶者天下衣食之原人之所仰以生也是以圣王重之臣不敢远引前古窃闻太宗皇帝尝游金明池召田妇数十人於殿上赐席使坐问以民间疾苦田妇愚戆无所隐避赐帛遣之太宗兴於侧微民间事固无不知所以然者恐富贵而忘之也故每临朝无一言不言及稼穡真宗皇帝乳母秦国夫人刘氏本农家也喜言农家之事真宗皇帝自幼闻之故为开封尹以善政着闻及践大位咸平景德之治为有宋隆平之极景德农田勅至今称为精当昔周公相成王作无逸曰先知稼穡之艰难乃逸则知小人之依盖以一盂之饭一尺之帛莫不出於艰难人主既知之则不肯用之於无益散之於无功骄侈之心无自而生矣伏惟太皇太后陛下深居九重皇帝陛下富於春秋自非今者濬发德音大开言路使畎亩之民皆得上封事则此曹疾苦何由有万分之一得达於天听哉其文辞鄙俚语言丛杂皆身受实患直贡其诚不可忽也伏望太皇太后陛下与皇帝陛下同赐省览庶以开广聰明资益圣性於民间情伪靡不周知异日太平之业由此为始矣取进止

与吕公着同举程颐劄子【元丰八年九月十五日上】

臣等窃见河南处士程颐力学好古安贫守节言必忠信动遵礼义年踰五十不求仕进真儒者之高蹈圣世之逸民伏望圣慈特加召命擢以不次足以矜式士类裨益风化取进止

乞裁断政事劄子【元丰八年十月十七日上】

臣闻两贵之不能相事两贱之不能相使此乃物理自然人情之常也是以圣人立为君臣使人臣各献其谋而人君裁决其是非若网在纲有条而不紊此国家所以治也若人君不加裁决使人臣各行其意则朝夕鬭讼弱不胜强寡不胜衆不则雷同诡随尸位窃禄苟且偷安以度目前此国家所以衰也然人君於是非之间亦当三思精察昭然无疑然後决之自古兴衰未有不由此涂出也夫人心不同各如其面虽以周公之圣召公之贤同辅成王犹有不悦况邪正忠佞各有所存者乎臣窃惟皇帝富於春秋太皇太后亲临万几事无大小皆委於执政垂拱仰成万一羣臣有所见不同势均力敌莫能相一者伏望陛下特留圣意审察是非若甲是而乙非当舍乙而从甲乙是而甲非当舍甲而从乙如此则羣臣莫敢不服善政日新矣不然陛下虽有求治之心事功无时而成也况书曰惟辟作福作威不可使用人赏罚之柄尽归执政人主一不得而专也取进止

议可劄子【元丰八年十月二十四日上】

臣闻古人有言谋之在多断之在独陛下宽仁委政羣下或政有大疑议论难一俛陛下不决其是非则争辩纷纭无时而息事功何由可成臣谨案蔡邕独断叙汉制有疑事公卿百官会议若台阁有正处而独执异议者曰驳议其合於上意者文报曰某官某甲议可此所以各尽羣下之所见而人主亦不失操柄也今执政之臣虽相与竭力同寅协恭若万一有议论必不可合者欲乞许令各具劄子奏闻望陛下精察其是非可否以圣意决之或於帘前宣谕或於禁中批出令依某人所奏若羣臣犹有固争执者则愿陛下更加审察若前来处分果非则勿惮改为若灼然无疑则决行不移耳如此再思而行庶几得尽衆心事亦少失矣取进止

乞不贷强盗白劄子【元丰八年八月上】

刑部奏钞曹州勘到百姓赵倩吕德吕文於今年三月二十三日同打劫南华县界顿荣家财物将枪刺顿荣一枪腮上血出打劫得财物被弓手捉获医人检得顿荣元被吕文刺伤处有血是失物伤将劫到赃估定足钱陆贯玖拾玖文本州只为顿荣被劫刺伤时不曾申官检定痕验遂具案申奏大理寺会到进奏院今年三月六日赦七日到州准律勅合决重杖一顿处死刑部检到例拟并特贷命决脊杖二十各刺面配广南远恶州军牢城门下勘会近年以来诸州勘到劫贼但不曾杀人放火者并作情理可愍或刑名疑虑申奏朝廷率从宽贷窃详逐人既为劫贼情理有何可愍赦後赃满伤人刑名有何疑虑此皆逐州官吏避见失入罪名专务便文营已无去害疾恶之心况曹州素多盗贼系重法地分如赵倩等所犯如此皆得免死则是强盗不放火杀人者尽得免死窃恐盗贼转加恣横良民无以自存殆非惩恶劝善之道其赵倩等欲乞并令本州依法处死仍乞立法自今後应天下州军勘到强盗情理无可愍刑名无疑虑辄敢奏闻者并令刑部举驳重行典宪更不得似日前用例破条

乞不贷故鬪杀劄子【元丰八年八月十四日上】

窃惟王者所以治天下惟在法令凡杀人者死自有刑法以来百世莫之或改若杀人者不死伤人者不刑虽尧舜不能以致治也近见刑部奏钞泰宁军勘到保正家人姜齐见本都代名大保长张存揜着百姓孙遇其孙遇揜着袁贵髻子张存道此人称是东岳急脚子胡乱打人不伏收领齐揜着孙遇递互打三二十拳解揜放却袁贵齐与张存揜倒孙遇齐行拳踢打孙遇身死齐发心共张存捉缚袁贵虚做打死元相争人申解赴县替得偿命其袁贵到县不肯虚招齐蒙枷项隔勘方具实招通又怀州勘到百姓魏简与郭兴争赌钱拽倒郭兴家棚子郭兴父郭昇拽着简使头撞简简为本人年老便道你共我不是抵对休扯着我待推搡郭昇图放却简用力去郭昇咽喉上搭一搭其人当下倒地身死又耀州勘到百姓张志松为再从弟张小六冤执称呪骂堂兄弟男女伟志松乘酒嗔恨张小六因此行拳打张小六当时身死上件三人於条皆合处死本州并作情理可悯奏裁耀州仍称张志松本无杀意刑部一切检例拟特贷命决脊二十刺配断所牢城窃详孙遇不合诈称东岳急脚子胡乱打人虽是罪人然罪不至死其姜齐等既解臂放袁贵即合申送赴官依法施行其孙遇别更不曾拒扞及走兼已就拘执岂可更揜倒殴擊直至於死又更诬执被苦人袁贵作杀人贼欲令替自己偿命如此情理有何可悯其魏简为郭昇年老不欲相打却用力去本人咽喉上一搭至死岂不更甚于殴打又张志松只为张小六冤执呪骂事理至轻遂欧本人致死并是鬪杀於情理皆无可

愍凡人因忿相争迭相欧击其意岂皆在於杀但一人於限内死则彼一人须当偿命况此三人皆即时欧杀当死无疑止是逐州避见失入罪名妄作情理可愍或刑名疑虑奏裁刑部即引旧例一切贷命若因循不改为弊甚大所以然者从来律令勅式有该说不尽之事有司无以处决引例行之今鬪杀当死自有正条而刑部不问可贷与否承例尽免死决配作奏钞施行是杀人者不死其鬪杀律条更无所用也於杀人者虽荷宽恩其被杀者何所告诉非所以禁制凶暴保安善良也欲乞今後应诸州所奏大辟罪人并委大理寺依法定断如情理无可愍其刑名无疑虑即仰刑部退回本州令依法施行如委实有可愍及疑虑即仰刑部於奏钞後别用贴黄声说情理如何可愍刑名如何疑虑今拟如何施行令门下省省审如所拟委得允当则用缴状进入施行如有不当及用例破条即仰门下省驳奏乞行取勘庶使画一之法不至隳坏凶暴之人有所畏惮其姜齐等缘系未立法以前今欲先次进入

大辟贷配法草【元丰八年十月二十日授刑部】

应开封府诸路州军奏到大辟罪人称是刑名疑虑及情理可愍者仰大理寺依法定断并坐疑虑可愍条送刑部看详如刑名实有疑虑情理实有可愍因依申奏取旨若看详得别无疑虑及可愍者即具钞奏下本处依法施行不得一槩将旧例贷配破却律勅正条仍委门下中书尚书省点检如有不当及用例破条奏乞取勘施行

卷四十九

钦定四库全书

传家集卷四十九 宋 司马光 撰章奏三十二

进孝经指解劄子【元丰八年十二月二日上】

臣窃惟自古五帝三王未有不由学以成其圣德者所谓学者非诵章句习笔札作文辞也在於正心修身齐家治国明明德於天下也恭惟皇帝陛下肇承基绪虽年在幼冲而执丧临朝率礼弗越体貌尊严举止安重顒顒叩叩有老成之德华夷瞻仰无不爱戴此乃圣性自然不闻亦式实天佑皇家宗庙社稷生民之盛福也然玉不琢不成器人不学不知道况复资学问以成之则尧舜禹汤文武何远之有伏见近降圣旨过冬至开讲筵臣窃以圣人之德无以加於孝自天子至於庶人莫不始於事亲终於立身扬名於後世诚为学所宜先也臣曷不自揆尝撰古文孝经指解皇佑中献於仁宗皇帝窃虑岁久遗失不存今则缮写为一册上进伏乞圣明少赐省览取进止

辞转官劄子【元丰八年十二月十二日上】

臣伏覩中书録黄奉圣旨神宗祔庙毕执政官依故事转迁以臣为正议大夫者窃惟英宗皇帝亲政之初以宰臣韩琦等於嘉佑之末有定策大功保佑圣躬济於艰难故各特迁一官今陛下以神宗皇帝大渐之际宰臣蔡确等啓迪圣心建立储贰传授大宝各特迁一官固亦其宜臣当是时方闲居在西京凭几未命非所预闻岂得与确等同受褒赏且国家名位本以釄功报德不可但以祔庙礼毕检举故事虚有授受况臣於登极之初已蒙覃恩改官今曾未踰年安敢再叨殊渥纵臣贪冒不知愧耻天下之人其谓臣何所有授正议大夫告身臣不敢祇受伏望圣慈特赐寝罢取进止

辞转官第二劄子【元丰八年十二月上】

臣於今月十一日伏覩中书録黄蒙恩除正议大夫臣於十二日具劄子奏以蔡确等啓迪神宗皇帝建立储贰传授大宝宜迁一官臣闲居西京非所预闻所有正议大夫告身臣不敢祇受自後未闻降出至十四日准合门告报令臣受上件告身臣窃惟富弼辅佐三朝名德老成当嘉佑之初亦是定策之臣但以不预顾命恳辞甚至如臣才德比於富弼无能为役当建储顾命之际臣为庶僚在外初不预闻岂敢止因祔庙随例迁官凡为政之要惟在赏功罚罪臣忝备执政无功受赏将何以裁抑他人所有新命伏望圣慈特赐寝罢取进止

辞转官第三劄子【元丰八年十二月上】

臣伏奉诏书以臣辞免恩命所请宜不允者昔英宗皇帝入承大统宰臣韩琦等实有定策之功又践阼之初圣躬违豫慈圣光献皇太后权同听政琦等尽忠竭力亦不为不至及英宗皇帝专制万几褒赏琦等各迁一官臣时为谏官犹上言以近岁官冗赏滥两府大臣陛下即政之初宜惩革斯弊今自於朞年之间连并迁官则难以禁他人之幸进者恐宿卫将军宗室外戚四方藩镇内侍近臣皆有冀望至时陛下亦不能裁抑两府亦不敢执奏当是时英宗皇帝虽不收还恩命而富弼亦有定策之功自以不预顾命力辞甚苦况臣既不预定策又不预顾命岂可来自冗散之地遽与辅臣同赏且臣昔日在人则言其不可受今日在已则受而不辞顾行复言能不自愧所有告身臣不敢祇受伏望圣慈矜察特赐寝罢取进止

辞转官第四劄子【元丰八年十二月上】

臣昨蒙恩除臣正议大夫臣三具劄子及帘前面陈至恳终未赐开允臣夙夜愧恐不能自己臣窃以为政之要惟在於赏功罚罪赏不当功则徼幸竞进罚不当罪则善良忧恐乱之基也曩日神宗皇帝大渐之际臣屏居闾阎今乃与建储受遗之臣一例迁官赏不当功何以过此陛下不知臣不肖使待罪执政执政当为陛下抑徼幸惜官职而身自冒赏何以表率他人臣非敢私饰小廉其志欲为国家慎重名器伏望圣慈矜察特赐寝罢新命所有告身臣不敢祇受取进止

辞转官第五劄子【元丰八年十二月上】

臣准阁门告示以臣累上章辞免新命已降批荅不许所有告身可告示早令祇受者臣窃惟无功受赏士之所难?观英宗皇帝神宗皇帝即政之初褒赏大臣皆以定策受遗之功非因祔庙礼毕臣既非定策又不受遗实难虚受至於政事日新皆陛下圣明衆贤协力在臣一人何能裨益而无名冒赏惟恐有玷清朝所有告身臣不敢祇受伏乞早赐寝罢取进止

请革弊劄子【元丰八年十二月四日上】

臣伏见陛下自临政以来夙夜孜孜以爱百姓安国家为事盖善治疾者必?其所来攻其所急救之欲速去之欲尽臣观今日公私耗竭远近疲弊其原大概出於用兵夫兵者凶器天下之毒财用之蠹圣人除暴定乱不得已而用之耳自有唐中叶藩镇跋扈降及五代羣雄角逐四海九州瓜分糜溃兵相吞噬生民涂炭二百余年太祖受天明命四征弗庭光啓景祚太宗继之克成厥勲然後大禹之迹悉为宋有於是载戢干戈与民休息或自生至死年及期颐不见兵革吏守法度民安生业鸡鸣狗吠烟火相望可谓太平之极致自古所罕俾矣及神宗继统材雄气英以幽蓟云朔沦於契丹灵夏河西专於拓跋交趾日南制於李氏不得悉张置官吏收籍赋役比於汉唐之境犹有未完深用为耻遂慨然有征伐开拓之志於是边鄙武夫窥伺小利敢肆大言祇知邀功不顾国患争贾余勇自谓卫霍不死白面书生披文按图玩习陈迹不知合变竞献奇策自谓良平更生聚敛之臣掇拾财利剖析秋毫以供军费专务市恩不恤残民各陈遗利自谓研桑复出相与误惑先帝自求荣位於是置提举官强配青苗多收免役以聚货泉又驱畎亩之人为保甲使舍耒耜习弓矢又置都作院调筋皮角木以多造器甲又

养保马使卖耕牛市驂骏而农民始愁苦矣部分诸军无问边州内地各置将官以领之自知州军总管钤辖都监监押皆不得关预舍祖宗教阅旧制诵射法效北服机械陈图竞为新奇朝晡上塲罕得休息而士卒始怨嗟矣置市易司强市取坐列贩卖增商税色件及菜果而商贾始贫困矣又立賒贷之法诱不肖子弟破其家又令民封状增价以买坊塲致其子孙邻保籍没貲产不能备偿又增茶盐之额贱买贵卖强以配民食用不尽迫以威刑破产输钱又设措置河北籴便司广积粮谷於临洺州县以备馈运教兵既久积财既多然後用之而承平日久人已忘战将帅愚懦行伍骄惰加以运筹决胜者乃浮躁巧伪之士不知彼已妄动轻举是以顿兵灵武力疲食尽自溃而归执兵之士荷粮之夫暴骨塞外且数十万筑堡永乐怠忽无备纵寇延敌闔城之人翦为鱼肉曾未足以威服戎狄而中国先自困矣先帝深悔其然厌截截徧言思番番良士及下哀痛之诏息兵富民奄弃天下此臣所为痛心疾首而泣血追伤者也伏惟皇帝陛下肇承基绪太皇太后同听庶政首戒边吏毋得妄出侵掠俾华夷两安今契丹继好秉常纳贡乾德拜章征伐开拓之议皆已息矣则此置提举官散青苗斂免役钱点教保甲置都作院养保马置将官市易司封状买坊塲增茶盐额措置河北籴便司皆为虚设陛下幸诏臣民各言疾苦其已至者千有余章未有不以此数事者足知其为天下公患衆人所共知非臣一人之私言也利害着明皎如日月何所复疑而羣臣犹习常安故憚於更张虽颇加裁抑而监司按堵将官具存保甲犹教阅保马犹养饲边州屯戍不减军器造作不休茶盐新额尚在差役旧法未复是用兵虽息而公私劳费犹未息也如此因循不知改辙数年之後万一遇水旱大饥盗贼羣起其为国家忧患岂敢尽言哉伏愿陛下断自圣志凡王安石等所立新法果能胜於旧者则存之其余臣民以为不如旧法之便者痛加厘革虽非一日可行之事欲乞陛下宣谕执政令因臣民上封事熟议利害进呈以圣鉴裁决而行之昔夏遵禹训商用汤法周循文武之典盖创业垂统之王贻厥孙谋後世所宜谨守不可失也若凡百措置率由旧章但使政事悉如熙宁之初则民物熙熙海内太平更无余事矣议者必曰革弊不可仓猝当徐徐有渐此何异使医治疾而曰勿使遽愈且勿除其根原使尽也其为医者谋则善矣其为疾者谋奚利哉取进止

乞罢免役钱依旧差役劄子【元佑元年正月二十二日上寻得旨依奏】

臣窃见免役之法其害有五旧日差役之时上户虽差充役次有所陪备然年满之後却得休息数年营治家产以备後役今则年年出钱无有休息或有所出钱数多於往日充役陪备之钱者此其害一也旧日差役之时下户亢不充役今来一例出钱免役驱迫贫民剥肤椎髓家产既尽流移无归弱者转死沟壑强者聚为盗贼此其害二也旧日差役之时所差皆土着良民各有宗族田产使之作公人管勾诸事各自爱惜少敢大段作过使之主守官物少敢侵盗所以然者事发逃亡有宗族田产以累其心故也今召募四方浮浪之人充役无宗族田产之累作公人则恣为奸伪曲法受赃主守官物则侵欺盗用一旦事发则挈家亡去变易姓名往别州县投名官中无由追捕官物亦无处理索此其害三也自古农民所有不过谷帛与力凡所以供公赋役无出三者皆取诸其身而无穷尽今朝廷立法曰我不用汝力输我钱我自雇人殊不知农民出钱难於出力何则钱非民间所铸皆出於官上农之家所多有者不过庄田谷帛牛具桑柘而已无积钱数百贯者也自古丰岁谷贱已自伤农官中更以免役及诸色钱督之则谷愈贱矣平时一斗直百钱者不过直四五十文更急责之则直三二十矣丰年犹可

以糴谷送纳官钱若遇凶年则谷帛亦无不免卖庄田牛具桑柘以求钱纳官既家家各卖如何得售惟有拆屋伐桑以卖薪杀牛以卖肉今岁如此来岁何以为生是官立法以殄尽民之生计此其害四也提举常平仓司惟务多敛役钱广积寛剩以为功效希求进用今朝廷虽有指挥令役钱寛剩不得过二分窃虑聚敛之臣犹依傍役钱别作名目隐藏寛剩使幽远之人不被圣泽此其害五也陛下近诏臣民各上封事言民间疾苦所降出者约数千章无有不言免役钱之害者足知其为天下之公患无疑也以臣愚见为今之计莫若直降勅命应天下免役钱一切并罢其诸色役人并依熙宁元年以前旧法人数委本县令佐亲自揭五等丁产簿定差仍令刑部检会熙宁元年见行差役条贯雕印颁下诸州所差之人若正身自愿充役者即令充役不愿充役者任便选雇有行止人自代其雇钱多少私下商量若所雇人逃亡即勒正身别雇若将带却官物勒正身陪填如此则诸色公人尽得有根柢行止之人少敢作过官中百事无不修举其见雇役人候差别役人各放逐便数内惟衙前一役最号重难躡者差役之时有因重难破家产者朝廷为此始议作助役法然自後条贯优假衙前诸公库设厨酒库茶酒司并差将校勾当诸上京纲运召得替官员或差使臣殿侍军大将管押其羸色及畸零之物差将校或节级管押衙前苦无差遣不闻更有破产之人若今日差充衙前料民间陪备亦少於躡日不至有破家产者若犹以为衙前户力难以独任即乞依旧於官户僧寺道观单丁女户有屋业每月掠钱及十五贯庄田中年所收斛斗及百石以上者并令随贫富分等第出助役钱不及此数者与放免其余产业并约此为准所有助役钱令逐州桩管据所有多少数目约本州衙前重难分数每分合给几钱遇衙前合当重难差遣即行支給然尚虑天下役人利害逐处各有不同欲乞於今来勅内更指挥行下开封府界及诸路转运司管下诸州县委逐县官看详若依今来指挥别无妨碍可以施行即便依此施行若有妨碍致施行未得即仰限勅到五日内具利害擘画申本州仰本州类聚诸县所申择其可取者限勅书到一月内具利害擘画申转运司仰转运司类聚诸州所申择其可取者限勅书到一季内具利害擘画奏闻朝廷候奏到委执政官再加看详各随宜修改别作一路一州一县勅施行务要所在役法曲尽其宜取进止

辞免医官劄子【元佑元年正月二十三日上】

臣以病在朝假伏蒙圣慈连日差中使押医官沈士安朱有章杨文蔚陈易简等到臣家各诊候留药臣上荷大恩天隆地厚陨首糜躯无足论报然臣窃闻陈易简见在病假近皇太后服药亦祇应不得今以臣故特烦圣旨督迫令每日一到臣家看候医治臣忝为人臣实不自安况臣私家亦须更请一医人每日诊候调理其陈易简已知臣脉气病状欲乞特降圣旨只令臣每日具病状增减就易简处取药更不令易简每日到臣家诊候庶於体分稍得自安取进止

辞放正谢劄子【元佑元年上】

臣伏闻降圣旨在合门宰臣执政官近迁转已正谢讫内有司马光见患在假特放谢仍免赴景灵宫福宁殿恭谢臣闻命震骇无地自处岂有朝廷特迁一官卧家受之并不入谢君降异常之泽臣无一拜之勤自古以来未尝有此臣虽顽暗必不敢当伏望圣慈早赐收还今来指

挥候臣疾患稍痊只依前来指挥减拜入谢及赴景灵宫福宁殿恭谢庶使贱臣粗能自安取进止审内批指挥劄子【元佑元年正月上内批依二十八日指挥】

臣昨日具劄子奏为圣旨特放正谢仍免赴景灵宫福宁殿恭谢臣以自古以来未有此礼必不敢当当夜准御批依近降指挥臣勘会今月十四日内降以臣转官所有将来正谢特令两拜起居免舞蹈十七日又准内降所有臣将来合赴景灵宫恭谢逐殿宜止令两拜二十八日又准入内供奉官刘永年传宣放臣正谢及景灵宫福宁殿神御前恭谢臣未审御批依近降指挥是依十四日指挥十七日指挥依二十八日指挥须至再有奏禀取进止

辞放正谢第二劄子

臣昨夜准御批指挥今早再有奏禀蒙复降御批依二十八日指挥臣承命惊惶措躬无地伏念臣忝为人臣陛下赐之一顾赐之卮酒赐之瓜果臣亦当稽首拜谢况进以高位加之宠名荣动搢绅泽流苗裔岂可即安私室专养沉疴不造王庭坐受圭组不独为海内之所共责有司之所直?天威违顔不出咫尺陨越毙踣为圣朝羞臣虽至愚粗知自爱何敢受此自纳於不测之诛伏望圣慈矜闵候臣所患稍痊安日止依十四日十七日所降指挥减拜入谢及於景灵宫福宁殿神御前恭谢庶使差可自安其二十八日指挥臣以死自守必不敢奉诏取进止

辞放正谢第三劄子【元佑元年二月上】

今月五日准尚书省劄子以臣前奏乞候所患稍痊安日依正月十四日十七日所降指挥减拜入谢及於景灵宫福宁殿神御前恭谢今月二日三省同奉圣旨依正月二十八日指挥臣闻君待臣以惠臣奉君以恭故能上下相亲道用交泰陛下念臣衰老抱病筋力尪羸特损朝仪以从私便陛下之大惠也臣若不知礼有腼面目坐受优恩曾无辞避是君有惠而臣不恭上行施而下无报臣虽顽昧心岂敢安伏望圣慈如臣前奏依正月十四日十七日指挥庶使微躯有地自处取进止

传家集卷四十九

卷五十

钦定四库全书

传家集卷五十 宋 司马光 撰章奏三十三

论西夏割子【元佑元年正月上】

臣伏见神宗皇帝以夏国王赵秉常为臣下所囚兴兵致讨奋扬天威震动沙漠虏擒其种落窜伏河外诸将收其边地建米脂义合浮图葭芦吴堡安疆等寨此盖止以藉口用为已功皆为其身谋非为国计臣窃闻此数寨者皆孤僻单外难於应援田非肥良不可以耕垦地非险要不足以守御中国得之徒分屯兵马坐费刍粮有久戍远输之累无拓土辟境之实此衆人所共知也王师既收灵州不克狼狈而归卒疲食尽失亡颇多西人知中国兵力所至自此始有轻慢之心是以明年边臣筑永乐城虏潜师掩袭覆军杀将涂炭一城久之又举一国之衆攻围兰州期於必取将士坚守仅而得全虏自是锐气少挫不敢轻犯边矣臣闻此数寨之地中国得之虽无所利虏中失之为害颇多何则深入其境近其腹心常虑中国一朝讨袭无以支梧不敢安居是以必欲得之不肯弃舍一年前虏尝专遣使者诣阙深自辨诉请臣服如故其志无他止为欲求其旧境而已朝廷既许其臣服虏来请旧境朝廷乃降指挥其前则云所以兴举甲兵本欲执取罪人救拔幽辱非有意侵取疆场土地而已其後乃云止将已得些小边土聊示削罚岂可更有陈乞还复之理此则朝旨首尾已自相违又兴师本为振拔秉常拒命者国人之罪岂可更削秉常之地於理差似未安王者以大信御四海羌戎虽微恐未易以文辞欺也於是虏既失望愤怒怨怼移文保安军辞理不逊云今来贺正旦人使难议遣发自是正旦生辰乃至陛下继明皆不遣使入贺其不臣大矣然而去岁四遣使者诣阙吊慰祭奠告其母丧并进遗物理虽不备稍示屈服臣窃料虏意不出於三一者犹冀朝廷万一赦其罪戾返其侵疆二者阳为恭顺使中国休怠便陰伺间隙入为边患三者久自絶於上国其国中贫乏使者往来得赐赉之物且因为商贩耳昔卫贰於晋晋取戚田及卫人既服郤缺曰日卫不睦故取其地今已睦矣可以归之叛而不讨何以示威服而不柔何以示怀非威非怀何以示德遂归戚田于卫今西人所为如此朝廷既不能拒絶勿受其使又不能招纳与之更始彼来则迎送馆谷以宾客待之不来则一无所问日复一日将踰二年臣窃意朝廷谓西人势已衰弱心实内附故来则不拒去则不迫置之度外不以为虞殊不思数年前王师大举深入将士所过烈於猛火割其疆场屡请而不还彼怨毒欲讐报之心窥窬欲乘衅之意日夜不忘若渴者不忘饮盲者不忘视也譬如有虎狼在屋侧垂头熟寝人岂可见其不动狎而侮之循其头蹶其尾邪臣每思之终夕寒心以臣愚虑於今为之止有二策一者返其侵疆二者禁其私市何谓返其侵疆凡天子即位天地一新涤瑕荡秽小大无遗昔赵佗自称南越武帝倔强岭南汉文帝即位赦其大罪遣单使往谕之佗稽首请服累世为臣李继迁俶扰西陲十有余年关中困弊真宗皇帝即位赦其大罪割灵夏等数州除其子赵德明为定难军节度使由是边境安宁者四十年此乃前世及祖宗之成法非无所依据也今秉常之罪不大於继迁也米脂

等寨不多於灵夏也陛下诚能於此踰年改元之际特下诏书数其累年不来贺正旦生辰及登宝位等不备之礼嘉其吊慰祭奠告国母丧进遗物之勤旷然推恩尽赦前罪自今以後贡献赐予悉如旧规废米脂义合浮图葭芦吴堡安疆等寨令延庆二州悉加毁撤除省地外元系夏国旧日之境并以还之其定西城兰州议者或谓本花麻所居赵元昊以女妻之羈縻役属非其本土欲且存留以为後图犹似有名御夷狄者不壹而足俟其再请或留或与徐议其宜亦无所伤至於会州尚在化外而经略司遽称熙河兰会虏常疑中国更有辟境之心不若改为熙河岷兰经略司如此则西人忽被德音出於意外虽禽兽木石亦将感动况其人类岂得不鼓舞忭蹈世世臣服者乎议者或曰先帝兴师动衆所费亿万仅得数寨今复无故弃之此中国之耻也昔汉元帝弃珠崖诏曰朕日夜惟思议者之言羞威不行则欲诛之通於时变则忧万民夫万民之饥饿与远蛮之不讨危孰大焉遂弃之此乃帝王之大度仁人之用心如天地之覆焘父母之慈爱盛德之事何耻之有国家方制万里今此寻丈之地惜而不与万一西人积怨愤之气逞凶悖之心悉举犬羊之衆投间伺隙长驱深入覆军杀将兵连祸结如晷日继迁元昊之叛逆天下骚动当是之时虽有米脂等千寨能有益乎不唯待其攻围自取固可深耻借使虏有一言不逊而还之伤威毁重固已多矣故不若今日与之之为美也此国大事伏望陛下留神熟虑更与执政详议以圣意断而行之不可後时失此机会悔将无及何谓禁其私市西夏所居氐羌旧壤地所产者不过羊马羶毯其国中用之不尽其势必推其余与外国贸易其三面皆戎狄鬻之不售惟中国者羊马羶毯之所输而茶彩百货之所自来也故其民如婴儿而中国乳哺之矣宝元庆历之间元昊负恩僭乱屡犯边境大入则大利小入则小利中国未尝蹈其境破其军禽其将屠其城有害於社稷也而首尾六年元昊遣使因缘边吏卑辞纳款顿颡称臣虽其恶积罪盈欲怀音革面原其私心未必不贪中国之财思私市之利故也旧制官给客人公据方听与西人交易传闻近岁法禁疎阔官吏弛慢边民与西人私交易者日夕公行彼西人公则频遣使者商贩中国私则边鄙小民窃相交易虽不获岁赐之物公私无乏所以得偃蹇自肆数年之间似恭似慢示不汲汲於事中国由资用饶足与事中国时无以异故也陛下诚能却其使者责以累年正旦生辰及登宝位皆不来贺何独遣此使者拒而勿内明勅边吏严禁私市俟其年岁之间公私困弊使自谋而来礼必益恭辞必益逊然後朝廷责而赦之许通私市待之如初然边民与西人交易为日积久习玩为常一旦禁之其事甚难何则若以常法治之则有司泥文动循墨追问证左逮捕传送之人停匿之家奏裁待报动涉半年如此则徒使边民丽刑者衆狱犴盈溢而私市终不能禁也夫三尺之限空车不能登峭峻故也百仞之山重载陟其上陵夷故也今必欲严禁边民与西人私市须权时别立重法犯者必死无赦本地分吏卒应巡逻者不觉透漏官员冲替兵士降配仍许人告捉获者赏钱若干当日内以官钱支給更不以犯事人家财充如此则缘边六路各行得一两人则庶几可以耸动人耳目令行禁止人不敢犯矣然人存政举此事全在边帅得人昔龐籍为河东经畧使下令禁边民与西人私市有熟户犯禁籍斩於犯处妻孥皆送淮南编管一境凜然无敢犯者其後施昌言为环庆路经畧使亦禁私市西人发兵压境昌言遣使问其所以来之故西人言无他事只为交易不通使者惧其兵威辄私许之法遂复坏若边帅未能尽得其人则此法恐未易可行不若前策道大体正万全无失也取进止

乞未禁私市先赦西人劄子【元佑元年二月上】

臣於今月上言以西人未服中国不得无忧而边备不敢少弛不自揆其狂妄献二策上策欲因天子继统旷然赦之归其侵地与之更始下策欲严禁私市俟其屈服然後赦之然禁私市甚难立法极严又边帅得人然後能行不若前策之道大体正万全无失也今窃闻执政用臣下策止令禁私市又立法不严边师未尽得人若边吏拘文获一漏百私市滔滔如故或此路禁絶而彼路放行如堤防一存一亡将何所益如此适足以激怒西人使益发悖心安肯屈服万一微犯边境或表牒中形不逊语至时朝廷转难处置悔之无及不若用臣上策早相弥缝纵未欲还其侵地且下诏书责而赦之使彼此安心时难得而易失不可忽也况本欲因天子继统荡涤其罪今日行之已为太晚若更迁延则赦之无名兹事系国安危若俟执政论议佥同恐失机会误国大事伏望圣意独断行之勿复有疑天下幸甚若有执政立异议乞令其人自入文字若依从其议他日因此致引惹边事当专执其咎取进止

乞先赦西人第二劄子【元佑元年二月上】

臣於今月十二日上言乞以天子继统旷然更始宜下诏数西人之罪而赦之纵未还其侵地且行此策以安边境至今闻执政议尚未决臣之愚意以为封内未安未可图外故欲急行臣前策以羁縻西人且可数年边鄙无事朝廷得休息戍兵安养百姓待国力完备家给人足然後奋扬天威讨贰柔服何所不可若行臣前策可以万全行臣後策有得有失岂可弃上策而用下策舍万全而就有失也本平兴国中李继迁反西陲不解甲者十余年关中困竭宝元庆历之间赵元昊叛屡入为寇覆军杀将自是中国虚耗不复富实今国家理财未得其道民力困穷於下府库窘乏於上又新遭大丧山陵才毕自去年十月初以来不雨雪旱势甚大若万一激怒西人微出一不逊语则并臣前策亦不可行矣今因天子即位未久西人外迹未有不顺故臣愿朝廷旦夕汲汲行之机会难得时不可失此臣所以惓惓进言不已者也若万一激怒西人致生边患兵连祸结士卒殄尽於锋镝生民困竭於转饷饿殍蔽地盗贼蜂起为国家虑岂不危哉而执政方以为西人微弱不敢复动数遣使来诚心内附置之度外不以为虞今复固执先禁私市之议又立法不严边帅不才者不先易去行之太早不能中节一旦祸生所忽边鄙震惊乃始归罪戎狄岂不害国事乎臣於今月三日所上言措置西边事虽画二策固以还其侵地责而赦之为上策严禁私市待其数年贫困来服然後赦之为下策所谓絶私市非立法至严帅臣智勇此法恐未易可行不若前策道大体正万全无失非臣前後反覆静言庸违也朝廷比来擢臣於冗散之中使预闻国论盖亦误谓臣微有益於国家非徒采其虚名也臣之不敢终辞亦欲竭尽疲弩少酬大恩非苟贪於禄位也今尽忠谋国而为衆所挫臣尚留此有何所用此国大事伏望陛下早审察二议从其长者若圣意以臣言为然乞御批依臣前策若降付三省枢密院执政仍有固守已见争之最力者乞如臣前奏令自入文字言先禁私市保得他日必不致引惹边事如其不然身执其咎取进止

乞不改更罢役钱劄子【元佑元年上】

臣近以抱病家居恐溘先朝露无以少报盛德是以力疾贪陈所见窃以即日为小民病者无若免役钱欲乞悉行废罢复祖宗差役旧法识虑愚短诚不意朝廷尽从其说非陛下明断不能如是此乃天下之幸非独微臣之幸也然臣闻令出惟行弗惟反彼免役钱虽於下户困苦

而上户优便行之已近二十年人情习熟一旦变更不能不怀异同又复行差役之初州县不能不小有烦扰又提举官专以多敛役钱为功惟恐役钱之罢若见朝廷於今日所下勅微有变动必须相告曰朝廷之勅果尚未定宜且观望必竟言役钱不可罢朝廷万一听之则良法复坏矣伏望朝廷执之坚如金石虽有小小利害未备俟诸路转运司奏到徐为改更亦未为晚当此之际则愿朝廷勿以人言轻坏利民良法取进止

乞罢提举官劄子【元佑元年上】

臣闻书称明王立政不惟其官惟其人臣少时见天圣中诸路止各有转运使一员亦无提点刑狱惟河北陕西以地重事多置转运使两员然朝廷必择朝士累任知州有声迹晓钱谷者乃得为之未尝轻以授人凡一路之事无所不总使按察官吏荐贤发奸爱养百姓兴利除害或朝廷有本路事务未能细知利害者则委之相度措置当是之时官少民安事无不举公私饶乐海内晏清景佑初始复置提点刑狱其後或时置转运判官以其冗长害事寻复废罢自王安石执政以来欲力成新法诸路始置提举常平广惠农田水利官其後每事各置提举官皆得按察官吏事权一如监司又增转运副使判官等员数皆选年少资浅轻俊之士为之或通判知县监当资序及选人以权发遣处之有未尝历亲民即为监司者能顺己意则不次迁擢小有乖违则送审官院与合入差遣更加责降彼年少则历事未多资浅则衆所不服轻俊则举措率易历事未多故措置百事往往乖方衆所不服故依势立威以行号令举措率易故虑事不熟坏法害民又利禄诱於前罪戾俟於後由是往往上不顧国家事体下不恤百姓怨咨止务希合以图进取致今日天下籍籍如此皆由此来也陛下幸念民惟邦本本固邦宁知元元困穷於国家非便欲救而安之诏青苗钱不得抑配免役钱寛剩不得过二分窃闻诸路提举官州县犹有於春首抑配青苗钱勒百姓供情愿状别作名目占免役寛剩钱但取文具而已如此则朝廷号令废格不行於臣下恩泽壅塞不被於黎民徒存空文何以为政臣闻去草者絶其本救水者回其原提举官者乃病民之本原也陛下必欲苏息疲瘵乞尽罢诸路提举官其转运使除河北陕西河东外余路只置使一员判官一员提点刑狱分两路者合为一路共差文臣两员凡本路钱谷财用事悉委转运司刑狱常平兵甲贼盗事悉委提点刑狱管勾仍选知州已上资序累历亲民差遣所至有政迹聰明公正之人方得为监司聪明则知官吏贤不肖公正则黜陟无私部下官吏既皆得人事务安有不干集百姓安有不富庶此乃国家镇抚四方之本也若以提举官累年积蓄钱谷财物不少恐转运司一旦得之妄有耗散即乞尽椿作常平仓钱物委提点刑狱一面交割主管依常平仓法谨伺谷价贱糴贵粜及准备灾伤赈贷其余不得支用若转运司委的窘乏须至兑那常平钱物者必须具数先奏朝廷得旨乃得移牒支拨若以监司数少路分阔远处巡历及管勾不辨即乞只依旧法每岁徧巡诸州更不徧巡诸县自非要切大事朝廷不令监司亲往勾当只令选差本部官除司理司法县尉独员监当之类旧条不许差出外其旧条不得隔州差选人勾当差及被差之人皆有罪新条诸州管勾官及主簿当给散月分不得差出之类指挥乞更不施行所贵监司有官可差干得事务若遇有贼盗乞朝廷只委提点刑狱差官或行移文字监督捕盗官捉杀察其不称职及有可以代之者先令权摄仍奏乞替换许一面相度贼盗强弱立赏钱数目其捕盗官若立功许随功大小保明乞转官及升差遣或减年磨勘朝廷更不下刑部磨勘诘难住滞临时详酌恩泽直赐指挥贼盗自然无不败获不须令亲出入监逐捉杀於事无益如此则监司巡历

管勾职事简要易为办集取进止

传家集卷五十

卷五十一

<集部,别集类,北宋建隆至靖康,传家集>

钦定四库全书

传家集卷五十一 宋 司马光 撰章奏三十四

论钱谷宜归一劄子【元佑元年上】

臣窃以洪范八政食货为先故古者国用必使冢宰制之祖宗之制天下钱谷自常平仓隶司农寺外其余皆总於三司一文一句以上悉申帐籍非条例有定数者不敢擅支故能知其大数量入为出详度利害变通法度分画移用取被有余济此不足指挥百司转运使诸州如臂使指朝廷常慎选健吏精於理财者为三司官如陈恕林特李参之类皆称职有名者也其余非通晓钱谷者亦罕得叨居其任故能仓库充溢用度有余民不疲乏邦家乂安自改官制以来备置尚书省六曹二十四司及九寺三监各有职事将旧日三司所掌事务散在六曹及诸寺监应支用钱物五曹得以自专有司得符即时应副而户部不能制申发帐籍又不尽归户部户部既不得总天下财赋无由尽知钱穀出入见在之数既不尽知何由量入为出又五曹及内外百官各具理财之法申奏施行户部不得一一关预无由尽公共一利害今之户部尚书旧三司使之任也而左曹隶尚书右曹不隶尚书天下之财分而为二视彼有余视此不足不得移用天下皆国家之财而分张如此无专主之者谁为国家公共爱惜通融措置者乎譬人家有财必使一人专主管支用若使数人主之各务已分所有者多互相侵夺又人人得取而用之财有增益者乎故利权不一虽使天下财如江海亦恐有时而竭况民力及山泽所出有限剂乎此臣所以日夜为国家深忧者也今纵未能大有更张欲乞且令尚书兼领左右曹侍郎则分职而治其右曹所掌钱物尚书非奏请得旨不得擅支诸州钱穀金帛隶提举常平仓司者每月亦须具帐申户部六曹及寺监欲支用钱物皆须先关户部符下支拨不得一面奏乞直支应掌钱物诸司不见户部符不得应副其旧日三司所管钱谷财用事有散在五曹及诸寺监者并乞收归户部若谓户部事多官少难以办集即乞减户部冗末事务付闲曹比司兼领而通隶户部如此则利权归一若更选用得人则天下之财庶几可理矣取进止

乞申勅州县依前勅差役劄子【元佑元年上】

臣伏见御批指挥以臣近建明差役法虑其间未得尽备差韩维吕大防孙永范纯仁专切详定闻奏臣窃以免役钱之病民自曩日臣僚民庶上封事及日近刘摯等奏陈言之甚详非独出臣一人之私意也陛下幸用臣言悉罢免役钱依旧差役诏下之日中外欢呼往来之人闻道路农民迭相庆贺云今後这回快活也然则此令之下深合人心明白灼然无可疑者其间条目未备不能委曲尽善固须有之臣所以乞下诸路州县官吏令看详若有妨碍施行未得

即具利害擘画以次上闻诚以畎畝幽隱南北异宜自非在彼亲民小官无以知其详悉故令各具所见指陈利害所以尽下情求民瘼非谓勅书一下禁人不得复议也俟其奏到徐议添改何後之有要在早罢役钱复差役为大利而已如构造大厦栋宇已立虽户牖未备可以徐图今陛下令韩维等再行详定考究利害宇补漏略成就良法固无所妨但勅下已踰半月州县差役约以及半方行遣纷纭臣愚窃恐闻此指挥谓朝廷前日之勅改更未定或敛钱或差役尚未可知官吏惶惑不知所从衆庶失望怨嗟益甚必有本因新法得进之臣乘此间隙争言免役钱不可罢因聚敛获功之吏称旧条未改督责免役钱愈急是民出汤火濯清泉复入汤火也伏望朝廷特赐申勅州县言今来止为其间条目未备令维等详定所有差役仰州县依前勅一面施行候详定到事节续降下次免致於差役中半纷纭之际令出反汗人情大摇实天下幸甚取进止

随乞宫观表辞位劄子【元佑元年上】

臣以病羸拜起及上下马不得请朝假将治已及月余旬日以来疾大势虽退饮食亦稍进然气体疲乏足肿生疮步履甚难策杖而行不出堂室况於拜起固所未易臣自料度筋力完复可以朝趋近亦数月远则半年或过此期未可前定岂有执政之臣身居高位坐受厚俸既不趋朝又不供职宴安偃仰养病於家何待人言独不内愧臣是用夙宵惶愧无地自处今不免有表上渎圣聪乞除宫观差遣一任以养衰残窃虑陛下怪其忽有此奏故别具劄子披沥肝胆伏望圣慈早赐开允取进止

辞位第二劄子【元佑元年上】

臣伏蒙圣慈以臣乞宫观差遣特命入内内侍省东头供奉官陈衍赐臣批答不允仍断来章者伏念臣自结髮从学讲先王之道闻君子之风窃不自揆常妄有尊主庇民之志不意天幸蒙陛下误采虚名擢於闾閭之间寘之庙堂之上礼遇过优委任至重臣非木石岂不知荷戴天恩铭心镂骨愿竭驽蹇少报万分眷恋天庭岂肯轻去不谓一旦婴此沉痾累月不愈害於饮食不能造朝今虽疾势渐平饮食亦进而肌骨羸瘠气力疲乏足胼瘍余毒方炽旬月之间必未能趋伏阙廷瞻望天光端居私家尸位窃禄纵陛下寬仁微臣不知廉耻中外有识之士及天下衆庶其谓臣何伏望圣慈矜察依臣前奏除宫观差遣一任使得自安其分取进止

为病未任入谢劄子【元佑元年閏二月二日上】

臣今月二日准合门承受范禹臣告报已降白麻除臣守尚书左仆射兼门下侍郎令当日入谢者臣先为久病在假不能朝参乞一宫观差遣未奉俞旨今忽闻制命超升左辅俾之师长百僚岂臣空疎所能堪可臣方别具愀然辞免未敢祇受况臣即今以久病少力足疮未愈步履甚艰拜起不得未任朝见乞候臣筋力稍完入覲宸展面陈至诚取进止

辞左仆射第一劄子【元佑元年閏二月上】

臣今月二日伏闻已降白麻除臣左仆射兼门下侍郎者臣资性愚钝学术肤浅误蒙甄采预闻政事常惧不称?于罪戾加以近婴疾疹久不朝参方乞宫观以便颐养岂意天恩出於意表即长中台直升元宰躋等躋分近世罕伦愧赧惊惧汗流沾踵况今中外旧臣或辅佐累朝或践扬两府高才硕德显着甚多若以代臣皆出臣右又即今执政臣位在四若以次而举亦未至臣伏望圣明历选其人俾居斯任如臣无状何敢克当所有新命臣不敢祇受取进止

辞左仆射第二劄子【元佑元年閏二月上】

臣今月六日伏蒙圣慈差东上合门副使王舜封赐臣左仆射兼门下侍郎告身者臣近闻恩命自知非分不敢膺克已累有文字辞免恭俟俞旨今蒙降到告身臣未敢祇受欲乞且留在合门取进止

辞左仆射第三劄子【元佑元年闰二月上】

臣於今月二十三日相继有劄子辞免新除尚书左仆射恩命未奉俞旨六日又蒙圣恩差东上合门副使王舜封就臣本家赐臣告身臣亦未敢祇受乞且留在合门今早勾当御药院冯宗道传宣并降到御批早令祇受臣上戴天恩下顾无状进退惟谷无地自处臣闻高宗命傅说为相戒之曰若作酒醴尔惟麴蘖若作和羹尔惟盐梅夫酿酒者多麴则太苦多蘖则太甘调羹者多盐则太咸多梅则太酸和调适宜?为难事故以谕良相酌寛猛之政处大小之事必平和允惬曲尽其宜然後为善臣才性长短敢不自知赋分於天朴钝戆直至於守事君之忠怀爱民之志不为欺罔不涉佞邪如此数条臣敢自保然烛理不明见事不敏度量?隘关防浅露若位以元宰委之机务分画措置必有差违至时虽自纳於刑亦无所益臣非敢爱身实恐误国况臣之少壮犹不如人今年齿衰老目视近昏事多健忘目前所为转首不记举措语言动多差失自近病来耳颇重听此皆事实衆所共见非臣以虚辞文饰如此岂可首居相位毗赞万几方今老成硕德已试有效及抱道藏器蘊积未施中外之臣不为无人伏望圣慈博访选以代臣必能称职所有告身臣未敢祇受缘臣即日步趋拜起皆所未能朝覲之期无由预定告身留臣本家於理非是伏乞依臣前奏早赐宣取且留在合门候臣所患痊平堪步趋拜起入覲天顔面陈至诚至时若不允許祇受未晚取进止

乞黄庭坚同校资治通监劄子【元佑元年上】

臣先奉勅编修资治通监共成二百余卷於去年九月内奉圣旨令秘书省正字范祖禹及臣男康用副本重行校定闻奏近又奉圣旨令据已校到定本逐旋送国子监镂板窃缘上件文字卷秩稍多其范祖禹近差充修神宗皇帝实録检讨官在彼自有职事虑恐日近校定不办有妨镂板臣窃见秘书省校书郎黄庭坚好学有文即日在本省别无职事欲望圣慈特差令与范祖禹及臣男康同校定上件资治通监所贵早得了当取进止

卷五十二

钦定四库全书

传家集卷五十二 宋 司马光 撰章奏三十五

乞令校定资治通监所写稽古録劄子【元佑元年上】

臣闻史者今之所以知古後之所以知先是故人主不可以不观史善者可以为法不善者可以为戒自生民以来帝王之盛者无如尧舜书称其德皆曰稽古然则治天下者安可以不师古哉伏见皇帝陛下初开经筵先讲论语读祖宗宝训论语记孔子之言行宝训述祖宗之圣谋诚为从学之要然国家未有天下以前帝王之事臣愚以为亦不可不知也顾以年祀悠远载籍浩博非一日二日所能徧阅而周知所宜提其纲目撮其精英然後可以见治乱存亡之大略也臣先於英宗皇帝时尝采猎经史上自周威烈王二十三年下尽周世宗显德六年略举每年大事编次为图年为一行六十行为一重五重为一卷凡一千三百六十二年共成五卷谓之历年图上之以省烦文便观览臣又於神宗皇帝时受诏修国朝百官公卿表臣依司马迁法自建隆元年至治平四年各记大事於上方书成上之有诏附於国史臣今更讨论经史上自伏羲下至周威烈王二十二年略序大要以补二书之阙合为二十卷名曰稽古録欲缮写奏御而私家少得笔吏恐日近不能了毕窃见先有圣旨令秘书省正字范祖禹等就本省校定臣所编修资治通监见有笔吏及纸札等物伏望圣慈特降指挥许臣并上件稽古録送祖禹等令就本局缮写校对讫先次上进候将来读祖宗宝训了日若别未有书可读欲乞且取臣此书进读仍令侍读官随文解释则前王轨辙皆可槩见庶几足以资稽古之万一辅圣性之聪明取进止

论賑济劄子【元佑元年上】

臣窃惟乡村人户播殖百谷种艺桑麻乃天下衣食之原比於余民尤宜存恤凡人情恋土各愿安居苟非无以自存岂愿流移他境国家若於未流移之前早行賑济使粮食相接不至失业则比屋安堵官中所费少而民间实受赐若於既流移之後方散米煮粥以有限之储蓄待无穷之流民徒更聚而饿死官中所费多而民实无所济伏覩近降朝旨令户部指挥府界诸路提点刑狱司体量州县人户如委是阙食据见在义仓及常平米谷速行賑济仍丁宁指挥州县多方存恤无致流移失所此诚得安民之要道然所以能使民不流移者全在本县令佐得人欲乞更令提点刑狱司指挥逐县令佐专切体量乡村人户有阙食者一面申知上司及本州更不候回报即将本县义仓及常平仓米谷直行賑贷仍据乡村五等人户逐户计口出给历头大人日给二升小儿日给一升令各从民便或五日或十日或半月一次齎历头诣县请领县司亦置簿照会若本县米谷数少则先从下户出给历头有余则并及上户其不愿请领者亦听候将来夏秋成熟粮食相接日即据簿历上所贷过粮令随税送纳一斗只纳一斗

更无利息其令佐若别有良法简易便民胜於此法者亦听从便要在民不乏食不至流移而已仍令提点刑狱司常切体量逐县令佐有能用心存恤阙食人户虽系灾伤并不流移者保明闻奏优与酬獎其全不用心赈贷致户口多流移者取勘闻奏乞行停替庶使官吏有所劝沮百姓实沾圣泽取进止

乞抚纳西人劄子【元佑元年三月上】

臣先於二月中曾上言乞因新天子继统下诏悉赦西人之罪与之更始虽未还其侵疆且岁给赐待之如故此道大体正万全无失既而执政所见各有异同沮难迁延遂屏弃不行臣窃闻今来西人已有关报定使副诣阙贺登宝位国家若於此际又不下诏开而纳之万一西人蓄怨积愤肆其悖心或有一骑犯边或於表牒中有一语不逊当是之时虽欲招纳乃是畏其陆梁伤威毁重何耻如之臣之前策亦不可行矣伏望陛下令三省枢密院将臣三月三日十二日十六日并今来所上文字一处进呈臣愚欲为国家消患於未萌诚惜此机会夙夜遑遑废寝忘食陛下若俟询谋佥同然後施行则执政人人各有所见臣言必又屏弃凡边境安则中国安此乃国家安危之机伏望陛下察臣所言甚易行而无後害可使华夷两安为利甚大断自圣旨勿复有疑取进止

抚纳西人诏意【元佑元年三月上】

朕闻王者奄有四极至仁无私靡间华夷视之如一夏国主秉常世守西土藩卫中邦自其祖彝兴以来沐浴皇化职贡时至率多忠勤仁宗皇帝加之宠名昨以大国锡予之数岁则有常轍因边臣奏陈云彼君臣失职及移文诘问曾无报应神宗皇帝乃出师命将拯彼阽危在於夏国主秉常实有大造而所部之人遽敢自絶侵軼我边鄙?刘我吏民正旦同天皆不入贺国家包以大度置而不问但絶岁赐以俟悛心不幸先帝违弃万国朕嗣守令绪祇承前志夙夜寅畏迨今朞年宣广恩泽无幽不振而夏国主秉常屡遣使者造于阙庭吊祭讞告寢修常職朕惟江海之大来则受之岂复追念往昔校计细故宜舍其前日之不恭取其今兹之效顺旷然瀚涤与之更始自今申敕将吏严戢兵民毋得辄规小利扰彼疆场凡岁时颁賚命有司率由旧章必使桴鼓不鸣烽燧无警彼此之民早眠晏起同底太寧不亦休哉可布告中外咸使闻知

辞接续支俸劄子【元佑元年三月上】

臣以假满百日自四月以後不敢勘请俸给闻近有圣旨特再给臣寬假将治其俸给等接续支給臣自正月二十一日以病在朝假久而不愈亦曾陈乞宫观以养衰残圣恩不许更除左仆射臣惶恐失图不敢复言自尔日望痊平入覲丹宸面陈至诚庶得极竭疲弩且供旧职以补报万分而臟腑虽宁疮疡未愈肌体羸瘠足力全无步履甚难拜起不得以此无由朝参计在假不管本职公事已及一百一十余日入覲之期未能自定窃以百日停俸着在旧章况臣当表率百僚岂敢废格不行臣闻孔子曰先事後得诗云不素餐兮今虽圣泽优厚曲加矜恤而使臣违先事之义重素餐之罪四海指目何以自安伏望圣慈许臣依条百日外住支请受

候参假日依旧庶使臣得安心养疾保全微躯取进止

乞罢将官劄子【元佑元年三月上】

臣於去年四月二十七日曾上言州县者百姓之根本长吏者州县之根本根本危则枝叶何以得安故自古以来置州郡必严其武备设长吏必盛其侍卫所以安百姓卫朝廷也秦?六国以为兵不复用虽置郡守而以御史监之墮名城销锋镝故陈胜吴广起而郡县不能制国随以亡晋武帝平吴悉罢州郡兵陶璜山涛皆言州郡武备不可废及永宁以後盗贼羣起州郡无备天下遂大乱国朝置总管钤辖都监监押为将帅之官凡州县兵马其长吏未尝不同管辖盖知州则一州之将知县则一县之将也熙宁中谋臣建议分天下禁军每数千为一将别置将官以领之训练差使抽那一出其手其逐州总管以下及知州知县皆不得关预量留羸弱下军及剩员以充本州白直及诸般差使而已凡设官分职当上下相维如身之使臂臂之使指纪纲乃立今为州县长及总管等官而於所部士卒有不相统摄殆如路人者至於仓库守宿街市巡邏亦皆乏人虽於条有许差将下兵士者而州县不得直差须牒将官将官往往占护不肯差拨万一有非常之变州县长吏何以号令其衆制御奸宄哉臣目覩前宰相西京留守韩绹谒嵩山起建道场其将下禁军充白直者於条不得出城经宿所敢留者剩员七八人而已况僻小州县其守御之备侍卫之衆可知矣臣当时乞悉罢将官其逐州县禁军并委长吏与总管等官同共提举教阅及诸处差使其州县长吏所给白直皆如嘉佑编勅以前之数臣自上此文字後来不闻朝廷有所施行窃见近岁诸处多阙雨泽盗贼颇多州县全无武备长吏侍卫单寡禁军尽属将官将官多与长吏争衡长吏势力远出其下万一有如李顺王伦攻城?邑之寇或如王均王则窃发肘腋之变岂不为朝廷旰食之忧邪王者制治於未乱保邦於未危岂可自恃太平之久谓必无此等事邪又自祖宗以来诸军少曾在营常分番往缘边及诸路屯驻驻泊盖欲使之均劳逸知艰难识战鬪习山川自置将官以来苟非有所征讨全将起发与将官偕行外其余常在本营不复分番屯驻驻泊饱食安坐养成骄惰之性岁月滋久恐不可复用又每将下各有部队将准备差遣指使之类一二十人而诸州总管钤辖都监监押员数亦如旧设官重复虚费廩禄凡将官之设有害无利天下晓军政者莫不知之臣愚伏望朝廷如臣前奏尽罢诸路将官其禁军各委本州县长吏与总管钤辖都监监押等管辖一如未置将官已前之法其诸州军兵马全少不足守御之处量与立额招添其守御有备而寇贼之发不能式遏或弃城逃避或率吏民迎贼或斂民财赂贼虽责之以死彼亦甘心今平居驕从且不能备一旦寇至责以死节不亦难哉取进止

传家集卷五十二

卷五十三

钦定四库全书

传家集卷五十三 宋 司马光 撰章奏三十六

举张舜民等充馆阁劄子【元佑元年上】

臣今月二十四日准尚书省劄子准二十二日诏书节文执政大臣宜各举文学政事行谊之臣可以充馆阁之选者三人臣窃见奉议郎张舜民材气秀异读书能文刚直敢言竭忠忧国通直郎孙準学问优博文辞宏赡行义无缺久淹下僚河南府左军巡判官刘安世才而自晦愿而有立力学修已恬於进取其人并堪充馆阁之选如後不如所举臣甘当同罪取进止

五月三日尚书省劄子光所患已安惟足疮有妨拜跪不候参假时放谢仍权免赴前後殿起居许乘轿子三日至都堂聚议或门下省治事

辞三日至都堂劄子【元佑元年上】

臣伏覩中书省録黄今月二日奉圣旨以臣所患已安惟足疮有妨拜跪不候参假特放正谢仍权免赴前後殿起居许乘轿子三日至都堂聚议或门下尚书省治事者臣闻命震恐无地自处窃念臣臆弱虽安饮食如故但两足无力疮口未合步履艰难拜起不得以此未果朝参至於数日至政事堂乃唐世以来宿德元老高年有疾朝廷尊礼特降此命岂伊微臣所敢伦拟况臣自正月二十一日请朝假至今百三十余日岂有未见君父辄赴省供职况臣於病中除左仆射虽累具劄子辞免未蒙开允仍蒙就家赐以告身亦未敢祇受方俟入覲天顔面陈至恳岂可遽治尚书省事伏望圣慈俟臣步履有力拜起得成参假了日与诸执政一例供职贵於微躯差得自安所有今月二日指挥乞赐寝罢取进止

内降付中书省许肩輿至内东门扶掖入对小殿

辞入对小殿劄子【元佑元年上】

臣今月二日闻有圣旨令臣不候参假特放正谢仍权免赴前後殿起居许乘轿子三日至都堂聚议或门下尚书省治事臣以恩礼太优不敢辄当寻具劄子辞免今月四日又覩中书省録黄奉圣旨依前降指挥不许辞免仍令合门告示许肩輿至内东门外令男扶掖至小殿引对特免起居令引见前一日闻奏如此则礼数愈重尤不敢当臣窃惟富弼三世辅臣德高望重神宗皇帝想见其人故特制此礼乃自古所无顾臣何人敢与为比况亲屈乘輿特御小殿以臣勤君其罪至大纵陛下优借而天威咫尺恐陨越随之似此异数臣决不敢受只候垂

帘日於延和殿引见并乞上殿然事有不得已者虽知僭越不得不承顺圣恩臣即目上下马未得及足上有疮深恶马汗欲乞如今圣旨许权乘轿子出入及入内至常时下马处下轿子又臣两足无力若无人扶掖委实全拜起不得欲乞今来入见及将来每遇入对并权许令臣男康入殿遇拜时扶掖候痊安日皆复旧规如此则曲成之仁已踰於天地非臣陨身丧元所能报塞所有其余恩礼并乞寝罢取进止三省同奉圣旨令乘轿子至崇政殿门外於延和殿垂帘日引对余并依前降指挥

辞男康章服劄子【元佑元年上】

臣久在病假今月十二日於延和殿入见并辞免新命以两足无力拜起不得圣恩特许令臣男康入殿扶掖臣既不得请臣男复赐章服父子忝窃诚不自安所有臣男恩命乞赐寝罢取进止

乞与诸位往来商量公事劄子【元佑元年上】

臣近奉圣旨许臣乘轿子三日一次至都堂聚议伏缘三省枢密院各有职事难以臣故必令三日一聚议检会去岁曾有指挥遇假日有公事许於东西府聚议其东西府近北旧有便门臣欲乞於近南更开一便门臣今缘足疾未愈乞遇假日或日晚执政出省後有司合商量公事许乘小竹轿子往诸位商量其执政有欲商量公事者亦许来臣本位更不一一奏闻所贵论议详尽事无留滞取进止

乞进呈文字劄子【元佑元年上】

臣先奉圣旨权免赴前後殿起居许乘轿子三日一至都堂聚议又许肩輿至内东门外令男康扶掖至小殿引对臣以恩礼大重不敢辄当只乞於延和殿引见以两足无力若无人扶掖委实全拜起不得乞今来入见及将来每遇入对并许令臣男康入殿遇拜时扶掖奉圣旨令乘轿子至崇政殿门外於延和殿垂帘日引对余并依前降指挥臣今月十八日合至都堂遇其日垂帘臣欲随执政赴延和殿常起居及上殿进呈文字窃虑阁门以前来圣旨有免赴起居字及只云三日一至都堂後來圣旨无将来每遇入对并许令臣男康入殿遇拜时扶掖字不听臣及男康入殿伏望圣慈传宣阁门十八日许臣随执政赴延和殿常起居及上殿进呈文字令臣男康入殿遇拜时扶掖仍自今後每遇入对并乞准此取进止

中使徐湜封还传宣

圣旨且令入都堂尚书省门下省治事所有入殿起居且颐养筋力直候秋凉引对所有元上劄子今却令封还并赐食二合

乞进呈文字第二劄子【元佑元年上】

臣今月十六日曾具劄子奏乞於十八日随执政赴延和殿常起居及上殿进呈文字寻蒙圣恩差入内东头供奉官徐湜封还仍传宣且令入门下尚书省治事所有入殿起居且颐养筋力直候秋凉引对此乃圣恩怜臣疲羸恐不堪劳苦欲且就安逸虽父母之爱其子恐不能如此之备臣陨身丧元无以为报然臣既参假治事若不以时入对面对面尽愚忠少裨万一则与未参假时无异所以区区陈请不能自已臣今欲再乞於二十六日随执政赴延和殿常起居及上殿进呈文字臣至时自度若筋力委实不能支梧即乞如今来圣旨且只入门下尚书省治事候筋力稍完再有陈请若且可以支梧即乞每遇垂帘日许随执政赴延和殿常起居及进呈文字仍乞传宣阁门自今後每遇臣入对许令臣男康入殿遇拜时扶掖取进止

乞进呈文字第三劄子

臣自前月十二日参假以来两曾具劄子奏乞随执政官於延和殿进呈文字皆蒙圣恩遣中使封回令候秋凉陛下矜爱微臣诚至深至厚然陛下不知臣不肖使待罪宰相宰相之职在辅佐天子谟明万几朝夕在前启沃献替臣自閏二月二日降麻除左仆射属在病假至今未尝得一日与诸执政至帘前参陪国论虽许投进文字然中心委细无由一一面陈陛下徒闵其衰病欲使便安於一身不若使之竭尽愚忠庶几有补於天下臣为私计岂不愿宴安在家若顾公义岂得内无愧惧窃恐上则失陛下所以擢用臣之意下则失微臣忘身徇国之心况已先奉圣旨权免前後殿起居朝会之劳什减七八臣自体当近日以来病势亦似更减步履比曩时稍轻但两足少力若无人扶掖则全拜不得今不免冒犯无厌之罪伏望圣慈特降指挥令臣每遇殿上问圣体及谢恩等合拜之时特令免拜若在殿下常起居许令臣男康扶掖仍乞传宣阁门每遇臣入朝许令臣男康随入殿门如此则於臣羸病之躯优假已极於公家之务亦无所废臣今欲乞如臣前奏於今月八日随执政赴延和殿常起居及上殿进呈文字取进止【此劄子若降付三省再候进呈则八日以前皆值假故不坐八日入朝不及如允臣所奏乞直批降指挥依奏】

乞进呈文字第四劄子

臣近曾三次具劄子奏乞与诸执政赴延和殿进呈文字皆蒙圣慈遣中使封还云候秋凉虽天恩矜悯隆厚无穷然臣既待罪宰相岂可不於帘前参陪国论况今已立秋兼臣自体当得筋力差胜於前可以支梧只是无人扶掖全拜起不得欲乞如臣前奏候垂帘日许令与诸执政赴延和殿常起居同进呈文字并乞特降指挥自今後每遇臣入对许令臣男康随入殿门取进止【圣意若不欲批指挥即乞降赴三省】

乞赴延和殿起居劄子【寻封回】

臣昨乞自今後遇延和殿垂帘日赴起居奏事蒙圣恩依所乞为足疮所有起居等宜特与权免拜及令男康扶掖入殿者臣若得男康扶掖实可以拜起臣既久不面天颜岂有全不拜之理欲乞每遇延和殿垂帘日与吕公着同班常起居取进止

乞官刘恕一子劄子【元佑元年上】

臣伏覩秘书少监刘攽等奏故秘书丞刘恕同编修资治通监功力最多比及书成编修属官皆蒙甄録惟恕身亡其家独未沾恩门户单露子孙并无人食禄乞依黄监梅尧臣例官其一子臣往岁初受勅编修资治通监首先奏举恕同修恕博闻强记尤精史学举世少及臣修上件书其讨论编次多出於恕至於十国五代之际羣雄竞逐九土分裂传记讹谬简编缺落岁月交互事迹差舛非恕精博他人莫能整治所以攽等衆共推先以为功力最多不幸早夭不见书成未死之前未尝一日舍书不修今书成奏御臣等皆蒙天恩褒赏甚厚独恕一人不得沾预降为编户良可矜悯欲乞如攽等所奏用黄监梅尧臣例除一子官使其平生苦心竭力不为虚设取进止

乞不拒絕西人请地劄子【元佑元年上】

臣近具劄子奏乞於今月八日随执政延和殿进呈文字复蒙圣慈遣中使封还令依前降指挥臣不敢再三固违圣旨然臣区区之心所以欲於八日入对者窃见夏国宥州有牒称已差人诣阙计会所侵疆土城寨窃虑其日进呈上件文字此乃边鄙安危之机生民休戚之本不可不察臣自今年二月初以来累曾上言乞因新天子即位西人恭顺之际早下诏书赦其罪戾待遇如故如此则控纵在我天子之体正休兵息民夷夏之心安不幸虜人有一语不逊一骑犯边则此诏不可复下无何臣在病假不得面论人心不同为衆所夺日复一日迁延至今虜先遣使来直求侵地指陈兵端辞意寢慢前所议诏书已不可下矣既失此机会即日使至应答亦难若悉从其所请则彼益骄而无厌若悉拒而不从则边患由此而起今就二者之中宁为百姓屈已少从所请以纾边患不可激令愤怒致兴兵犯塞以困生民所以然者灵夏之役本由我起新开数寨皆是彼田今既许其内附岂可犹靳所侵地而不与彼必曰我自天子新即位卑辞厚礼以事中国庶几归我侵疆今犹不许则是恭顺无益不若以武力取之彼小则上书悖慢大则攻新城当是之时不得已而与之其为国家之耻无乃甚於今日乎以小喻大譬如甲夺乙田未请而与之胜於请而後与若更请而不与则彼必兴鬪讼矣此是非利害明如白黑臣窃虑进呈之际羣臣犹有见小忘大守近遗远惜此不毛无用之地结成覆军杀将之祸兵连不解为国家忧伏望陛下决自圣志勿听浮言为兆民计文彦博辅佐四朝熟知虜情此可谓军国重事愿陛下下询彦博以决之取进止

卷五十四

钦定四库全书

传家集卷五十四 宋 司马光 撰章奏三十七

乞以十科举士劄子【元佑元年上寻依此行】

臣窃惟为政之要莫如得人百官称职则万务咸治然人之才性各有所能或优於德而嗇於才或长於此而短於彼虽臯夔稷契止能各守一官况於中人安可求备是故孔门以四科论士汉室以数路得人若指瑕掩善则朝无可用人苟随器授任则世无可弃之士臣误蒙甄擢备位宰相慎选百官乃其职业而智识浅短见闻褊狭知人之难圣贤所重寰宇至广俊彦如林或以恬退滞淹或以孤寒遗逸被褐怀玉岂能周知若专引知识则嫌於狭私难服衆心若止循资序则官非其人何以致治莫若使在位達官人举所知然後克協至公野无遗贤矣臣不胜狂愚欲乞朝廷设十科举士一曰行义纯固可为师表科【有官无官人皆可举】二曰节操方正可备献纳科【举有官人】三曰智勇过人可备将帅科【举文武有官人此科亦许钤辖以上武臣举】四曰公正聪明可备监司科【举知州以上资序】五曰经术精通可备讲读科【有官无人人皆可举】六曰学问该博可备顾问科【有官无官人皆可举】七曰文章典丽可备着述科【有官无官人皆可举】八曰善听狱讼尽公得实科【举有官人】九曰善治财赋公私俱便科【举有官人】十曰练习法令能断请谳科【举有官人】应职事官自尚书至给舍谏议寄禄官自开府仪同三司至太中大夫职自观文殿大学士至待制每岁须得於十科中举三人【非谓每科各举三人谓各随所知某人堪充某科共计三人】其状云臣窃见某人有何行能【并须指陈事实不得徒饰虚辞位在上者得举在下之人位在下者不得举在上之人】臣今保举堪充某科如蒙朝廷擢用後不如所举【谓若举行义纯固而违犯名教节操方正而佞邪险躁智勇过人而愚懦致败公正聪明而私曲昏闇经术精通而不能讲读学问该博而空疎墙面文章典丽而鄙拙纒繆善听狱讼而冤滞失实善治财赋而病民耗国练习法令而屡致出入】及犯正入已赃臣甘伏朝典不辞候奏状到日付中书省择勤谨吏人二人专切收掌仍十科各置簿画时抄録年月日某官姓名举某官姓名别置合举官臣僚簿岁终不举及人数不足按劾施行或遇在京及外方有事须合差官体量相度点检磨勘剗刷催促推勘定夺则委执政亲检逐簿各随所举之科选差令试管勾上件事务若能办集即别置簿记其劳绩遇本科职任有阙【谓若经筵或学官有阙即用行义纯固经术精通学问该博等科人台谏有阙即用节操方正科人之类】则委执政亲检逐簿选名实相称或举主多有劳绩之人补充仍於本人除官勅告前尽开坐举主姓名於後或不如所举其举主从贡举非其人律科罪犯正入已赃举主减三等科罪若因受贿徇私而举之罪名重者自从重法期在必行不可寬宥虽见为执政官朝廷所不可輟者亦须降官示罚即朝廷临时因事特诏举官【谓若举知河渠马牧等处之类】不在十科之内者有不如所举亦同此法所贵人人重慎所举官皆得人取进止

起请科场劄子【元佑元年上】

臣伏觀朝廷改科场制度第一场试本经义第二场试诗赋第三场试论第四场试策试新科明法除断案外试论语孝经义奉圣旨令礼部与两省学士待制御史台国子监司案集议闻奏臣窃有所见不敢不以闻凡取士之道当以德行为先文学为後就文学之中又当以经术为先辞采为後是故周礼大司徒以六德六行宾兴万民汉以贤良方正孝廉质朴敦厚取士中兴以後取士尤为精慎至於公府掾属州从事郡国计吏丞史县功曹乡嗇夫皆择贤者为之苟非其人则为世所讥贬是以人人思自砥砺教化兴行风俗纯厚乃至後世陵夷虽政刑紊於上而节义立於下有以奸回巧伪致富贵者不为清议所容此乃德化之本原王者所先务不可忽也熹平中诏引诸生能文赋者待制鸿都门下蔡邕力争以为辞赋小才无益於治不如经术自魏晋以降始贵文章而贱经术以词人为英俊以儒生为鄙朴下至隋唐虽设明经进士两科进士日隆而明经日替矣所以然者有司以帖经墨义试明经专取记诵不询义理其弊至於离经析注务隐争难多方以误之是致举人自幼至老以夜继昼腐唇烂舌虚费勤劳以求应格诘之以圣人之道曹若面墙或不知句读或音字乖讹乃有司之失非举人之罪也至於以赋诗论策进士及其末流专用律赋格诗取舍过落擿其落韵失平侧偏枯不对蜂腰鹤膝以进退天下士不问其贤不肖虽顽如跼蹐苟程试合格不废高第行如渊骞程试不合格不免黜落老死衡茅是致举人专尚辞华不根道德涉猎钞节怀挟剽剽以取科名诘之以圣人之道未必皆知其中或游处放荡容止轻儇言行丑恶靡所不至者不能无之其为弊亦极矣神宗皇帝深鉴其失於是悉罢赋诗及经学诸科专以经义论策试进士此乃革历代之积弊复先王之令典百世不易之法也但王安石不当以一家私学欲盖掩先儒令天下学官讲解及科场程试同己者取异己者黜使圣人坦明之言转而?於奇僻先王中正之道流而入於异端若已论果是先儒果非何患学者不弃彼而从此何必以利害诱胁如此其急也又黜春秋而进孟子废六艺而尊百家加之但考校文学不勉励德行此其失也凡谋度国事当守公论不可希时又不可徇俗宜校是非之小大利害之多少使质诸圣人而不谬酌於人情而皆通稽於上古而克合施之当世而可行然後为善也今国家大议科场之法欲尽美以臣所见莫若依先朝成法合明经进士为一科立周易尚书诗周礼仪礼礼记春秋孝经论语为九经令天下学官依注疏讲说学士博观诸家自择短长各从所好春秋止用左氏传其公羊穀梁陆淳等说并为诸家孟子止为诸子更不试大义应举者听自占习三经以上多少随意皆须习孝经论语於家状前开坐习某经某经又每岁委升朝文官保举一人不拘见在任不在任是本部非本部各举所知若系亲戚亦於举状内声说其举状称臣窃见某州某县人某甲有何行能臣今保举堪应经明行修科於後不如所举臣甘当连坐不辞候奏状到朝廷下礼部贡院置簿各分逐路抄録本人姓名注举主官位姓名於其下仍下本州出给公据付本人收执及令本州亦如贡院置簿抄録准备开科场日考验公据其举状既上之後若所举之人犯赃私罪至徒已上情理重及违犯名教候断讞仍收坐举主奏乞朝廷取勘施行其人未及第者减五等已及第者减叁等坐之一如举选人充京官法臣窃料此法初行其奔竞属请固不能免若朝廷必坐举主母有所赦行三五人後自皆慎择其人不致妄举如此则士之居乡居家独处閤室立身行已不敢不慎惟惧玷缺有闻於外矣所谓不言之教不肃而成不待学日训月察立赏告讐而士行自美矣每遇开科场其有举主者自称应经明行修举仍於所投家状前开坐举主者位姓名有司检会簿上合同方许收接其无举主者只称应乡贡进

士举如常法每举人三人以上自相结为一保止保委是正身及是本贯不曾犯真刑无隐忧
匿服此外皆不保其本州及贡院考试并依旧法差封弥誊录监门巡铺官程试之日严加检
察如旧试经学诸科法各令求已毋得移坐位相从托商量相聚传义传本怀挟代笔违者扶
出第一场先试孝经论语大义五道内孝经一道论语四道先须备载正文次述注疏大意次
引诸家异义次以已见评其是非以援据精详理长文优者为通其次为粗援疎略理短文拙
者为否三通以上为合格不合格者先次駁放合格者榜引次场就试如旧试经学诸科法或
合格人数太少则委试官临时短中求长详酌放过次场试尚书次场试周礼次场试仪礼次
场试礼记次场试春秋次场试周易大义各五道令举人各随所习经书就试考校过落如孝
经论语法次场论二道一道於儒家诸子书内出题一道於历代正史内出题次场试策三道
皆问时务考策之日方依解额及奏名人数定去留编排高下以经数多者在上经数均以策
论理长文优在上其经明行修举人并於进士前别作一项出榜解发及奏名至御前试时务
策一道千字以上封弥官於号上题所明经及举主人数候考校详定毕编排之时亦以经数
多者在上经数均以策理长文优者在上文理均以举主多者在上其经明行修举人亦於进
士前别作一项编排先放及第其推恩注官比进士特加优异他时选择清要官馆阁台谏等
并须先取经明行修人其举主姓名常於官告前声说如此则举人皆务尊尚经术穷圣人指
趣不敢不精旁览子史不敢不博又不流放入於异端小说讲求时务亦不敢不知所得之士
既有行义又能明道又能博学又知从政其为国家之用岂不贤於今日之所取乎所有今来
乞复诗赋者皆向日老举人止习诗赋不习经义应举不得故为此说欲以动摇科场制度为
已私便朝廷若不欲弃捐旧人候将来科场进士有特奏名者令试诗赋随其优劣等第推恩
亦无伤也不可以此轻改成法复从弊俗迷惑後生若以为文章之士国家所不可无即乞许
人於试本经合格日投状乞试杂文於试论次场引试或古诗或律诗或歌行或古赋或颂或
铭或赞或四六表启临时委试官出题目试某文定篇数字数共须及五百字以上取辞采高
者为合格候得解及奏名及第日编排姓名高下各在经数同等人之上如此则文章之士亦
不乏矣至於律令勅式皆当官者所须何必置明法一科使为士者豫习之夫礼之所去刑之
所取为士者果能知道义自与法律冥合若其不知但日诵徒流绞斩之书习鍛链文致之事
为士已成刻薄从政岂有循良非所以长育人材敦厚风俗也朝廷若不欲废弃已习之人其
明法曾得解者依旧应举未曾得解者不得更应则收拾无遗矣臣愚所见如此伏乞以臣所
奏及礼部等官所议榜国子监门及编下诸州有州学处榜州学门令举人限一月内投状指
定何法为善仰本州附递以闻候到京齐足更委其他执政看详参酌从长施行取进止

谢免北使朝见日起居状【元佑元年上】

右臣伏覩中书省录黄以今月十一日北使朝见奉圣旨许臣与文彦博免赴起居仍候人使
升殿降阶讫权归幕次将欲赐茶即升殿臣以久患脚膝远行久立实所未堪方欲奏陈伏蒙
圣恩差句当御药院梁某宣谕令臣於人使见辞日更不赴臣无任感天荷圣激切屏营之至
谨录奏谢以闻谨奏

传家集卷五十四

卷五十五

<集部,别集类,北宋建隆至靖康,传家集>

钦定四库全书

传家集卷五十五 宋 司马光 撰章奏三十八

申明役法劄子【元佑元年上】

臣先曾上言乞直降勅命应天下免役钱一切并罢其诸色役人并依熙宁元年以前旧法人数委令佐揭簿定差蒙朝廷一一如臣所请臣窃闻降勅之初百姓莫不喜悦一两月间州县定差已了别无词讼人情安帖无何续有顾募不足方行定差指挥人始疑惑既而屡有更张号令不一又转运使各以已见欲合本路共为一法不令州县各从其宜是致州县惶惑不知所从或已差役人却放或已放顾人却收或依旧用役钱顾人或不用钱招人充役朝夕不定上下纷纭往往与二月六日勅意相违窃缘臣元初起请及朝廷所降勅节文明言委州县官看详依今来指挥若有方碍致施行未得仰具利害擘画申州州申转运司转运司奏闻委执政官再加看详随宜修改别作一路一州一县勅施行务要曲尽其宜岂是当日所言一字不可移易但患转运司州县不肯奏陈臣今欲申明元初起请内声说不明不尽事件谨具画一如後

一臣起请虽云依熙宁元年旧法人数定差若旧法人数有於今日不可行者即是妨碍合申乞改更人数或太多或太少惟本州县知得的确合消数目合酌中立额申乞依数定差朝廷难为遥度

一臣起请虽云若所差人不愿充役任便选顾有行止人自代其顾钱多少私下商量若所顾之人邀勒被差之人广求顾直官司亦当裁定不得过自来官中顾钱之数其州县官员即不得指占所顾之人令被差之人顾覓

一臣起请虽云见管役人候差到役人各放令逐便者若所顾之人自有田产情愿充役者亦自可依旧存留又曹司一役新差之人多不谙熟书算行遣及案下文字未曾交割合留所顾之人给与顾钱令与新差之人同共行遣限半年内交割了毕才放逐便

一臣起请云今日衙前陪备少於晷日不至破家若犹以为户力难任即乞於官户僧道单丁女户有屋业每月掠钱及十五贯庄田中年所收斛斗及百石以上者并等第出助役钱不及此数者与放免臣意以为十口之家岁收百石足供口食月掠房钱十五贯足供日用二者相须此外有余者始令出助役钱非谓止收百石即令助役也若犹嫌太少及所收掠课利难知

实数即乞应系第三等以上令出助役钱第四等已上放免若本州坊场河渡等钱自可支酬衙前重难分数得足则官户等更不消出助役钱一从来诸州招募人投充长名衙前若招募不足方始差到乡户衙前此自是旧法今来别无改更惟是旧日将坊场河渡折酬长名衙前重难令自出卖今来官中出卖坊场河渡收钱依分数折酬长名衙前重难只此与旧法有异若乡户差补已足续有投名者即先从贫下放乡户归农乡户愿投充长名亦听

一臣起请委逐县看详具利害擘画申州本州类聚择其可取者擘画申转运司转运司类聚诸州所申择其可取者擘画奏闻朝廷伏缘知逐处民间利害子细转运司不如州州不如县窃虑逐县逐州有擘画得事理切当而本州及转运司抑遏删去不以上闻致勅下之日依旧妨碍施行未得欲乞更降指挥下州县如有似此擘画切当被在上删去者许逐县直申转运司本州直申奏所贵下情无壅曲尽事宜仍乞降指挥下详定役法所只得以诸路州县申到利害详其可否立为定法其不当职之人为高奇之论不切事情者不得施行亦不可将一路一州一县利害作海行条贯

一详定役法所奏请行下指挥若有妨碍难行之事亦乞如臣起请委逐路州县看详具利害擘画申上随宜修改

右臣所言若有可取乞遍下诸州县除此外并依二月六日所降勅命施行取进止

乞罢保甲招置长名弓手劄子【元佑元年上】

臣窃见府界及三路保甲虽罢团教犹冬教一月於民有损於官无益不若尽罢之便何则比於团教之时民间劳费虽什减六七然犹有三四此所谓於民有损也朝廷每岁遣使按阅所费金帛以百万计而终无所用之此所谓於官无益也臣以为不若尽罢之便自置保甲以来盗贼倍多所以然者乡村无赖子弟乍涉城市闻见纷华自恃身为保丁坐索本家供给饮博游荡习以成性今虽罢团教不肯复归南亩服田力穡逸欲既深资用不足既家藏利兵又身挟武艺由是邀结党友群行攻劫父兄不能禁州县不能制此自然之势也是以数年以来年不甚饥而府界三路盗贼纵横入县镇杀官吏若遇虫蝗水旱大饥之岁将若之何此不可不为之先虑也以臣愚见莫若尽罢府界及诸路保甲据逐县主户数目盗贼多少委提点刑狱相度每若干户置长名弓手一人与免户下租税支移折变及夫役诸般差徭科配一无所预务为优假使人歆慕每十人置节级一员五十人置十将一员百人置员寮一员二百人以上置指挥使副指挥使各一员虽不及二百人亦置指挥使副指挥使名目尽管一县弓手以为赏功资级其节级始初且令本县令佐依上下名次或选有部辖者权管候有长行捉杀到强盗一人即补充正节级替下权管之人自後每捉杀到强盗一人依此迁一级若未有阙且为守阙不得管人候有阙日补正其累功劳迁至正指挥使满三年以上又曾捉杀到强盗三人从来不曾犯赃罪者仰本县官吏结罪保明申州本州官吏结罪保明申奏乞朝廷与於三班借差内安排若遇有强恶贼人朝廷临时别立赏格者不在此限如此则保甲中勇健之士见前有出官之望来应募者必多除第一第二等户物力高强合充重役不得应募外其余但於本县有户籍田产不以等第高下并许投充长名弓手永无解役之期【若第一第二等户情

愿以一丁为弓手余丁充重役者亦听】若一人阙额有二人以上争投者即委令佐拣试武艺高强者充之如此则本县勇健者皆充弓手其余懦弱虽使之为盗亦无能为患若见充长名弓手人有勇力武艺衰退者许令外人指名比较若胜於旧者即令充替如此则不须教阅武艺自然长得精熟仍委本州及提点刑狱常切觉察令佐有取舍不公者取勘依法施行若应募未满足今乡差弓手之数即且令乡差弓手相兼祇应候招到长名弓手一人即替乡差弓手一人归农其乡差弓手愿投长名者亦听若长名弓手及百人以上即令分一半作两番二百人以上每百余人分作一番并年终交替其上番者随县尉逐捕盗贼自节级以上各令管所辖之人若所辖之人有小可过犯许一面区分不得过小杖十下若所辖之人敢陵犯本辖人员者杖一百殴者徒一年虽权管亦同本辖人员若於所辖人处取受财物并依律科罪犯赃罪杖者若系管辖权管即降充长行下名若系正人员即降一资自後每捉杀到强盗两人始当一人罪至徒者不以权正并降充长行下名自後每捉杀到强盗三人始当一人虽许迁资并系额外不得管人不得出官若遇下番则不相管辖亦无阶级其下番者自十将以下各随所居之处与耆长同觉察本管地分内曾为强盗之人及窝藏之家凡为强盗者不肯於本管地分作过须在他处盖恐累及本地分捕盗人无所自容故也其本地分捕盗人往往知之莫肯发举盗既得财分赃则絶迹远遁其贼发地分捕盗人虽欲擒捕莫知其处官中虽立三限科校终无所益由此贼发地分捕盗人每有贼发莫肯申举若变主懦弱则多方抑塞不令声贼变主强梁则共陪所失之财劝和使休是致羣盗无所忌惮日益昌炽又告捕得贼多被贼人讎报焚烧庄舍屠杀老少其赏钱岂宜留滞而往往为州县沮难有司靳惜动有经年请领不得使之解体欲乞今後应贼发地分其捕盗人更不立三限科校捕盗官亦不批罚只以擒贼多少论其功赏若敢抑塞隐蔽从严法施行仍每州各随大小贼盗多少借官钱数千贯专充告捕赏钱每获强盗勘得从来住止窝藏去处候断遣已了委本州长吏当日先以官钱支給告捕之人即移牒出贼州县勾追住止窝藏地分捕盗人科不觉察罪弓手杖一百耆长杖八十壮丁笞四十先籍没贼人及窝藏家财产偿所支赏钱外其不足之数令捕盗人等均摊限壹月催足津般赴给赏州军补填官钱若路远难以津般则各於本州官钱内关牒折兑其强恶贼人朝廷特於常法外多立赏钱者自以省钱充不在捕盗人均摊之限如此贼盗则无所容身必思改过自新若果行此法府界三路既免教阅劳费之患无赖子弟又有所归投得以羁縻诸路正乡村之名复国家旧制勇健之士前有仕进之望争讨贼立功不待教阅而弓手武艺自然不敢衰退不须点差而乡兵自足兼有所用人虽衆多而上下有纲纪不敢相侵暴贼发地分捕盗人不知贼处免虚受刑责出贼地分为累及身不敢蔽匿景迹之人被盗之家无人抑塞有所伸诉贼盗穷窘无所容身稍冀衰息取进止

乞令六曹删减条贯白劄子

勘会近岁法令尤为繁多凡法贵简要令贵必行则官吏易为检详咸知畏避近中书门下後省修成尚书六曹条贯共计三千六百九十四册寺监在外又编修诸司勅式所申修到勅令格式一千余卷册虽有官吏强力勤敏者恐不能遍观而详览况於备记而必行之其间条目苛密抵牾难行者不可胜数昨者条贯初下吏部侍郎左选差注不行者数日不免再有奏陈复依旧法必料诸曹条贯皆有似此拘碍难行者今欲特降指挥下尚书六曹委长贰郎官同共看详本曹新旧条贯内有海行已有及全无义理於事无益防禁太繁难为遵守者尽令删

去惟取纪纲大体切近事情朝夕不可无者方始存留作本司条贯限两月申奏施行

传家集卷五十五

卷五十六

钦定四库全书

传家集卷五十六 宋 司马光 撰章奏三十九

乞先行经明行修科劄子【元佑元年上】

臣先上言乞每岁委陞朝文官保举一人应经明行修科与进士并置程试一如进士惟於及第後推恩优异以劝勉天下举人使敦修士行昨已有朝旨来年科場且依旧法施行窃闻近有圣旨其进士经义并兼用注疏及诸家之说或已见仍罢律义先次施行臣窃详朝廷之意盖为举人经义文体专习王氏新学为日已久来年科場欲兼取旧学故有此指挥令举人豫知而习之臣所乞置经明行修科者欲使举人知向去科場朝廷敦尚行义不专取文学所以美教化厚风俗比於经义文体尤为要切宜使举人豫知欲乞亦降朝旨先次施行况与进士旧法两不相妨取进止

所举孙准有罪自劾劄子【元佑元年上】

臣先准诏书举文学政事行谊之臣可以充馆阁之选者三人臣举通直郎孙準近闻孙准与妻赵氏因争女使与妻兄赵元裕相论诉状内有虚妄事罚铜六斤臣昧於知人所举有罪理当连坐乞赐责降取进止

所举孙準有罪自劾第二劄子

臣先举孙準行义无缺堪充馆阁之选如後不如所举甘当同罪近闻準与妻家争讼罚铜六斤臣奏乞连坐责降伏蒙圣慈批还云孙準为家私小事罚铜安有连罪伏缘臣举状称準行义无缺今準闺门不睦妻妾交争是行义有缺於臣为贡举非其人臣不敢逃刑况臣近奏十科或有不如所举其举主从贡举非其人律科罪虽见为执政朝廷所不可辍者亦须降官示罚臣备位宰相身自立法首先犯之此而不行何以齐衆乞如臣所奏从贡举非其人律施行所贵率厉羣臣审慎所举取进止

後殿常起居乞拜劄子【元佑元年上】

臣窃以人臣见君礼无不拜文彦博年龄位望皆远踰於臣每後殿起居犹须拜伏独臣一人恩旨不拜忝为臣子实不自安欲乞今後遇文彦博入朝与之同班不入朝即别为一班依羣臣例常起居况臣自揣近日筋力微增若得臣男扶掖其常起居四拜殊不为难伏望圣慈听许以存朝廷之礼取进止

辞大礼使劄子【寻改差】

臣先奉勅差充明堂大礼使伏缘臣自去冬以来脚膝无力拜起艰难至今正月下旬全妨拜起遂请朝假至今首尾八个月若无人扶掖委实独自拜起不得每次朝见幸蒙圣恩许男扶掖将来飡明堂在上帝前不可使人扶掖又随皇帝陟降拜伏必恐未能一一如礼欲望圣慈矜悯别赐差官充大礼使取进止

论监司守资格任举主劄子【元佑元年上】

臣窃见御史韩川上言诸路监司不当拘限资格专任举主当令宰相自加选择窃缘常调之人不可不为之立资格以抑躁进塞幸门若果有贤才朝廷自当不次选擢岂拘此制凡年高资深之人虽未必尽贤然累任亲民历事颇多知在下艰难比於元不历亲民便任监司者必小胜矣朝廷执政止八九人若非交旧无以知其行能不惟涉徇私之嫌兼所取至狭岂足以尽天下之贤才若采访毁誉则爱憎毁誉情伪万端与其听游谈之言曷若使之结罪保举故臣奏设十科以举士其中一科公正聪明可备监司诚知请属挟私所不能无但有不如所举者严加谴责无所宽宥则今後自然慎择不敢妄举矣至如楚潜等虽无声名安知其无实用俟其到官无状废职并举主坐之亦未为晚取进止荐王大临劄子【元佑元年八月八日上大临除太学录已卒】

臣窃见郢州处士王大临通经术善讲说安仁乐义誉高乡曲贫不易志老不变节屢尝有诏敦遣固辞不起伏望圣慈召致京师真之学官为士类矜式取进止

乞官陈洙一子劄子【元佑元年上】

臣窃以嘉佑中仁宗皇帝未有继嗣故殿中侍御史陈洙奏乞择宗室之贤者立以为後既发奏状谓家人曰我今日入一文字言社稷大计若得罪大者死小者贬窜汝辈当为之备下奏状者未返洙得疾而卒臣时为谏官亲闻见此事窃怜其亡身殉国继之以死而天下莫之知近见故职方员外郎张术亦以当时乞建储贰子申伯特补太庙斋郎伏望圣慈依张术例除一子官以旌忠义取进止

辞明堂宿卫劄子【元佑元年上】

臣先奉圣旨将来明堂特与免侍祠摄事导驾及称贺陪位肆赦立班止令宿卫在於人臣恩礼优厚无以复加捐生陨命不足酬报然臣日近患左足掌底肿痛全然履地不得跬步不能行未知痊愈之期所有将来明堂宿卫亦恐祇赴不得伏望圣慈特赐矜免乞恩不已慙惧无地取进止

辞提举修实录劄子【元佑元年上】

臣先奉勅差提举修神宗皇帝实录臣自受命以来以衰羸多病罕曾得到局供职日近又患左足肿痛不能履地日甚一日未有痊愈之期所有修神宗皇帝实录伏乞别赐差官提举取进止

进呈上官均奏乞尚书省事类分轻重某事关尚书某事关二丞某事关仆射白劄子【寻得旨依】

今欲应尚书省事旧有条例事不至大者并委六曹长官一面专决应奏上者奏上应行下者行下其有冲改条贯或应临时特取旨及事体大非六曹所能专决者即申都省委仆射左右丞同商量或送中书取旨或直批判指挥所有都省常程文字并只委在右丞一面批判指挥施行事体稍大及有所疑者方与仆射商量同批判所有诸色人辞状只委左右丞一面接收可留即留可退即退若六曹判断不当及住滞不决即别委不干碍官定夺是非及根究住滞因依若显有不当及无故住滞其本曹官吏即行按劾所贵上下相承各有职分行遣简径事务办集

乞趣时收采常平斛斗白劄子【元佑元年上寻得旨依奏】

勘会旧常平仓法以丰岁穀贱伤农故官中比在市添价收采使蓄积之家无由抑塞农夫须令贱糶凶岁穀贵伤民故官中比在市减价出糶使蓄积之家无由邀勒贫民须令贵采物价常平公私两利此乃三代之良法也曩者有因州县阙常平采本钱虽遇丰岁无钱收采又有官吏怠慢厌采糶之烦虽遇丰岁不肯收采又有官吏不能察知在市斛斗实价只信凭行人与蓄积之家通同作弊当收成之初农夫要钱急糶之时故意小估价例令官中收采不得尽入蓄积之家直至过时蓄积之家仓廩盈满方始顿添价例中糶入官是以农夫糶谷止得贱价官中采谷常用贵价厚利皆归蓄积之家又有官吏虽欲趣时收采而县申州州申提点刑狱提点刑狱申司农寺取候指挥比至回报动涉累月已是失时谷价倍贵是致州县常平仓斛斗有经隔多年在市价例终不及元采之价出糶不行堆积腐烂者此乃法因人坏非法之不善也熙宁之初执政以旧常平法为不善更将采本作青苗钱散与人户令出息二分置提举官以督之丰岁则农夫糶谷十不得四五之价凶年则屠牛卖肉伐桑卖薪以输钱於官钱货愈重谷直愈轻朝廷深知其弊故罢提举官令将累年蓄积钱谷财物尽桩作常平仓钱物委提点刑狱交割主管依旧常平仓法施行今岁诸路除有水灾州军外其余丰熟处多今欲特降指挥下诸路提点刑狱司乘有此采本之时委丰熟州县官各体察在市斛斗实价多添钱数广行收采如阙少仓廩之处以常平仓钱添盖仍令少采麦豈多采谷米其南方及川界卑湿之地有斛斗难以久贮者即委提点刑狱相度逐州县合销数目抛降收采才候将来在市物货价比元采价稍增即行出糶不得令积压损坏仍令州县各勒行人将十年以来在市斛斗价例比较立定贵贱酌中价例然後将逐色价分为三等自几钱至几钱为中等价几钱以上为上等价几钱以下为下等价令逐处临时斟酌加减务在合宜既约定三等价仰自今後州县每遇丰岁斛斗价贱至下等之时即比市价相度添钱开塲收采凶年斛斗价贵至上等之时即比市价相度减钱开塲出糶若在市见价只在中等之内即不采糶更不申取本州及上司指挥免有稽滞失时之患仍委提点刑狱常提举觉察若州县斛斗价及下等而不收

糴价及上等而不出糴及收貯不如法变转不以时致有损坏并监官不逐日入場致壅滯糴人户并取勘施行若州县长吏及监官能用心及时糴糴至得替时酌中价钱与斛斗通行比折与初到任时增剩及十分中一分以上许批书上历子候到吏部日与升半年名次及二分以上许指射家便差遣一次所贵官吏各各用心州县皆有储蓄虽遇荐饥民无菜色又得官中所积之钱稍稍散在民间可使物货流通其河北州县有糴便司斛斗见多沿边州县转运司见糴军粮处更不糴常平仓斛斗若今来指挥内有未尽未便事仰委提点刑狱司逐旋擘画申奏施行

乞约束州县不得抑配青苗钱白劄子【元佑元年上】

捡会先朝初散青苗钱本为利民故当时指挥并取人户情愿不得抑配自後因提举官速要见功务求多散讽脇州县废格诏书名为情愿其实抑配或举县勾集或排门抄劄亦有无赖子弟谩昧尊长钱不入家亦有他人冒名诈伪请去莫知为谁及致迫催皆归本户朝廷深知其弊故悉罢提举官不复立额考较天下莫不欣戴昨於四月二十六日有勅命令给常平钱谷限二月或正月只为人户欲借请者及时得用又令半留仓库半出给者只为所给不得辄过此数至於取人户情愿不得抑配一遵先朝本意虑恐州县不晓勅意将谓朝廷复欲多散青苗钱广收利息勾集抑配督责严急一如曩日置提举官时令欲续降指挥下诸路提点刑狱司告示州县并须候人户自执状结保赴县乞请常平钱之时方得勘会依条支給不得依前勾集抄劄强行抑配仍仰提点刑狱司常切觉察如有官吏似此违法骚扰者即时取勘施行若提点刑狱不切觉察委转运司安抚司觉察闻奏

乞罢散青苗钱白劄子【元佑元年上得旨依】

昨於四月二十六日降指挥令於正月二月支散常平仓钱?窃虑州县多不晓朝廷之意将谓却欲广散青苗钱多收利息严行督责一如未罢提举官时勘会青苗钱利民甚少害民极多臣民上言前後非一今欲遍行指挥下诸路提点刑狱司自今後其常平仓钱谷只令州县依旧法趁时糴糴其青苗钱更不支俵所有旧欠二分之息尽皆除放只令提点刑狱契勘逐州县元支本钱随见欠多少分作料次令随税送纳

传家集卷五十六

卷五十七

钦定四库全书

传家集卷五十七 宋 司马光 撰章奏四十

乞合两省为一劄子【元佑元年与三省同上】

臣等闻三王不相袭礼五帝不相沿乐况国家设官分职张立治具上下相维修饰明备何所愧於汉唐何必事事循其陈迹而失当今之宜也谨案西汉以丞相總百官而九卿分治天下之事光武中兴身亲庶务事归台阁尚书始重而西汉公卿稍已失职矣及魏武佐汉初建魏国置秘书令典尚书奏事文帝受禅改秘书为中书有令有监而亦不废尚书然中书亲近而尚书疎外矣东晋以後天子以侍中常在左右多与之议政事不得任中书於是又有门下而中书权始分矣降及南北朝大抵皆循此制唐初始合中书门下之职故有同中书门下三品同中书门下平章事其後又置政事堂盖以中书出诏令门下掌封駁日有争论纷纭不决故使两省先於政事堂议定然後奏闻开元中张说奏改政事堂为中书门下自是相承至于国朝莫之能改非不欲分也理势不可复分也曩日所谓中书者乃中书门下政事堂也唐末诸司使皆内臣领之枢密使参预朝政始与宰相分权矣降及五代改用士人枢密使皆天子腹心之臣曰与议军国大事其权重於宰相太祖受命以宰相专主文事参知政事佐之枢密使专掌武事副使佐之自是以来百有余年官师相承中外安帖百司长官及诸路监司诸州长吏皆得专达或申奏朝廷或止申中书枢密院事大则中书枢密院进呈取旨降勅劄宣命指挥事小则批状直下本司本路本州本人故文书简径事无留滞神宗皇帝以唐自中叶以後官职繁冗名器紊乱欲革而正之诚为至当然但当据今日之事实考前世之讹谬删去重复去其冗长必有此事乃置此官不必一依唐之六典分中书为三省令中书取旨门下覆奏尚书施行凡内降文书及诸处所上奏状申状至门下中书省者大率皆送尚书省尚书省下六曹六曹付诸案勘当检寻文书会问事节近则寺监远则州县一切齐足然後相度事理定夺归着申尚书省尚书省送中书取旨中书既得旨送门下省覆奏画可然後釀录下尚书省尚书省复下六曹方符下诸处以此文字繁冗行遣迂回近者数月远者踰年而未曾结絶或四方急奏待报或吏民辞讼求决皆困於留滞又本置门下省欲以封駁中书省録黄枢密院录白恐有未当若令举职则须日有驳正争论纷纭执政大臣遂成不協故自置门下省以来驳议甚少又门下不得直取旨行下虽有駁议必须却送中书取旨中书或不舍前见复行改易又内批文字及诸处奏请多降付三省同共进呈则门下之官已经商量奏决若复有駁正则为反复近日中书文字有急速者往往更不送门下省然则门下一官殆为虚设徒使吏员倍多文书繁冗无益於事臣等今衆共商量欲乞依旧令中书门下通同职业以都堂为政事堂每有政事差除及台諫官章奏已有圣旨三省同进呈外其余并令中书门下官同商议签书施行事大则进呈取旨降勅劄事小则直批状指挥一如旧日中书门下故事并两省十二房吏人为六房同共点检钞状行遣文书若有溢员除拣选留住外并特与減三年出职不及三

年应出职者与减磨勘年限若政事有差失委给事中封駁差除有不当委中书舍人封还词头又两省谏官皆得论列则号令之出亦不为不审慎矣如此则政事归一吏员不冗文书不繁行遣径直於先帝所建之官并无所变更但於职业微有修改欲令於事务时宜差为简便其委曲条目并候得旨允许续议修立取进止

乞令六曹长官专達劄子【元佑元年上】

臣等闻王者设官分职居上者所總多故治其大要居下者所分少故治其详细此理势之自然纲纪所由立也是以周官小宰以官府之六属举邦治大事则从其长小事则专达凡宰相上则啓沃人主论道经邦中则选用百官赏功罚罪下则阜安百姓兴除利害乃其职也至於簿领之差失期会之稽违狱讼之曲直胥史之选补皆郎吏之任非宰相所宜亲也故人有言察目睫者不能见百步察百步者亦不能见目睫言详於近者必略於远谨於细者必遗於大也今尚书省事无大小皆决於仆射仆射自朝至暮省览文书受接辞状未尝暂息精力疲弊於米盐细故其於经国之大体安民之远猷不暇复精思而熟虑恐非朝廷所以责宰相之事业也窃以六曹长官古之六卿事之小者岂可不令专达臣等商量欲乞今後凡有诏令降付尚书省者仆射左右丞签訖【官告黄牒之类已签訖者更不签】分付六曹誊印符下诸司及诸路诸州施行其臣民所上文字降付尚书省仆射左右丞签訖亦分付六曹本曹尚书侍郎及本厅郎官次第签訖委本厅郎官讨寻公案会问事节相度理道检详条贯下笔判云今欲如何施行次第通呈侍郎尚书若郎官所判已得允当则侍郎签过尚书判准应奏上者直奏上应行下者直行下即未得允当者委侍郎尚书改判事之可否皆决於本曹长官其文字分付本厅郎官之时委本曹长官随事大小凿限若有稽迟即行纠劾即委的有事故结絕未得者申长官展【吏部尚书如旧日判东西审官院左选侍郎如旧日判流内铨右选侍郎如旧日判三班院户部长官如旧日三司使刑部长官如旧日判审刑院旧日本司文字并直奏直下今欲令六曹长官准此】更不由经仆射左右丞即改更条法或奏乞特旨【谓如刑部刑名疑虑或情理可悯或情重法轻特乞停替编配之类】或事体稍大或理有可疑非六曹所能专决者听诣仆射左右丞咨白或具状申都省委仆射左右丞商议或上殿取旨或头签劄子奏闻或入熟状或直批判指挥其诸色人辞状并只令经本曹长官陈过尚书侍郎本厅郎官次第签押判决一如朝廷降下臣民所上文字次第施行若六曹不为收接及久不结絕或判断不当即令经登闻鼓院进状降下尚书省委仆射左右丞判付本省不干碍官员看详定夺若本曹显有不当即行纠劾所贵上下相承各有职分行遣简径事务易集取进止

乞令三省诸司无条方用例白劄子【元佑元年上】

勘会旧例只是前官所行或是或非岂足永为後法近岁三省及百司多用例破条诸色人亦多於条外攀援体例希求恩泽欲令今後凡有正条者并须依条无条方许用例前例若是所当遵行前例若非即宜厘革只委本省六曹本司长官相度理道与夺批判所贵向去渐除弊例

乞令监司州县各举按所部官吏白劄子【元佑元年上】

检会监司知州通判於本部官吏内有罪恶显着而有失觉察者并连累责降虽有旧条然未尝一一行遣又虑一路一州官吏衆多上位觉察不尽又未指定合觉察事件致寛者则一切不问急者则滥及无辜又凡为监司州县长吏当进贤退不肖不可但令觉察有罪不令举荐贤才今欲立举荐四条一曰仁惠【谓安民利物衆所畏爱非疲软不立曲取人情者】二曰公直【谓心无适?事不吐茹非内私外公实佞诈直者】三曰明敏【谓深察情理应机办事非饰诈掠美利口矜功者】四曰廉谨【谓安贫守分动遵法度非诈清钓名偷安避事者】按察四条一曰苛酷【谓用刑繁苛残虐踰法者】二曰狡佞【谓倾险巧诈危人自安者】三曰昏懦【谓不晓物情依阿无守者】四曰贪纵【谓饕餮无厌任情不法者】凡监司州县於所部之内皆得以此八条举按官吏其举荐者於本部官吏之内有仁惠公直明敏廉谨者可举则举无有定数县举之州州置簿记姓名州举之监司监司置簿记姓名监司举之朝廷中书置簿记姓名各随所举行能任使以试之果有实效则渐加旌异其按察者监司专按察知州军通判路分都监以上知州军通判专按察在州官吏及诸知县知县专按察簿尉及县界内官吏若有苛酷狡佞昏懦贪纵者县体量申州州体量申监司监司体量申奏续更体量的确事迹纠发施行若有失察觉别致因事彰露其监司降知州军知州降通判通判各降一资知县降监当其余所部官吏监司知州军通判皆得按察但不坐失觉察之罪即挟情按察不以公者候勘鞫见实自依常法知县惟得具事迹申州不得擅勘命官

乞不帖例贷配劄子【元佑元年十月二十日上】

勘会守法者有司之职揆道者君相之权伏见从来命官犯罪大理寺既依法定断更令刑部检例或追官或勒停或冲替或差替之类朝廷依而行之谓之特旨凡人之罪犯千端而事体万计岂可求其比类能得正同又既谓之特旨当临时断在朝廷若先令刑部帖例朝廷依此施行乃是轻重之权返在有司也欲今後应命官犯罪大理寺既定断委刑部看详内有法重情轻或法轻情重并具状申中书省更不帖例委中书省官相度情理轻重同共商量除依法外自贷命编配至特放临时拟定进呈取旨施行其百姓犯大辟罪诸州奏称刑名疑虑及情理可悯者大理寺依法定断委刑部看详委的有疑虑可悯之状即具状申门下省更不帖例委门下省官相度事理同共商量临时拟定或依法或贷命编配进呈取旨施行

再申明役法劄子【元佑元年上】

检会二月六日勅文止是罢免役钱其诸色役人并依熙宁元年以前旧法委令佐揭簿定差尚虑诸路州县利害各有不同所以下文云委逐县看详若有妨碍施行未得即具利害擘画申州仰本州类聚诸县所申择其可取者具利害擘画申转运司转运司类聚诸州所申择其可取者具利害擘画奏闻其意欲使本州体量诸县所申利害之虚实擘画之是非择其实而是者条例申转运司云某县当如何措置某县当如何措置其余已依旧法定差施行转运司得诸州所申亦如此体量条例申奏盖欲随处差役曲尽其宜非谓使逐路共为一法也今访闻诸路转运司不遵用熙宁元年以前旧法又不取诸州县所擘画各以已意撰成一路役法差官分诣诸州县名为商量其实讽谕令随已意却作州县擘画立法申奏州县稍有违异辄加责怒以此多不依应得逐处利便不合民心又诸路州县见朝廷置详定役法所以为当别

撰役法頒下往往等候下即定差殊不知看詳役法所專候諸路州縣具到利害擘畫即作一路一州勅行下以此觀望迂延久不了絕今欲特降指揮下諸州縣除有旧法妨碍難行之事速具申陳外其餘并依旧法一面定差其看詳役法逐處先申到利害擘畫事件如得允當逐旋奏乞令本處依此施行所貴差役之法日近早見結絕

傳家集卷五十七

卷五十八

钦定四库全书

传家集卷五十八 宋 司马光 撰书啓一

谢检讨啓

仰戴宠灵俯循涯分任非才称忧与愧并窃以帝王垂宪於典坟文武布政於方?参天球赤刀之宝閼石室金匱之严岂繫记述之良抑亦讨论之美自微贯穿前载浹洽旧闻稽古侔倚相之才叙事识子长之体则何以懋明得失考合异同访逸事於名山求绪言於故老使圣哲丕绩蔽天壤而亡穷俊乂隆名炳丹青而不朽原立官之甚重宜择士以恪居岂容冒尘坐致隳旷如光者行能褊浅器质迂踈徒以儒术承家蚤用门资署吏甫任典谒已辱闻诗愚者常专虽慕攻坚之业勤而无获正如毁瓦之为猥玷士科始陪宾幕漆雕之道未信尹何之伤实多旋属家艰零丁苦出比还官次汨没道涂辞锋顿而不修学殖落而亡几分从尘役絶觊荣阶俄承乏於?宗遂参华於天禄庆霄清晏蓬渚邃严缣素物盈率多未见英豪彞集叨与并游顾琐陋之无庸每怔忡而自失所虞扬汰敢冀甄收何期佑弼之司误辱褒称之奏俾登史观赞治信书緝记言记动之殊辨所见所闻之实详明其故紬绎厥文窃惟累洽之辰方咏衆贤之富弗图嘉命遽及竊才靖究所来孰云无自此盖伏遇某官獎延後进汲引下僚采其毫发之长振以齿牙之论使不售之马立享千金之酬无用之材或充万乘之器敢不劬劳从事恪慎处躬冀少答於生成庶无慙於知遇

谢校勘啓

伏以圣哲之道悉载於书书之散讹道亦鬱滯是以国家开图籍之府设校讎之官必求秀?絶特之人使之执事诚以道为重也光天与之分甚显且愚徒以世家相承习尚儒素故自免去襁褓初知语言父兄提携授以经籍是以不执余技而逢衣自名曾未能游圣人之藩篱济六艺之糟粕遽用门?列於王官始就乡举径叨上第常窃自恨道未至而受禄学未优而治民虽媮获於一时终不足为成人也已而天降之祸服衰五年指景数刻几无生望洎免丧为吏从事藩方则牒诉文移所居委塞是以旧学益废剪为荆榛私心怅然每用叹邑不自意得承乏东序息肩簿领乃始修斲钱鏹诛治荒秽庶几勉狗宿昔之志虽失之春芸犹得之秋获足为愈焉敢谓朝之辅臣不察弩朽遽列其名荐之法座上方倚信大臣议无不用遂发中诏引登书府使之款朱阙蹈紫台倏去蓬蒿颡颞霄汉荣耀过分不寒而栗夙夜循念罔知所来此盖伏遇某官内竭忠力以勤王家外隆寛裕以延士类各适其器不遗衆才顾盼所加人增大吕之重议论所与世剧袞章之荣俾兹妄庸滥获甄采敢不益自勤敕无违率履勉服故业期於有成庶几不辱宠灵无负知鉴

又谢庞参政啓

伏以朋友道缺为日久矣陵夷至於近世益以衰薄甚者旦为好言暮而反之况於存没之异贵贱之絶苟能言其姓名识其游处斯可颂矣矧又收抚其孤诱掖成就使之自卯而翼去幽而光天下几何人哉光质性愚陋动无可称学古着文皆不逮衆徒以先人畴昔尝托僚案获友高明道同志合出处如一分义之美近古所希光以童子获执几杖侍见於前执事抚髻诲导俾之就学以至冒窃科级叨尘禄位始终之赐皆有自焉及夫上天降灾祸罚崇大屏伏田里号咷待尽执事赐书吊抚俾能自存又譔着遗烈表之楸柏使其後祀焜耀无穷凡兹大恩固已无量矣而又以光朴懦自守谓其寡过每赐祓饰多踰其实光或闻之流汗被顙常惧不能堪副以累知言暨衰麻外除复从吏役执事以文武才实入赞枢极荐士之奏首列光名事虽报闻勤惻愈甚间二岁进参大政则又复前奏出之展前上方推信大臣议无不用亟命近署试其所能艺术素疎果暴螻鄙方自踧踖以须谴絀不意天恩曲成引内祕府遽使颀颀禁闥依光紫霄校讐羣书参奉游豫岂光空薄所能堪称承命震骇征营失据静自循度罔知所来此非先人之余休被及後昆执事之敦笃不遗故旧糠粃小生何阶自致銜恩念亲涕洟横集夫以执事之忠亮纯明岂其私一不肖之人使污蔑文馆羞士大夫盖将驱一世之人使媮者日醇薄者日敦诚有以赞天子之大化非独苟然而已乃知大君子之举事用志远矣光敢不夙夜刻励寤寐训辞进益所长攻去所短冀不忝前人之教诲羞知己之称论以负明诏之收擢而已过此以往不知所为

上宋侍读书

昔燕王有马千里而天下无敢献马於燕者为其皆不能及廐中之良也赵王有璧径尺而天下无敢贾玉於赵者为其皆不能及栎中之美也彼以物求售者诚然以道求售者则异矣请以周公言之夫周公之德美才智天下固无庶几望其藩篱者然周公沐则捉髮殮则吐哺汲汲焉走迎天下之士惟恐一人伏於蓬荜之下者是以鍾石箎弦之音歌舞其德于今未衰曩者悦以已之才德求诸他人则外踰四海舟车所极终无一人可收采者又安有晔晔光美施於千载邪降及後世贤公卿大夫未有不祖述此道而能具美者也伏惟执事体纯明以立质积学问以广德自结圣主优游禁闥四表仰声而响集羣士希光而附眄睐所被温於春阳咳唾所沾重於珪璧诚荐绅之表的後进之衡监也光才朽行僻学疎文陋羣居士林无与比数而不自屏絀妄以技进於左右是由献马於燕贾玉於赵也执事悦以二国之意遇之则光宜驱呵摈逐不得少留於門下矣以周公之道按之则光必得从七十子之後而俟见焉窃以为古者见於公卿大夫必有贄今其礼亡久矣士非文无用为贄者是敢不自隐其嗤鄙杂录旧所为文凡五卷执之立於屏外以俟进退之命焉

与薛子立秀才书

光顿首前日承不赐弃外辱以所为文示之使得窃观甫尽数篇不觉喟然置之而叹噫士之读书者岂专为禄利而已哉求得位而行其道以利斯民也国家所以求士者岂徒用印绶粟帛富宠其人哉亦欲得其道以利民也故上之所以求下下之所以求上皆非顾其私主於民

而已矣近世为士者颇谬於古往往以读书为资身之货耳彼又恶知所谓利民者邪观足下之文上以荐之於宰辅下以貽之令长求盗之吏未尝不以民为先皆閭里素所疾苦而上不获知者深切着白使其人果举而行之则足下虽未得位而泽固施於民矣且夫身为布衣已能孳孳念民若此况得位邪光窃有以知异日卓然为名臣使所至之方蒙被其福者非足下而谁此真古人之志也朝廷得之亦异於?刻经史润饰文采以自售施之於政而不达者矣光是用矍然喜於今之世而复见古之士且竦首倾耳以俟朝廷之得人而贺之也文编不敢久留谨奉而归之

上庞枢密论贝州事宜书

孔子曰不在其位不谋其政国有大事庙堂之上谋议素熟方略已定而复以踈贱之人狂愚之议干与其间臯之大者也然光闻之受恩而不知报者犬彘也光虽不才独忍为犬彘之行忘盛德而无所裨益哉是以夙夜思之苟有以报万分者虽蹈入大臯不敢爱也窃闻贝州军士恩过而骄厌其久生自求速死虽狂戇妄为势无所至蚤晚之间终就屠?若兵久不决难久不解万一城中之寇未即伏诛而他变旁起不逞之人同恶相济乘衅而动则为朝廷之忧方此始耳此不得不为之过虑也虽国家恩德在民沦於骨髓根深柢固万无所虑然王者举事固当计万全之势然後行之者也不则狂贼自知臯恶无状降首亡由独守穷城势不支久则拥其徒衆盗取库兵收载宝贿猺突而出建旗鸣鼓攻剽城邑以数千之盗散之赵魏之郊东连青徐亦足以齐民之患未可以旬月擒也以光之愚窃谓城中之衆未必皆有怨叛之志其造计首恶者不过数人自余皆迫於凶威不得已而从之者也其望大军之至赦令之降若坠涂炭者之待救纺於树者之求解也朝廷诚以此时发近郡之兵塹环其郭勿攻勿战使不得出而又陰以重赏募人入城焚其积聚坏其所恃使逃无所出守无所资然後命重臣素仁厚为士卒所信爱者奉明诏以临之諭以脇从之人有能捕斩首恶若唱先出降者待以不次之赏其始虽与谋而能幡然悔过从善者亦除其臯待以不死或为恶不变敢拒官军者戮及妻子无有所赦如是不过旬月逆卒之首必函致於阙下矣此乃坐支解狂贼之术也往年保州之役威罚实行今为恶者必诳诱其徒曰汝罪已大出城必诛保州近事足以为戒自非赏至厚信至明则不足以破散其谋宜得先降者厚赏赐之超资越序拜以官爵锦衣骏马狗於城下使足歆慕以焜耀其余彼虽甚愚国家昭昭然设贵爵重赏於前峻刑严诛於後示以大信皦如日月安有不动心者哉书曰除恶务本周颂曰铺时绎思我徂维求定明圣王之诛不在快志多杀要欲布陈条理期於安定而已今诚贯其脇从之辜开以自新之涂纵未即日殄?使其内自相猜肘腋之变纷纷数起支节散落腹心溃败则渠魁之首可指日而烹也然後分别白黑表章善恶取倡为乱者种族诛之余皆勿问亦足以立威而示怀矣讨不失臯赏不失功士卒无伤甲兵不顿财谷不费盗贼不滋窃以为最策之得者也或者必欲以兵力取之贼凭坚城执利兵据仓库比其授首则河朔之力固已困矣况加以不虞之变哉夫炎炎不絕焰焰柰何当事之微治之易耳时至不为祸如发机今狂贼日夜煦妪其党出库物夺民财以?之又恐喝以国家之威刑沮抑其向善之意不乘其衆心危疑未定之际坏败其谋已而日浸久臯浸深朝廷无寬貸之令凶党有惨毒之威朝薰暮蒸衆志已固然後图之则招之不来攻之不克用力百倍而功不可必也故不爱官爵金帛之重赏以坏其党今其时也过是无益矣朝廷之议高深幽密今日处置为攻为战为赦为诛非草茅之所能知也万一议者有欲用兵碎

而不以计破者此乃愚诚区区愿陈所见者也诗云先民有言询于刍蕘夫以周公之才於天下事宜无所不知而日孜孜礼白屋之士求善言询政治者诚欲尽衆人之思虑也执事为天子腹心之臣典枢机之任凡百筹画得失之数必已决於胷中矣而光不识分限复妄有云者诚贪於报恩而忘其愚僭之辜也伏计执事法周公之道亦不厌刍蕘之言以博观焉

回状元第二第三先辈书

伏蒙某官不以光之愚庸散贱亲枉车骑辱临其门前之以啓以将盛意恐悚愧慊於兹未怠窃以取士之详进贤之速视古以来宜无若今者今夫天下之士举於其州用不能而退者十常七八然後升之礼部礼部又如之然後升之天子之庭天子临轩亲覆之又有退者然後解其布衣而禄之如此可不谓之取士之详欤然其以魁杰秀异在殊级者其视朝廷美官若寓物褚中不十年必取之大抵皆至公卿如此可不谓之进贤之速欤取如是详而能独为羣士之先则其才可知已进如是速而能不自隆贵以礼於愚庸散贱之人则其德可知已才与德二者议士之所先也而皆有以过絶於人光是用不敢私贺於左右而贺於朝廷贺於衆庶知其将得贤公卿而有所瞻赖也

答薛虢州谢石月屏书

日前令嗣先辈访逮出手笔并石月屏为贶捧玩不胜愧喜比来数於都下朋从处见此屏观其天质圆莹非刻非绘如秋高气清迴然在望信乎天地之异气山泽之殊宝也素心悦之无从可得岂意一旦不烦恳请坐至握中性本踈野雅叶所欲虽受文锦十纯白璧百双在光之愚未为重赐谨当滕閤箱笈不忘惠好耳气序瘴暑信後伏想休胜俗故忽忽久不遑修谢尤增悚惧先辈注官甚便想加慰喜未期接待倍希珍厚

答谢公仪书

光之得游於书府也为日寡窃尝侧闻先达长者之言曰昔之初有职业於兹者不以位之崇卑名之显晦皆贄啓以造於僚友之门閭焉与见於公卿贵人之礼均若是者非他盖以凡居此官本以礼义相先非以名位相高也兹道之替久矣光不及见焉常拊髀私叹自恨生之後而进之晚不得目前人盛事又伤身之贱而名之晦不能率先士夫以振起之也不意今者某官以英伟之才负天下??之望始以鸿渐之翼翔集兹地独能力探故实勤而行之虽光之愚陋轻微不足齿於僚列者皆亲枉车骑怀啓?謁临其蓬荜一无所遗光始愧中疑终而释然知兹礼之来非光之为而为台阁之美不可使遂委草莽而沈絶不继也伏以某官始者游太学则冠诸生登王庭则先俊选贵名之白若列宿之罗清旻疾风之走四海凡一事一为皆天下之所仰而趋慕而归者也若使出於媮则後来之士无自入於敦出於敦则後来之士无自入於媮况始仕於朝天下方拭目而观之清耳而听之乃独不出於媮而出於敦是则及物之利繇此其始矣光是以为天下士大夫贺而不敢以见礼私自荣也

与范景仁书

诗云先民有言询于刍蕘言人君不以鄙贱废善言也又云心乎爱矣遐不谓矣言人臣不以踈远忘忠爱也又云彼姝者子何以予之言贤者在位下乐告以善道也又云何以恤我我其收之言贤者得忠信之言无不受也光实何人明主以为臣景仁以为友明主方侧身求谏而景仁以言事为官光又可以嘿而已乎光闻古者士传言谏盖以士贱不能自通於君故因贤卿士大夫以传之光羣者不自知其贱且愚辄以宗庙社稷深远之计冒闻朝廷诚知位卑而言高智小而谋大触犯皆死死者人之所必不免也若忠於国家而死死之荣也是以剖肝沥胆手书緘封而进之庶几得达法座之前明主或皆听采自以圣意建万世不拔之基则光退就鼎鑊如蒙黼黻此光之本心也无何自夏及秋囊书三上皆杳然若投沙砾於沧海之中莫有知其所之者夫以即日明主求谏之切诏书烂然颁於天下而光所言又非琐琐不急之务若幸而得关圣听则光所言是邪当采而行之非邪当明治其罪岂有直加弃置曾不诘何此必所言涉千里之远历九阍之深或弃或遗而不得上通也古之人有奏疏而焚藁者盖为言已施行不可掠君之美以为己功也若奏而不通又自焚其藁则与不言何异哉光是用中夜起坐涕泣沾襟窃思当今朝廷谏争之臣忠於国家敢言大事而又周旋日久知光素心事惟景仁而已光之言不因景仁以自通尚谁望哉且景仁以为天子耳目之臣得光之言传於明主天下固莫得而窥也光是敢辄取所上奏藁献於左右伏冀景仁察其所陈果能中於义理合於当今之务则愿因进见之际为明主开陈兹事之大所当汲汲留意不当因循简忽以忘祖宗光美之业及乞取光所上三奏略赐省览知其可取可舍可矜可罪裁定其一而明赐之无使孤远之臣徒怀愤嘿嘿而无所告语也昔樊哙谏汉高祖留止秦宫奉春君请徙都长安始皆未听得留侯言即日从之盖人主素所信重入其言易故也今光官於千里之外为边州下吏景仁朝夕出入紫闥登降丹陛天子之责治乱安危者不在於光皆在景仁光虽言之终不能有益於国家止於是而已矣若夫恳惻复熟以感寤明主成圣世无疆之休则在景仁留意而已如此实天下之幸非独光之幸也

与李子仪书【嘉佑元年】

昨日值客至不克尽谈宿夕思之终未能达子仪高远之虑故辄复布其愚悃以闻左右未审果肯省视否凡足下今所欲为义邪利邪将不胜其忿苟为诋訐以快志邪此三者皆未见其可也足下虽自信其心不为利动然天下之人乌可户晓万一被涉此谤於何湔洗是弃千金之璧而得腐鼠也虽一日十官岂足美哉光辱与足下游久窃观士大夫间才行具美如足下者能有几人所以孳孳深相重惜不欲使有毫末之议加於全德事苟上闻不可复掩朋友虽欲从而辞之亦无及已足下何不试察光心所以区区不避谴怒竭忠相告者亦何所利哉正为贤者惜举措而已

答闻喜马寺丞中庸书

月日光顿首再拜明府寺丞阁下光顷日虽得邂逅奉望顔色然殊未暇陪从容抒悃欵也今者猥蒙记存远赐之书仍以新与邑中贤士大夫治孔子祠命为之记何采听之过而责望之重也且愧且恐若无所容光资性顽蔽辞艺鄙薄平居为朝夕近用之文犹多乖僻取人嗤傲况於语先圣之道载贤令之功镌之金石传之将来是犹执匠人而负之以千钧之重虽欲自

托於显茂之业而贪不朽之荣独不轻先圣而累明府羞邑中之贤士大夫乎此诚非光之所敢任也伏惟寬明当賜开察改求酣鬯於道而富有於文者使为之则宜与大名昭昭千古不穷矣若光类者正可相与诵咏而已

传家集卷五十八

卷五十九

<集部,别集类,北宋建隆至靖康,传家集>

钦定四库全书

传家集卷五十九 宋 司马光 撰书啓二

与东阿张主簿书【嘉佑二年正月二十四日】

正月二十四日光顿首主簿足下光不佞幸蒙丞相辟署来此官虽贱微朝廷亦委之察举境内贤士大夫苟舍置贤者而惟目前营求者之与臯孰大焉是以到官以来窃观诸县贤士大夫无如足下徇公爱民者其所以奉知固不俟足下之求也今乃贬损书海有从风雨而老之叹殊非所望君子患不能不患人不知足下姑勉修所能何患无知已不宣

与范景仁书

九月二十六日同年弟司马光再拜景仁学士足下竊者景仁初为谏官四方之士知与不知闻者皆曰谏官得景仁天下其庶矣况如光者其喜固不在衆人之後然而有所惧者其故何哉请试为景仁道之夫良玉易瑕清水易污凡负天下之望者必任天下之责此理之固然也竊使景仁才术操行无以异於衆人则其来也人不为之喜其去也不为之戚嘿然不言人不以为责今景仁之名皦然暴於天下已如清夜列星之文虽欲厚自谦让藏於衆人乌可得哉此光所以为景仁惧也景仁官虽未甚达然为天子耳目之臣朝夕在天子左右万民之利病已得而言之朝廷之得失已得而言之亦不得谓之不用矣夫士之学行已美而名不彰者朋友之过也既彰矣而时不用者执事之过也既用矣而功业不白於天下者敢问谁之过也行矣景仁勉之自今日以往天下之民万一有失职而吟叹者景仁之责也朝廷之政万一有违理而伤道者景仁之责也非独光浮目而望沈耳而听也天下之人莫不皆然举措小差天下之责四面至矣呜呼可不惧哉自非相爱重之深至乌肯及此也不宣

答范景仁书

月日光再拜景仁足下日者不自知其不肖猥贱敢妄以书干冒左右退自悔恐谓必且得罪见弃絶矣北都递中忽辱示问然後知大君子纳善无厌以畜其德汪汪然若江海之大夫如是天下之士孰不愿挟其忠信以趋左右者哉幸甚景仁书云有朝廷之是非有天下之是非有後世之是非夫何忧何惧善矣景仁之充此言也实天下苍生之福也虽光亦愿景仁如是而已矣必曰议天下之是非若讥乐之是非则非光之所敢知也又云必欲伺大臣之细故发其隐微以市已直实不能也此则不惟景仁耻之光亦耻之不愿景仁为也光所谓良玉易疵

清水易污者谓其全之之难有疵污而人见之易也非谓其易磷缁也春秋责贤者备孔子之意岂不异哉景仁或未之思耳凡论者审知其是守之不移然後能明其道何强辨之有哉必诡随雷同然後景仁悦之邪属部役者之金堤行在朝夕忽忽不能尽所怀

答明太祝【端】书【嘉佑二年六月二十四日】

六月二十四日司马光顿首太祝足下士之服儒衣冠者莫不指圣贤之道以为归然而能至焉者几希非其智力不足为也名利诱之则转而从他不自知耳自古士之求道而不至者凡病此也今足下年甚少才甚美不知光之不肖而辱赐之书乃云非为名也非为利也欲师道德而已呜呼足下之言古大君子之言也审能充之圣贤之道近在耳目之前矣如光者将跂仰颂叹之不及又奚暇道德之知而况以师道自处哉足下之志则诚美矣其所从求之人则非也孟子谓曹交曰夫道若大路然岂难知哉人病不求耳子归而求之有余师荀子曰学者诵数以贯之思索以通之为其人以处之除其害以养之足下傥察二子之言则虽闭门求之道乌有不至者哉光何人也足下推褒之过而督责之重譬之若指江河而使孺子涉焉必不敢从已

答陈秘校【充】书【嘉佑二年九月二十四日上】

九月二十四日司马光再拜复书秘校足下比日前辱赐书推褒责望皆非光所敢当惶恐累日无以自处岂非足下爱之之厚而不觉言之之过也然光未知足下之志所欲学者古之文邪古之道邪若古之文则光平生不能为文不敢强为之对以欺足下若古之道则光与足下并肩以学於圣人光又智短力劣罢倦不进者也乌足问哉虽然足下之意勤不竭尽以告则必不止敢私荐其所闻足下择焉足下书所称引古今传道者自孔子及孟荀扬王韩孙柳张贾才十人耳若语其文则荀扬以上不专为文若语其道则恐韩王以下未得与孔子并称也若论学古之人则又不尽於此十人者也孔子自称述而不作然则孔子之道非取诸已也盖述三皇五帝三王之道也三皇五帝三王亦非取诸已也钩探天地之道以教人也故学者苟志於道则莫若本之於天地考之於先王质之於孔子验之於当今四者皆冥合无间然後勉而进之则其智之所及力之所胜虽或近或远或小或大要为不失其正焉舍是而求之有害无益矣彼数君子者诚大贤也然於道殆不能无駁而不粹者焉足下必欲求道之真则莫若以孔子为的而已夫射者必志於的志於的而不中者有矣未有不志於的而中者也彼数君子者与我皆射者也彼虽近我虽远我不志於的而惟彼所射之从则亦去的愈远矣此光之所闻而是非不能自定者也足下试熟察而审处焉

与夏秘丞【倚】书【字中立】

光再拜光初离并州一驿曾於递中领所赐书以道涂无便可以报谢暨至都下则朝论纷纷以忽里之败为皆因筑堡引惹生事光每见公卿大夫下至等辈辄为开述虏侵汉地事体本末二堡不可不筑之状前日之败盖由边将轻敌无备穿头入其网中本非作堡之过言之切至口几流血而世俗常情成是败非气焰方张不可向迓以光区区譬如鷕鷕渐羽以洒邓林

之火固无益矣闻光言者或逆加排折不容出口或哂然阳应腹非背笑要之所语数十百人
讫无一人信者光遂闭口不敢复言但引咎责躬乞分取诸君之罪而并坐之所上之奏非特
为庞公也亦具述当日与诸君谋议本末其言皆天地所监不敢有分毫欺罔仍言朝廷若不
以修堡为非则庞某夏某等必不受责若以为非则庞某等先已罢修此堡因臣至彼见虏骑
退散方议再修武某夏某等因臣传导其言方得达於庞某修堡之事皆臣所致若治其罪臣
当为首乞伏重诛以正国典章再上不报又巡白二府力陈此诚乞朝廷大则肆之斧钺中则
流窜岭海或圣朝至仁减贷极轻亦望以中立为比除一远郡监当所以然者上以不亏国家
至平之法中以少谢负累知己之系下则他日复见武侯中立及邢贾诸人有所施其面目沥
泻肝胆恳恻备至而二府诸公确然以为台狱元无收竖使朝廷何以施行光退复具奏章草
更欲以死自请则亲友皆言如此是明知朝廷不行而饰伪以采名也光闻其言实无以自明
遂自塞嘿不敢复上再三循念当日与中立於东齐计议之时固以成败自决迨至忽里败绩
之後光又与中立书言朝廷若知败绩不因修堡则吾辈何罪若为因修堡所致则必不以事
尽诿诸君今诸君俱被谴责而光独得无咎是卖诸君以自脱也将不得列於人类其为羞愧
可胜道哉每一念此昼则投筯辍餐夜则击席叹吒终身慊慊不可湔洗若贮瓦石在於胷中
无时可吐所以经年不通一字以问动止者固非懈惰诚由内自慙忤又未知中立察之与否
使光执笔无以置辞前日郎吏乃以手字相示云得之西来军士光然後知中立聪明察光非
卖友者不加罪绝而犹赐存问光始敢布陈其所怀庶几中立参以所闻知其非妄也虽然此
乃畧道梗槩其不可以书传者须在他日面谈方尽翫缕也

与夏秘丞【倚】别纸

诏狱所竖中立事尝亦剽闻立寨斫木则有之辰巳之差则告者过也但谓所申郭武出巡为
虚及状内无武侯入城一节事耳然以光观之皆中立忠於朝廷信於上司笃於僚友之事而
治狱者集以为过当如之何此盖措意不在中立故也书云又有余忧此则虑之过者光去夏
自麟还并悉述所闻衆人之议不出五策以白庞公其最下听其侵耕置而勿问【凡浅识偷
安者其言皆如是也】次则力战以决胜负【勇悍不思者其言如是也】次则诱其耕民徙
之内地使彼自惧失亡而去【陈怀顺之谋也】次则绝其私市使彼自计侵耕所得不偿所
云必来分割【光与邢舍人所议也】次则乘间筑堡以扞之借使不尽得其田亦足为麟州
耳目藩蔽【光与武侯中立所议也】庞公幸用其二而舍置其三【诱民决战勿问】今日
思之始知当日下策乃上计也嗟乎事难豫知无可言者所惜者国家边臣姑息之弊久矣今
止欲自於汉地内立一小堡已谓之引惹生事罪及元帅则後来者所为可知益使戎狄轻汉
矣次则庞公垂老孜孜为国更获欺罔之名次则中立才美操坚而横罹此虽不足为异日之
累而亦暂致淹回次则光罪当为首而不蒙诛戮贬窜使国家有同罪异罚之讥此皆光所慊
慊者也以此之故光今虽强颜出入朝省每有人正视其面则慙不敢仰凡以上累知己而旁
负朋友故也其他一一非书所尽盛暑中倍自保辅

与魏处士【闲】书

十二月十一日光再拜云夫处士老兄近蒙贶手笔云见家兄言光颇喜养生夫生之贵於物

也甚矣人不能保其生於他何有光心虽喜之不能得其涂径望其藩墙也今老兄年余八十矣自皇佑初拜别又逾十年每闻家兄言老兄精神益明膂力益壮视听饮食過於少年不知以何道修育乃能至是诚不胜叹慕之深顾以俗网縻縶未由得亲执几杖以受教於下坐傖有道之稊稗土苴可使愚陋牵俗之人与知而力行者愿时赐诲谕俟他日得侍左右然後卒業不胜幸甚

答刘太博忱书

光顿首再拜赵令来蒙贶书教以所不及始於喜愧终於感惧光常病世人称交友者有遇则翊翊笑言以酒食相悦相去则长函短幅副以苞苴言皆谄谀又似欺侮习尚成俗莫知其非求诸古人切切惓惓谅直之益万无一二常惧没世不见其人今乃得之於足下此其所以为喜也足下所示皆国家安危之本治乱之原当今所宜汲汲者足下为远官无言责犹能孳孳不忘忠荃如此光仕於朝廷官以谏为名政事有阙或不能知知之或不能言言之或不能入不能入又不能去此其所以为愧也昔者先人获知於先龙图推称援引以至於通达今兹光又获知於足下教诲隐括使逃於罪戾仍世受赐於门下此其所以为感也观足下之言非直可以为交友之良乃实国家之忠臣光知而不能荐又偷安窃禄以妨贤者之路大则将受诛於朝廷小则将取讥於天下士大夫此其所以为惧也凡足下所谕敢不熟思而谨志之苟其智力之所及者不敢不勉也

上始平庞相公述不受知制诰书

光惶恐啓雨後薄寒比日晴霁稍复暄暖恭惟台候万福适蒙宠赐手教问以久不受恩命之故不惟爱念之厚廼复知其坚守愚志必有所为非苟然而已古人所谓知己者正应如是区区之死不足以报感极以泣无言可谕光自總角以来则拜伏趋走於前又辱知爱如此之重岂敢以半言诬罔聰明借使有之亦不能欺也光自幼读经书虽不能钩探微蘊比之他人差为勤苦尽心而已又好史学多编辑旧事此其所长也至於属文则性分素薄尤懒为之当应举时强作科場文字虽仅能牵合终不甚工颇慕作古文又不能刻意致力闕前修之藩篱徒使其言迂僻鄙俚不益世用此真所谓学步邯郸匍匐而归者也曩者年三十余相公在枢府时始令学作四六文字供给牋奏虽承命不敢不勉而终以愚陋不能进益自相公出镇以来亦遂舍置未尝复为也时时答亲旧书啓则不免假手於人今知制诰之职掌为天子作诏文宣布华夷岂可使假手答书啓者为之邪光与石舍人同年登第少相亲押熟知其人志度清夷操行纯一当在馆阁时闻望甚美其文采亦不全出衆人之後一旦擢处西掖所作诰命小有瑕谪则轻薄之人相与传以为笑至今身没而传笑者未已光窃伤之曩使石不登西掖岂有此辱邪光平生所为文辞比之於石自谓犹未能及而视此前轍欲使光遵而蹈之岂能不惧且愧苟贪其荣利强顔为之不惟取一身没齿之羞亦非所以增朝廷之光华也以是观之光之不受知制诰出於赤诚非饰让也但不为朝廷及世人所谅耳夫馆职止於校正文字故虽如光者亦可为之至於知制诰天下止有四员非文辞高妙殊衆絶伦者固不可为也非独如是而已抑又有势不可受者光曩者除开封府推官判三司度支勾院又修起居注皆曾辞免至于四五而不能得请卒复就职今兹召试制诰私心自念以为若复辞而不获则举措可

慙不若勿辞遂勉强就试当是之时谓吕侍讲虽辞亦必不免无何明旦欲诣合门受勅而今夕闻吕别有除命乃知光自不辞而非朝廷不许也是以复有今者之请奏章已四上矣若又因循复往就职则是前後辞让禄位皆诡诈饰名以巧邀朝廷举不可信矣虽家人仆隶犹将疑之况天下之人乎如是则光无复面目以立於士大夫之间是以竭力致辞不复计奏章之数若朝廷终不见听治其顽蔽不恭之罪行罚而已矣知制诰必可免也前日至堂中见执政亦具以诚白之不知其见信否今并四次奏草封上贵知其本末之详自免谏职以来喜有参侍之期而以辞官之故未奉朝请伏谒门下杳未有涯晨夕遑遑心如游云常在左右但形留不往耳既不获面陈因辞抒情不觉烦多

答刘贤良【蒙】书

五月十六日陕郡司马光再拜复书贤良刘君足下昔张伯松语陈孟公曰人各有性长短自裁子欲为我亦不能吾而效子亦败矣马文渊戒兄子欲其效龙伯高之周慎谦俭不欲其效杜季良忧人之忧乐人之乐也光愚无似何足以望万一於古人然私心所慕者伯松伯高而不敢为孟公季良之行也况幼时始能言则诵儒书习谨敕长而为吏则读律令守绳墨龔龔然为鄙细之人侧足於庸俗之间不为雄俊奇伟之士所齿目为日久矣不意去岁足下自大河之北洋洋而来游於京师负其千镒之宝欲求良工大贾而售之乃幸见顾於陋巷因得窃读足下之文窥足下之志文甚高志甚大语古则浩博而渊微论今则明切而精至诚不能不口夸而心服譬如窈人子终日环绕爱玩咨嗟传布讫无一钱敢问其直之高下亦终於无益而已矣今者足下忽以亲之无以养兄之无以葬弟妹嫂侄之无以恤策马裁书千里渡河指光以为归且曰以鬻一下婢之资五十万畀之足以周事何足下见期待之厚而不相知之深也光得不骇且疑乎方今豪杰之士内则充朝廷外则布郡县力有余而仁可仰者为不少矣足下莫之取乃独左顾而抵於不肖岂非见期待之厚哉光虽窃托迹於侍从之臣月俸不过数万饔飧炊玉晦朔不相续居京师已十年囊褚旧物皆竭安所取五十万以佐从者之疏糲乎夫君子虽乐施予亦必已有余然後能及人就其有余亦当先亲而後疎先旧而後新光得侍足下才周岁得见不过四五而遽以五十万奉之其余亲戚故旧不可胜数将何以待之乎光家居食不敢常有肉衣不敢纯衣帛何敢以五十万市一婢乎而足下忽以此责之岂非不相知之深哉光视地然後敢行顿足然後敢立足下一旦待以为陈孟公杜季良之徒光能无骇乎足下服儒衣谈孔顔之道啜菽饮水足以尽欢於亲簞食瓢饮足以致乐於身而遑遑焉以贫乏有求於人光能无疑乎足下又责以韩退之之所为若光者何以敢望韩退之哉退之能为文其文为天下贵凡当时王公大人庙碑墓碣靡不请焉故受其厚谢随复散之於亲旧此其所以能行义也若光者何人敢望韩退之哉光自结髮以来虽行能无所长然实不敢鎔铢妄取於人此衆人所知也取之也廉则其施之人也靳亦其理宜也若既求其取之廉又责其施之厚是二行者诚难得而兼矣足下又欲使光取之於他人是尤不可之大者微生高乞醯於邻人以应求者孔子以为不直况已不能施而敛之於人以为已惠岂不害於恕乎足下之命既不克承又费辞以?之其为罪尤深足下所称韩退之亦云文章不足以发足下之事业钱财不足以调左右之匮乏捆载而往垂橐而归足下亮之而已不宣

卷六十

钦定四库全书

传家集卷六十 宋 司马光 撰书后三

答胡寺丞【宗愈】书【时宗愈为楚州粮料荐歙州蕲门令丁騞】

光顿首再拜前岁承临访以谏局不得诣谢顷又辱赐书兼示以所着文藁京师日困俗事因循逾年尚未报谢虽感戢勤仰之心无时少忘而惰慢之辜诚无以辞於左右宜见弃絶而不录者也今兹乃复重赐以书仍告以贤者之名是不以小礼为疏密而直责以古人之处也光实何人蒙期待之厚如此且愧且恐殆无容措丁君未之得见又不知其所居不获身往受教也唯当谨识重语无日忘之京师名利之场士大夫不知光之不肖日枉车骑过弊庐者不啻十数然为道谊而来者则难得矣丁君不屈临迺益知足下之不妄誉人也时寒千万加爱

答周同年源书

十二月日具街司马光谨再拜复书都官同年前比承赐书并示古律诗三卷理致精奥辞气清壮诚陋目所未尝睹如登崑丘閱衆宝顾盼惊眩心知其可贵而口不可尽名也幸甚幸甚受赐至大宜即时修报而缺然逾旬者抑有由焉光生而朴愚行能无所长自度於方今士大夫间?出其下不意朝廷过采置之侍从居常自愧今年赐书迺欲方之汲黯夫汲黯何可当也汉武帝猜忍暴刻其近臣如庄助朱买臣吾邱壽王之徒虽平生所信爱小有过辄抵死九卿顔异对宾客微反唇以为腹诽而诛之其视杀人族人若鉏草茅然黯当此时能犯忌讳触盛怒直诋其非以安国家利百姓非天下贤杰能如是邪今陛下慈爱寛仁与羣臣言愉愉和顔色如接宾友唯恐伤其意求规谏之言孜孜如不及虽有狂狷讦直亦能容之光於群臣中官非甚薄曾不能引古圣贤之道以少助盛德万分之一直碌碌随衆容身庇妻子而已岂得为汲黯之伦乎夫任羸者以万钧之重非徒不能负也且有颠仆糜碎之患光虽至愚犹知避颠仆糜碎之患是以战栗汗流而久不敢报也惟同年少赐矜察而寛假之不宣光惶恐再拜

答孔司户文仲书

三月二十日司马光顿首复书司户秘校孔君足下辱书教以孔子第门人而文学处四科之末所以然之理幸甚幸甚光愚陋无堪居常不见齿於士大夫足下徒以生之蚤而仕之久亦从而访焉称褒之过而责望之重且恐且愧无以自处光昔也闻诸师友曰学者贵於行之而不贵於知之贵於有用而不贵於无用故孔子曰弟子入则孝出则悌谨而信泛爱衆而亲仁行有余力则以学文子夏曰事父母能竭其力事君能致其身与朋友交言而有信虽曰未学吾必谓之学矣此德行之所以为四科首者也孔子又曰诵诗三百授之以政不达使於四方

不能专对虽多亦奚以为夫国有诸侯之事而能端委束带与宾客言以排难解纷循国家之急或务农训兵以扞城其民是亦学之有益於时者也故言语政事次之若夫习其容而未能尽其义诵其数而未能行其道虽敏而博君子所不贵此文学之所以为末者也然则古之所谓文者乃诗书礼乐之文升降进退之容弦歌雅颂之声非今之所谓文也今之所谓文者古之辞也孔子曰辞达而已矣明其足以通意斯止矣无事於华藻宏辩也必也以华藻宏辩为贤则屈宋唐景庄列杨墨苏张范蔡皆不在七十子之後也顔子不违如愚仲弓仁而不佞夫岂尚辞哉足下所谓学积於内则文发於外积於内也深博则发於外也淳奥则夫文者虽不学焉而亦可以兼得之学不充於中而徒外事其文则文盛於外而实困於内亦将兼弃其所学斯言得之矣曾子曰尊其所闻则高明矣行其所知则光大矣足下允蹈其言为之无倦将与渊骞并驱争先又况游夏尚奚足慕光方叹服止仰之不暇自视一无所有其何以为献不宣光顿首

与王介甫书【熙宁三年二月二十六日】

光居尝无事不敢涉两府之门以是久不得通名於将命者春暖伏惟机政余裕台候万福孔子曰益者三友损者三友光不材不足以辱介甫为友然自接待以来十有余年屡尝同僚亦不可谓之无一曰之雅也虽愧多闻至於直谅不敢不勉若乃便辟善柔便佞则固不敢为也孔子曰君子和而不同小人同而不和君子之道出处语默安可同也然其志则皆欲立身行道辅世养民此其所以和也曷者与介甫议论朝廷事数相违戾未知介甫之察不察然於光向慕之心未始变移也窃见介甫独负天下大名三十余年才高而学富难进而易退远近之士识与不识咸谓介甫不起而已起则太平可立致生民咸被其泽矣天子用此起介甫於不可起之中引参大政岂非亦欲望衆人之所望於介甫邪今介甫从政始期年而士大夫在朝廷及自四方来者莫不非议介甫如出一口下至闾阎细民小吏走卒亦窃窃怨叹人人归咎於介甫不知介甫亦尝闻其言而知其故乎光窃意门下之士方曰誉盛德而赞功业未始有一人敢以此闻达於左右者也非门下之士则皆曰彼方得君而专政无为触之以取祸不若坐而待之不过二三年彼将自败若是者不唯不忠於介甫亦不忠於朝廷若介甫果信此志推而行之及二三年则朝廷之患已深矣安可救乎如光则不然忝备交游之末不敢苟避譴怒不为介甫一一陈之今天下之人恶介甫之甚者其诋毁无所不至光独知其不然介甫固大贤其失在於用心太过自信太厚而已何以言之自古圣贤所以治国者不过使百官各称其职委任而责成功也其所以养民者不过轻租税薄赋敛已逋责也介甫以为此皆腐儒之常谈不足为思得古人所未尝为者而为之於是财利不以委三司而自治之更立制置三司条例司聚文章之士及晓财利之人使之讲利孔子曰君子喻於义小人喻於利樊须请学稼孔子犹鄙之以为不如礼义信况讲商贾之本利乎使彼诚君子邪则固不能言利彼诚小人邪则惟民是虐以饫上之欲又可从乎是知条例一司已不当置而置之又於其中不次用人往往暴得美官於是言利之人皆攘臂鬪视銜鬻争进各鬪智巧以变更祖宗旧法大抵所利不能补其所伤所得不能偿其所亡徒欲别出新意以自为功名耳此其为害已甚矣又置提举常平广惠仓使者四十余人使行新法於四方先散青苗钱次欲使比户出助役钱次又欲更搜求农田水利而行之所遣者虽皆选择才俊然其中亦有轻佻狂躁之人陵轹州县骚扰百姓者於是士大夫不服农商丧业谤议沸腾怨嗟盈路迹其本原咸以此也书曰民不静亦

惟在王宫邦君室伊尹为阿衡有一夫不获其所若已推而内之沟中孔子曰君子求诸已介甫亦当自思所以致其然者不可专罪天下之人也夫侵官乱政也介甫更以为治术而先施之贷息钱鄙事也介甫更以为王政而力行之徭役自古皆从民出介甫更欲歛民钱顾市佣而使之此三者常人皆知其不可而介甫独以为可非介甫之智不及常人也直欲求非常之功而忽常人之所知耳夫皇极之道施之於天地人皆不可须臾离故孔子曰道之不明也我知之矣知者过之愚者不及也道之不行也我知之矣贤者过之不肖者不及也介甫之智与贤皆过人及其失也乃与不及之患均此光所谓用心太过者也自古人臣之圣者无过周公与孔子周公孔子亦未尝无过未尝无师介甫虽大贤於周公孔子则有间矣今乃自以为我之所见天下莫能及人之议论与我合则喜之与我不合则恶之如此方正之士何由进谏諛之士何由远方正日踈谏諛日亲而望万事之得其宜令名之施四远难矣夫从谏纳善不独人君为美也於人臣亦然昔郑人游於乡校以议执政之善否或谓子产毁乡校子产曰其所善者吾则行之其所恶者吾则改之是吾师也若之何毁之蘧子冯为楚令尹有宠於蘧子者八人皆无禄而多马申叔豫以子南观起之事警之蘧子惧辞八人者而後王安之赵简子有臣曰周舍好直谏日有记月有成岁有效周舍死简子临朝而叹曰千羊之皮不如一狐之腋诸大夫朝徒闻唯唯不闻周舍之鄂鄂吾是以忧也子路人告之以有过则喜鄧文终侯相汉有书过之史诸葛孔明相蜀发教与群下曰违覆而得中犹弃弊蹻而获珠玉然人心苦不能尽惟董幼宰参书七年事有不至至于十反孔明尝自校簿书主簿杨顥谏曰为治有体上下不可相侵请为公明以作家譬之今有人使奴执耕稼婢典炊爨鸡主司晨犬主吠盗私业无旷所求皆足忽一旦尽欲以身亲其役不复付任形疲神困终无一成岂其智之不如奴婢鸡狗哉失为家主之法也孔明谢之及顥卒孔明垂泣三日吕定公有亲近曰徐原有才志定公荐拔至侍御史原性忠壮好直言定公时有得失原辄谏争又公论之人或以告定公定公叹曰是我所以贵德渊者也及原卒定公哭之尽哀曰德渊吕岱之益友今不幸岱复於何闻过哉此数君子者所以能功名成立皆由乐闻直谏不讳过失故也若其余骄亢自用不受忠谏而亡者不可胜数介甫多识前世之载固不俟光言而知之矣孔子称有一言而可以终身行之者其恕乎诗云执柯伐柯其则不远言以其所愿乎上交乎下以其所愿乎下事乎上不远求也介甫素刚直每议事於人主前如与朋友争辩於私室不少降辞气视斧钺鼎镬无如也及宾客僚属谒见论事则唯希意迎合曲从如流者亲而礼之或所见小异微言新令之不便者介甫辄艴然加怒或诟詈以辱之或言於上而逐之不得其辞之毕也明主宽容如此而介甫拒谏乃尔无乃不足於恕乎昔王子雍方於事上而好下佞已介甫不幸亦近是乎此光所谓自信太厚者也光昔者从介甫游介甫於诸书无不观而特好孟子与老子之言今得君得位而行其道是宜先其所美必不先其所不美也孟子曰仁义而已矣何必曰利又曰为民父母使民盼盼然将终岁勤动不得以养其父母又称贷而益之恶在其为民父母也今介甫为政首建制置条例司大讲财利之事又命薛向行均输法於江淮欲尽夺商贾之利又分遣使者散青苗钱於天下而收其息使人愁痛父子不相见兄弟妻子离散此岂孟子之志乎老子曰天下神器不可为也为者败之执者失之又曰我无为而民自化我好静而民自正我无事而民自富我无欲而民自朴又曰治大国若烹小鲜今介甫为政尽变更祖宗旧法先者後之上者下之右者左之成者毁之矻矻焉穷日力继之以夜而不得息使上自朝廷下及田野内起京师外周四海士吏兵农工商僧道无一人得袭故而守常者纷纷扰扰莫安其居此岂老氏之志乎何介甫總角读书白头秉政乃尽弃其所学而从今世浅丈夫之谋乎古者国有大

事谋及卿士谋及庶人成王戒君陈曰有废有兴出入自尔师虞庶言同则绎诗云先民有言询于刍蕘孔子曰上酌民言则下天上施上不酌民言则下不天上施自古立功立事未有专欲违衆而能有济者也使诗书孔子之言皆不可信则已若犹可信则岂得尽弃而不顾哉今介甫独信数人之言而弃先圣之道违天下人之心将以致治不亦难乎近者藩镇大臣有言散青苗钱不便者天子出其议以示执政而介甫遽悻悻然不乐引疾卧家光被旨为批答见士民方不安如此而介甫乃欲辞位而去殆非明主所以拔擢委任之意故直叙其事以义责介甫意欲介甫早出视事更新令之不便於民者以福天下其辞虽朴拙然无一字不得其实者窃闻介甫不相识察颇督过之上书自辩至使天子自为手诏以逊谢又使吕学士再三谕意然後乃出视事出视事诚是也然当速改前令之非者以慰安士民报天子之盛德今则不然更加忿怒行之愈急李正言言青苗钱不便诘责使之分析吕司封传语祥符知县未散青苗钱劾奏乞行取勘观介甫之意必欲力战天下之人与之一决胜负不复顾义理之是非生民之忧乐国家之安危光窃为介甫不取也光近蒙圣恩过听欲使之副贰枢府光窃惟居高位者不可以无功受大恩者不可以不报故辄敢申明去岁之论进当今之急务乞罢制置三司条例司及追还诸路提举常平广惠仓使者主上以介甫为心未肯俯从光窃念主上亲重介甫中外群臣无能及者动静取舍唯介甫之为信介甫曰可罢则天下之人咸被其泽曰不可罢则天下之人咸被其害方今生民之忧乐国家之安危唯系介甫之一言介甫何忍必遂已意而不恤乎夫人谁无过君子之过如日月之过过也人皆见之更也人皆仰之何损於明介甫诚能进一言於主上请罢条例司追还常平使者则国家太平之业皆复其旧而介甫改过从善之美愈光大於日前矣於介甫何所亏丧而固不移哉光今所言正逆介甫之意明知其不合也然光与介甫趣向虽殊大归则同介甫方欲得位以行其道泽天下之民光方欲辞位以行其志救天下之民此所谓和而不同者也故敢一陈其志以自达於介甫以终益友之义其舍之取之则在介甫矣诗云周爰咨谋介甫得光书僥未赐弃擲幸与忠信之士谋其可否不可以示谄谀之人必不肯以光言为然也彼谄谀之人欲依附介甫因缘改法以为进身之资一旦罢局譬如鱼之失水此所以挽引介甫使不得由直道行者也介甫奈何徇此曹之所欲而不思国家之大计哉孔子曰巧言令色鲜矣仁彼忠信之士於介甫当路之时或齟齬可憎及失势之後必徐得其力谄谀之士於介甫当路之时诚有顺适之快一旦失势必有利於介甫以自售者矣介甫将何择焉国武子好尽言以招人之过卒不得其死光常自病似之而不能改也虽然施於善人亦何忧之有用是故敢妄发而不疑也属以辞避恩命未得请且病膝疮不可出不获亲侍言於左右而布陈以书悚惧尤深介甫其受而听之与罪而絶之或詈詈而辱之与言於上而逐之无不可者光俟命而已

与王介甫第二书【熙寧三年三月三日作】

光以荷眷之久诚不忍视天下之议论恟恟是敢献尽言於左右意谓纵未弃絶其取诟辱必矣不谓介甫乃赐之海笔存慰温厚虽未肯信用其言亦不辱而絶之足见君子寛大之德过人远甚也光虽未尽晓孟子至於义利之说殊为明白介甫或更有他解亦恐似用心太过也传曰作法於凉其弊犹贪作法於贪弊将若何今四方丰稔县官复散钱与之安有父子不相见兄弟离散之事光所言者乃在数年之後常平法既坏内藏库又空百姓家家於常赋之外更增息钱役钱又言利者见前人以聚敛得好官後來者必竞生新意以腴民之膏泽日甚一

日民产既竭小值水旱则光所言者介甫且亲见之知其不为过论也当是之时愿毋罪岁而已感发而言重有喋喋负罪益深

与王介甫第三书

光惶恐再拜重辱示谕益知不见弃外收而教之不胜感悚不胜感悚夫议法度以授有司此诚执政事也然当举其大而略其细存其善而革其弊不当无大无小尽变旧法以为新奇也且人存则政举介甫诚能择良有司而任之弊法自去苟有司非其人虽日授以善法终无益也介甫所谓先王之政者岂非泉府賒贷之事乎窃观其意似与今日散青苗之意异也且先王之善政多矣顾以此独为先务乎今之散青苗钱者无问民之贫富愿与不愿强抑与之岁收其什四之息谓之不征利光不信也至於辟邪说难壬人果能如是乃国家生民之福也但恐介甫之座曰相与变法而讲利者邪说壬人为不少矣彼颂德赞功希意迎合者皆是也介甫偶未之察耳盘庚曰今我民用荡析离居又曰予岂汝威用奉畜汝衆又曰无或敢伏小人之攸箴又曰非废厥谋吊由灵盖盘庚遇水灾而迁都臣民有从者有违者盘庚不忍脇以威刑故勤劳晓解其卒也皆化而从之非谓废弃天下人之言而独行已志也光岂劝介甫不恤国事而同俗自媚哉盖谓天下异同之议亦当少垂意采察而已幸恕其狂愚不宣光惶恐再拜

上许州吴给事书

月日具官光谨再拜献书某官执事光昔者未冠为书生从师友间得执事所对直言策及後策观之喟然叹曰道之不明久矣蔽於古者远大而不可从溺於今者浅薄而不足用今执事论高而不悖於今义实而不戾於古所讥切皆当世之病所区画皆应事之宜粲然虞夏商周之道可以覆手而取举足而登也非夫深明於道之本其孰克以致此哉由是私自望曰异日傥得出入门下承事之间以受一言之益使皦然睹道之正涣然识道之归事君行已知所取舍而无所疑则私愿足矣及举进士幸免黜去始敢进谒朝之公卿大夫当是时蓄才德负名声出入帝廷荣耀辉赫照人者衆矣光皆未及往见首求执事之门而叩之诚欲急於学术之明而成宿昔之志也并裒其所为文以为始见之贄执事不责其僭而辱赐之诗以振饰之且曰道为根抵言为华由来表里相经纬光由是益知君子务知大者远者则光愿受学之志愈固而专矣不幸光献文之明日西出之官自是已来非奔走吏道则在苦出衰絰之中矣东西南北崎岖 坎过阙门上逆旅爨未及燃已复出外矣是以役役十年而不得卒业也去年罢滑台从事至京师则执事既为天子辅弼臣矣光贱士也其敢不自分限而屡以其不肖之迹污辱门下之尘称道旧恩以求瞻望几杖哉必若是而为天下之人谓之不营禄位而为道则难矣光是以屏身退处不敢屡进以烦将命非为辄自疎外诚惧不知者不能察其区区而有尘累於至公也今圣主以许田股肱大郡屈烦执事暨镇治之光然後敢复叙昔日之知而求毕其戇愚之志夫肝鬲之所崇聚而欲抒展於左右者固不可立谈而尽也是敢复繕缀近所为文凡五卷而荐之非敢以为文也贵露下情而已伏惟亮其狂简之诛而矜其自幼及长企仰之意副其所以来求考正道义之诚则没齿衔戴盛德永永为执鞭秉轡门下之士矣不宣光惶惧再拜

答胙城郭大丞书

光顿首再拜窃以前世郡县以来朝廷唯置太守都尉令长自他掾属皆官长所自辟除供趋走治文书而已今幕府吏犹古之掾属也职至轻位至微独命於朝廷差异耳执事以老成之德任百里之重官为三丞着籍於朝虽大君子卑逊不以自重然考之古视之今其事任位序不轻章矣而岁时月朔必以贺牒为赐辞恭礼备若小邑长之事牧伯然此岂光之所能堪哉是以日夜鞠躬重足继为书启布之左右乞停此议以安反侧而执事好谦之志确然愈固虽於盛德益有光美将使无似之躯於何自置殆非所以相全爱之道也廼者韦城张秘丞亦然光具此意因书请焉韦城悟其不可幸赐惠许独执事未炤愚欸祈请喋喋不垂允纳每得一纸流汗沾足光闻君子与人恭而有礼固不若此也今不敢避烦再荐言庶几高明垂意察古今之体酌重轻之宜凡此过礼率从翦削时有惠训手笔往来使得泰然自安无负踧踖幸之大者不宣光顿首再拜

别刘孝叔杂端手启

光再拜前日暂得诣别怅恋何可胜言比宿起居何如舟舰具未解维果在何时恭惟道胜名立余无可贵外物土芥固不足以滑和唯冀亲近药物益自爱重区区所祷不宣光再拜

与范尧夫经略龙图书

光启昨在洛中及至京广两於河中通次得所赐书值光治装赴陈州又得旨诣阙寻又忝左省之命忽忽事多久不修报明恕必察其非踈懈也曷承就移庆帅既践世官复修旧治计尧夫必乐然就职然士论所矜者犹多也光今日忝窃皆由尧夫素加诲诱重以推挽其感戢固不在言今岁大暑异常边地必稍愈触热饮冷更祈节慎不宣光再拜

与范尧夫经略龙图第二书

光愚拙有素见事常若不敏不择人而尽言此才性之蔽光所自知也加之闲居十五年本欲更求一任散官守候七十即如礼致事久絶荣进之心分当委顺田里凡朝廷之事未尝挂虑况数年以来昏忘特甚诚不意一旦冒居此地蒙人主知待之厚特异於常义难力辞黽勉就职故事多所遗忘新法固皆面墙朝中士大夫百人所识不过三四如一黄叶在烈风中几何其不危坠也又为世俗妄被以虚名不知其中实无所有上下责望不轻如何应副得及荷尧夫知待固非一日望深赐教督以所不及闻其短拙随时示谕勿复形迹此独敢望於尧夫不敢望於佗人者也光再拜

答河阳李夷白秘校书

五月三十日光再拜司理秘校李君足下顷国家罗天下豪雋光以无似叨备有司以是得瞻见符采承接余论其为幸已大违别已来汨没俗事未遑修问信至两蒙惠言且谓自省於中

至於无愧则安为之又谓光事之非礼固弗受悦之非道固不悦何足下自遇之厚而见期之深也愧感之外敢不颂咏美志而佩服雅言庶几黽勉以不负所教焉至於师法非所敢当又承王事鞅掌以学之不讲为深忧光也闻诸宓子贱曰始诵之今得而行之是学益明也何费日之有盛暑未获展晤惟加爱为祷不宣光再拜

答齐州司法张秘校正彦书

十一月七日光白司法秘校张君足下前日辱书始则谕以古之为士易今之为士难终则见索恶诗欲以示郡之贤守倅光实何人承雅意勤厚如此固不当辞然光素无文於诗尤拙不足以揄扬盛美取信於人况近世之诗大抵华而不实虽壮丽如曹刘鲍谢亦无益於用光忝与足下以经术相知诚不敢以此为献所可献者在於相与讲明道义而已足下所谓古之为士者乃君子之道也所谓今之为士者乃小人之道也自有天地以来君子小人相与并生於世各居其半一消一息一否一泰纷然杂揉固非一日非君子之道多於古鲜於今古则可为而今则不可为也小人之道鲜於古而多於今古不可为而今则可为也顾人之取舍何如尔奚古今之异而有易有难哉足下学春秋非徒诵其文通其义而已乃能於传注之外凡古今治春秋之书存可见者皆徧观而略记之评其短长靡不精当人或杂举而猝问之臠对无滞袞袞焉如泉源之不穷年未弱冠举明经为天下第一今位虽卑年虽少譬如隋珠和璧委於道涂愚者犹知拾而宝之况贤守倅哉诗云鹤鸣于九臯声闻于天鱼在于渚或潜在渊孔子曰不患人之不已知求为可知也足下当固守於古而勿流放於今汲汲於己而徐於人为之不止光见异日为贤公卿功业烜赫於当时名声彰彻於後世竹帛所不能纪金石所不能颂诗何为哉诗何为哉不宣光白

传家集卷六十

卷六十一

<集部,别集类,北宋建隆至靖康,传家集>

钦定四库全书

传家集卷六十一 宋 司马光 撰书后四

答张先生【砥】书

八月二日涑水司马光白张君先生辱书示以所着春秋传士大夫不以经术为事久矣足下独能治春秋三十年成书三十万言是古之儒者复见於今日也钦仰咨叹无有穷已足下自谓天以圣师之道厄日引久而陰有所相若非己意之所自出者光经术素浅於春秋尤所不通虚辱足下之赐读之累日不能识其涯涘又乌暇知其得失敢错论议於其间哉至於建白於上乞废三传之学而行足下之书以伸千载圣人未明之意此尤非光之所敢任也不胜惶悸之?其书谨再拜封纳请更择能通春秋学有大名居高位可以副足下之求者而从之幸甚幸甚不宣光白

答陈监簿【师仲】书

九月十八日涑水司马光再拜陈君监簿足下金州人来辱两书以能出处见期未相识为恨光实何人敢受此赐反仄愧汗无地自处光性愚陋颇好读古人书闻君子之风亦知慕之而未能至睹小人所为颇知耻之但恐未能免耳曩蒙朝廷猥加收采尘污侍从预陪国论讫无铢两之补俄又擢寘枢庭譬如有入举万金之重加稚子之背彼必走而避之万金非不贵也然走而避之者知非其任故也此乃物理之常乌足谓之贤哉今以衰病自求便安朝廷未弃之田里尚縻以一官赐之廩禄使饱食安坐自放於丰草长林间乃圣主之至仁鄙夫之大幸岂敢效古之人以道不行而自藏哉恐足下传闻之误而獎借之过诚不敢自保恐万一佗日陷足下於不知言之责以重老朽之辜是敢辄自陈叙浼渎聪明庶几识察而已光虽未获侍前三复足下书及所示文编语高而气直才美而志大其向往钦服之心固非笔札所能尽也

答李大卿【孝基】书【熙宁五年正月十三日作】

光再拜昨晚暂得请见经宿起居何如适辱诲笔承朝夕往河清不得再诣辞千万以保摄为祷大卿平生以保摄为事计其专勤举世无伦然光区区犹有所献者譬如举轻尘以裨泰山虽不知量志在忠益而已光闻一陰一阳之谓道然变而通之未始不由乎中和也陰阳之道在天为寒燠雨暘在国为礼乐赏刑在心为刚柔缓急在身为饥饱寒热此皆天人之所以存日用而不可免者也然稍过其分未尝不为灾是故过寒则为春霜夏雹过燠则为秋华冬雷

过雨则为霖潦过暘则为旱暵礼胜则离乐胜则流赏僭则人骄溢刑滥则人乖叛太刚则暴太柔则懦太缓则泥太急则轻饥甚则气虚竭饱甚则气留滞寒甚则气沈濡热甚则气浮躁此皆执一而不变者也善为之者损其有余益其不足抑其太过举其不及大要归诸中和而已矣故陰阳者弓矢也中和者质的也弓矢不可偏废而质的不可远离中庸曰中者天下之大本也和者天下之达道也致中和天地位焉万物育焉由是言之中和岂可须臾离哉昨日闻大卿言脏腑素有冷疾须至服热药今则徧身生疮疥手足时痠癢疑有风邪尚欲以乌头治之光虽略曾以所见贡闻又恐侍坐之久尊体疲倦不敢毕其辞而退窃以大卿勤养生之术数十年而犹有冷疾者殆食素膳太多故也彼笋簞乳腐麪滓豆炙性大寒而滞气光见人多食之致脾胃虚弱胀满滑泄面目浮肿腰足沉重前後非一矣天生万物各有所食苟不得其所食则不能全其生人为万物之灵兼蔬谷酒肉而食之乃其常性也酒肉者所以扶衰养疾不可废也大卿絕酒肉而专素膳为日已久此其所以有冷疾也既得冷疾复以热药攻之闻大卿所服之药皆躁悍酷烈佗人莫能近口此其所以失中和也中冷则为羸瘠面肿外热客於肌肤则为疮疥流於筋脉则为癰癤光虽不晓医以陰阳之理推之殆不远矣不胜款款之愚欲望大卿自今罢素膳屏热药静虑以适神潜心以实下起居饮食造次须臾不少离於中和试行之旬月窃谓所苦不须攻疗必自去矣若旬月无效弃黜其言可也光以托契义之旧仰德名之熟虽得见尚新所居连墙而往来不数然爱重之心过於朝夕握手接膝者矣是以敢辄献尽言幸希裁察不宣光再拜

与吴丞相充书【熙宁十年四月作】

光启光愚戇运僻自知於世无所堪可以是退伏散地苟窃微禄以庇身保家而已近闻道路之人自京师来者多云相公时语及姓名或云亦尝有所荐引未知虚实光自居洛以来仕宦之心久已杜絕在少壮之时犹不如人况年垂六十须髮皓然视昏听重齿落七八精神衰耗岂复容有干进之心但以从游之久今日特蒙齿记感荷知己之恩终身岂敢忘哉顾惟相公富贵显荣丰备已极光踈冗之人无一物可以为报唯忠信之言庶几仰禱盛德之万一耳伏惟明主历选周行登用人杰以毗元化以光不敢忘知己之心知相公必不轻孤於明主也窃见国家自行新法已来中外恟恟人无愚智咸知其非州县之吏困於烦苛以夜继昼弃置实务崇饰空文以刻急为能以欺诬为才间阎之民迫於诛敛人无贫富咸失作业愁怨流移转死沟壑聚为盗贼日夜引领冀朝廷之觉寤弊法之变更凡几年于兹矣相公聰明岂得不闻之邪今府库之实耗费殆竭仓廩之储仅支数月民间货产朝不谋夕而用度日广撙斂日急河北京东淮南蠭起之盜攻剽城邑杀掠官吏官军已不能制矣若不幸复有方二三百里之水旱霜蝗所在如是其为忧患岂可胜讳哉此安得谓之细事保其必无而恬然不以为意乎贾谊当汉文之世以为譬如抱火厝之积薪之下而寝其上火未及然因谓之安若当今日必谓之火已然而安寝自若者也昔周公勤劳王家坐以待旦跋胡?尾羽敝口瘖终能为周家成太平之业立八百之祚身为太师名播无穷子孙奄有龟蒙与周升降王夷甫位居宰辅不思经国专欲自全置二弟於方镇以为三窟及晋室阽危身亦不免然则圣贤之心岂皆忘身徇物不自为谋哉盖以国家兴隆则身未有不预其福者也顾衆人之识近而圣贤之虑远耳如相公之用心固周公之用心也今若法弊而不更民疲而不恤万一鼠窃益多蠭蛩有毒则窃恐庙堂之位亦未易安居虽复委远机柄均逸外藩固非息肩之处乃至投簪解绂啸傲东山

亦非高枕之地也然则相公今日救天下之急保国家之安更无所与让矣救急保安之道苟不罢青苗免役保甲市易之法息征伐之谋而欲求其成效是犹恶汤之沸而益薪鼓橐欲适鄢郢而北辕疾驱也所求必不果矣欲去此五者而不先别利害以寤人主之心则五者不可得而去矣欲寤人主之心而不先开言路则人主之心不可得而寤矣所谓开言路者非如曩时徒下诏书使臣民言得失既而所言当者一无所施行又取其稍讦直者随而罪之此乃塞言路非开之也为今之要在於辅佐之臣朝夕启沃唯以亲忠直纳谏争广聪明去壅蔽为先务如是则政令之得失下民之疾苦粲然无所隐矣以圣主睿明之资有贤相公忠之助使谏言日进下情上通至治可指期而致况弊法何难去哉夫难得而易失者时也今病虽已深犹未至膏肓苟制治於未乱保邦於未危尚有反掌之易失今不治遂为痼疾虽邴魏姚宋之佐将末如之何必有噬脐之悔矣相公读书从仕位之首相展志行道正在此时苟志无所屈道无所失其合则利泽施於四海其不合则令名高於千古丈夫立身事君始终如此亦可以为无负矣光切於报德贪尽区区不觉辞多光惶恐再拜

答蒋中舍【深之】书【深之祖沦淳化中为永康军判官死蜀寇】

光启承垂示先都官画像记沈公论之已详殆无以加古之人谁不死惟得其所为难故国君死社稷大夫死衆士死制各死其所受礼也为臣事君不计位之高卑恩之厚薄知之浅深苟在其职死之义也方蜀寇之炽守臣军帅弃地与衆而逃者多矣先都官独以文吏在下位力战死之其於礼义非知之明守之笃能如是乎可谓得其所矣沈公既叙其忠孝光又述其礼义然忠孝礼义亦相与为表里者也光再拜

答郭长官【纯】书

光启去岁十月蒙惠书足下所治路僻光闲居难值便人以是期年不获修报然中怀耿耿未尝暂忘潘司録来又辱书且感且媿霜秋公余喜聆安善所示会统稽元图贯穿千余载前贤搜罗所不至者纖悉尽备靡有阙遗非夫好学之勤用意之精谁能臻此钦服钦服光学疎识浅於正闰之际尤所未达故於所修通监叙前世帝王但以授受相承借其年以记事尔亦非有所取舍抑扬也於汉昭烈之立尝着论以述其事今并録呈可以见其不敢专矣夫正闰之论诚为难晓近世欧阳公作正统论七篇以继之自谓无以易矣有章表民者作明统论三篇以难之则欧阳公之论似或有所未尽也欧阳公谓正统不必常相继有时而絶斯则善矣然谓秦得天下无异禹汤又谓始皇如桀纣不废夏商之统又以魏居汉晋之间推其本末进而正之此则有以来章子之疑矣章子补欧阳公思虑之所未至谓秦晋隋不得与二帝三王并为正统魏不能兼天下当为无统斯则善矣然五代亦不能兼天下与魏同乃独不絶而进之使与秦晋隋皆为霸统亦误矣足下离之更为异等斯又善矣然则正闰之论虽为难之经三君子尽心以求之愈讲而愈精庶几或可以臻其极乎是知古之人贵於切切惓惓良有以也如光者蠢愚冥顽安足以闢三君子之藩篱而敢措一辞於正闰之间窃惟足下録此书以相示盖亦有切切惓惓之志非欲光为诺诺之人也刍蕘之言明者择焉光辱足下之厚意岂可逆自鄙薄不倾胷腹之所有以尽布於左右而求采择乎孔子曰名不正则言不顺先儒谓秦为闰者以其居二代之间而非正统如闰居两月之间而非正月也夫霸之为言伯也古者天

子立二伯分治天下诸侯周衰方伯之职废齐桓晋文能帅诸侯以尊周室故天子册命使续方伯之职谓之霸主而後世学者乃更以皇帝王霸为德业之差谓其所行各异道此乃儒家之末失也今章子以霸易闰似未为得恐不足遵也夫统者合於一之谓也今自余以下皆谓之统亦恐名之未正也又蜀先主自言中山靖王之後而不能举其世系後唐出於沙陀姓朱邪氏唐赐之姓明宗复非庄宗之族清泰又非明宗之子李昇起於厮役莫知其姓或云湖州潘氏子李神福俘之以为僮仆徐温勾之以为子及称帝慕唐之盛始自言姓李初欲祖吴王恪嫌其诛死又欲祖郑王元懿命有司检讨二王苗裔有司请为恪十世孙昇曰历十九帝十世何以尽之有司请以三十年为一世议然後定足下云蒙先世之烈者谓之余今三家皆谓之余可乎且余者岂非谓承王统之余也今刘知远谓之闰而刘崇谓之余可乎又凡不能一天下者或在中国或在方隅所处虽不同要之不得为真天子今以曹魏刘石二赵符姚两秦元魏高齐宇文周朱梁石晋刘汉郭周为闰孙吴刘宋二萧齐梁陈慕容燕赫连夏为偏李蜀吕李秃髮沮渠西凉乞伏秦冯燕杨吴王孟两蜀广南汉王闽为僭三者如不相远然愿更详之彼符氏姚氏与慕容氏赫连氏与拓跋氏一?关西一?山东与高齐宇文周何以异乎又凡天祿之不终者传世不传世等耳王莽虽篡窃天下尝尽为之臣者十八年与秦颇相类非四夷羣盗之比也则天乃唐之母后临朝称制与吕后无殊但不当革命称周耳其後子孙相继有天下不得谓之不终其身今与王莽同谓之伪亦似未安也凡此数者皆愚陋之所见未必中理愿足下采其区区之心而不以为罪幸甚幸甚光再拜

答陈司法【师仲】书

八月三十日涑水司马光谨复书司法陈君足下辱书并示先国博家传以为何蕃董邵南之节行不见於佗书独韩文公传而诗之故其名彰彻迨於今谓光盍亦为传若诗使吾先君之名流布於世承命悸栗流汗及足何足下比拟之非伦而责望之太过乎文章自魏晋衰微流及齐梁陈隋羸惫纖靡穷无所之文公杰然振而起之如雷霆列星惊照今古自班张崔蔡不敢企仰况潘陆以降固无足言故何董之名附其文而传彙使一妄庸人传而诗之二子於今尚有闻乎光性愚学疎於文尤非所长今时常为秉笔者笑敢望传於後乎足下乃使为韩之所为是犹驱策弩马曰必为我追千里之足其果能为之乎借使光不自知量辄引韩以自况为诗传以叙当世贤者之事业必取举世之唾詈且无容其身矣诚不敢自爱大惧汨没先君子之名以重其臯况先君子之名潜德遗美二顔既传而评之甚精且详决传无疑光何所有可以加铢两之重乎惟足下怜而察之

与范景仁问正书所疑书

光启晚来蒙惠手笔并?扇值相继有客不得即时修谢前此承示所着正书且垂谕云未安处便与点窜以景仁之明达耆壽加以平生所致思而得者乃下问於顽鄙末学如光之比虽古人询于刍蕘以能问不能殆无以踰此何以胜克悚仄悚仄伏读累日如风雅皆周道既衰诗人追思其盛而歌之关雎以兴淑女非兴后妃成康平王齐侯皆指其爵諡文王配上帝终周世常然八蜡不数昆虫三年之丧不应二十七月衆子在嫡孙亦应传重舜无涂廩浚井之事韩愈为嫂服期非是凡此之类皆其素所探揣谓其当然而未敢自信今乃幸与景仁如合符

契豁然决矣至於解利贞者情性也四海困穷柔远能迓皆先儒研思所未到不胜叹服其间亦有愚昧所未谕者十余条或一字笔误无不签出以俟稍暇得侍函丈请益卒业前日所留易说系辞注续诗话皆狂简不揆宜见诛絶於君子者然亦庶几景仁矜共有志於学痛为鉏治其芜秽明示以坦涂使识所之旨幸甚幸甚孔子曰朋友切切偲偲斯道也亡废久矣面相谏背相訾者出门皆是也非吾人孰当惜之幸冀留意

答孙长官【察】书

十一月二十七日涑水司马光再拜复书崇信贤令孙君足下蒙贶书兼示以尊伯父行状墓志及所着唐史记令光为之碑以纪述遗烈以尊伯父之清节令望加之光自幼穉至于成人得接待周旋今日获寓名丰碑之末附以不朽何荣如之虽文字鄙拙亦不敢辞顾有必不可承命者惟足下察之光曩日亦不自揆妄为人作碑铭既而自咎曰凡刊琢金石自非声名足以服天下文章足以传後世虽强顏为之後人必随而弃之乌能流永久乎彼孝子孝孙欲论譔其祖考之美垂之无穷而愚陋如光者亦敢膺受以为已任是羞污人之祖考而没其德善功烈也罪孰大焉遂止不为自是至今六七年所辞拒者且数十家如张龙图文裕张侍郎子思钱舍人君倚乐卿损之宋监子才或师或友或僚案或故旧不可悉数京洛之间尽知之傥独为尊伯父为之彼数十家者必曰是人也盖择贤不肖为之也为人子孙者有人薄其祖考宜如何讎疾之哉以光么麽使当此数十家之讎疾将何以堪之所以必不可承命者此也虽然窃有愚意敢试陈之惟足下采择焉今世之人既使人为铭纳诸圻中又使佗人为铭植之隧外圻中者谓之志隧外者谓之碑其志盖以为陵谷有变而祖考之名犹庶几其不泯也然彼一人之身耳其辞虽殊其爵里勲德无以异也而必使二人为之何哉愚窃以为惑矣今尊伯父既有欧阳公为之墓志如欧阳公可谓声名足以服天下文章足以传後世矣佗人能加之愚意区区欲愿足下止刻欧阳公之铭植於隧外以为碑则尊伯父之名自可光辉於无穷又足以正世俗之惑为後来之法不亦美乎未审足下以为何如

答张尉来书

五月五日陕人司马光谨复书福昌少府秘校足下光行能固不足以高於庸人而又退处冗散属者车骑过洛乃蒙不辱而访临之其荣已多今又承赐书兼示以新文七篇岂有人尝以不肖欺听闻邪何足下所与之过也始惧中愧终於感藏以自慰知幸知幸光以居世百事无一长於文尤所不闲然窃见屈平始为骚自贾谊以来东方朔严忌王子渊刘子政之徒踵而为之皆蹈袭模仿若重景叠响讫无挺特自立於其外者独柳子厚耻其然乃变古体造新意依事以叙怀假物以寓兴高扬横骛不可羈束若咸韶护武之不同音而为闲美条鬯其实钧也自是寂寥无闻今於足下复见之苟非英才间出能如此乎钦服慕重非言可迨然彼皆失时不得志者之所为今明圣在上求贤如不及足下齿髮方壮才气茂美官虽未达高远有渐异月方将冠进贤佩水苍出入紫闥訏谟黄合致人主於唐虞之隆纳烝民於三代之厚如斯文者以光愚陋窃谓不可遽为也光顿首

与景仁论乐书

九月二十一日某再拜白景仁足下蒙示房生尺法云生尝得古本汉书云度起於黄鍾之长以子谷秬黍中者一黍之起积一千二百黍之广度之九十分黄鍾之长一为一分今文误脱之起积一千二百黍八字故自前世以来累黍为之纵置之则太长横置之则太短今新尺横置之不能容一千二百黍则大其空径四厘六毫是以乐声太高又尝得开元中笛及方响校太常乐下五律教坊乐下三律皆由儒者误以一黍为一分其法非是不若以一千二百黍实管中随其短长断之以为黄鍾九寸之管九十分其长一为一分取三分以度空径数合则律正矣景仁此来盛称此论以为先儒用意皆不能到可以正积古之谬祛一世之惑光窃思之有所未谕者凡数条敢书布陈幸景仁教之景仁曰房生家有汉书异於今本光按累黍求尺其来久矣生所得书不知传於何世而相承积谬由古至今更大儒甚衆曾不寤也又其书既云积一千二百黍之广何必更云一黍之起此四字者将安施設刘子骏班孟坚之书不宜如此冗长也且生欲以黍实中乃求其长何得谓之积一千二百黍之广孔子称必也正名乎必若所云则为新尺一丈二尺得无求合其术而更戾乎景仁曰度量权衡皆生於律者也今先累黍为尺而後制律返生於度与黍无乃非古人之意乎光谓不然夫所谓律者果何如哉向使古之律存则歛其声而知声度其长而知度审其容而知量校其轻重而知权衡今古律已亡矣非黍无以见度非度无以见律律不生於度与黍将何从生邪夫度量衡所以佐律而存法也古人所为制四器者以相参校以为三者虽亡苟其一存则三者从可推也又谓後世器或坏亡故载之於书形之於物夫黍者自然之物有常不变者也故於此寓法焉今四器皆亡不取於黍将安取之凡物之度其长短则谓之度量其多少则谓之量称其轻重则谓之权衡然量有虚实衡有低昂皆易差而难精等之不若因度求律之为审也房生今欲先取容一龠者为黄鍾之律是则律生於量也量与度皆非律也舍彼用此将何择焉景仁曰古律法空径三分围九分今新律空径三分四厘六毫此四厘六毫者何从出耶光谓不然夫径三分围九分者数家言其大要耳若以密率言之径七分者围二十有二分也古之为数者患其空积微之大烦则上下辈之所为三分者举成数而言耳四厘六毫不及半分故弃之也又律管至小而黍粒体圆其中岂无负载廓空之处而必欲责其丝忽不差邪景仁曰生以一千二百黍积实於管中以为九寸取其三分以为空径此自然之符也光按量法方尺之量所受一斛此用累黍之法校之则合矣若从生言度法变矣而量法自如则一斛之物岂能满方尺之量乎景仁曰量权衡皆以千二百黍为法何得度法独用一黍光按黄鍾所生凡有五法一曰备数二曰和声三曰审量四曰嘉量五曰权衡量与衡据其容与其重非千二百黍不可至於度法止於一黍为分无用其余若数与声则无所事黍矣安在其必以一千二百为之定率也景仁曰生云今乐太高太常黄鍾适当古之仲吕不知生所谓仲吕者果后夔之仲吕耶开元之仲吕邪若开元之仲吕则安知今之太高非昔之太下耶笛与方响里巷之乐庸工所为岂能尽得律吕之正乃欲取以为法考定雅乐不亦难乎此皆光之所大惑也君子之论无固无我惟是之从景仁苟有以解之使莹然明白则敢不敛衽服义岂欲徒为此譏譏也

景仁复书

九月二十二日镇再拜复书君实足下昨日辱书以为镇不当为议状是房庶尺律法始得书?然而惧曰镇违羣公之议而下与匹士合有不适中宜获戾於朋友也既读书乃释然而喜曰得君实之书然後决知庶之法是而镇之议为不谬庶之法与镇之议於今之世用与不用未

可知也然得附君实之书传於後世使後世之人质之故终之以喜也君实之疑凡五而条目又十数安敢不尽言解之君实曰汉书传於世久矣更大儒甚衆庶之家安得善本而有之是必谬为脱文以欺於镇也是大不然镇岂可欺哉亦以义理而求之也春秋夏五之阙文礼记玉藻之脱简後人岂知其阙文与脱简哉亦以义理而知之也犹镇之知庶也岂可逆谓其欺而置其义理哉又云一黍之起於刘子骏班孟坚之书为冗长者夫古者有律矣未知其长几何未知其空径几何未知其容受几何岂可直以千二百黍置其间哉宜起一黍积而至一千二百然後满故曰一黍之起积一千二百黍之广其法与文势皆当然也岂得为冗长乎若如君实之说以尺生律汉书不当先言本起黄锺之长而後论用黍之法也若尔是子骏孟坚之书不为冗长而反为颠倒也又云积一千二百黍之广是为新尺一丈二尺者君实之意以积为排积之积广为一黍之广而然邪夫积者谓积於管中也广者谓所容之广也诗云乃积乃仓孟康云空径之广是也又云孔子曰必也正名乎者此孔子教子路以正卫之父子君臣之名分岂积与广之谓邪又云古人制律与尺量权衡四器者以相参校以为三者苟亡得其一存则三者从可推也者是也又云黍者自然之物有常而不变者亦是也古人之虑後世其意或当如是然古以律生凡古人之意既知黍之於後世可以为尺岂不知黍之於後世亦可为律而故於其法为相戾乎若如君实之说则是古人知一而不知二也知彼而不知此也又云径三分围九分者数家之大要不及半分则弃之也者今三分四厘六毫其围十分三厘八毫岂得谓不及半分而弃之哉汉书曰律容一龠得八十一寸谓以九分之围乘九寸之长九九而八十一也今围分之法既差则新尺与量未必是也如欲知庶之量与尺合姑试验之乃可又云权衡与量据其容与其重必千二百黍而後可至於尺法止於一黍为分无用其余若以生於一千二百是生於量也且夫黍之施於权衡则由黄锺之重施於量则由黄锺之龠施於尺则由黄锺之长其实皆一千二百也此皆汉书正文也岂得谓一黍而为尺邪岂得谓尺生於量邪又云庶言太常乐太高黄锺适当古之仲吕不知仲吕者果后夔之仲吕邪开元之仲吕耶若开元之仲吕则安知今之太高非昔之太下者此正是不知声者之论也无复议也又云方响与笛里巷之乐庸工所为不能尽得律吕之正者是徒知古今乐器之名为异而不知其律与声之同也亦无复议也就使得真黍用庶之法制为律吕无忽微之差乃黄帝之仲吕也岂直后夔开元之云乎书曰律和声方舜之时使夔典乐犹用律而後能和声今律有四厘六毫之差以为适然而欲以求乐之和以副朝廷制作之意其可得乎其可得乎太史公曰不附青云之士则不能成名君实欲成其名而知所附矣惟其是而附之则可其不是而附之安可哉谚曰抱桥柱而浴者必不溺君实之议无乃为浴者类乎君实见咨不敢不为此譏譏也

再与景仁书

九月二十三日光再拜景仁足下前者妄为书以干聪明意欲就大君子决所疑也退而惧曰房生老儒远来景仁方欲就其名而我难问不置得无罪於景仁乎既又自得曰景仁惟义之从非人之私也我又何惧昨日得所示书然後释然而不我罪而犹我教也幸甚幸甚然其中犹有未察愚意而直以强辩抗之此所以愤愤不得饮默必当自伸者也景仁曰我违群公之议而下与匹士合宜获戾於朋友此何言也光虽不肖岂肯教景仁枉道上同以取容哉顾所论何如耳论苟是欤虽褐寬博当从而事之论苟非欤虽万乘之君滋不受也若以为彼贵人也论虽是当非之此寒士也论虽非当是之亦非中正之道光所不为也景仁曰如光之说以

尺生律汉书不当先言本起黄钟之长而後论用黍之法是大不然光非谓太古以来律必生於度也特以近世古律不存故返从度法度求之耳安得不谓之度生於黄钟之长邪景仁曰安知今之太高非昔之太下是不知声者之论是则然矣然能知声之正者果谁耶又曰徒知今古乐器之名为异而不知其律与声之同夫古今乐器与声之同光亦知之所不知者今乐之太簇或应古乐之大吕今乐之大吕或应古乐之黄钟则非光所及知也岂徒光耳自非古之神瞽谁适知之景仁曰就使得真黍用庶之法制为律吕无忽微之差乃黄帝之仲吕也夫真黍或可得而律吕不难制若欲求无忽微之差则难矣乃遽以房生之智为与黄帝同亦以褒矣景仁谓光欲成其名而知所附若抱桥浴者光始闻景仁论房生尺则未敢谓之然当时岂前知诸公绌房生之议乎盖景仁欲以此抑之使不敢语宜苟欲立论求是者安避此讥哉避此讥而不为非正直也若乃尺法之可疑者则前书论之已详惟景仁未赐熟察耳光复何言若终如是而不可变则愿附景仁之言以达来世之君子而质是非焉古之朋友无不切磋琢磨以明其道景仁必不罪其不已从而往返不已也

景仁再答书

九月二十四日镇复书君实足下镇岂不知君实者也君实之为人也其性介其言辩其性介故恶不介之名其言辩故能穷物之义理故镇以不介之事加君实以起君实之辩而穷尺律之义理因之以为戏也孔子曰前言戏之耳诗曰善戏谑兮不为虐兮君实何恤而愤愤不得饮默哉来书六百七十有八言而二百五十言及尺律就二百五十言去前书重复者其言无几矣君实之辩义理於此止乎将亦有隐而未发者何其释不介之事多而论尺律之事少也君实以为古者以律起尺後世以尺起律镇以为古者以律起尺後世亦以律起尺前书尽之矣不复言也君实云今乐之太簇或应古乐之大吕今乐之大吕或应古乐之黄钟以为君实所不得知也者岂直君实哉古之神瞽亦不得知也岂直古之神瞽哉古之后夔亦不得知也何哉无律也古者以律而考声也书曰律和声周礼曰执同律以听军声是也前书尽之矣不复言也君实言镇云用庶之法则黄帝之仲吕以为褒庶之智与黄帝侔者非也今农夫治田禾麻菽粟黍稷梁稻以时而布之或耕之或耘之或先种而後敛之或後种而先敛之有过之者曰此后稷之法也农夫之智果后稷乎老婢鑽木取火承以束緼传以薪燎治鸟兽之肉炮之燔之烹之煮之有过之者曰此炎帝之法也老婢之智果炎帝乎医者能知药有陰阳配合子母兄弟根茎花叶金石骨肉有单行者有相须者有相使者有相畏者有相忌者有相反者有相制者又能知人之手足口耳目鼻肤髮心腹肾腸受气之处而疗之过之者曰此神农之法也医者果神农之智乎然则君实之允镇亦未得也君实以为镇不熟察君实之书尚有条目乎幸一一疏示不宣镇再拜

传家集卷六十一

卷六十二

钦定四库全书

传家集卷六十二 宋 司马光 撰书后五

与王乐道书【元丰三年八月作】

昨日光退与郭秀才再三评议乐道所苦盖本非大病但药物过分剂衣食不适宜致困惫如此耳光虽不晓医观乐道羸瘠虽甚然精神声气殊未觉衰愿乐道姑自保养勿为过虑凡人之所赖以生者天地中和之气也若不节饮食衣服直以极热极寒踈利之药循环攻之使中和之气何以自存乎况今乐道之疾上热下寒服凉药则热未去而寒益甚服温药则寒未减而热益加然则所服之药皆有损而无益也光愚欲望乐道尽屏去诸药【必不得已止服参苓之类扶助胃气可也】只调饮食以待病气自退饮食不惟禁止生冷亦不可伤饱亦不可伤饥粟米性温作薄糜如药强服之且有谷气以助养臟府衣服不可过薄亦不可过厚加之弃置万事勿以经怀沈听内视藏心于渊恬淡逍遥归于自然使神安志适骨肉都融则中和之气油然而生如此养之旬月何疾不瘳矣夫欲速则不达半岁之病岂一朝可愈但当去其害之者勿令过与不及俟气血徐徐自复则善矣光夙夜为乐道思之无以出此辄敢献其区区虽其言似迂然收效甚远在聪明详择之

答新知磁州陈大夫【游古】书

正月二十二日涑水司马光再拜复书知府大夫足下光虽未获展际然与令侄公廩相知为日固久近蒙贶书并宠示先相国文集一通三复书文愧汗满颜伏惟先相国閎才茂勲布在竹帛以其余力发挥於文光自为儿未亂时固已诵相国之诗况於今日瞻仰遗文譬如蓬莪生泰山之隅依附而不知其高儵鮒历渤澥之尾游泳而莫测其广足下乃比之扬雄遇明哲君子过矣此岂後进小生所宜当也前岁公廩校正先集欲刻板摹之广传於世光幸以邻居公廩每有一事未明一字未正必垂访问苟浅学所能及者未尝敢有隐也所不能及者亦不敢质而阙之请公廩访诸能者此特磨研编削之比耳岂足为有功於先集哉乃蒙足下勤勤相谢又褒借太过虽增君子谦谦之美顾小人不敏受而有殆无地以自处所幸者得閤藏先集以诒子孙俾转相授受以永其传乃其志也

答范景仁书

近於梦得处连得所赐两书闻泛西湖浮渚水登香菜楼望陞山起居甚适差慰勤想又蒙教以宜观素问病原有疗病导引之方且云铸周鬴汉斛已成欲令光至颍昌就观之虽古之儒者闻善相告见善相示勤勤恳恳殆不过此其幸与感何可胜言但以家兄约非久入洛须留

此待之不可舍去故未敢轻诺徒增耿耿耳景仁所教诚善矣孔子曰盍各言尔志窃不自揆辄敢以所闻养生及治乐之道荐於左右譬犹嘉谷既殖必使佣役从而耘耨之大厦既构必使贱工从而砻斲之然後克成其粹美也景仁可能不鄙而听之乎常记昔者与景仁同在贡院充点检官主文试进士民受天地之中以生论当是时塲中秉笔者且千人皆以为民之始生无不禀天地中和之气也其文辞之美固多矣以愚观之似皆未得刘康公之指常欲私出鄙意而论之因循汨没卒不能就於今三十五年矣因景仁教以养生之道敢试言之康公之言曰民受天地之中以生所谓命也是以有动作礼义威仪之则以定命也能者养之以取福不能者败之以取祸今成子惰弃其命矣盖所谓生者乃生存之生非始生之生也夫中者天地之所以立也在易为太极在书为皇极在礼为中庸其德大矣至矣无以尚矣上焉治天下下焉修一身舍是莫之能矣就其小小者言之则养生亦其一也何以知之夫人之有疾也必自於过与不及而得之陰阳风雨晦明必有过者焉饥饱寒燠劳逸喜怒必有偏者焉使二者各得其中无疾矣陰阳风雨晦明天之所施也饥饱寒暑劳逸喜怒人之所为也人之所为苟不失其中则天之所施虽过亦弗能伤矣木朽而蝎处焉肉腐而虫聚焉人之所为不得其中然後病袭焉故曰养备而动时则天不能病也是以圣人制动作礼义威仪之则所以教民不離於中不離於中所以定命也能者则养其中以享福不能者则败其中以取祸是皆在己非在佗也诗云人而无礼胡不遄死记曰人有礼则生无礼则死人无礼则失中失中则弃命矣刘康公所以能知成肃公之将死盖用此道也彼素问病原之说虽佳恐漫汗支离不若此道之为明且约也昔者圣人造次而动不爽於和纵心所欲不失其中施之於身则有余矣将以教天下垂後世则未能也是故调六律五声八音七始以形容其心制吉凶宾军嘉礼以轨物其德使当时及後世之人虽四海之远千载之久听其乐则洋洋乎其心和常若圣人之在其上循其礼则肃肃然其体正常若圣人之处其旁是以大夫无故不撤簋簠士无故不撤琴瑟朝夕出入起居未尝不在礼乐之间以收其放心检其慢志此礼乐之所以为用也周室既衰礼缺乐弛典章亡逸畴人流散律度量衡不存乎世咸英韶護不传乎人重以暴秦焚灭六籍乐之要妙存乎声音其失之甚易求之甚难自汉以来诸儒取诸胷臆以亿度古法牵於文义拘於名数较竹管之短长计黍粒之多寡竞於无形之域讼於无证之庭迭相否臧纷然无已虽使后夔复生亦不能决彼周黼出於考工记事非经见是非固未得而知如汉斛者乃刘歆为王莽为之就使其真器尚存亦不足法况景仁复改其制度恐徒役心力费铜炭而已孔子曰礼云礼云玉帛云乎哉乐云乐云钟鼓云乎哉今先王之乐余音遗文既不可得而睹闻矣盍亦返其本乎乐记曰礼乐不可斯须去身致乐以治心则易直子谅之心油然而生矣易直子谅之心生则乐乐则安安则久久则天天则神天则不言而信神则不怒而威致乐以治心者也致礼以治躬则庄谨庄谨则严威中心斯须不和不乐而鄙诈之心入之矣外貌斯须不庄不谨而易慢之心入之矣乐也者动於内者也礼也者动於外者也乐极和礼极顺内和而外顺则民瞻其顔色而弗与争也望其容貌而民不生易慢焉此乐之本礼之原也夫乐之用不过於和礼之用不过於顺二者非徒宜於治民乃兼所以养生也如某者虽知之常病未能行之今老矣犹庶几强勉而学焉以养其余生亦愿景仁共勤此道捐其末求其本舍其流取其原致乐以和其内致礼以顺其外内和则疾疹不生外顺则灾患不至疾疹不生则乐灾患不至则安既乐且安志气平泰精神清明畅乎四支浹乎百体如此则功何以不若伶伦师旷壽何以不若召康卫武医经病原皆可焚周黼汉斛皆可销矣景仁以为何如哉抑礼乐乃天地人之大伦自古大贤君子尚不敢轻议而狂简小子辄妄言及之是宜得诛絶之罪於圣人赖

景仁之知我如鲍叔之知管仲也不以为僭不以为狂庶几有可采择於其中焉

景仁又答书

某启辱书言考工记及刘歆所铸斛并素问病原不可不复窃谓舜巡四岳则同律度量衡孔子曰谨权量四方之政行焉以是知圣人之於尺量权衡恃以为治者而尺量权衡必本於律律必有声以考其和此乐之所由作也周之黼汉之斛其法具存魏晋以来其尺至有十五种盖由横黍纵黍所为而不禀於律也然卒不能作乐止用旧声终唐之世无变改者至周王朴始用魏晋所弃之法遂以仲吕为黄钟太祖皇帝患之特下一律仁宗皇帝留意数十年终无所得及上仙太皇犹以李照胡瑗所铸铜律置神御前然李照以纵黍累尺与今太府其律又应古乐而钟磬才中太簇是乐与律自相矛盾也胡瑗之乐君实详知之此不复云前岁议乐按太常鐸钟皆有大小轻重非三代不能为然最大者今为林钟而仲吕乃居黄钟子位考之正差五律与前後言者相符虽经镌凿尚可补治若以大小次之必得其正近又用李照之乐则不若仲吕之愈也何则太簇商声宋子京所谓君实寄於臣管是也是大不可又况十二律皆有清声花日新撰谱与郑卫无异而以荐郊庙可乎考工记世以为汉儒所为汉志载刘歆之说多所牵合某亦於二书深疑之近因黼斛考其制作不复疑矣又知太府之尺与权衡皆古之禀於律者惟量出於晋魏之贪政与律不合须君实面言乃悉窃以为论此者今世无如吾二人讲求问难之多而且久也得君实来協同其说以破千余年之惑为後世之传则吾徒事业固亦不细矣难兄若朝夕来不敢奉邀候归陝岁首垂访春中却同入洛幸也刘康公论极佳此诚非举人之所能到然素问专主於医非黄帝莫能为者某至颖昌已再读矣须有所得恨读之之晚病原乃申素问之说易为观覽若君实不倦亦不可忽於身大有所益圣人之於後世如此但恐未可焚烧黼斛费铜炭则然亦不可错弃恃念不宣某再拜

与范景仁第四书

某启近领正月十二日书续又领所赐论医及乐书教诲勤勤感藏无已医书固难测素问巢源在其中最精奥诚如所谕光前书所云者非敢废弃之也窃谓医书治已病平心和气治未病冀景仁既得其本则未可焚也然谓素问为真黄帝之书则恐未可黄帝亦治天下岂可终日坐明堂但与岐伯论医药鍼灸耶此周汉之间医者依托以取重耳古律既亡胡李之律生於尺房庶之律生於量皆难以定是非光为景仁言之熟矣今不复云权量虽圣所重又须更审法制修废官然後政行於四方恐未可专恃以为治也又今之权量未必合於圣人之权量也夫中和乐之本也锤律乐之末也本巧也末规矩也虽不尽善犹能成器若规不规矩不矩虽使良工执之犹将惑焉光是以愿景仁销新铸之黼斛不欲使传於後世万一有知乐者音律既合於古矣不幸得景仁之器考之而不合反以自疑曰景仁贤者岂肯作器以误我更惑於其所学矣此光之所大惧也望景仁察之数日来顿喧洛城花卉如锦家兄已到光未可离此景仁既许来千万勿食言也

景仁答第四书

人来得二月十六日手书承体候已就平复不胜喜慰又云平心和气以治未病君实之心未尝不平其气未尝不和而不能治未病某窃恐所有之乐如议之乐尔医与乐皆出於黄帝岐伯乃当时之工也圣人立法之时不可不如此周悉其书不若虞书周汉间依记以取重者亦然也尺量权衡亦起於当时何则已有律至虞书同律度量衡舜虑四方而此三物者不稟於律则风俗不可以统同故每岁巡於方岳下考而齐一之安得为不恃此以为治今之尺乃古之尺今之权衡乃古之权衡前年以古乐声为黄锺长九寸三分损一为林锺长六寸律皆围九分黄锺积实得八百一千分三分损一林锺得五百四十分十二律皆如此率而其声協此乃增律之一寸以为尺岂生於量也与今之太府尺正同又以黄金方寸得一斤乃知太古权衡皆古法也惟量比律十三分二之大此盖出於魏晋以来贪政也即以所制律考太常鐃钟未位最大者乃应黄锺子位中者应仲吕前後人言高五律者不虚矣古者十二锺皆有大小犹十二律之有长短也犹觚斛之有轻重也以律之径三分至觚之方尺圆其外之百三万六千八百分斛之方尺圆其外庀旁九厘五毫之百六十二万分皆无差也律者乐之本也钟鼓云乎哉盖病後世专事钟鼓而不知本也刑名之书谓之律者取此也五刑之属三千其罪之大小情之轻重苟不以律则不得其当犹无律而定乐也胡先生律围十三分三厘八毫者八围九分者一围八分四厘者一围七分九厘五毫者一外有损益而内无损益何也为声之不協此也黄锺之律短也黄锺之律短者由以尺而生律也君实若不见过一观觚斛某惧後世待君实为执一而不变人也非所闻之君实也

与景仁第五书

光启范朝散来领二月二十三日及晦日两书所云递中书未尝得盖二十三日书即是也夫治心以中此舜禹所以相戒也治气以和此孟子所以养浩然者也孔子曰爵禄可辞也白刃可蹈也中庸不可能也然则中和者圣贤之所难而来示谓光心未尝不平气未尝不和犹不免於病此言过矣以光方於古人乃下之下者也於圣贤之道曾不能望其藩篱然亦知中和之美可以为养生作乐之本譬诸万物皆知天之为高日之为明莫不瞻仰而归向之谁能跂而及之耶曩所以荐於左右者欲与景仁龟勉共学之尔安能遽入其域邪至於景仁去冬为酒所困发於耳发於牙是亦过中之所为也又云今之尺乃古之尺今之权衡乃古之权衡惟量比所为律十三分二之大此无他出於魏晋以来贪政也光为尺量权衡自秦汉以来变更更多矣今之尺与权衡岂得犹是先王之所用邪彼贪者知大其量以多取人谷岂不知大其尺以多取人帛大其权衡以多取人金乎且尺量权衡公私所其用也敛之以大量则给之亦以大量贪者何所得乎此则衆人共知其不然明矣黄金方寸其重一斤恐亦?今之尺与权衡言之尔唐自安史之乱雅乐工器什不一存逮於黄巢荡无子遗有殷盈孙者更案考工记始铸鐃钟十二五代用之周世宗更命王朴考正其音後今以景仁律验之在未位者已中黄锺则是太常鐃钟下七律也不知何故反以为合又景仁所谓律与觚斛之分数光未甚解岂非语其容受耶景仁亦以千二百黍为一龠则二百四十万黍为一斛以今斛槩之何啻大十三分之二耶此皆愚所不及非面议莫能尽也曩谓景仁必入洛庶得相与极论养生作乐之本今景仁既不来光又不得往鬱鬱之志殊未便也

景仁复第五书

某复书君实足下辱手书言中和之难诚是也礼云致中和天地位焉万物育焉言帝王中和之化行则阴阳和动植之类蕃非为一身除病而禁医书也孟子养浩然之气荣辱祸福之不能动其心非除病之谓也某向之病诚由饮食过中是饮食过中非中和也尺与权衡合於律惟量为三分之大自魏晋自秦汉俱不载於书不可知也大敛之大给之亦不可知也古有什一之税而鲁什二汉什五秦大半皆大敛也不必大其量是也亦恐便於用而致然尔今尺合於律权衡合於律而觔斛之轻重合於权衡尺之方深合於量又与古乐声正同所谓量者一律之容为一龠千六百四十龠为一觔百三万六千八百分之实也二千龠为一斛百六十二万分之实也自古至今黄金无变者尺之法权衡之法不可变亦犹是也其数与声与尺与权衡皆禀於律独量为不禀必有自来矣不见於书所以疑其自魏晋也以胡先生乐书考之乃知其律短而声高君实不求此而袭先儒之误乃云未甚解觔斛之分者正以此也君实深於筭请自律分推而至於权衡尺量则涣然无疑矣求位最正者曰林鍾自六月至十一月则黄鍾位也非有七律子位中者曰仲吕自十一月至四月则仲吕位也前所谓各高五律非谬矣太常鑄钟恐非盈孙所为是时尺法亡久矣安得如考工记有大小轻重之法乎故曰非周以前莫能为者累谕议不决时以汉书脱文及隋书所载先儒之误非君实误也更详思之

与范景仁论中和书

光再拜自四月来连於梦得处领三书以无的便久未之报惟景仁必能察其非惰慢也来书主觔斛论甚确光寡学於鍾律实所不解不足以辨是非臯者互相攻难聊资戏笑耳今若喋喋为报乃是求胜而强相加争言而竞後息非素志也且置是论至於中和为养生作乐之本此皆见於经传非取诸光之胷臆不可忽也诗云呦呦鹿鸣食野之苹鹿得美草犹呼其类共食之况君子得美道可不告其执友而共学之乎何光区区仰告之勤而景仁却之之坚曾不熟察也来示云致中和天地位焉万物育焉言帝王中和之化行则阴阳和动植之类蕃非为一身除病也夫和者大则天地中则帝王下则匹夫细则昆虫草木皆不可须臾离者也岂帝王则可行而一身则不可行耶人苟能无失中和则无病岂待已病然後除之邪夫养生用中和犹割鸡用牛刀所益诚微然生非中和亦不可养也譬如用勺水涤一器景仁见而责之曰夫水所以浮天载地生育万物汝何得用之涤器如此则可乎不可乎又云孟轲养浩然之气言荣辱祸福不能动其心非除病之谓也夫志气之帅也苟不以中和养其志气能浩然乎苟气不浩然则荣辱祸福交攻之终日戚戚陨获充诎能无病乎孔子曰仁者壽又曰大德必得其壽彼仁与德舍中和能为之乎又云向之病诚由饮食过中是过饮食之中非中和也光诚愚不知饮食之中非中和更为何物也光所以愿者欲景仁举措云为造次颠沛未始不存乎中和岂於饮食独舍之乎此则尤所不解也夫中和之道崇深阔远无所不周无所不容人从之者如鸟兽依林去之者如鱼虾出水得失在此於彼奚损益焉而光重复反覆言之犹嘘温以助春吹寒以佐冬徒自困苦夫何为哉正身遇所忠爱不能自默耳夫已自未能力行而遽以强人此孔子所谓道听而涂说宜人之不见信也然景仁明如离朱中和之益着於南山岂景仁所不能睹哉或者偶未之思耳臯者所蒙教诲何敢忘之但承其意不承其术谨当熟读中庸以代素问巢原熟读乐记以代考工记律历志庶几有得於桑榆启发其端皆自益友之赐也至幸至幸至感至感不宣光再拜

景仁答中和书

君实示谕在书为皇极在礼为中庸在天为中和在人为中和天不中不和则病人人不中不和则病天此所谓天人相与之道也孔子大圣不能救周之衰孟子养浩然之气至大至刚不能救战国诸侯之乱何则无位也若夫闾巷之间数十百家同一日时无贫富贵贱贤不肖或病或死此所谓天病人也天病人者人病天也岂一人之身所致哉有位者之职也君实体孔孟之道者家居而欲天地位焉万物育焉难矣哉语曰子疾病孟子曰昨日病今日愈是病亦不能除也乐议终未见果决续附三篇皆前议阙者幸详覽焉

与景仁再论中和书

光启许人至得五日所赐书承气体休佳至慰至喜示谕孔子孟轲亦病凡议论者以此所有佐彼所阙以此之是变彼之非告之以忠进之以直彼当察之以公受之以虚若馈献之相交贸易之相资各得所求故可贵也光前献乐议景仁已拒之今献中和之论又不售若墨翟守千仞之城以待勅敌使光何自而入焉夫聚财异於用兵用兵则贵必胜聚财则贵多得今光屡有所献皆不克纳借使光服其不胜然於景仁亦何得哉岂可徒竞无穷之辞请亦置是论处暑以来天气顿凉望慎护自爱而已

景仁再答中和书

以律生尺黄帝之法也以尺生律蔡邕及魏以来诸儒之误也邕又谓铜律为铜龠君实以邕及魏晋以来诸儒之误见贶某报以黄帝之法岂非谅直而忠告者邪至若人有生而中和者有生而暴戾者生而中和得礼乐以辅导之则为贤为圣以至於神而不可知生而暴戾得礼乐以教训之则为善良为贤才矣不得礼乐则遂为恶人不可悛革者也至於天地位万物育要须见在位设施之如何某以所有以所是奉献而君实略不虛以受之遽欲置是二说二说皆未可置必是非定乃已然後为公而不竞於为强辞也

与范景仁第八书

来论云以中和作乐及养生之议未可置必是非有定乃止此议上有先圣下有来哲是非必有所定若但以笔舌相攻则光与景仁借令有老彭壽是非何时而定耶是以置之昨在乡里作絕四及致知在格物二论辄敢錄呈有不合於理处更告景仁攻难庶得求其是而从之勿以前不受教遂弃之也

景仁复第八书

皇佑中与君实官太常同议大乐阮天隐胡先生深诋李照非是最後房庶来又言二人者亦非是何则以尺而起律也又谓王朴之乐高五律已而依庶之说令制尺律龠三种而律才下三格与李照同是时朝廷特授庶一官罢归庶亦自黜其言之不中然君实初与胡阮非李照

者近时又以前史不可刊今按前史抵误献十条才録七条以呈请详观之於义理可刊不可刊大抵吾侪读经史经有注释之未安者史有谈録之害义理者或为论或为辩以正之所以见为学之志而示於世注者子是也今夫乐自太祖病之太宗真宗仁宗讲求之至必欲救正之列圣之所拳拳者盖以礼乐治国之大而不可一日慢况乐之太簇为黄鍾宫商易位哉君实今所主是前与胡阮非之者君实前非李照今复主之岂未思之邪王朴乐某亦同房庶非之虽高五律君臣民事物不相干今复欲用之照乐得也胡瑗所作比王朴下半律仲更尝言之君实已悉李照之乐声虽发揚又下三律然君臣民事物皆失其位不可不深念之

与范景仁第九书

闻景仁欲奏所为乐此大不可恐为累非细是非未论或招悔吝尚可举措所宜慎惜也区区之愚尽托寻叟布之左右愿垂识察光宁可为景仁屈服景仁所论为是光所论为非不愿景仁上此奏也且景仁所论果是但存文字传於後世必有施行之时何必汲汲自荐於今日也切告切告不可不可

景仁复第九书

义有轻重事有取舍悔吝举措轻也可舍也乐重也不可不奏前年定乐乐工有言其非者朝廷鞭配之乐之误不及匿名事又一救得其义与悔吝取舍孰为重哉

景仁又复书

郊坛设黄道午陛执政大臣及从官赞引初献而引亚献终献可乎误则百官瞻望以为何如天地神祇宗庙社稷之灵以为何如此礼之失易见者也况乐隐奥而律吕君臣自有上下次序失则又不能知而天地神祇宗庙社稷亦见之矣以是而思不可不论重焉

与景仁论积黍书

六月中於梦得处连辱两书自尔以通监欲进御结絶文字日不暇给以是阙然久不修报计景仁虽恠之必知其非疎怠也光与景仁自皇佑中论乐迄今三十年笔舌往返前後非一今更欲竭肺肝以仰告亦止於陈言重复祇增烦瀆无益於析理也然景仁今书所诘责者亦不可不略自辨来示云光与胡阮前非李照今又复主之光曩时所上闻者正以房庶妄改汉书以就私意谓景仁不宜信而从之近日所上闻者止为景仁以今之太府尺即黄帝时尺恐不然耳至於音律高下素非光所习学实不晓其是非亦不知王李胡阮之相去几律何尝敢不所主有所非邪此则所不敢当也来示云经有注释之未安史有记录之害义理者不可不正此则诚然然须新义胜旧义新理胜旧理乃可夺耳如浴乎沂十月五日星聚东井之类是也至於房庶所改汉书云一黍之起积一千二百黍之广全不成文理岂可遽改旧书邪其余则与景仁之志殊涂而同归景仁以礼乐为治国之大而不可慢光岂以为小而可慢耶景仁吹律吕考钟磬校尺量铸觚斛以求先王之乐光谓先王之乐大要主於中和而已亦犹景仁谓

衣有青赤黄白黑之异光谓主於温而已矣景仁谓食有酸苦甘辛咸之异光谓主於饱而已矣然则景仁岂能全废光之说光岂敢尽不用景仁之论邪彼诸家言乐者各有十二律五音更相是非如五方之人言语不通饮食不同各谓我是而彼非孰能正之从景仁之乐视之则王朴君臣民事物全不相干李照皆失其位使二人复生於今日视景仁之乐未知其云何也若欲知其真是真非必有如伶伦后夔师旷者始能知之耳今既未有其人愿景仁且以所着乐说与光书合藏之以俟後世必有知乐者能辨之也光之言止於此自今景仁复以乐论相示亦不敢对也

景仁答积黍书

某与君实议乐前後几万言不出於以尺起律以律起尺二事为异同尔其余则泛同传记证左而已最先者君实以为房庶改汉书一黍之起积一千二百黍之广八字某以为汉书前言分寸尺丈引本起黄锺之长後言九十分黄锺之长则八字者不可谓庶自为且庶亦不能为也尺量权衡皆以千二百黍在尺则曰黄锺之长在量则曰黄锺之龠在权衡则曰黄锺之重皆千二百黍也岂独於尺而为不成文理乎隋书诸儒之论始以一黍为一分之说若尔则黄锺积实一千二百分而八百一十分者非也自蔡邕不能知谓铜律尺为铜龠尺黄锺万事根本尺量权衡之所亶者而诸儒尺至有一十五种逮今千余年无人是正吾侪业已留意可不为终之乎君实以青赤黄白黑主於温酸苦甘辛咸主於饱谓为某说不然五色者之於衣华於身而已五味者之於食适於口而已乌取於温饱而云乎哉见君实议乐正如是矣王朴之乐君臣民事物全不相干以仲吕为黄锺而次比之知其然也李照之乐皆失位者以太簇为黄锺而次比之知其然也此非面陈不可持国约石淙相见至时亦当一往以究其说君实云必有伶伦后夔师旷始能知之某以为三人亦不能知何则无律也书云律和声礼云吹律听军声传云虽有师旷之聪不以六律不能正五音故知三人者有亦不能知之无律故也君实云示谕七条或然或否不知何者为然何者为否请一疏示当为修改某谓太府尺为黄帝时尺考李照之律与尺而知其然李照以太府尺纵黍而累之亦牵於隋书之说也然其乐比其律高三律律是而乐非也何以知今之尺是黄帝时尺以黄帝之法为律以起尺十二律内外皆有损益其声和而与古乐合以为龠斛而其分数其轻重又与周官汉斛铭并同无毫厘之差以此知太府尺太府权衡皆黄帝时物也其法与黄帝之法同起於律也隋谓之开皇官尺历唐以至於今者谓隋唐尺则人皆信之谓黄帝时尺则皆骇矣自隋以来至唐以及五代最为乱世而此物不变则自秦至三代至五帝而上黄帝又何疑哉千岁之日今日是也谨此复命

又小简

乐为小事为大事王朴李照胡瑗三家君实不决是非是慢而小之也但看今之君臣民事物可知之往年孙宣公冯章靖宋之京非李照乐乃召阮逸胡瑗房庶令修之君实当时与胡阮同非李照者今所用乃李照乐君实云不改何也持国大地失脚正可以君实中和乐呼之五方之人言语不通信然至於歌乐则一岂有我是而彼非君实之言可全废某之言不可不尽用何则盖无不是也古人之皆不到也十二律皆有损益而和也岂不为新义胜旧义新理胜

旧理乎所恨至是未有人是之

景仁答中和论

中庸曰中者天下之大本其传曰中为大本者以其含喜怒哀乐礼之所由生政教自此出也某以为中者对外而为言也君实曰中皆不近四旁之名也指形而言之则有中有外此书以中庸为名所指者盖德也非形也某以为心者在身之中有知而无形者也请以堂论之身形也犹堂也对外而言则举堂之内皆中也若以不近四旁为中则堂之中又有中焉非所谓舍藏之中乃得中之中也君实又曰喜怒哀乐之未发既谓之中则及其既发当谓之外某又以为发者由中出者也出而中节非外而何亦何必曰外又如君实之说此书以中庸为名指德而言则有中有和若然则经当云喜怒哀乐之未发谓之中发而皆中节谓之庸也此书虽以中庸为名至於左右其说始终其义不害旁有证援也君实不喜老庄及辅嗣之说不敢复有称引今直以本篇义明之经曰诚者天之道也诚之者人之道也诚者不勉而中不思而得从容中道圣人也诚之者择善而固执之也故有博学审问慎思明辨之说君实又曰曷若治心养气专以中为事动静默语未尝不在乎中此正所谓择善而固执之诚之者也至於不勉而中不思而得从容中道岂治心养气者所能办哉所谓诚者非别有一物也但诚其心而已矣心至於不勉不思而中道至矣譬如钟大叩之则大鸣小叩之则小鸣以其中虚也大小自外而至者也钟岂预设小大於中而应之哉所谓过与不及者亦因时称事而为之中也时有异变事有异宜亦岂可预设中於心而待之也荀卿大学君实之所信也其论心不过曰虚曰静曰定虚静定虽非兀然如木石亦岂可形容哉孟子曰操则存舍则亡出入无时莫知其乡惟心之谓欤亦言心之无定在也书曰惟精惟一允执厥中盖言心能精一则信执其中也君实既以大本之中便为无过与不及则其下岂当复云发而皆中节也经云惟至诚为能尽其性尽其性则能尽人之性尽人之性则尽物之性尽物之性则可以赞天地之化育然则位天地育万物盖圣人得位者之所能也孔子曰予欲无言天何言哉四时行焉百物生焉此圣人有其道无其位者也经之末又引子曰声色之於化民末也诗曰德輶如毛毛犹有伦以毛为犹有伦则又明以上天之载无声无臭则圣人之心之德与天地参矣但可以意通而不可以形得也今夫穹然而体高苍然而色正者天之形也雷风日月山泽为天之用者圣人深拱法宫其迹则百官承序万物乐生究其用盖有不可见者矣易曰形而上者谓之道形而下者谓之器语器则自天以下皆器也语道则不可见者皆道也孟子曰大而化之之谓圣圣而不可知之之谓神非立天下大本者其孰能与於斯愚故曰明乎此者其见天地圣人之心乎

韩秉国书

维后春气斗温伏惟动止安和相见之期竟未有定殊增耿耿见与景仁书似恠鄙拙论议於公有所未尽者向读中和论疑中字解释未甚明然未敢决然以为非也今试妄言烦公一阅是非幸复垂谕以解愚蔽胷中所欲言者非可以书尽惟冀自爱重而已谨手启不宣

秉国论中和书

中之说有二对外而为言一也无过与不及一也喜怒哀乐之未发漠然无形及其既发然後见其中节与不中节也故喜怒哀乐之未发谓之中发而中节谓之和人之心虚则明塞则暗虚而明则烛理而无滞应物而不穷喜怒哀乐之发有不中节乎中节则无过与不及矣有不和乎在易之卦虚其中曰离为日为南方为火王弼解复其见天地之心云天地以本为心者也雷动风行运变万化寂然至无是其本也春萌夏长秋落冬闭日月之行星斗之运此天地之迹可见於外者也张官置吏发?施令事功之修举民物之茂遂此圣人治天下之迹可见於外者也若其所以迹者盖莫得而拟议也凡物莫不有此本又衆本之所自出故曰大本凡物不得其节则过与不及施於用则为蔽塞为睽乖为不行为患难无此四者和矣故曰达道明乎此者其见天地圣人之心乎

传家集卷六十二

卷六十三

<集部,别集类,北宋建隆至靖康,传家集>

钦定四库全书

传家集卷六十三 宋 司马光 撰书啓六

答韩秉国书【元丰八年二月二十九日作】

光啓丁通直来蒙贶书审起居安和至喜示谕见与景仁书似恠论议有所不同此何言哉朋友道废久矣光述中和论所以必欲呈秉国者正为求切磋琢磨庶几近是耳岂欲秉国雷同而已雅闻秉国有论光不胜其喜故因景仁请见之何谓恠也然光至愚於秉国之论犹有所未達者请试陈之惟秉国择焉秉国云中之说有二对外而言一也无过与不及一也此诚如谕然中者皆不近四旁之名也指形而言之则有中有外指德而言之则有和此书以中庸为名其所指者盖德也非形也如秉国所谕则中庸应云喜怒哀乐之未发谓之中及其既发谓之外不则云喜怒哀乐之未发谓之虚发而皆中节谓之和乃相应也秉国又云虚则明塞则暗此诚如所谕然所谓虚者非空洞无物之谓也不以好恶利害蔽其明是也夫心动物也一息之间升天沉渊周流四海固不肯兀然如木石也惟贤者治之能止於一择其所止莫如中庸故虞书曰惟精惟一允执厥中也凡人固有无喜怒哀乐之时当此之际其心必有所在小人则追求嗜好靡所不之惟君子能自处於中庸之地不动以待事也大学曰知止而後有定定而後能静静而後能安安而後能虑虑而後能得又曰为人君止於仁为人臣止於敬为人子止於孝为人父止於慈与国人交止於信言所止各有在也荀子曰德操然後能定能定然後能应能定能应夫是之谓成人亦言所定在於德也又曰人何以知道曰心心何以知曰虚一而静心未尝不藏也然而有所谓虚不以所已藏害所将受谓之虚心未尝不两也然而有所谓静不以梦剧乱知谓之静然则虚者固不为空洞无物静者固不谓兀然而木石也凡曰虚曰静曰定云者如大学与荀卿之言则得中而近道矣如佛老之言则失中而远道矣光所以不好佛老者正谓其不得中道可言而不可行故也借使有人真能独居宴坐屏物弃事以求虚无寂灭心如死灰形如槁木及有物歛然来感之必未免出应之则其喜怒哀乐未必皆能中节也曷若治心养气专以中为事动静语默饮食起居未始不在乎中则物虽辐凑横至一以中待之无有不中节者矣秉国又引王辅嗣解复其见天地之心以证虚无为衆本之所自出夫万物之有诚皆出於无然既有则不可以无治之矣常病辅嗣好以老庄解易恐非易之本指未足以为据也辅嗣以雷动风行运变万化为非天之心然则为此者果谁邪夫雷风日月山泽此天地所以生成万物者也若皆寂然至无则万物何所资仰邪天地之有云雷风雨犹人之有喜怒哀乐必不能无亦不可无也故易曰云行雨施品物流形诗曰君子如怒乱庶遄沮君子如祉乱庶遄已但动静有节隐见有时不可过与不及过与不及皆为灾害必得中然後和和然後能育万物也自有天地以来阳极则陰生陰极则阳生动极则静静极则动

盛极则衰衰极则盛否极则泰泰极则否若循环之无端万物莫不由之故曰一陰一阳之谓道此皆天地之心然复者阳生之卦也天地之大德曰生故圣人赞之曰复其见天地之心乎言天地之道虽一往一来本以好生为心也易道幽深而辄敢妄为之解其罪甚大亦不自识其是与非也抑求之空言不若验之实事窃闻秉国平日好习静光不胜区区愿秉国试辍习静之心以为习中之心动静语默饮食起居皆在於中勿须與离也久而观其所得所失孰少孰多则秉国必自得之矣岂待光之烦言哉愚虑如此所不及者不惜更示不宣光再拜

答秉国第二书【元丰八年三月十五日作】

光啓辱四日所惠书诲以所未谕幸甚幸甚书文甚多援据甚广光欲一一一条对则恐逐枝叶而忘本根徒费纸割视听无益於进道是宜直指其大要而言之今光与秉国皆知中庸之为至德而信之矣所未合者秉国以无形为中光以无过与不及为中此所谓同门而异户也夫喜怒哀乐之未发常设中于厥心岂有形於外哉荀卿太学所谓虚静定者非寂然无思虑也虚者不以欲恶蔽其明也静者不以忧迫乱其志也定者不以得丧易其操也中庸所谓中者动静云为无过与不及也二者虽皆为治心之术其事则殊矣今秉国合而为一恐未然也周公思兼三王以施四事有不合者仰而思之夜以继日孔子终日不食终夜不寝以思道岂得寂然无思虑哉苟为不思又不虑直情径行虽圣人亦恐喜怒哀乐不能皆中节也中庸所谓诚者天之道言聪明睿智天所赋也诚之者人之道言好学从谏人所为也不勉而中不思而得从容中道谓圣德之已成者也择善而固执之博学审问慎思明辨笃行谓贤人之好学者也人一能之己百之谓愚者之求益者也夫不历块堦不能登山不沿江河不能至海圣人亦人耳非生而圣也虽聪明睿智过絶於人未有不好学从谏以求道之极致由贤以入於圣者也故孔子曰我非生而知之好古敏以求之者也又曰吾十有五而志於学至於七十然後从心所欲不踰矩以孔子之德性犹力学五十有五年乃能成其圣况佗人不学而能之乎若谓圣人生知自天必不可及则顔子何为欲罢不能孟子何为自比於舜哉舜戒羣臣曰予违汝弼汝无面从使舜生而圣不勉而中不思而得夫又何弼哉诗称文王不闻亦式不谏亦入言其性近於道处师弗烦在传弗勤非谓不学而不谏也光前书论中已备矣恐秉国尚未详览而熟察也光前书云愿秉国动静语默饮食起居皆在於中勿须與离也久必自得之秉国亦尝留意采其言乎今有人馈食於吾二人者吾二人未尝而先争之一人曰咸一人曰酸曷若相与共尝则知其味矣又有馈药於吾二人者吾二人未服而先争之一人曰寒一人曰温曷若相与共服则知其验矣中美食也良药也光愿与秉国强勉而试行之师旷曰秉烛之明孰与夜行吾人虽老矣继今而学犹庶几其有益也往来之言奚以多为

答两浙提举赵宣德书

光顿首再拜比见邸报闻先大资少保违去盛世惊怛惋痛衷怀如割以道远无便无由发疏致慰昨晚兵人来忽辱示问并郑君所为行状欲令光作志文光实何人望先公名德何啻倍蓰什百曩获接待之久蒙知顾之厚今得论譔盛美自托不朽何幸如之顾以光不为人作碑志已十余年所辞拒者甚多往岁有孙令以书见属欲令光譔其伯父之翰碑光时复书叙不可为之故颇详是後又辞王乐道曾子固等数家皆以此书呈之去年富公初薨光往吊酹其

孤朝奉在草土中号哭自擲必欲使光作墓志又遣人来垂谕至于三四光亦以所以语孙令者告之竟辞不为今若独为先公为之则是有所轻重厚薄足下试以尊意度之谓光敢为之乎不敢为乎此则不待光辞之毕足下必尽察之矣况先公清节直道着於海内皎如列星决不沉没佗年所以取信於世者在国史列传岂待光鄙陋之文然後彰彰乎然方今羣公文章高出於衆议论为人所信者何可悉数足下不求於彼顾遣使者自衢至洛走数千里专以相委荷雅意期待如此之重乃敢仰违尊命俾使者虚返其为罪戾擢发有余所冀大君子聪明通恕知其非可为而不为也慙慙恐悸言不能尽

答武功石令飞卿书

光啓县人来蒙示啓事千余言大指以为明天子在上宜以时起佐万一以泽斯民不宜专务自逸何足下期待之过而责望之重也捧读战慄流汗及踵光闻君子拟人必於其伦仲尼圣人也自生民以来未之有也而足下语及不肖动辄以仲尼况之此虽甚愚不辨菽麦之人亦不敢当无乃重增不肖之罪而为足下失言之累乎不可不可光自惟德行文学言语政事一无所长在稠人间仅及下中但事君不敢欺得官非智力所任者不敢轻受此固为士者之常守无足言者而世俗闻阁之人遽相与惊恠从而誉之光闻之每蹶踖发慙不自知其何以致之盖所谓名浮於实者也性慙滯不晓时务比又苦衰疾不堪治民遂自乞冗员苟窃微禄以庇身养族天子怜其无佗恶直不才耳而尝历事三朝今虽昏耄无所用不忍弃捐俸之掌留台道宫月给钱粟而不责以职事如疲牛老马尚以莖豆饲之不求其任重致远脱其絛鞅纵之林野使之徜徉自适以尽其天年此乃天子至仁虽天地之覆载沧海之涵容未足以谕而草木鱼虫无一毫之益以报盛德乃光有负於朝廷而朝廷实无负於光也光岂敢养高傲世钓名邀利邪光胷中何所有而足下欲迫之使立朝廷佐下风邪且明天子在上进贤退不肖褒勤黜惰皆决於掌握为人臣者身非已有如金在熔泥在钧惟甄冶之所为用舍进退岂得自专邪窃恐足下误信世俗之谈而有是言也愿勿以骥驥之皮蒙驾驢之背而策之使一日千里幸甚幸甚

答怀州许奉世秀才书

五月四日涑水司马光再拜复书许君秀才足下去年十二月怀州人来蒙惠书自尔日欲因王判官寓书报谢俗事汨没继以国丧奔走京师往返殊无暇稽慢之罪固无所逃光性愚鲁自幼诵诸经读注疏以求圣人之道直取其合人情物理目前可用者而从之前贤高奇之论皆如面墙亦不知其有内外中间为古为今也比老止成一朴儒而已屢闻王君具道盛美云道甚高学甚精孝弟隆闺门名义着乡里常延颈企踵瞻仰声采固非一日不意过听遽诒之话言仍示以所述孝睦事迹夫孝弟者仁义之实敦睦者政化之本光以是闕足下之志固不待承顔接辞而後知之矣钦服钦服夫玉韞穷山十仞之土不能掩其光珠潜深渊岸草为之不枯足下姑进德修业但恐大名不免彰彻於世勿病人之不已知也光属受诏守陈不久留於洛王君多沿牒在外今日暂见之来旦复出辄走此布区区草率不悉仍封旧注古文孝经一册容易上呈庶達鄙志光顿首再拜

与吕晦叔简

光啓自晦叔入都及得共事每与僚案行坐不相离未尝得伸恁幅虽日夕接武犹隔阔千里也今不幸又在病告杳未有展覲之期其邑邑可知光平生有国武子之疾好尽言以招人过遇庸人时或妄发以取恨怒况至交益友岂敢反怀情不尽乎晦叔自结发至仕学而行之端方忠厚天下仰服垂老乃得秉国政平生所蘊不施於今日将何俟乎比日以来物论颇讥晦叔慎嘿太过若此际不廷争国事蹉跌则入彼朋矣愿慎?慎旃光诚不肖岂敢以忧国为已任然昨日富家之谕已上闻矣光自病以来悉以身付医家事付康惟国事未有所付今日属於晦叔矣

与吕晦叔第二简

介甫文章节义过人处甚多但性不晓事而喜遂非致忠直踈远谗佞辐辏败坏百度以至于此今方矫其失革其弊不幸介甫谢世反覆之徒必诋毁百端光意以谓朝廷特宜优加厚礼以振起浮薄之风苟有所得辄以上闻不识晦叔以为如何更不烦答以笔札展前力言则全仗晦叔也

答彭朝议【寂】书

光啓辱书獎借太过期待太厚且愧且惧殆无所容光稟性甚愚求道多蔽德行言语政事文章皆不迨人龔龔廉谨自守而已不意时俗妄加虚名如火附萤如膏污衣潜迹湔澣不知所避固微生之不幸未尝敢取以为已有也属者朝廷误赐甄擢俾待罪政府辞不获命僂俛就职每内讼非据如藉蒺藜素与足下未尝得接声采之熟陪从容之久乃能不远数千里教以所不及非光无似克堪大赐乃足下爱君仁民之志勤恳切至不暇择其人之可否而语之也衔荷盛德刻骨不忘谨当宝藏时取伏读以自警策庶几少副万分之一譬如弩马闻骐驎嘶鸣不自量度踴跃踣躅亦欲疾步而从之殊不知轶景遗风虽破骨絶筋而不可及也虽然朝廷近发诏书溥覃四海虽市?畎之民皆得直上封言事足下位为朝大夫任为部刺史於朝政阙失民间疾苦愿不惜以时上闻俟禁中降出得与诸公评议協同者即行之幸甚幸甚光再拜

答程伯淳书

光昨日承问及张子厚諡仓卒奉对以汉魏以来此例甚多无不可者退而思之有所未尽窃惟子厚平生用心欲率今世之人复三代之礼者也汉魏以下盖不足法郊特牲曰古者生无爵死无諡爵谓大夫以上者檀弓记礼所由失以谓士之有谥自县贲父始子厚官比诸侯之大夫则已贵宜有諡矣然曾子问曰贱不谥贵幼不谥长礼也唯天子称天以谥之诸侯相谥犹为非礼况弟子而谥其师乎孔子之没哀公谥之不闻弟子复为之諡也子路欲使门人为臣孔子以为欺天门人厚葬顔渊孔子叹不得视犹子也君子爱人以礼今关中诸君欲諡子厚而不合於古礼非子厚之志与其以陈文范陶靖节王文中子孟贞曜为比其尊之也曷若

以孔子为比乎承关中诸君决疑於伯淳而伯淳谦逊博谋及於浅陋不敢不尽所闻而献之以备万一惟伯淳裁择而折衷之

答吕由庚推官手书

光再啓示谕史院所取文字光前此亦蒙?稟两朝所上章疏光以身今尚存难将谏草内授史官但答云所上疏内多涉朝廷机密不敢辄具録上伏乞朝廷於禁中及中书密院检寻如有可采者乞下史院修纂今来先中丞文字又似不同子孙正当发挥前烈垂之不朽唯於慈壽乞增奉养一事恐当讳避其余言时政阙失弹奏大臣等事今日不録申史院则先公平生事业遂汨没矣更希裁度光再啓

贻刘道原

光再拜光少时惟得高氏小史读之自宋讫隋正史并南北史或未尝得见或读之不熟今因修南北朝通监方得细观乃知李延壽之书亦近世之佳史也虽於襍祥谈嘲小事无所不载然叙事简径比於南北正史无烦冗芜秽之辞窃谓陈壽之後唯延壽可以亚之也渠亦当时见衆人所作五代史不快意故别自私着此书也但恨延壽不作志使数代制度沿革皆没不见道原五代长编若不费功计不日即成若与沈约萧子显魏收三志依隋志篇目删次补葺别为一书与南北史隋志并行则虽正史遗逸不足患矣不知道原肯有意否其符瑞等皆无用可删後魏释老志?其要用者附於崔浩传後官氏志中氏族附於宗室及代初功臣传後如此则南北史更无遗事矣今国家虽校定摹印正史天下人家共能有几本久远必不传於世又校得絶不精只如沈约叙传差却数板亦不寤其它可知也以此欲告道原存録其律历礼乐职官地里食货刑法之大要耳不知可否如何如何光再拜

答范梦得

光前者削奏时将谓宫教二年改官不知新制乃须五年得无却成奉滯否慚悚慚悚梦得来所作丛目方是将实録事目标出其实録中事应移在前後者必已注於逐事下讫【假如实録贞观二十三年李靖薨其下始有靖传传中自鎖告变事须注在隋义宁元年唐公起兵时破萧铣事须注在武德四年灭铣时斩辅公佑须注在七年平江东时擒颉利须注在贞观四年破突厥时佗皆倣此】自旧唐书以下俱未曾附注如何遽可作长编也请且将新旧唐书纪志传及统纪补録并诸家传记小说以至诸人文集稍干时事者皆须依年月注所出篇卷於逐事之下实録所无者亦须依年月日添附无日者附於其月之下称是月无月者附於其年之下称是岁无年者附於其事之首尾【如左传称初郑武公娶于申之类及为某事张本起本者皆附事首者也如卫文公复国之初言季年乃三百乘因陈完奔齐而言完始生筮知八世之後成子得政因晋悼公即位而言其命官得人不失霸业因卫北宫文子聘於郑而言裨谿草创子产润色因吴乱而言吴夫槩王为棠谿氏注云传终言之之类皆附事尾者也】有无事可附者则约其时之早晚附於一年之下【如左傳子罕辞玉之类必无的实年月也假使宰相有忠直奸邪事无处可附者则附於拜相时佗官则附於到官时或免卒时其有

处可附者不用此法】但稍与其事相涉者即注之过多不害【假如唐公起兵诸列传中有一两句涉当时者但与注其姓名於事目之下至时虽别无事迹可取亦可以证异同者日月也】尝见道原云只此已是千余卷书日看一两卷亦须二三年功夫也俟如此附注俱毕然後请从高祖初起兵修长编至哀帝禅位而止其起兵以前禅位以後事於今来所看书中间见者亦请令书吏别用草纸録出每一事中间空一行许素纸【以备翦开粘缀故也】隋以前者与贡父梁以後者与道原令各修入长编中盖缘二君更不看此书若足下止修武德以後天佑以前则此等事尽成遗弃也二君所看书中有唐事亦当纳足下处修入长编耳其修长编时请据事目下所该新旧纪志传及杂史小说文集尽检出一阅其中事同文异者则请择一明白详备者録之彼此互有详畧则请左右采获错综铨次自用文辞修正之一如左传叙事之体也此并作大字写若彼此年月事迹有相违戾不同者则请选择一证据分明情理近於得实者修入正文余者注於其下仍为叙述所以取此舍彼之意【先注所舍者云某书云云某书云云今案某书证验云云或无证验则以事理推之云云今从某书为定若无以考其虚实是非者则云今两存之其实録正史未必皆可据杂史小说未必皆无凭在高鉴择之】凡年号皆以後来者为定假如武德元年则从正月便为唐高祖武德元年更不称隋义宁二年玄宗先天元年正月便不称景云三年梁开平元年正月便不称唐天佑四年也诗赋等若止为文章诏诰若止为除官及妖异止於恠诞诙谐止於取笑之类便请直删不妨或诗赋有所讥讽【如中宗时回波词諠譁窃恐非宜肃宗时李泌诵黄台瓜辞之类】诏诰有所戒諭【如德宗奉天罪己诏李德裕讨泽潞諭河北三镇诏之类及大政事号令四方或因功迁官以罪黜官其诏文虽非事实要知当时托以何功诬以何罪亦须存之或文繁多节取要切者可也】妖异有所儆戒【凡国家灾异本纪所书者并存之其本志强附时事者不须也?记如李淳风言武氏之类及因而?杀戮叛乱者并存之其妄有牵合如水入斗为朱字之类不须也相貌符瑞或因此为人所忌或为人所附或人主好之而谄者伪造或实有而可信者并存之其余不须也妖恠或有所儆戒如?书武三思门或因而生事如杨慎矜墓流血之类并存之其余不须也】诙谐有所补益【如黄幡绰谓自己儿?可怜石野猪谓诸相非相之类存之其余不须也】并告存之大抵长编宁失於繁毋失於畧千万切禱切禱今寄道原所修广本两卷去【此即据长编録出者其长编已寄还道原】恐要见式樣故也甚思与足下相见熟共商榷无因可得企渴企渴中前寄去晋纪八卷写淨草者必已写了其元本却告分付儿子康令带来虽未了亦告分付盖为今夏递往南康军路中遗失却三卷若更失此则都无本故也其写了淨草续附递来不妨彙所请出魏纪今令李永和带去有改动者告指挥别写及楷改目痛灯下作此书恕其不谨光上

凡有人初入长编者并告於其下注云某处人或父祖已见於前者则注云某人之子或某人之孙今更寄贡父所作长编一册去恐要作式樣并道原广本两卷并告存之向去不使却寄示也

三省咨目

光比日牵强入朝欲与诸公商议数事贡其短拙以求采择无何上下马不得须至在朝假谨具咨目如左当今法度所宜最先更张者莫如免役钱不惟刻剥贫民使不聊生人雇得四方

无赖浮民使供百役官不得力为今之计莫若尽罢免役钱依旧差役民间息肩者什已七八若虑逐处利害不同即委诸路转运司及州县具未便事理申陈朝廷更为相度别立一州一县勅施行第一不可委提举司相度彼虽本职藉赖役钱如鱼之有水安肯放免必来沮难无疑也光见欲作一文字奏闻若降至三省望诸公同心叶力与赞成如此行之可以除久弊苏疲民凡法久则难变此法行之已十五年下户虽愁苦上户颇优便常情论议已是非不一若不於此际决志改之恐异日遂为万世膏肓之疾公家不得用民力贫民常苦富民优矣朝廷今欲整治天下苏息疲民先须十八路各得好监司一两人忠厚晓事忧民忘私使之进贤退不肖兴利除害朝廷於本路事有所不知问之则以实对委之措置则不至乖方然後可以倚仗为耳目股肱也苟非其人则百事倒置矣前日所草监司资格及委官荐举文字不知诸公曾徧见未若如此可行则早告进呈施行然立格为易守格为难既出指挥以後愿诸公坚执此格勿自隳坏始为有益也旱势可惧若春更不雨必成大饥不可不豫为之备国家所赖为根本者莫若农民农民者衣食之原国家不可不先存恤也欲加存恤莫若察其乏食之初早加赈赡使各安土不至流移官费既省民不失业此上策也若已流移官虽多作擘画散米煮粥徒聚为饿殍无益也为今之计莫若豫先将常平斛斗在州县者十分中支拨一分充赈贷米委州县桩管许一面支破常切觉察乡村人户有阙食者许经本县投状据口数多少老小出给历子每五七日一次赴县请给口食先从下户为始县亦置簿拘管请却之数如此救接直至成熟日方即一切住支却令还纳所贷元数更不取利息如此始是实惠弋俊已获未闻赏获之者其将官讨捕者不无搔扰宜早罢之前日蔡尹来言开封有巨盗朝廷有募人能禽之者赏以班行今既禽之止赏以钱孔子称去食去兵无信不立圣朝政令岂当如此诸公更筭其多者范景仁当仁宗不豫未有继嗣天下寒心莫敢啓口之时独能首建大议以安宗庙社稷章十九上除官不拜可谓以身徇国之臣其功不在文富之下今文富重赏景仁独不沾及太皇太后亦应知其功大愿诸公进呈秉国文字时详为敷奏乞优与推恩前日帘前宣谕上封事异等者宜畧加旌赏此乃圣朝美事光有看详封事历三卷官职姓名及所言事一一有之愿诸公同於其间选择才识出衆者具姓名敷奏量加褒异以成圣心

密院咨目

光比日曳病入朝只为欲与诸公商议数事於帘前敷奏终不能得聚厅今光饮食日减不能造朝未知几时复得瞻望顔色须至具咨目如左吕大忠言夏虜乍恭乍犇由私市公行故也其延庆侵疆有害无用终当与之然今日未可与也俟大忠到官审察事势先奏乞严禁私市不过年岁间彼必屈服遣人来祈请然後朝廷下诏旷然归以侵疆赦其罪戾自今贡赐往来一切如故此策大善请明公更召见询访其详然如光愚见若只如去夏约束则大是悠悠徒为玩令一无所益须别立法云应汉户熟户与西人私相交易者正犯人处斩妻子送江淮编管粉壁晓示许人陈告即时支系省钱五十贯充赏本地分巡检寨主监押并冲替仍令经畧司本州常切觉察如此逐处行却一两个方能禁絶若西人往年兴兵压境以胁庆州刘忱时亦莫之听但坚壁清野使自疲弊而去河东经畧司总领二十余州军边面千余里地接二边帅府之重孰过於此而以吉甫处之果能称职否且如昨者北敌侵火山地不与於初累石时更令撤去彼若放箭我射何伤仍明据道理紧行文牒痛加诘责云当奏朝廷问诸北朝今朝廷亦不共理会示之以弱但恐春暖敌狃於得志以为南朝易与大兴徒衆广有占割朝廷亦

坐视无如之何土地者国之本若虏惟意所欲无问多少要取便取成何国家此由边帅不能防微杜渐故也渠自乞扬州诸公何不早许之别择老成重厚有胆畧者以代之子厚方欲措置熙河为经久之计而元帅乃一方头目其人岂高材英器忧国忘家者邪愿早易之勿败事御史所言保用罢按阅甚当宜从之彼得三时务农岂顾此微茫赏物而省国用不少但与逐旋置库量留些小金帛遇冬教时委令佐选絶艺者赏以银牒子银盃彩段如何又班行虽云猥贱亦是国家命官岂可如泥土与人其出等事艺及正长教人及分数欲更不与班行【正长所以鞭撻保丁只为未及分数千赏故也】前日见驾部来白沙苑地狭不能容京西所送骡马且彼无牡马徒多养骡马何为但使之积死可惜耳欲令京西未发者皆烙退印还民已发者令沙苑估价出卖如何若可取望早指挥然监牧亦不可不一面早差官相度兴复汉唐都长安故养马多在汧陇三辅之间国家都大梁故监牧在郛郑相卫许洛之间各取便於出入故也今宜且复近处一二监各有旧基故也子厚尝言军赏误何时当与裁减改正边人立小功者宜勿赏此宋璟所以安开元也封事大约已徧止有两复吏云其籤子厚欲有去取既难得会议彼亦无大利害但请子厚欲去者去之余令进入贵早结絶

与三省密院论西事简

不和西戎中国终不得高枕光所上刍蕘果有可采否纵未欲遽以侵地归之且下一诏数其不贺正旦生辰及登宝位臣礼不备谕以天子新即位务崇寛大旷然赦之自今贡奉赐予宜皆复旧规但不责其必来献地分画疆界而已令保安牒与如此则彼此相弥缝且有名又不失大体不乘此际为之万一彼微为边患或更出不逊语愈难处置愿诸公筭其多者

传家集卷六十三

卷六十四

钦定四库全书

传家集卷六十四 宋 司马光 撰论一

功名论【嘉佑二年作】

自古人臣有功者谁哉愚以为人臣未尝有功其有功者皆君之功也何以言之夫地有草木天不雨露之则不能以生月有光华日不照望之则不能以明臣有事业君不信任之则不能以成此自然之道也古者大国不过百里小国半之然皆有贤卿大夫以辅佐其君大者以王小者以霸下者犹能保其社稷世数十传而不絶由是观之天下乌有无士之国哉患在人主知之不明用之不固信之不专耳如是则人臣虽有才智而不得施虽有忠信而不敢效人主徒忧劳於上欲治而愈乱欲安而愈危欲荣而愈辱矣然则人主有贤不能知与无贤同知而不能用于不知同用而不能信与不用同不用贤而求功业之美名誉之白难矣昔百里奚虞人也由余戎人也商鞅魏人也而用於秦苗贲皇申公巫臣楚人也而用於晋伍员楚人也而用於吴韩信陈平项羽之人也而用於汉是五国者非无贤人也主不能知而驱之以资敌国此所谓有贤不能知与无贤同也齐桓公见郭氏之墟问於野人曰郭何故亡对曰以其善善而恶恶公曰善善而恶恶国所以兴也而亡何故对曰善善而不能行恶恶而不能去所以亡也公归以告管仲曰君与其人俱来乎曰否管仲曰君亦一郭氏也公乃召而官之齐景公待孔子曰若季氏则吾不能以季孟之间待之齐王欲中国而授孟子室养弟子以禄万鍾使诸大夫国人皆有所矜式是二君者非不知孔孟之为圣贤也不能行其道而徒欲尊之以为名是以孔孟以为不义而不留也洪范曰凡厥正人既富方谷汝弗能使有好于而家时人斯其辜此所谓知贤不能用与不知同也乐毅为燕伐齐下七十余城燕王疑之使骑劫代将田单诈骑劫而败之尽失齐地廉颇为赵将拒秦久而不战赵王疑之使赵括代将白起击赵括而虏之阬其卒四十万项羽用范增谋强霸诸侯围汉王荥阳几拔矣闻汉之反间而疑之范增怒而去项羽卒为汉禽夫驾车者既服骐驎矣又以弩马参之欲其并驱而前不可得也蓺田者既树嘉谷矣又以稂莠杂之欲其滋生而茂不可得也为国者既置贤才矣又以小人间之欲其并立而治不可得也是故宓子贱为单父宰辞於君请君之近史二人与之俱至官使二史书方书辄掣其肘书不善则从而怒之二史患之辞请归以告鲁君鲁君以问孔子孔子曰宓不齐君子也其才任王霸之佐屈节治单父将以自试也意者以此为谏乎公寤太息而叹曰此寡人之不肖寡人乱宓子之政而责其善者数矣微二史寡人无以知其过微夫子寡人无以自寤遽发所爱之使告宓子曰自今以往单父非吾有也从子之制有便於民者子决为之五年一言其要宓子遂得行其政而单父大治大禹谟曰任贤勿贰去邪勿疑疑谋勿成百志惟熙荀子曰人主有六患使贤者为之则与不肖规之使智者虑之则与愚者论之使修士行之则与污邪之人疑之虽欲成立得乎哉譬之是犹立直木而恐其影之枉也惑莫大焉语曰好女之色恶者之孽也公正之士衆人之痤也修乎道之人污邪之贼也今使污邪之人论

其怨贼而求其无偏得乎哉譬之是犹立往木而求其影之直也乱莫大焉噫人主苟不知其贤则已矣已审知其贤授之以政而复疑之何哉凡忠直之臣行其道於国家则必与夫天下之奸邪为怨敌矣非喜与之为怨也不与之为怨则君不尊国不治功不立也以一人之身日与天下之奸邪为怨更进迭毁於君前而君不能决兼听而两可之如是则忠直之臣求欲无危不可得也君子非爱死而不为也知其身死而功不立奸邪愈炽忠良愈恐政治愈乱国家愈危也是以君子难进易退辞贵就贱被髮佯狂逃匿山林者以此故也此所谓用贤不能专与不用同也明主为之不然审求天下之大贤而亟用之专信之举社稷百姓而委属之虽有至亲不能夺也虽有至贵不敢争也虽有谗巧不能间也确然若胶漆之相合视其际而不可得见也然後贤者得竭其心而施其才不忧怨贼之口不惧猜嫌之迹人主端拱无为享其功利收其荣名而已矣古之圣帝明王用此道而光宅四海长育万物功如天地名若日月者多矣固不待称引而知也请言其时近而道卑者昔齐桓公得管仲三薰而三浴之解其縲紲置以为相鲍叔桓公之傅也避太宰之位而安随其後国子高子天子之守卿也人率五卿而听其政令况其余四境之内上下之人其孰敢不战战栗栗从桓公而贵信之是以能九合诸侯一正天下为五霸首也陈平楚之亡将也汉高祖得之使典护诸将绦灌之属尽害之高祖以平为护军中尉尽监护诸将诸将乃不敢言韩信亡卒也高祖用萧何一言拔诸行伍之中以为大将诸将皆惊而不敢争也是以五年之中灭项羽定天下创业垂统四百岁而不絶蜀先主与关羽张飞布衣之友周旋艰险恩若兄弟一旦得诸葛孔明待之过於关张关张不说先主曰孤之有孔明犹鱼之有水愿诸君勿复言是以能起於败亡之中保有一方与魏吴为敌国苻永固得王景畧於处士以为丞相贵戚大臣有害之者永固辄杀之谓太子宏及长乐公丕曰汝事王公如事我也是以能东取燕西取凉南取襄阳北取拓跋奄有中原几平海内此五臣者从今日视之皆英杰之才也曷使四君知之不明用之不固信之不专则管仲醢於齐庭陈平穷於户牖韩信饿於淮陰诸葛孔明老於隆中王景畧死於华山名氏埋灭不可复知乌有晔晔功烈施於後世如此哉是以大雅云徐方既同天子之功晋平公问叔向曰齐桓公之霸君之力乎臣之力乎叔向曰管仲善制割隰朋善削缝宾胥无善纯缘桓公知衣而已亦其臣之力也师旷曰管仲善断割之隰朋善煎熬之宾胥无善齐和之羹已熟矣奉而进之而君不食谁能强之亦其君之力也魏文侯使乐羊将而攻中山三年而拔之返而论功文侯示之谤书一篋乐羊再拜稽首曰此非臣之功主君之力也由是言之人臣不能立功凡有功者皆其君之功也

机权论【庆历五年作】

世之命机权也妄故作机权论以辨之机者弩之所以发矢者也机正於此而的中於彼差之至微失之甚远故圣人之用机也似之易曰机者动之微吉凶之先见者也又曰君子见机而作不俟终日然则机者事之未着萌芽端兆之时圣人眇然见之能去祸而取福迎吉而御凶所以为神也圣人之所慎无过机者故曰兢兢业业一日二日万机也权者铨也所以平轻重者也圣人之用权也必将校轻重商缓急彼重而此轻则舍此而取彼彼缓而此急则去彼而就此取舍去就之间不离於道乃所谓权也然则机者仁之端也权者义之平也今世俗之为说者乃欲弃仁义而行机权不亦反哉夫不知机权则无以为圣人圣人未尝斯须不用者机权而已矣圣人精心审慎而後行之故百姓万物皆赖焉小人不知机权之道而诬窃其名妄

行諄理所以福祿不久而禍亂及之也請問聖人機權之道曰昔紂為玉杯象箸而箕子佯狂
衛靈公仰視蜚鴻而孔子行是皆知機者也夫杯箸小器飾以珠玉未為太過而箕子知其必
亡國者為其奢淫泰侈之漸由此始也仰視蜚鴻失理之細者而孔子去之者知其不能用聖
人而有厭怠之心不去則大禍將至也如此聖人之知機豈不偉哉伊尹放太甲微子去商歸
周周公誅管蔡是皆知權者也夫數君子豈不知放君畔宗戮親之為不善哉誠以放君之責
輕而淪喪大業之禍重畔宗之讖薄而保存宗祀之孝深戮親之嫌小而傾覆周室之害大故
去彼而取此也夫太甲之初欲敗度縱敗禮苟非苦其身體勞其思慮則不能變惡遷善克終
允德成湯之業將墜於地伊尹躬受湯命阿衡王家故不得不放諸桐宮也受為不道自絕於
天微子不去與之偕亡則祖祢不祀宗族無主故不得不抱祭器而歸周也管蔡奉廢姓伐宗
國違天命逆人心傾危聖輔斷喪周室成王幼弱周公攝政故不得不奮干戈揚斧鉞以治之
蓋周公非自愛而愛周室故也向若太甲尚可諫而改則伊尹必不放君商受苟可輔而存則
微子必不畔宗管蔡猶可教而治則周公必不戮親夫豈不思誠不得已也是以太甲曰惟嗣
王不惠于阿衡伊尹作書曰祗爾厥辟辟不辟忝厥祖是猶以辱先為戒未欲正言覆亡之禍
委蛇其辭以感切之也王惟庸罔念聞伊尹乃言曰無越厥命以自覆是正言禍敗以聳動之
也王未克變伊尹乃以王生而榮逸不知勞辱狎近小人積習至此非其性惡故曰茲乃不義
習與性成營于桐宮密迓先王其訓無俾世迷言積習寢久將成其性及今猶可沮誅而改此
乃伊尹尽心尽力於成湯太甲之至也微子之誥曰商其弗或亂正四方言受不可復正決必
亡國已所以當出奔存湯後也父師若曰商其淪喪我罔為臣仆言商既亡宗族俱滅無所寄
托也又曰王子弗出我乃顛隲言不可不行也此微子廣咨權謀輕重之審諦也大誥曰肆予
冲人不叩自恤義爾邦君越尔多士尹氏御事言今東征非為已也 風曰既取我子無毀我
室子以喻管蔡也室以喻周家也言管蔡輕而周家重也予羽譙譙予尾翬翬言勤瘁也予室
翬翬風雨所漂搖予唯音曉曉言三監背誕王室阽危故我恐懼以忱之也此豈周公背公向
私之志哉夫聖人之用權也如此故國家安而仁義立也後世之人昧錙銖之利以放逐其君
懷芥帶之嫌以屠滅其親而亦自比於伊周曰吾用機權不亦誣哉此乃亂臣賊子所以滋多
也

朋黨論【嘉佑三年五月二十三日作】

黃介夫作壞唐論五篇以為壞唐者非巢溫與閹?乃李宗閔李德裕朋黨之弊也是誠得其本
矣雖然介夫知其一未知其二彼盜賊之興由閹豎閹豎之橫由輔相則信然矣噫輔相樹立
私黨更相排壓而不能正又誰咎哉夫朋黨之患不專在唐自古有之以堯之明共工驩兜相
荐於朝舜臣堯既流共工又放驩兜除其邪黨然後四門穆穆百工咸熙仲虺數夏之惡曰簡
賢附勢實繁有徒武王數商之惡曰朋家作仇脇權相滅是則治亂之世未嘗無朋黨堯舜聰
明故能別白善惡而德業昌明桀紂昏亂故不能區處是非而邦家覆亡由是言之興亡不在
朋黨而在昏明矣洪範皇極曰無偏無諛遵王之義無有作好遵王之道無有作惡遵王之路
無偏無黨王道蕩蕩無黨無偏王道平平无反無側王道正直周公戒成王曰孺子其朋孺子
其朋其往無若火始焰焰厥攸灼叙弗其絕是以舜誅禹父而禹為舜佐伊尹放太甲而相之
周公放蔡叔而封蔡仲公之至也夫宗閔德裕雖為朋黨由文宗實使之文宗嘗曰去河北賊
易去朝中朋黨難殊不知群臣為朋黨誰之過也由是觀之壞唐者文宗之不明宗閔德裕不

足专罪也

中和论【元丰七年十月三日作】

君子从学贵於博求道贵於要道之要在治方寸之地而已大禹谟曰人心惟危道心惟微惟精惟一允执厥中危则难安微则难明精之所以明其微也一之所以安其危也要在执中而已中庸曰喜怒哀乐之未发谓之中发而皆中节谓之和君子之心於喜怒哀乐之未发未始不存乎中故谓之中庸庸常也以中为常也及其既发必制之以中则无不中节中节则和矣是中和一物也养之为中发之为和故曰中者天下之大本也和者天下之达道也智者知此者也仁者守此者也礼者履此者也乐者乐此者也政者正其不然者也刑者威其不从者也合而言之谓之道道者圣贤之所共由也岂惟人哉天地之所以生成万物靡不由之故曰致中和天地位焉万物育焉孔子曰君子无终食之间违仁造次必於是颠沛必於是故曰道不可须臾离可离非道也孔子曰中庸之为德也其至矣乎民鲜久矣又曰回也其心三月不违仁其余则日月至焉而已日月至焉者斯已贤矣以是观之能久於中庸者盖鲜矣孔子曰智者乐仁者寿盖言知夫中和者无入而不自得能无乐乎守夫中和者清明在躬志气如神能无寿乎小雅曰乐只君子邦家之基乐只君子万寿无期又曰乐只君子邦家之光乐只君子万寿无疆盖言君子有中和之德则邦家安荣既乐且寿也孔子曰克己复礼为仁盖言礼者中和之法仁者中和之行故得礼斯得仁矣孔子闲居曰无声之乐志气不违以至於气志既起乐记曰易直子谅之心生则乐以至於不言而信不怒而威盖言乐以中和为本以钟鼓为末也商颂曰不竞不絀不刚不柔敷政优优百禄是遒盖言政以中和为美也大雅曰惠此中国以绥四方无纵诡随以谨无良盖言刑以中和为贵也子曰饭蔬食饮水曲肱而枕之乐亦在其中矣又曰回也一簞食一瓢饮不改其乐扬子曰紆朱怀金之乐也外颜氏子之乐也内盖言圣贤内守中和虽幽隐贫贱不失其乐也刘康公曰民受天地之中以生所谓命也能者养之以福不能者败以取祸中庸曰大德者必得其寿盖言君子动以中和为节至於饮食起居咸得其宜则阴阳不能病天地不能夭虽不导引服饵不失其寿也孟子曰我善养吾浩然之气夫志气之帅也气体之充也志至焉气次焉故孟子养德以气言之盖能谨守中和之志不以喜怒哀乐乱其气则志平气顺德日新矣故曰持其志无暴其气及夫德之成也沛然不息确然不动挺然不屈故曰其为气也至大至刚以直养而无害不有道义以充其内能如此乎故曰配义与道无是馁也凡人为不善能欺天下之人不能欺其心虽忌而行之於其心不能无蒂芥焉然则浩然之气不存矣故曰行有不慊於心则馁矣君子优游从容以养其气虽不敢忽忘亦不正以为事欲其速成故曰必有事焉而勿正心勿忘勿助长也操之则存舍之则亡久而无怠然後自得之此其所以难言也扬子曰藏心于渊美厥灵根君子存神於内应务於外虽往来万变未尝失其所守是以百骸治而德本植焉故曰神不外也志之所至气必辅之君子乘之以为善小人乘之以为恶故曰气者所适善恶之马也君子守中和之心养中和之气既得其乐又得其寿夫复何求哉孔子曰狂者进取又曰吾党之小子狂简斐然成章如光之谓矣虽然此皆纂述圣贤之言非取诸臆也夫道犹的也射者莫不志於的其中否则未可知也必俟有道者乃能裁之

才德论【庆历五年作】

世之所谓贤者何哉非才与德之谓邪二者殊异不可不察所谓才者存诸天德者存诸人智愚勇怯才也愚不可强智怯不可强勇四者有常分而不可移故曰存诸天善恶逆顺德也人苟弃恶而取善变逆而就顺孰御之哉故曰存诸人譬之於物金可以为钟可以为鼎玉可以为珪可以为璧此存诸人者也玉不可以为钟鼎金不可以为珪璧此存诸天者也存诸天者圣人因而用之存诸人者圣人教而成之虽然自非上圣必有偏也厚於才者或薄於德丰於德者或杀於才钩之不能两全宁舍才而取德昔者鄆舒有三隼才恃之而不务德晋灭之智宣子将以瑶为後智果曰不如宵也瑶之贤於人者五其不逮者一也美?长大则贤射御足力则贤技艺毕给则贤巧文辩慧则贤强毅果敢则贤如是而甚不仁以其五贤陵人而以不仁行之智宗必灭宣子弗听智氏果亡故曰宁舍才而取德抑又闻之为国家者进取莫若才守成莫若德进取不以才则无功守成不以德则不久陈平贪污之人也韩信无耻之士也樊哙屠者而酈食其酒徒也天下之至贱无行者也然其才皆有过人者汉祖举而用之故蹶秦仆项而卒兼天下也魏国置相而用田文吴起不悦与之论功田文曰我战鬪治民皆不如子若主幼国危大臣未附百姓不信当是时属之子乎属之我乎吴起乃谢曰属之子矣此言田文无佗技能唯忠厚可信也夫有德者必不反其君故可以托六尺之孤寄百里之命为社稷臣有才者不必忠信故以羈策御之而为德者役也然则德者掌也才者指也掌亡则指不可用矣是故民者田也国者苗也才耒耜也德膏泽也进取不以才犹无耒耜而耕也虽勤灌溉不能生矣守成不以德犹既种而无膏泽也苗槁无日矣故人主利其耒耜以垦治其民而封殖其国又引膏泽以溉之使其本根深固而枝叶蓂茂故子孙谨守其畔获而食之而已复何为哉

传家集卷六十四

卷六十五

钦定四库全书

传家集卷六十五 宋 司马光 撰论二

知人论【嘉佑二年作】

考制度习威仪辩牢飨之等详筮豆之数此宗人之职也察清浊别正邪协律吕之音肄缀兆之容此太师之职也练士卒简器械战必胜攻必取此将帅之职也明法令审狱讼禁强御诛奸回此士师之职也丰衣食衍货财通有无纾滞积此司会之职也便舟舆利器械守法度禁淫巧此工师之职也考龟筮占祲祥相吉凶视休咎此太卜之职也谨盖藏吝出纳治文书精会计此府史之职也若夫选贤而进之量能而任之成功者赏败官者诛此则人君之职也夫天下至广也兆民至衆也万机至繁也而天子兼而有之必将以一人之耳目智力为之则所及者寡所废者多矣是以明主择辅佐以论官师论官师以正羣吏正羣吏以和万民则治约而事无旷矣益稷曰元首明哉股肱良哉庶事康哉此言君明则臣良矣良则事康也立政曰宅乃事宅乃牧宅乃準兹惟后矣又曰文王惟克厥宅心乃克立兹常事司牧人以克俊有德文王罔攸兼于庶言庶狱庶慎惟有司之牧夫是训用违庶狱庶慎文王罔敢知于兹此为人君急於知人缓於知事也魏文侯与田子方饮文侯曰钟声不比乎左高田子方笑文侯曰何笑子方曰臣闻之君明乐官不明乐音今君审於音臣恐其聳於官也是以笑荀子曰治国有道人主有职若夫贯日而治详一日而曲列之是所以使夫百吏官人为也不足以是伤游玩安燕之乐若夫论一相以兼率之使臣下百吏莫不宿道乡方而务是夫人主之职也人主者守至约而详事至佚而功垂衣裳不下簟席之上而海内之民莫不愿得以为帝王夫是之谓至约乐莫大焉人主者以官人为能者也匹夫者以自能为能者也人主得使人为之匹夫则无所移之百亩一守事业穷无所移之也今以一人兼听天下日有余而治不足者使人为之也大有天下小有一国必自为之然後可则劳苦耗悴莫甚焉如是则虽臧获不肯与天子易势业以是统天下一四海何故必自为之自为之者役夫之道也墨子之说也论德使能而官施之者圣王之道也儒之所谨守也传曰农分田而耕贾分货而贩百工分事而劝士大夫分职而听建国诸侯之君分土而守三公揔方而议则天子恭已而已矣由是言之人君之事守莫大於知人也昔者舜导百川不如禹殖百穀不如稷布五教不如契听五刑不如皋陶典百工不如垂典山泽不如益典礼不如伯夷典乐不如夔然而明此八者之本能知其人而任使之者舜也譬如车之有轂宫之有栋人之有心此羣圣所以为之役而归之功也呜呼帝王之事美矣大矣固不可得而言也齐桓公兄弟争国暴於豺狼闺门不治甚於狗彘然独能知管仲之贤举国而委之一则仲父二则仲父是以兵车之会三乘车之会六指麾左右而诸侯莫敢不从後世言桓公者徒知其贤而不复知其恶也孔子言卫灵公之无道季康子曰夫如是奚而不丧子曰仲叔圉治宾客祝佗治宗庙王孙贾治军旅夫如是奚其丧齐文宣帝荒淫狂悖甚於桀纣然而知杨愔之贤悉以国事委之时人以为主昏於上政清於下凡此皆淫昏暴

乱之君也徒以能知贤人而用之大者以霸其次以安小者以存况乎以圣君而用贤臣是犹王良之御六骥逢蒙之关繁弱孟贲之挥干将何适而不達何射而不中何击而不断哉或曰人主之职在知人则既知之矣抑以尧之圣而失之四凶孔子之圣而失之宰我子羽夫人岂易知也哉曰是则然矣夫射者必志於的弓矢既调专精审固而发之虽或不中亦鲜矣与夫冥冥而射者不犹愈乎昔臯陶陈九德曰寬而栗柔而立愿而恭乱而肃扰而毅直而温简而廉刚而塞强而义彰厥有常吉哉日宣三德夙夜浚明有家日严祗敬六德亮采有邦翕受敷施九德咸事俊乂在官百僚师师百工惟时孔子曰视其所以观其所由察其所安人焉廋哉人焉廋哉李克曰居视其所亲富视其所与達视其所举穷视其所不为贫视其所不取是亦知人之术也顾人主不深察而已矣

三勤论

扬子曰民有三勤政善而吏恶一勤也吏善而政恶二勤也政吏骈恶三勤也愚谓勤民者一未尝有三也何则吏者民之司命吏良则民斯逸矣未有吏善而政恶者也亦未有政善而吏恶者也度吏之才而任之者君之政也形民之力而用之者吏之政也吏苟得人安有谷人不足於昼丝人不足於夜者乎故为人君者谨於择吏而已矣佗奚足事哉

十哲论【庆历二年作】

十哲於经未见而学者多称之国家祀孔子十哲则祀於堂上其余门人祀於东西庑下俎豆之数皆异焉愚窃以为过矣是十人者孔子虽以四科第之非谓门人之中唯十人为贤也至於柴也愚参也鲁师也辟由也喭岂谓唯此四人为不肖邪以此观之尊十哲非孔子意明矣必若以一善取之则门人之贤者非止十人也以尽善取之则德行之外未有无过者也孔子谓宰我曰朽木不可雕於予与何诛谓子贡曰赐不受命而货殖焉亿则屡中谓冉有曰求也非吾徒也小子鸣鼓而攻之可也谓子路曰由知德者鲜矣谓子夏曰商也不及然则岂为尽善邪又十哲之外孔子之所称誉多矣曾点与子路冉有俱侍坐各言其志而孔子独曰吾与点也曾参以至孝显孔子为之语孝经又谓子贱君子哉若人然则十人之余岂可尽诬邪且政事言语文学之高者不足以当德行之卑者是十人者其中固有差等矣岂可为之一槩耶

四豪论【庆历二年作】

战国之时天下礼义消亡下陵上替诸侯僭天子大夫僭诸侯陪臣之间有能约身抑志尊贤养士不爱烦费以树声名者齐有孟尝魏有信陵赵有平原楚有春申虽不能以礼义佐其君以政教和其民合於至公槩於大道然自奋於浊世天下谈士异口同舌咸谓之贤铨於四人臧否优劣亦可闻欤论者曰夫人臣者上以事君中以利国下以养民释此三者非人臣也臣而不臣圣王当世必为诛首孟尝君养士赖匿亡命废公法树私恩媮采名誉以窃国相之任迹其行事皆为身耳非能为国与民谋也至其晚节遂挟仇敌以覆宗国保薛中立自比诸侯臣而不臣孰甚於此春申君进书春宫解楚国社稷之忧纵楚太子而自以身当不测之诛智勇忠信有足称者至其柱石楚国权宠无贰割江东之封穷僭奢之乐十余年间楚国益弱又

纳邪人之言造奸伪之谋乱其国嗣洿败王家方诸田文罪又甚焉终为李园所袭身首屠裂则其智勇忠信果安在也平原君行事大仿孟尝至於贪上党之田致邯鄲之祸遂至国家大败社稷几亡于以知其智谋尤出数子之下也然赵奢戮平原君之客奢谕释以公义而平原君荐奢於朝卒着功名且平原君臣人之节终始无亏此其贤於孟尝春申远矣信陵君以母弟之亲卿相之尊抱关鼓刀之人亲执馭而事之诘而不耻劳而不倦非有高世之材孰能如此且向使侯生朱亥皆实庸人公子虽事之如是不足称也然公子所以降身诘志者审知二子之贤耳以区区之魏惴惧之衆当秦乘胜十倍之兵一战却之邯鄲全六国安信陵君之功也秦乘公子之去魏急攻大梁公子一悟毛薛之言翻然易虑归救宗国复破秦军闭诸函谷可谓能矣魏王信谗猜阻公子公子遂灭迹酣饮全身远害以其壽终可谓智矣智能如此而又守之以仁行之以恭必若采善於乱世论贤於侠游则彼三人者蔑以加其上矣故校其臧否当以信陵为首平原次之孟尝又次之春申为其下矣或曰无忌盗国兵符矫杀晋鄙以赴平原君之私交虽有功於魏非忠臣也何以贤於三子对曰赵魏唇齿之国以虎狼之秦攻危亡之赵赵亡则魏毙理势然矣魏王不達事宜徒畏强秦之空言坐拥盛兵以观成败计之大失无过於此故无忌矫夺其军以救赵非独赴赵之难亦为魏谋也奚其不忠哉汉高祖过大梁辄祠信陵君为置守冢者彼三子则皆无旌异高祖英主也盖有以知之矣

管仲论

孔子称管仲之器小哉先儒以为管仲得君如此不勉之以王而仅止於霸此其所以为小也愚以为周天子存而管仲勉齐桓公以王是教之寡也此管仲所耻而不为孔子顾欲其为之邪夫大人者顾时不用则已用则必以礼乐正天下使纲纪文章粲然有万世之安岂直一时之功名而已邪管仲相桓公霸诸侯禹迹所及冠带所加未能使之皆率职也而偃然自以天下为莫已若也朱紱而镂簋反玷而三归此其器岂不小哉扬子曰大器其犹规矩準绳乎先自治而後治人斯言得之矣

荀息论

晋献公使荀息传奚齐荀息曰臣竭其股肱之力不济则以死继之及里克杀奚齐荀息死之君子曰诗所谓白圭之玷尚可磨也斯言之玷不可为也荀息有焉杜元凯以为荀息有此诗人重言之义以愚观之元凯失左氏之意多矣彼生与君言死而背之者是小人穿窬之行君子所不讥也夫立嫡以长正也献公溺於嬖宠废长立少荀息为国正卿君所倚信不能明白礼义以格君心之非而遽以死许之是则荀息之言玷於献公未没之前而不可救於已没之後也然则左氏之志所以贬荀息而非所以为褒也

廉颇论【庆历五年作】

世称藺相如以区区之赵抗虎狼之秦秦虽强暴不能陵赵者相如之功也谓其贤於廉颇愚窃疑之何则秦之所以不能陵赵者以其国治兵强也固非口舌之间所能抗也然则国何以治兵何以强岂非廉颇在其位邪赵得和氏璧秦王闻而欲之请易之以土田相如奉璧衔命

而往秦王欲强取之相如抗节不挠视死如归卒欺秦王而归璧於赵以是为相如之功噫又何足称哉夫和氏之璧怀握之玩得之不足以为重失之不足以为轻而相如以死争之以诈取之有如秦王赫然增怒肆其强暴逞其毒螫菹醢相如移兵攻赵是为赵王爱数寸之玉丧国土之贤贪无用之器贻宗庙之忧人臣爱君果如是哉渑水之会秦王请赵王鼓瑟而诏史书之相如进缶於秦王秦王不可则挺劔劫之必得当而後止是何异贾豎小人矜豪恃气不能相下者恶足言功哉昔桀为无道汤幽囚於夏台戎狄侵豳太王避之於岐文王三分天下有其二就拘於羑里夫以幽拘之辱弃国而逃与一鼓瑟之间孰难哉然而三王忍耻行之卒蹶夏商抚绥四海相如傥能相赵王示微弱以骄秦忍小耻以怒赵崇德修政以须秦之可亡从而仆之济黔首於涂炭救赤子於虎狼其功烈岂不炜?光远哉而於罇俎之间坛坫之上争言暴气取当而止英伟之士不亦可羞哉赵王不能远观嘉其一命之不辱赏其要劫之小策一旦位诸功实之上廉颇日夜愤愤欲砺刃刺之而相如能不与之校此则贤矣然亦不可用一善掩大功世称藺优於廉非通论也

贾生论【庆历三年作】

世皆以贾生聪明辩博晓练治体若遭明主当治世诚得尽用其道三代可复帝皇可几不幸黜於絳灌踈废早终可为痛惜愚以为贾生学不纯正虽有儁才任之为治必不效矣何以知之观其书而知之贾生数上疏陈得失云可为痛哭者一流涕者二太息者六然所谓痛哭者谓侯太强也以为指大於股胫大於要久而不制必为国害夫为天下者患政刑之不立不患诸侯之太强贾生言不见用然终文帝世诸侯帖服孝景初立晁错不胜其愤而削之反者纷然响应起不踰时败亡不救恶能为汉之大害哉所谓流涕者匈奴不宾也匈奴荒外之国与禽兽无殊天下治而不服不足损圣王之德天下弊而得之不足为圣王之功而贾生孜孜爱其蓐尔之金絮忘其征讨之大费忿其区区之礼节忽其勤民之钜害恶在其为知治体也夫治天下之具孰先於礼义安天下之本孰先於嗣君礼义不张虽复四夷宾服强场不耸当如内忧何储嗣失教虽复诸侯微弱四方无虞其谁能守之然贾生以此二者列之於後以为余事舍国家之纪纲遗天下之大本顾切切然以列国外夷为虑皆涕泣之可谓悖本末之统谬缓急之序谓之知治体何哉又曰仁义者人主之芒刃也法制者人主之斤斧也不能以道辅人主镇抚诸侯缓之以德齐之以礼而欲踈骨肉断慈惠视仁义为虚器操刑法为利柄翦周孔之夷涂树申商之险术由此观之所学岂得为纯正耶世人不察其所由之术苟见其材之茂学之博其言晡晡可观而不得施於世因从而叹之不知夫駁濫刻深非吾党也夫唯材高而道不正者君子恶之

龚君宾

王莽慕龚君宾之名誡以尊爵厚禄劫以淫威重势而必致之君宾不胜逼迫絶食而死班固以薰膏之语讥焉未闻有为辨之者也可不大哀昔者纣为不道毒痛四海武王不忍天下困穷而征之斯则有道天子诛一乱政之匹夫尔於何不可而伯夷叔齐深非之义不食周粟而饿死狷隘如此仲尼犹称之曰仁以为不殒其节而已况於王莽凭汉累世之恩因其继嗣衰絶饰诈伪而盗之又欲诬洿清士以其臭腐之爵禄甘言谀礼期於必致不可以智免不可以

义攘则志行之士舍死何以全其道哉或者谓其不能黜芳弃明保其天年然则虎豹之鞞何以异於犬羊之鞞庸人之行孰不如此又责其不诡辞曲对若薛方然然则将未免於谄岂曰能贤故君宾遭遇无道及此穷矣失节之徒排毁忠正以遂已非不察者又从而和之太史公称伯夷叔齐不有孔子则西山之饿夫谁识知之信矣哉

邴吉论

邴吉为丞相出逢羣盜格鬪死伤横道过之不问见牛喘而问之以以为诘禁盜賊守令之事陰陽不調此乃宰相職耳談者美之愚竊以為不然夫宰相所以治陰陽者豈拱手端署无所施設而陰陽自調蓋亦佐人主治庶政安四海使和氣洋洋薄於宇宙旁暢周達浸潤滲漉明則百姓洽幽則鬼神諧然後寒暑時至萬物阜安雖古昔聖人之治天下至於陰陽和寒暑時而至治極矣豈庸人所能致哉當邴吉為政之時政治之不得刑罰之失中不肖之未去忠賢之未進可勝紀哉釋此不慮而慮於牛喘以求陰陽不亦疎乎且京邑之內盜賊縱橫政之不行孰甚於此詩云商邑翼翼四方之極近不能正如遠人何若曰守令之職守令不賢當責何人非執政者之過而又誰欵昔士會為政晉國之盜逃奔于秦子產為政桃李垂於街者英援若盜賊不禁而曰長安令之職風俗不和而曰三老之職刑罰不當而曰廷尉之職衣食不足而曰司農之職推而演之天下之事各有其官則宰相居於其間悉无所與而曰主調陰陽陰陽固可坐而調耶愚以為邴吉自知居其位而无益於世飾智譎問以揜其迹抑亦自欺而已矣

致知在格物論【元豐六年作】

人之情莫不好善而惡惡慕是而羞非然善且是者蓋寡惡且非者實多何哉皆物誘之也物迫之也桀紂亦知禹湯之為聖也而所為與之反者不能勝其欲心故也盜跖亦知顏閔之為賢也而所為與之反者不能勝其利心故也不軌之民非不知穿窬探囊之可羞也而冒行之驅於飢寒故也失節之臣亦非不知反君事讎之可愧也而忍處之逼於刑禍故也況於學者豈不知仁義之美廉耻之尚哉斗升之秩錙銖之利誘於前則趨之如流水豈能安展禽之黜樂顏子之貧乎動色之怒毫末之害迫於後則畏之如烈火豈能守伯夷之餓徇比干之死乎如此則何暇仁義之思廉耻之顧哉不惟不思與不顧也抑亦莫之知也譬如逐獸者不見泰山彈雀者不覺露之沾衣也所以然者物蔽之也故水誠清矣泥沙汨之則俛而不可見其影燭誠明矣舉掌翳之則咫尺不辨人眉目況富貴之汨其智貧賤之翳其心哉惟好學君子為不然已之道誠善也是也雖茹之以藜藿如梁肉臨之以鼎鑊如茵席誠惡也非也雖位之以公相如塗泥賂之以萬金如糞壤如此則視天下之事善惡是非如數一二如辨黑白如日之出无所不照如風之入无所不通洞然四達安有不知者哉所以然者物莫之蔽故也於是依仁以為宅遵義以為路誠意以行之正心以處之修身以帥之則天下國家何為而不治哉大學曰致知在格物格猶扞也御也能扞御外物然後能知至道矣鄭氏以格為來或者猶未盡古人之意乎

葬論【元豐七年作】

葬者藏也孝子不忍其亲之暴露故敛而藏之賁送不必厚厚者有损无益古人论之详矣今人葬不厚於古而拘於陰阳禁忌则甚焉古者虽卜宅卜日盖先谋人事之便然後质诸蓍龟庶无後艰耳无常地与常日也今之葬书乃相山川冈畎之形势考岁月日時之支干以为子孙贵贱贫富壽夭贤愚皆系焉非此地非此时不可葬也举世惑而信之於是丧亲者往往久而不葬问之曰岁月未利也又曰未有吉地也又曰游宦远方未得归也又曰贫未能办葬具也至有终身累世而不葬遂弃失尸柩不知其处者呜呼可不令人深叹愍哉人所贵於身後有子孙者为能藏其形骸也其所为乃如是曷若无子孙死於道路犹有仁者见而殮之邪先王制礼葬期远不过七月今世着令自王公以下皆三月而葬又礼未葬不变服食粥居倚庐哀亲之未有所归也既葬然後渐有变除今之人背礼违法未葬而除丧从宦四方食稻衣锦饮酒作乐其心安乎人之贵贱贫富壽夭系於天贤愚系於人固无关预於葬就使皆如葬师之言为人子者方当哀穷之际何忍不顾其亲之暴露乃欲自营福利邪昔者吾诸祖之葬也家甚贫不能具棺槨自太尉公而下始有棺槨然金银珠玉之物未尝以錙铢入於圹中将葬太尉公族人皆曰葬者家之大事奈何不询陰阳此必不可吾兄伯康无如之何乃曰询於陰阳则可矣安得良葬师而询之族人曰近村有张生者良师也数县皆用之兄乃召张生许以钱貳万张生野夫也世为葬师为野人葬所得不过千钱闻之大喜兄曰汝能用吾言吾畀尔葬不用吾言将求佗师张师曰惟命是听於是兄自以己意处岁月日時及圹之浅深广狭道路所从出皆取便於事者使张生以葬书缘饰之曰大吉以示族人族人皆悦无违异者今吾兄年七十九以列卿致仕吾年六十六忝备侍从宗族之从仕者二十有三人视佗人之谨用葬书未必胜吾家也前年吾妻死棺成而敛装办而行圹成而葬未尝以一言询陰阳家迄今无佗故吾常疾陰阳家立邪说以惑衆为世患於丧家尤甚顷为谏官尝奏乞禁天下葬书当时执政莫以为意今着兹论庶俾後之子孙葬必以时欲知葬具之不必厚视吾祖欲知葬书之不足信视吾家

卷六十六

<集部,别集类,北宋建隆至靖康,传家集>

钦定四库全书

传家集卷六十六 宋 司马光 撰议

不以卑临尊议【庆历五年作】

大传以为武王克商祀於牧室追王太王王季文王不以卑临尊也夫父子之间譬犹天地之体殊君臣之位絶尊卑之分天性自然是以子虽为天子无害父之尊父虽为士子不敢先之人道之大伦古今之通义也武王纂绍前迹登隆基绪追尊先世告成王业盖以推功归美崇戴前人非谓身临四海之尊不可以诸侯为祖父也窃谓记礼者深於圣人之旨失之何则太王王季文王追褒既盛则太王之前公刘不窋之伦尚为以卑临尊未得谓之顺也然则追称继号终已无穷岂可行哉谨案武成曰太王肇基王迹王季其勤王家我文考文王克成厥勲又周颂曰天作高山太王荒之大雅曰维此王季受禄无丧奄有四方至言文王受命非一不可悉着然则周之王迹肇於太王茂於王季成於文王終於武王武王既有四海追思王迹之所由兴积功开业之艰难是故推三世而王之以明非已功藉祖宗之余烈也圣人之志昭晰若此而谓之不欲以卑临尊其为失也大矣且夫以太王之仁爱勤劳王季之孝友光明文王之布德行化讨叛怀柔三分天下之诸侯而有其二谦畏天命不辑大勲以授圣子武王因累世之基用既王之周推已亡之商而取天位临四海朝诸侯虽以中庸之君处之犹不敢盖其祖宗之勲谓天禄由已而成徒以私意追王祖宗不使诸侯临天子之尊而已况於武王大圣岂得尔哉泰誓曰予克受非予武惟朕文考无罪受克予非朕文考有罪惟予小子无良夫武王归美前人之意如此追王之理岂不明与

祔庙议【嘉佑八年六月一日上】

礼天子七庙三昭三穆与太祖之庙而七太祖之庙万世不毁其余昭穆尽则毁示有终也自汉已来天子或起於布衣以受命之初太祖尚在三昭三穆之次故或祀四世或祀六世其太祖以上之主虽属尊於太祖亲尽则迁故汉元帝之世太上庙主瘞於寝园魏明帝之世处士庙主迁於园邑晋武帝祔庙迁征西府君惠帝祔庙又迁豫章府君自是以下大抵过六世则迁其神主盖以太祖未正东向之位故止祀三昭三穆若太祖已正东向之位则并三昭三穆为七世矣唐高祖初立祀四世太宗增祀六世及太宗祔庙则迁洪农府君神主於夹室高宗祔庙又迁宣皇神主於夹室皆祀六世此前世之成法也惟明皇立九室祀八世事不经见难可依据今若以太祖太宗为一世则大行皇帝祔庙之日禧祖亲尽当迁於西夹室祀三昭三穆於先王典礼及近世之制无不符合太庙更不须添展一室

配天议

伏准中书劄子翰林学士王珪及知制诰钱公辅等奏季秋大飨明堂以仁宗皇帝配神作主事奉圣旨令台谏及经筵臣寮与两制礼院同共再详定闻奏者朝廷以祖宗事重不敢自专博访羣臣使各陈其意臣等愚懵不达古今但据所闻正礼以对至於取舍系自圣明窃以孝子之心谁不欲尊其父者圣人制礼以为之极不敢踰也故祖已训高宗曰祀无丰于昵孔子与孟懿子论孝亦曰祭之以礼然则事亲者不以数祭为孝贵於得礼而已矣祭法有虞氏禘黄帝而郊啻祖颡项而宗尧夏后氏禘黄帝而郊鯀祖颡项而宗禹商人禘啻而郊冥祖契而宗汤周人禘啻而郊稷祖文王而宗武王先儒谓禘郊祖宗皆祭祀以配食也禘谓祭昊天於圆丘也祭上帝於南郊曰郊祭五帝五神於明堂曰祖宗故诗曰思文后稷克配彼天又我将祀文王於明堂此其证也下此皆不见於经矣前汉以高祖配天後汉以光武配明堂以是观之古之帝王自非建邦啓土及造有区夏者皆无配天之文故虽周之成康汉之文景明帝章帝其德业非不美也然而子孙不敢推以配天者避祖宗也孝经曰严父莫大於配天则周公其人也孔子以周公有圣人之德成太平之业制礼作乐而文王适其父也故引之以证圣人之德莫大於孝答曾子之问而已非谓凡有天下者皆当尊其父以配天然後为孝也近世祀明堂者皆以其父配五帝此乃误识孝经之意而违先王之礼不可以为法也景佑二年仁宗诏礼官稽案典籍辨崇配之序定二祧之位乃以太祖为帝者之祖比周之后稷太宗真宗为帝者之宗比周之文武然则祀真宗於明堂以配五帝亦未失古礼今仁宗虽丰功美德洽於四海而不在二祧之位议者乃欲舍真宗而以仁宗配食明堂恐於祭法不合又以人情言之是继祖而进父也夏父弗忌跻僖公先兄而後弟孔子犹以为逆祀书於春秋况维祖而进父乎必若此有之不独乖违典礼恐亦非仁宗之意也议者又欲以太祖及三宗迭配郊丘及明堂臣等亦以为不可何则国家受天永命传祚万世若继体守文之君皆得配天则子孙将有无穷之数与祖宗无别也凡为国家者制礼立法必思万世之规不可专徇目前而已臣等窃谓宜遵旧礼以真宗配五帝於明堂行之为宜

宗室袭封议【时在学士院朝廷以为非是两制议者各赎铜三十斤礼部各追一官】

臣等窃原圣人制礼之意必使嫡长世世承袭者所以重正统而絶争端也古者诸侯生立世子死则袭爵故令文称诸王公侯伯子男皆子孙承嫡者传袭若无嫡子及有罪疾立嫡孙无嫡孙以次立嫡子同母弟无母弟立庶孙曾孙以下准此皆为始薨之时应袭爵之人也其无後者则国除自唐末以来三公以下不复承袭国朝故事常封本宫最长者一人为国公陛下以为非古故於去年十一月十一日降敕节文称宣祖太祖太宗之子皆择其後一人为宗令世世封公补环卫之官以奉祭祀不以服属尽故杀其恩礼又称其非袒免亲更不赐名授官太常礼院手奏检详国朝近制诸王之後皆用本宫最长一人封公继袭今来新制既言祖宗之子皆择其後一人为宗即与自来事体不同本院参详合依礼令传嫡承袭闰十一月五日奉圣旨祖宗之子并濮国公并令传嫡袭封所有见今诸宫院已封公者令依旧将来即更不袭封臣等详观两次诏旨丁宁皆欲以复古礼而垂正统也今据礼院所定诸王後合袭封人内除越王曾孙世程鲁王孙宗肃韩王孙宗绩吴王孙宗绦并依礼令当传袭外其昭成太子陈王蔡王皆无後国当除宗保仲合宗达以旁亲继袭乃是朝廷特恩为之立後绍封其国於

礼典亦无乖违所有秦王之後陈荐等欲立其庶曾孙克继韩忠彦等欲立其庶长孙承亮楚王之後陈荐等欲立其庶曾孙世逸韩忠彦等欲立其庶长孙从式魏王之後衆礼官皆欲立其嫡孙同母弟宗惠臣等看详三王见今自有正统而承亮从式宗惠皆系旁支若此三人袭三王之封则子子孙孙常居环卫世袭爵禄与国无穷其正统子孙袒免以外更不赐名授官数世之後降在阜隶如此三人何幸而封正统何罪而絶不惟与礼令之意乖违亦非圣诏所谓为宗传嫡者也所以然者盖缘礼令据初薨之时定为嗣之人今日於数世之後议当为後者事体有殊而专执令文所以参差不合而异论纷纭也臣等案忠彦等以为令文之制与古稍异若无嫡孙而有嫡曾孙则舍曾孙而立嫡子母弟若无母弟又立庶子以此知亦许推及旁支常以亲近者为先也今令文称无嫡孙同母弟则立庶孙以礼典与五服敕言之诸子之子除嫡长外皆为庶孙既立庶孙则当於诸旁庶孙内择其长者一人立之盖王视庶孙恩亲等也庶孙比曾孙行尊而属近也臣等案令文皆约古礼为之安有与古不同之理借使不同朝廷方宪章稽古亦当舍令而从礼岂可弃礼而就令也况令文所谓子孙承嫡者传袭言嫡子嫡孙相继不絶虽经百世皆应传袭也若不幸而絶则有立嫡子同母弟以下之事非谓有嫡曾孙舍之不立而立嫡子之母弟也晋庾纯云古者所以重宗诸侯世爵士大夫世禄防其争竞故明其宗也吴商云按礼贵嫡重正所以尊祖祢继世之正统也夫受重者不得以轻服服之是以孙及曾元其为後者皆服三年受重故也王敞云君为祖三年既为君而有父祖之丧者谓父祖并有废疾不得受国而已受位於曾祖者也范宣云嫡孙亡无後则次子之後乃得传重以此观之明嫡统不絶则旁支无继袭之道然则令文所谓子孙承嫡者传袭自嫡曾孙以下皆包之矣所以更言若无嫡子及有罪疾立嫡孙者嫌人无嫡子即立嫡子之母弟或嫡子有罪疾并其嫡孙废之故也又言曾孙以下準此者谓庶孙以上皆无即立嫡曾孙之母弟无母弟即立庶弟之类是也若令文之意但以行尊属近者为嗣则无嫡子便应立嫡子母弟及庶子何为更立庶孙也必若忠彦等所云则国家故事取本宫最长者一人封公已是行尊属近之人便当遵行何必更有改作也彼令文所指者传袭之人五服敕所载者丧服之制事理各殊岂可引丧服之庶孙证传袭之庶孙也且造令之时王公以下薨则传袭故必有立曾元者今诸王之薨已历数世乃更追议当为後之人则不应舍正统而更取旁支也今欲使合於古而适於今则莫若自国初以来於其人薨没之时定当为嗣者以至於今日则於礼令不失而亦不离正统矣案秦王以雍熙元年薨於时嫡子德恭当立德恭以景德三年卒嫡长子承庆当立承庆以宝元二年卒无嫡子有庶子六人长曰克晤先卒无子次曰克继当立楚王以某年薨嫡长子惟叙当立惟叙以大中祥符五年卒嫡子从煦当立从煦以庆历五年卒无嫡子有庶子世逸一人当立魏王以某年薨无嫡子有庶子三人长曰允升以某年卒嫡子宗礼当立宗礼以治平二年卒嫡长子仲翹先卒无子次母弟仲髦亦先卒次母弟仲苍当立以此考之其当为後者岂不明白矣所有承选虽是德文之嫡子其父元非嫡长自不应承袭盖因今来承亮以庶孙得承袭故使承选有辞先王制礼皆本诸天地酌之人情譬如四支百体不可移也移之则纲纪纷乱争端并兴於承选可以见其验矣臣等谨依古礼及令文并去年十一月十一日敕命闰十一月五日圣旨指挥检详属籍重行定夺到秦王之後合以克继袭封楚王之後合以世逸袭封魏王之後合以仲苍袭封其余并如衆礼官议所定

李仆射謚文恭议【穆】

仆射稟秀美之气涵纯壹之德刚柔得中华实兼茂越自衡泌奋飞天朝回翔禁垣遂赞大政咨命不永奄忽迁得自时迄今垂七十载令问休畅泱然未息绅弁之士流为美谈谨案謚法忠信接礼曰文不懈于位曰恭夫事亲尽诚与人不欺行有标的言有规括忠信接礼之谓矣光辅神宗亿安四海迈其懿德倡率士民不懈于位之谓矣请謚曰文恭

钱中令謚宣靖议【若水】

令公仁惠足以布政明智足以建功清修足以服人寬裕足以容衆与物无竞执议甚坚泊乎如渊挠不可浊介乎如石重不可移信尚德之君子全节之正人也而又讲学不倦好谋而成文以美身忠以赞国谨案謚法善问周达曰宣和德考衆曰靖令公论譔帝典发挥圣政使祖宗之烈烛耀无穷是不亦宣乎关领枢机谋谟帷幄六师辑睦夷夏又安是不亦靖乎请謚曰宣靖

赵少傅謚僖质议【祜】

少傅体和居厚履恭涵壹言必有物动不进名矫迹衡茅濯羽云汉入赞枢极出殿藩维谨案謚法小心恭慎曰僖言行相应曰质少傅内则造辟尽忠外则腾章建画亲昵有问应以他言可不谓僖乎历事三朝始终一节不赍饰以譁衆不激讦以高人可不谓质乎请謚曰僖质

冯太尉謚勤威议【守信】

昔者晋人不恭敢距大邦负固阻兵赳赳不庭太宗征之霆骇风趋狐狼之墟化为乐都混壹之勲太尉与焉猗猗孔炽整居幽冀纵骑鸣弦至于澶渊真宗一麾电卷云披剪其酋豪马溃麋逃底宁之功太尉在焉天下既平蜚游不惊符瑞充盈登休荐成和鸾四巡万乘星陈东暨云亭西涉河汾警蹕之清太尉扈焉白马之河漏为横波济泽之阿闾殫可歌隕林仆竹薪石相属渊吐其陆莓莓衍沃堤防之劳太尉重焉谨案謚法能修其官曰勤猛以强果曰威迹其夙夜在公临敌刚决荣禄昭融令问始终考於二法可谓協矣请謚曰勤威

辯

性辯【治平三年正月二十日作】

孟子以为人性善其不善者外物诱之也荀子以为人性恶其善者圣人教之也是皆得其一偏而遗其大体也夫性者人之所受於天以生者也善与恶必兼有之是故虽圣人不能无恶虽愚人不能无善其所受多少之间则殊矣善至多而恶至少则为圣人恶至多而善至少则为愚人善恶相半则为中人圣人之恶不能胜其善愚人之善不能胜其恶不胜则从而亡矣故曰惟上智与下愚不移虽然不学则善日消而恶日滋学焉则恶日消而善日滋故曰惟圣罔念作狂惟狂克念作圣必曰圣人无恶则安用学矣必曰愚人无善则安用教矣譬之於田稻粱藜莠相与滋生善治田者耘其藜莠而养其稻粱不善治田者反之善治性者长其善而

去其恶不善治性者反之孟子以为仁义礼智皆出乎性者也是岂可谓之不然乎然不知暴慢贪惑亦出乎性也是知稻粱之生於田而不知藜莠之亦生於田也荀子以为争夺残贼之心人之所生而有也不以师法礼义正之则悖乱而不治是岂可谓之不然乎然殊不知慈爱羞愧之心亦生而有也是知藜莠之生於田而不知稻粱之亦生於田也故扬子以为人之性善恶混混者善恶杂处於身中之谓也顾人择而修之何如耳修其善则为善人修其恶则为恶人斯理也岂不晓然明白哉如孟子之言所谓长善者也荀子之言所谓去恶者也扬子则兼之矣韩文公解扬子之言以为始也混而今也善恶亦非知扬子者也

情辩

应几有子生十年而丧之应几悲哀甚既而自谕曰是何益哉昔者吾尝闻於有道者矣曰死而悲哀者情也死生有时短长有命知其物理之常不足悲者道也故其始也悲不自制情胜道也及其久也悲日益衰而理可以夺道胜情也予常以为知言光辨之曰是非有道者之言也夫情与道一体也何尝相离哉始死而悲者道当然也久而寢衰者亦道当然也故始死而不悲是豺狼也悲而伤生是忘亲也豺狼不可忘亲亦不可是以圣人制服日远日轻有时而除之若此者非他皆顺人情而为之也夫情者水也道者防也情者马也道者御也水不防则泛溢荡潏无所不败也马不御则腾突奔放无所不之也防之御之然後洋洋焉注夫海駸駸焉就夫道由是观之情与道何尝交胜哉

铭

铁界方铭【景佑四年作】

质重精刚端平直方进退无私法度攸资燥湿不渝寒暑不殊立身践道是则是傲

劒铭【并序】

或曰古者君子居常佩劒以备不虞今也无之仓卒何恃焉应之曰君子恃道不恃劒道不在焉虽劒不去体不能救其死故苟得其道则劒存可也亡可也作劒铭云

昆吾之精太阿之灵深虞过防却除不祥倏忽纵横万夫莫当用得其道利器可保道之不明器无足凭怙力弃常匹夫以亡败德阻兵国家以倾逆不敌顺暴不犯仁上以守国下以全身长铗萧萧七星炤腰不离於道神锋可销

盘水铭【嘉佑七年二月一日作】

盘水之盈止之则平平而後清清而後明勿使小歆小歆必倾倾不可收用毁其成呜呼奉之可不兢兢

四言铭【熙寧三年五月二十一日作】

聪明壮勇之谓才忠信孝友之谓行正直中和之谓德深远高大之谓道

箴

勇箴【景佑四年作】

何为而正致诚则正何为而勇蹈正则勇孟贲之材心动则回临义不疑呜呼勇哉

逸箴

百仞之木生本秋毫德隳於惰名立於劳宴安之娱穷乎一昼德着名成亿年不朽可贪非道可爱非时没世无称君子耻之昔在周公作为无逸大圣犹然况非其匹

友箴

余何游乎余将游圣之门仁之里非圣不师非仁不友可乎未可不若游衆人之场闻善而迁观过而改

颂

顔乐亭颂【并序周翰孔子四十七世孙名宗翰邦直李清臣子瞻苏轼也】

孔子旧宅东北可百步有井鲁人以为昔顔氏之居也周翰思其人买其地构亭其上命曰顔乐邦直为之铭其言顔子之志尽矣无以加矣子瞻论韩子以在隐约而平寛为哲人之细事以为君子之於人必於其小焉观之光谓韩子以三书抵宰相求官与于襄阳书谓先达後进之士互为前後以相推授如市贾然以求朝夕刍米仆赁之资又好悦人以铭志而受其金观其文知其志其汲汲於富贵戚戚於贫贱如此彼又乌知顔子之所为哉夫岁寒然後知松栢之後雕土贫贱然後见其志此固哲人之所难故孔子称之而韩子以为细事韩子能之乎光实何人敢评先贤之得失聊因子瞻之言申而尽之颂曰贫而无怨难顔子在陋巷饮一瓢食一簞能固其守不戚而安此德之所以完

赞

河间献王赞【庆历五年作】

周室衰道德坏五帝三王之文飘沦散失弃置不省重以暴秦害圣典疾格言燔诗书屠术士称礼乐者谓之狂惑述仁义者谓之妖妄必薙灭先圣之道响絶迹尽然後慊其志虽有好古

君子心诵腹藏壁局岩鐻济秦之险以通於汉者万无一二汉初挟书之律尚存久虽除之亦未尊録谓之余事而已则我先王之道焰焰其不熄者无几矣河间献王生为帝子幼为人君是时列国诸侯苟不以宫室相高狗马相尚则裒奸聚猾僭逆妄图唯献王厉节治身爱古博雅专以圣人法度遗落为忧聚残补缺校实取正得周官左氏春秋毛氏诗而立之周礼者周公之大典毛氏言诗最密左氏与春秋为表里三者不出六艺不明噫微献王则六艺其遂噎乎故其功烈至今赖之且夫观其人之所好足以知其心王侯贵人不好奢靡而喜书者固鲜矣不喜浮辩之书而乐正道知之明而信之笃守之纯而行之勤者百无一二焉武帝虽好儒好其名而不知其实慕其华而废其质是以好儒愈於文景而德业後之景帝之子十有四人栗太子废而献王最长向若遵大义属重器用其德施其志必无神僊祠祀之烦宫室观游之费穷兵黩武之劳赋役转输之敝宜其仁丰义洽风移俗变焕然帝王之治复还其必贤於文景远矣嗟乎天实不欲礼乐复兴邪抑四海自不幸而已矣

传家集卷六十六

卷六十七

钦定四库全书

传家集卷六十七 宋 司马光 撰评

子吟

尧舜之圣非以其能轻天下也廼以其能重天下也夫唯重天下故必得圣人然後授之禹之传於子非私之也苟天下无圣人以授之则非子莫之传矣夫父之传子非至禹而後有之也盖自生民以来有国家者无不然矣燕吟徒知慕尧舜之名不知察尧舜之实誡於奸言以?於死亡为天下笑岂不悲哉孟子曰以天下与人易为天下得人难岂非以燕吟而知之邪

应侯罢武安君兵【庆历五年作】

甚矣邪臣之害国也以得为丧以成为败保身固宠不顾国谋损公而益私仆人而立已国家丧败不与其忧世之患此亦已久矣

甘罗【庆历五年作】

甘罗以稚子名显於世非有他奇略正以势力恐张唐耳虽云慧敏然君子治世无所取焉

范雎【庆历五年作】

穰侯相秦秦益强宰制诸侯如严主之役仆夫左右前後无不如志此穰侯之功也范雎非能为秦忠谋亦非有患於穰侯也欲行其说而穰侯适妨其路故控其喉拊其背而夺之位秦王视听之不明遂至於迁逐母弟况穰侯何有哉穰侯虽擅权未至如雎之所言孔子恶夫佞者岂以此夫

秦阬赵军【庆历五年作】

夫兵之设非以害人所以养人也残暴如此其谁与之秦七世役诸侯卒兼天下然其失策之大者有三焉欺楚怀王而虏之不信莫大焉阬赵降卒四十万不仁莫大焉欺与国诛已降使诸侯疑而百姓怨不智莫大焉秦所以失天下之故多矣在此三者於不信之不信不仁之不仁不智之不智是以始皇坟草未生而四海横溃宗庙为墟究其祸本兆於此矣

项羽诛韩生【庆历五年作】

世皆以项羽不能用韩生之言弃关中之险故失天下窃谓不然夫秦据函谷东向以制天下然孝惠昭襄以之兴而二世子婴以之亡顾所以用之之道何如耳地形不足议也项羽放杀其君不义之名明於日月宰制天下王诸侯废公义而任私意逐其君以置其臣其受封者争夺不服踈斥忠良猜忌有功使臣下皆无亲附之意推此道以行之虽重金袭汤不能以一日守也况三秦之险哉

贯高【庆历五年作】

高祖以骄失臣贯高以很亡君君臣之际不亦两伤邪高不能辅君以义不忍小耻轻虑浅谋以陷弑君之恶卒亡其国祸自高始虽杀身破家以明张敖而令赵国社稷芜没宗庙邱墟所存者小所亡者大所得者少所失者多槩以大义亦乌足言哉

汉高祖斩丁公【庆历五年作】

汉高祖可谓能远谋矣臣无贰心古之命也纵君之敌以树私恩奸莫大焉奸而为惠勿报可也若将报之其望必大为臣不忠而享大报虽无背施何以使人天下既定奸不干正尽节者赏贰心者诛君无失刑臣无贰心然後人无觊觎上下安矣宜乎子孙相承庙祀四百盖亦谋之远矣周书曰远乃猷此之谓也

烹酈生

班固称蒯通一说而丧三僇为其亡田横杀酈生骄韩信也以愚观之汉王既遣酈生下齐而不止韩信之进兵是则汉王杀之非蒯通杀之也惜夫一失其信羣臣孰敢为之使诸侯孰敢为之与虽得齐而有之所亡岂不多哉

戾太子败【庆历五年作】

钩弋夫人之子十四月而生孝武以为神灵命其门曰尧母当是时太子犹在东宫则孝武属意固已异矣是以奸臣逆窥上意以倾覆冢嗣卒成巫蛊之祸天下咸被其殃然则人君用意小违文义祸乱及此可不慎哉

立钩弋子为太子【庆历五年作】

孝武以孝昭之生神异於人而复有早成之资违长幼之次而立之鑑於诸吕先诛其母以絶祸源其於重天下谋子孙深远矣然而举襁褓之子置之万民之上非有孝昭之明霍光之忠鲜不危哉

诛赵广汉【庆历五年作】

广汉之为京兆汉兴以来无能及者周礼议贤议能然则虽有罪固当宥之况广汉之罪不及死邪斯足以为孝宣魏相之累矣

张汤有後【庆历五年作】

或称张汤矫伪刻薄而後嗣显荣七叶不絕意者积善余庆积恶余殃近虚语耶应之曰不然所谓积者继世相因之谓也故传称八元八凯世济其美又称三族世济其凶此非积善积恶之谓耶栾书有惠於晋晋人思之黻虽刚愎犹得保其宗庙至盈无德乡族遂亡然则黻之所以存书之余庆也盈之所以亡黻之余殃也祖父有德子孙为不善未免祸败庆何有焉祖父不善而子孙有德福祿将集殃何有焉祖父为不善而子孙又无德以盖前人之愆则余殃被之是以尧舜虽至德朱均不能免其灾瞽瞍虽大恶舜禹无所亏其圣若张汤者虽险詖人也有子安世保辅汉室寔有大功子孙嗣之率皆忠恪信厚恭俭周密邦有道不废邦无道免於刑戮以是光显於後弥历永世固其宜矣又何异焉

贾捐之【庆历五年作】

君子以正消邪捐之以邪攻邪宜乎其不济矣

京房对汉元帝【庆历五年作】

甚矣闇君之不可与言也天实剥丧汉室而昏塞孝元之心使如木石不可得入至於此乎哀哉京房之言如此其深切着明也而曾不能谕何哉诗云匪面命之言提其耳匪手携之言示之事又云海尔谆谆听我藐藐噫後之人可不以孝元为监乎

高顺【庆历五年作】

或问陈登高顺皆有过人之才俱事吕布而登输心魏祖亲为反间顺尽力於布与之偕死意者顺贤登欵应之曰不然古者列国并立同事王室故先王制礼诸侯有王大夫有君君臣始终有死无贰汉氏平壹海内万国一君天下之君唯帝室耳顺於吕布虽备将佐无委质之分布者反覆乱人非能辅佐汉室而又强暴无谋败亡有证登知几轻举以存易亡徐豫克清百姓苏息顺托身失所迷远不复以陷大戮易称比之匪人岂谓顺耶其才虽美未能及登以兹观之优劣见焉

魏孝武帝初立【庆历五年作】

甚矣高欢之无道也其视君不如奕棋废而置之在造次尔立君大事不详如此取悔宜哉

魏孝武帝西迁【庆历五年作】

周书曰天之所坏不可支也元氏失政久矣而孝武欲兴之脱於高欢得宇文黑獺其所以异者无几耳呜呼为人君者必制治於未乱保安於未危兢兢业业日慎一日不然怠惰荒淫使祸流子孙既乱且危然後慎之其可乎

张巡【嘉佑元年作】

天授之谓才人从而成之之谓义发而着之事业之谓功精敏辩博拳捷趨勇非才也驱市井数千之衆摧敌人百万之师战则不可胜守则不可拔斯可谓之才矣死党友存孤儿非义也明君臣之大分识天下之大义守死而不变斯可谓之义矣攻城拔邑之衆斩首捕虏之多非功也控扼天下之咽喉蔽全天下之大半使其国家定於已倾存於既亡斯可谓之功矣呜呼以巡之才如是义如是功如是而犹不免於流俗之毁况其暖暖者邪

冯道为四代相【庆历五年作】

忠臣不二君贤女不二夫策名委质有死无贰天之制也彼冯道者存则何心以临前代之民死则何面以见前代之君自古人臣不忠未有如此比者然而尊官重禄老以没齿何哉夫为国家者明礼义獎忠良褒义烈诛奸回以厉羣臣羣臣犹爱死而忘其君况相印将节以宠叛臣其不能永享天命宜矣然而庸愚之人往往犹称其智盖五代披攘人主岁易羣臣失节比踵於朝因而誉之欲以自释余恐後世以道所为为合於理君臣之道将大坏矣臣而不臣虽云其智安所用哉

原

原命

子罕言命子贡称夫子之文章可得而闻也夫子之言性与天道不可得而闻也是则天道精微非圣人莫能知今学者未能通人理之万一而遽从事於天是犹未尝操舟而欲涉海不陷溺者其几矣昔眭孟知有王者兴於微贱而不知孝宣乃欲求公孙氏嬪以天下翼奉知汉有中衰厄会之象而不知王莽乃云洪水为灾西门君惠知刘秀当为天子而不知光武乃谋立国师刘秀秀亦更名以应之刘灵助知三月当入定州四月尔朱氏灭而不知灭尔朱者为齐神武入定州者乃其首也此五子者其於术可谓精矣皆无益於事而身为戮没又况下此者哉夫天道窅冥恍惚若有若亡虽有端兆示人而不可尽知也非天下之至神其孰能与於此是以圣人之教治人而不治天知人而不知天春秋记异而说不书唯恐民冒没猖狂以趋於乱也

说

说玄

予少之时闻玄之名而不获见独观雄之自序称玄盛矣及班固为雄传则曰刘歆尝观玄谓雄曰空自苦今学者有禄利然尚不能明易又如玄何吾恐後人用覆瓿也雄笑而不应诸儒或讥以为雄非圣人而作经犹春秋吴楚之君僭号称王盖诛绝之罪也固存此言则固之意虽愈於歆亦未谓玄之善如雄所云也余亦私怪雄不赞易而别为玄易之道其於天人之蕴备矣而雄岂有以加之廼更为一书且不知其焉所用之故亦不谓雄宜为玄也及长学易苦其幽奥难知以为玄者贤人之书校於易其义必浅其文必易夫登乔山者必践於块埤适沧海者必沿於江汉故愿先从事於玄以渐而进於易庶几乎其可跂而望也於是求之积年始得观之初则溟滓漫漶畧不可入廼研精易虑屏人事而读之数十过参以首尾稍得闕其梗槩然後喟然置书叹曰呜呼扬子云真大儒者邪孔子既没知圣人之道者非子云而谁孟与荀殆不足拟况其余乎观玄之书明则极於人幽则尽於神大则包宇宙细则入毛发合天地人之道以为一刮其根本示人所出胎育万物而兼为之母若地履之而不可穷也若海挹之而不可竭也盖天下之道虽有善者蔑以易此矣考之於运元之初而玄已生察之於当今而玄非不行穷之於天地之季而玄不可亡叩之以万物之情而不漏测之以鬼神之状而不违槩以六经之言而不悖籍使圣人复生视玄必释然而笑以为得已之心矣乃知玄者以赞易也非别为书以与易角逐也何歆固知之之浅而过之之深也或曰易之法与玄异雄不遵易而自为之制安在其赞易乎且如与易同道则既有易矣何以玄为曰夫畋者所以为禽也网而得之与弋而得之何异书者所以为道也易网也玄弋也何害不既设网而使弋者为之助乎子之求道亦胶矣且扬子作法言所以准论语作玄所以準易子不废法言而欲废玄不亦惑乎夫法言与论语之道庸有异乎玄之於易亦然大厦将倾一木扶之不若衆木扶之之为固也大道将晦一书辨之不若衆书辨之之为明也学者能专精於易诚足矣然易天也玄者所以为之阶也子将升天而废其阶乎先儒为玄解者诚已善矣然子云为文既多训诂指趣幽邃而玄又其难知者也故今疑先儒之解未能尽契子云之志世必有能通之者比老终且学焉

述

述国语【庆历五年作】

先儒多怪左丘明既传春秋又作国语为之说者多矣皆未甚通也先君以为丘明将传春秋乃先采集列国之史国别分之取其菁英者为春秋传而先所采集之藁因为时人所传命曰国语非丘明之本志也故其辞语繁重序事过详不若春秋传之简直精明浑厚迺峻也又多驳杂不粹之文诚由列国之史学有厚薄才有浅深不能醇一故也不然丘明作此复重之书何为耶然所载皆国家大节兴亡之本柳宗元邪佞之人智识浅短岂足以窥望古君子藩篱而妄着一书以非之窃惧後之学者惑於宗元之言而简弃此书故述其益以张之

四言铭系述【元丰二年五月十七日作】

迂叟为四言铭见者忽之曰老生常谈耳故有系述孔子称才难夫才者所受於天非人所能强也故推十合一曰士千人曰俊万人曰杰出於其类拔於其萃此其所以难也闻言易悟曰

聰睹事易辨曰明敢为不惧曰勇强力不屈曰健有是四者才则美矣然未足恃也自古恃才而不懃德行以杀身丧家亡国者踵相及也彼皆天之所与非已之所为又奚足以骄人哉君子则不然有其才必思美其行以成之尽心於人曰忠不欺於已曰信善父母曰孝善兄弟曰友夫孝友百行之先而後於忠信何也苟孝友而不忠信则非孝友矣能是四者行则美矣未及於德也正直为正正曲为直适宜为中交泰为和正直非中和不行中和非正直不立若寒暑之相济陰阳之相成也夫察目睫者不能见百步瞻百步者亦不能见目睫均是德也执其近小而遗其远大守其卑浅而忘其高深是犹不免为小人焉故君子好学不厌自强不息推之使远廓之使大耸之使高研之使深发于心形于身裕于家施于国格于上下被于四表虽尧舜周孔莫不本於是矣呜呼舍是而云道者皆不足学也

贈

书心经後贈紹鑑【元丰五年十二月十三日作】

余尝闻学佛者言佛书入中国经律论三藏合五千四十八卷般若经独居六百卷学者撮其要为心经一卷为之注者郑预最简而明余读郑注乃知佛书之要尽於空一字而已或问扬子人有齐死生同贫富等贵贱何如扬子曰作此者其有惧乎此经云照见五蘊皆空度一切苦厄似与扬子同指然则释老之道皆宜为忧患之用乎世称韩文公不喜佛常排之余观其与孟尚书书论大颠云能以理自胜不为事物侵乱乃知文公於书无所不观盖尝徧观佛书取其精粹而排其糟粕耳不然何以知不为事物侵乱为学佛者所先邪今之学佛者自言得佛心作佛事然皆不免侵乱於事物则其人果何如哉西京僧官凡六员曰録曰首座曰副首座左右街各一有缺则选僧之有行业者补之又缺则以次上迁逮左録而止崇德僧紹鑑既为左首座矣会足有微疾乃叹曰吾弃家为僧固求自安逸今已病而犹自勤於僧职岂吾本心哉即投牒自请解去时左録新物故其徒皆止之以为宜待次补鑑不听既解去明日右録亦物故补其处者乃位於鑑下之人也其徒皆为之恨鑑处之恬然噫鑑儻不知事物之空能如是乎郑经刻石於天宝末今颇剋缺余贤鑑能不以所重易所轻且欲劝之俾全其所得乃命吏好写一通以贈之

諭

諭若讷【熙宁五年】

熙宁六年冬光在洛阳有衢州僧若讷袖书来见曰仁宗皇帝时得召对成化殿命讲所学经且作颂三篇上甚喜後数日中使赐若讷紫衣辞曰臣所为不远千里求见明主者欲献其所学庶几广之於天下今陛下乃赐臣紫衣非臣志也臣不敢奉诏使者三返终辞不受上乃飞白安净二字以赐若讷若讷然後举首加额受而藏之若讷野僧也生江湖间一旦万乘之主召入禁中而访所学授以二字盖师号之类也天下僧受师号者何可胜纪有能亲屈帝笔如若讷之光荣者乎若讷是以不敢忘先帝不费之恩思有以报之向聚吾师所述之经五千余卷合为一藏名曰报恩经藏徧请朝廷辅佐之臣譔文书石琢而立之今又将刻所赐二字於

石以传于後子为我序其事而记之光谢之曰光儒者素不习释氏书将何以发明上人之学与受赐之由且文辞鄙陋何敢辄寓名诸公之末自陷不知量之罪乎若讷固请不已曰若讷去冬已尝犯寒至洛值子西适秦不克见而返今兹复来非有他求欲得文而已若讷岂不知朝廷贵人及四方能文者甚衆欲为斯记者亦不鲜若讷皆不愿得而唯子之求何子拒我之深乎光甚愧其言因谕之曰上人之志於光勤且厚如此光敢无辞以为复抑仁宗皇帝既嘉上人不受命服赐以二字岂师号之谓邪盖以褒劝上人之德也上人亦尝深思其指乎夫安净德之美者也既曰安矣则於物宜无求既曰净矣则物不得而间之是故安如磐石虽加減万钧不为之低昂净如清水有一毫入之则累矣上人既能知先帝之大恩当谨守圣言而力行之以无负先帝之所期乃所以报也经藏奚为哉况光之文又足求邪

训

训俭示康

吾本寒家世以清白相承吾性不喜华靡自为乳儿长者加以金银华美之服辄羞赧弃去之二十忝科名闻喜宴独不戴花同年曰君赐不可违也乃簪一花平生衣取蔽寒食取充腹亦不敢服垢弊以矫俗干名但顺吾性而已衆人皆以奢靡为荣吾心独以俭素为美人皆嗤吾固陋吾不以为病应之曰孔子称与其不逊也宁固又曰以约失之者鲜矣又曰士志於道而耻恶衣恶食者未足与议也古人以俭为美德今人乃以俭相诟病嘻异哉近岁风俗尤为侈靡走卒类士服农夫蹑丝履吾记天圣中先公为羣牧判官客至未尝不置酒或三行五行多不过七行酒沾於市果止於梨栗枣柿之类殽止於脯醢菜羹器用甕漆当时士大夫家皆然人不相非也会数而礼勤物薄而情厚近日士大夫家酒非内法果殽非远方珍异食非多品器皿非满案不敢会宾友常数日营聚然後敢发书苟或不然人争非之以为鄙吝故不随俗靡者盖鲜矣嗟乎风俗颓弊如是居位者虽不能禁忍助之乎又闻昔李文靖公为相治居第於封邱门内厅事前仅容旋马或言其太隘公笑曰居第当传子孙此为宰相厅事诚隘为太祝奉礼厅事已寛矣参政鲁公为谏官真宗遣使急召之得於酒家既入问其所来以实对上曰卿为清望官柰何饮於酒肆对曰臣家贫客至无器皿殽果故就酒家觴之上以其无隐益重之张文节为相自奉养如为河阳掌书记时所亲或规之曰公今受俸不少而乃自奉若此公虽自信清约外人颇有公孙布被之讥公宜少从衆公叹曰吾今日之俸虽举家锦衣玉食何患不能顾人之常情由俭入奢易由奢入俭难吾今日之俸岂能常有身岂能常存一旦异於今日家人习奢已久不能顿俭必致失所岂若吾居位去位身在身亡常如一日乎呜呼大贤之深谋远虑岂庸人所及哉御孙曰俭德之共也侈恶之大也共同也言有德者皆由俭来也夫俭则寡欲君子寡欲则不役於物可以直道而行小人寡欲则能谨身节用远罪丰家故曰俭德之共也侈则多欲君子多欲则贪慕富贵枉道速祸小人多欲则多求妄用败家丧身是以居官必贿居乡必盗故曰侈恶之大也昔正考父饁鬻以餬口孟僖子知其後必有达人季文子相三君妾不衣帛马不食粟君子以为忠管仲镂簠朱紘山檣藻梲孔子鄙其小器公叔文子享卫灵公史鰌知其及祸及成果以富得罪出亡何曾日食万钱至孙以骄溢倾家石崇以奢靡夸人卒以此死东市近世寇莱公豪侈冠一时然以功业大人莫之非子孙习其家风今多穷困其余以俭立名以侈自败者多矣不可徧数聊举数人以训汝汝非徒身当服行

当以训汝子孙使知前辈之风俗云

传家集卷六十七

卷六十八

钦定四库全书

传家集卷六十八 宋 司马光 撰序一

百官表总序

四海至广虽圣人不能独治万机至衆虽圣人不能徧知是故设官以分其事量能而授之任自生民以来有国家者莫之能易也唐虞夏商尚矣周官具存粲然大备降及秦汉迄于隋唐虽不能如三代之粹美然上下相维皆有条绪孔子称惟器与名不可以假人又曰必也正名乎名之宜正者无若百官唐初职事官有六省一台九寺三监十六卫十率府之属其外又有勲官散官勲官以赏战功散官以褒勤旧故必折馘执俘然後赐勲积资累考然後进阶以其不可妄得故当时人以为荣及高宗东封武后预政欲求媚於衆始有泛阶自是品秩寢讹朱紫日繁矣肃宗之後四方糜沸兵革不息财力屈竭勲官不足以劝武功府库不足以募战士遂并职事官通用为赏不复选材无所爱吝将帅出征者皆给空名告身自开府至郎将聽临事注名後又听以信牒授人有至异姓王者於是金帛重而官爵轻矣或以大将军告身才易一醉其滥如此重以藩方跋扈朝廷畏之穷极褒宠苟求姑息遂有朝编卒伍暮拥节旄夕解缙衣旦纓公衮者矣流及五代等衰益紊三公端揆之贵施於军校衣紫执象之荣被於胥史名器之乱无此为甚大宋受命承其余弊方纲纪大基未暇厘正故台省寺监卫率之官止以辨班列之崇卑制廩禄之厚薄多无职业其所谓官者乃古之爵也所谓差遣者乃古之官也所谓职者乃古之加官也自余功臣检校官散官阶勲爵邑徒为烦文人不复贵凡朝廷所以鼓舞羣伦缉熙庶绩者曰官曰差遣曰职而已於三者之中复有名同实异交错难知又迁徙去来常无虚日欲观其大畧故自建隆以来文官知杂御史以上武官合门使以上内臣押班以上迁除黜免删其烦冗存其要实以伦类相从以先後相次为百官公卿表云

河南志序【元丰六年作】

周官有职方士训诵训之职掌道四方九州之事物以诏王知其利害後世学者为书以述地里亦其遗法也唐丽正殿直学士韦述为两京记近故龙图阁直学士宋君敏求字次道演之为河南长安志凡其废兴迁徙及宫室城郭坊市第舍县镇乡里山川津梁亭驿庙寺陵墓之名数与古先之遗迹人物之俊秀守令之良能花卉之殊尤无不备载考诸韦记其详不啻十余倍开编粲然如指诸掌真博物之书也次道性嗜学先正宣献公蓄书三万卷次道自毁齿至于白首从事其间未尝一日舍置故其见闻博洽当时罕伦又闲习国家故事公私有疑咸往质焉又喜着书如唐书仁宗实録国史会要集注史记之类与衆共之或专修而未成者皆不计外其手自纂述已成者凡四百五十卷盖昔人所着未有若此其多也次道既没太尉潞公留守西京其子庆曾等奉河南志以请於公曰先人昔尝佐此府叙其事尤详惜其传於世

者甚鲜愿因公刻印以广之岂徒先人蒙不朽之赐於泉壤抑亦使四方之人未尝至洛者得之如游处已熟後世闻今日洛都之盛者得之如身逢目睹也幸公留意公从之且命光为之序光於次道友人也乌敢以固陋而辞

刘道原十国纪年序

皇佑初光为贡院属官时有诏士能讲解经义者听别奏名应诏者数十人赵周翰为侍讲知贡举问以春秋礼记大义其中一人所对最精详先具注疏次引先儒异说末以己意论而断之凡二十问所对皆然主司惊异擢为第一及发糊名乃进士刘恕年十八矣光以是慕重之始与相识道原乃其字也道原是岁赋诗论策亦入高等殿试不中格更下国子监试讲经复第一释褐钜鹿主簿迁和川令陆介夫为广西帅奏掌机宜前世史自太史公所记下至周显德之末简策极博而於科举非所急故近岁学者多不读鲜有能道之者独道原笃好之为人强记纪传之外闾里所録私记杂说无所不览坐听其谈衮衮无穷上下数千载之细大之事如指掌皆有稽据可验令人不觉心服英宗皇帝雅好稽古欲偏观前世行事得失以为龟监光承乏侍臣尝从容奏旧史文繁自布衣之士鲜能该通况天子一日万机诚无暇周覽乞自战国以还迄于显德凡关国家之兴衰系衆庶之休戚善可为法恶可为戒者詮次为编年一书删其浮长之辞庶於奏御差便上甚喜寻诏光编次历代君臣事迹仍谓光曰卿自择馆阁英才共修之光对曰馆阁文学之士诚多至於专精史学臣未得而知所知者惟和川令刘恕一人而已上曰善退即奏召之与共修书凡数年间史事之纷错难治者则以诱之道原光蒙成而已今上即位更命其书曰资治通鉴王介甫与道原有旧深爱其才熙宁中介甫参大政欲引道原修三司条例道原固辞以不习金谷之事因言天子方属公以政事宜恢张尧舜之道以佐明主不应以财利为先介甫虽不能用亦未之怒道原尝见之辄尽诚规益及吕献可得罪知邓州道原往见介甫曰公所以致人言盖亦有所未思因为条陈所更法令不合衆心者宜复其旧则议论自息介甫大怒遂与之絶未几光出知永兴军道原曰我以直道忤执政今官长复去我何以自安且吾亲老不可久留京师即奏乞监南康军酒得之光寻判西京留台奏迁书局於洛阳後数年道原奏请身诣光议修书事朝廷许之道原水陆行数千里至洛阳自言比气羸惫必病且死恐不复得再见留数月而归未至家遭母丧俄得风疾右手足偏废伏枕再葺痛苦备至每呻吟之隙辄取书修之病益笃乃束书归之局中以元丰元年九月戊戌终官至秘书丞年止四十七嗟乎以道原之耿介其不容於人齟齬以没固宜天何为复病而夭之邪此益使人痛惋恻怛而不能忘者也道原嗜学方其读书家人呼之食至羹炙冷而不顾夜则卧思古今或不寐达旦在和川时以公事适野见刘聪太宰刘雄碑嘉平五年始改建元正旧史之失在洛阳与光偕如万安山道旁有碑读之乃五代列将人所不称道者道原即能言其行事始终归验於旧史信然宋次道知亳州家多书道原枉道就借观之次道曰具酒饌为主人礼道原曰此非吾所为来也殊废吾事愿悉撤去独闭门昼夜读且抄留旬日尽其书而去目为之翳道原致疾亦由学之苦邪方介甫用事呼吸成祸福凡有施置举天下莫能夺高论之士始异而终附之面誉而背毁之口服而心非之者比肩是也道原独奋厉不顾直指其事是曰是非曰非或面刺介甫至变色如铁或稠人广坐介甫之人满侧道原公议其得失无所隐恶之者侧目爱之者寒心至掩耳起避之而道原曾不以为意见质厚者亲之如兄弟奸谄者疾之如仇讎由是困穷而终不悔此诚人之所难也昔申枨以多慾不得为刚

微生高以乞醯不得为直如道原者可以为刚直之士乎道原家贫至无以给旨甘一毫不妄取於人其自洛阳南归也时已十月无寒具光以衣袜一二事及旧貂褥赈之固辞强与之行及颍州悉封而返之於光而不受於他人可知矣尤不信浮屠说以为必无是事曰人如居逆旅一物不可乏去则尽弃之矣岂得齎以自随哉可谓知之明而决之勇矣道原好着书志欲笼络宇宙而无所遗不幸早夭其成者十国纪年四十二卷包羲至周厉王疑年谱共和至熙宁年畧谱各一卷资治通监外纪十卷余皆未成其成者亦未以传人曰今柳芳唐历本皆不同由芳书未成而传之故也期於瞋目然後传病亟犹汲汲借人书以参校已之书是非其失气垂尽乃口授其子羲仲为书属光使譔埋铭及十国纪年序且曰始欲诸国各作百官及藩镇表未能就幸於序中言之光不为人譔铭文已累年所拒且数十家非不知道原托我之厚而不获承命悲愧尤深故序平生所知道原之美附於其书以传来世道原自言其先万年人六世祖度唐末明经及第为临川令卒官遇乱不能归遂葬高安因家焉南唐以高安为筠州今为筠州人父焕字凝之进士及第为颍上令不能屈节事上官年五十弃官家庐山之阳且三十年矣人服其高欧阳永叔作庐山高以美之今为屯田员外郎致仕云

名苑序【庆历九年作】

孔子称名不正则言不顺言不顺则事不成乃至於百姓无所措手足甚矣圣人重名之至也刘子政述九流有名者流曰尹文子公孙龙子等凡七家尹文子今存其术杂黄老刑名之言耳余书更历久远世鲜传之今有孙氏释名盖亦其类也昔者鲁哀公问社於宰我宰我对曰周人以栗曰使民战栗孔子闻之深非之曰成事不说遂事不谏既往不咎戒其後复为也两汉以来儒者务为此态旁贯曲取纤辞蔓说至有依声袭韵强为立理诚可闵笑者甚衆此非宰我栗社之比邪今释名之文亦犹是矣抑亦失圣人之旨远哉愚尝念之久矣间因观经传诸书有可以正名者因记之窃以为备万物之体用者无过於字包衆字之形声者无过於韵今以集韵本为正先以平上去入衆韵正其声次以说文解字正其形次以训诂同异辩其理次以经传诸书之言证其实命曰名苑其有法制云为时迁物变者亦畧叙其沿革欲人知其源流变态云尔至於鱼虫草木之类虽纖苛烦碎非慷慨君子所当用心然亦重名之一节尔至於三才道德礼乐善恶真伪之名辅佐世治其功亦不细哉所谓文武之道未坠於地在地人贤者识其大者不贤者识其小者将来君子好学乐道庶几亦有取焉

古文孝经指解序

圣人言则为经动则为法故孔子与曾参论孝而门人书之谓之孝经及传授滋久章句漫差孔氏之人畏其流荡失真故取其先世定本杂虞夏商周之书及论语藏诸壁中苟使人或知之则旋踵散失故虽子孙不以告也遭秦灭学天下之书扫地无遗汉兴河间人颜芝之子得孝经十八章儒者相与传之是为今文及鲁恭王坏孔子宅而古文始出凡二十二章当是之时今文之学已盛故古文排摈不得列於学宫独孔安国及後汉马融为之传诸儒党同疾异信伪疑真是以历载累百而孤学沉厌人无知者隋开皇中秘书学士王逸於陈人处得之河间刘炫为之作稽疑一篇将以兴坠起废而时人已多讥笑之者及唐明皇开元中诏议孔郑二家刘知几以为宜行孔废郑於是诸儒争难蠹起卒行郑学及明皇自注遂用十八章为定

先儒皆以为孔氏避秦禁而藏书臣窃疑其不然何则秦世科斗之书废絶已久又始皇三十四年始下焚书之令距汉兴才七年耳孔氏子孙岂容悉无知者必待恭王然後迺出盖始藏之时去圣未远其书最真与夫他国之人转相传授历世踈远者诚不侔矣且孝经与尚书俱出壁中今人皆知尚书之真而疑孝经之伪是何异信脰之可?而疑炙之不可食也嗟乎真伪之明皦若日月而历世争论不能自伸其中异同不多然要为得正此学者所当重惜也前世中孝经多者五十余家少者亦不减十家今秘阁所藏止有郑氏明皇及古文三家而已其古文有经无传案孔安国以古文时无通者故以隶体写尚书而传之然则论语孝经不得独用古文此盖後世好事者用孔氏传本更以古文写之其文则非其语则是也夫圣人之经高深幽远固非一人所能独了是以前世并存百家之说使明者择焉所以广思虑重经术也臣愚虽不足以度越前人之胷臆闚望先圣之藩篱至於时有所见亦各言尔志之义是敢辄以隶写古文为之指解其今文旧注有未尽者引而伸之其不合者易而去之亦未知此之为是而彼之为非然经犹的也一人射之不若衆人射之其为取中多也臣不敢避狂僭之罪而庶几於先王之道万一有所裨焉

洛阳耆英会序【元丰五年正月作】

昔白乐天在洛与高年者八人游时人慕之为九老图传於世宋兴洛中诸公继而为之者凡再矣皆图形普明僧舍普明乐天之故第也元丰中潞国文公留守西都韩国富公纳政在里第自余士大夫以老自逸於洛者於时为多潞公谓韩公曰凡所为慕於乐天者以其志趣高逸也奚必数与地之褻焉一旦悉集士大夫老而贤者於韩公之第置酒相乐宾主凡十有一人既而图形妙觉僧舍时人谓之洛阳耆英会孔子曰好贤如緇衣取其敝又改为乐善无厌也二公寅亮三朝为国元老入赞万机出绥四方上则固社稷尊宗庙下则熙百工和万民天子腹心股肱耳目天下所取安所取平其勲业闳大显融岂乐天所能庶几然犹慕效乐天所为汲汲如恐弗及岂非乐善无厌者与又洛中旧俗燕私相聚尚齿不尚官自乐天之会已然是日复行之斯乃风化之本可颂也宣徽工公方留守北都闻之以书请於潞公曰某亦家洛位与年不居数客之後顾以官守不得执卮酒在坐席良以为恨愿寓名其间幸无我遗其为诸公嘉美如此光未及七十用狄监卢尹故事亦预於会潞公命光序其事不敢辞时五年正月壬辰端明殿学士兼翰林侍读学士太中大夫提举崇福宫司马光序

开府仪同三司守司徒武宁军节度使致仕韩国公富弼字彦国年七十九

河东节度使开府仪同三司守太尉判河南府兼西京留守司事潞国公文彦博字寬夫年七十七

司封郎中致仕席汝言字君从年七十七

太常少卿致仕王尚宫字安之年七十六

太常少卿致仕赵丙字南正年七十五

秘书监致仕刘凡字伯寿年七十五

卫州防御使致仕冯行己字肃之年七十五

太中大夫充天章阁待制提举崇福宫樊建中字正叔年七十三

司农少卿致仕王谨言字不疑年七十五

太中大夫提举崇福宫张问字昌言年七十一龙图阁直学士通议大夫提举崇福宫张壽字景元年七十

传家集卷六十八

卷六十九

<集部,别集类,北宋建隆至靖康,传家集>

钦定四库全书

传家集卷六十九 宋 司马光 撰序二

顏太初杂文序【宝元二年作】

天下之不尚儒久矣今世之士大夫发言必自称曰儒儒者果何如哉高冠博带广袂之衣谓之儒耶执简伏册呻吟不息谓之儒耶又况点墨濡翰织制绮组之文以称儒亦远矣舍此勿言至於西汉之公孙丞相萧望之张禹孔光东汉之欧阳歙张酺胡广世之所谓大儒果足以充儒之名乎鲁人顏太初字醇之常愤其然读先王之书不治章句必求其理而已矣既得其理不徒诵之以夸诳於人必也蹈而行之在其身与鄉党无余於其外则不光不光先王之道犹翳如也廼求天下国家政理风俗之得失为诗譔泊文以宣畅之景佑初青州牧有以荒淫放荡为事慕嵇康阮籍之为人当时四方士大夫乐其无名教之拘翕然效之寢以成风太初恶其为大乱风俗之本作东州逸党诗以刺之诗遂上闻天子亟治牧罪又有郢州牧怒属令之清直与已异者诬以罪榜掠死狱中妻子弱不能自诉太初素与令善怜其冤死作哭友人诗牧亦坐是废於时或荐太初博学有文诏用为国子监直讲会有御史素不善太初者上言太初狂狷不可任学官诏即行所至改除河中府临晋主簿太初为人实寬良有治行非狂人也自临晋改应天府户曹掌南京学卒於睢阳旧制判司簿尉四者无殿负例为令録虽愚懦昏毫无所取者积以年数必得之而太初才识如此举进士解褐近十年卒不得脱判司簿尉之列以终身死时盖年四十余噫天丧儒者使必至於大坏乎将犬吠所怪粲粲者必见鋤也何其仕与寿两穷如此世人见太初官职不能动人又其文多指诮有疵病者所恶闻虽得其文不甚重之故所弃失居多余止得其两卷在同州又得其所为题名记今集而序之前世之士身不显於时而言立於後世者多矣太初虽贱而天其文岂必不传异日有见之者观其後车诗则不忘鉴戒矣观其逸党诗则礼义不坏矣观其哭友人诗则酷吏愧心矣观其同州题名记则守长知弊政矣观其望仙驿记则守长不事厨传矣由是言之为益岂不厚哉

吕献可章奏集序【熙宁五年八月二十九日作】

欧阳观文有言士学古怀道者仕於时不得为宰相必为谏官谏官与宰相等坐乎庙堂之上与天子论可否者宰相也立乎殿陛之前与天子争是非者谏官也宰相九卿而下失职者受责於有司谏官失职者取讥於君子有司之法行乎一时君子之讥着之策书而昭明垂之百世而不泯诚哉是言也然士之居其任果能不失职者亦鲜矣献可为台谏官前後凡若干年遇黜者三皆以弹奏执政确切不已天子重伤大臣意不得已而黜之其直声赫然振动天下

自余百官之愆违政事之阙失苟与之同时无强弱大小知无不言言无不尽如献可者於其职业可谓无所愧负矣古之人称死而不朽者如臧文仲既没其言立是也然文仲之言传於今者无几盖时人不能存録遂使遗逸岂不惜哉光於献可忝备僚友献可平生造膝之言固不可得而闻今既没其子曰庾等搜求章奏遗藁得二百余篇光请而序之俾後之人察其言足以知献可之心然则献可身虽没其心长存也呜呼献可以直道自立始终无缺而官止於諫议大夫年止五十八彼不以其道得者或位极将相寿及胡耆从愚者视之则可为愤邑从贤者视之以此况彼所得所失孰为多少邪後之人得是书者宜宝蓄之当官事君苟能效其一二斯为伟人矣

庞相国清风集略後序

公之勲业治行范景仁所为清风集叙言之详矣公性喜诗虽相府机务之繁边庭军旅之急未尝一日置不为凡所以怡神养志及逢时值事一寓之於诗其高深阔远之趣固非庸浅所可及至於用事精当偶对的切虽古人能者殆无以过及疾亟光时为諫官有谒禁走手啓参候公犹録诗十余篇相示手注其後曰欲令吾弟知老夫病中尚有此意思耳字已惨澹难识後数日而薨葬者嗣子某字懋贤已集其文为五十卷既而以文字之多惧世人传者不能广也又选诗之尤善者凡千篇为十卷命曰清风集略刻板摹之命光继叙其事呜呼公之善在人者旁施四海後垂无穷如诗乃公之余事耳懋贤犹务其传勤勤恐不逮况其大者乎公之积庆宜有继哉时年月日门人涑水司马光序

薛密学田诗集序【元丰八年作】

扬子法言曰言心声也书心画也声画之美者无如文文之精者无如诗诗者志之所之也然则观其诗其人之心可见矣今人亲没则画像而事之画像外貌也岂若诗之见其中心哉故枢密直学士赠太尉薛公以文学政事显於真宗仁宗之际其所施設见於国史及宋宣献公所为神道碑此不详书公既薨五十余年少子中散大夫致仕侑集公诗二百二章以授光俾之譔序且为之名昔先人为郾尉公为转运使知待甚厚荐之於朝光虽不肖其敢忘诸是以虽不文不敢辞谨按薛氏自姚秦以来世有伟人仕公卿将相行能功业光照简册号称甲族迄於今不衰岂非河汾胜气独鍾於一門乎然而枝叶因游宦多散之四方惟公一族留不去犹居河东请名之曰河汾集庶几子子孙孙继公之志常保守奉事则而象之以传庆於无穷也元丰八年三月丁未涑水司马光序

赵朝议【丙】文藁集

在心为志发口为言言之美者为文文之美者为诗如鼓钟者声必闻於外灼龟者兆必见於表玉蘊石而山木茂珠居渊而岸草荣皆物理自然虽欲揜之不可得已朝议大夫致仕赵君南正善属文尤嗜为诗自初仕至归老聚其藁凡十四编一旦走仆负之以书属光为之序光实何人克膺兹任然尝闻同僚楚正叔之言曰予与南正同登进士第又同居颍阳熟其为人其清白耿介佗人殆难能也今閱其文藁味其言求其志乃知正叔信不我欺而南正所守良

可尚也噫世人有得南正文槁而观之虽未之识如自少至老日与之游矣元丰八年三月十一日丁未涑水司马光序

冯亚诗集序

文章之精者尽在於诗观人文徒观其诗斯知其才之远近矣陕人冯亚字希顔学诗於处士魏野偏得其道潘逍遥深重之未四十而终魏诗大行於时亚诗去魏不远而所传者鄉曲而已所以然者由魏之寿亚之夭欤家公知杭州亚子噩以其先人诗集请因杭工刻诸板而传之余以世俗不能识真贵於难得而贱於饱闻不若藏之於家有同志者就而写之则虽欲勿传安得不传若刻之於版有不知文者或敢讥评其否臧衆心无常从而和之是陨夫子之盛名不果刻序而归之王内翰赠商雒庞主簿诗後序【王诗云织女峯前贫主簿黄姑岩下旧词臣久栖枳棘方思替谥戴貂蝉不是真六里青山云簇簇一条丹水石磷磷春来?梦应相似同是帝城南畔人】

至道初今观文殿大学士始平公先君子赠中书令?为主簿商雒王公时自中书舍人谪官商州王公以文章独步当世久宦已通显於朝加之刚简峭直固不妄与人交然令君以九品官与相往来王公赠诗意好欵密则令君为人可知已至和初始平公以前相国在郢从容出王公诗示光曰先君尝有德於商雒吏民至今思之其辞牒判署犹有宝蓄存者而况今守商州为我刻王公之诗於商雒以慰吏民之心光曰诺退而序其事并诗往刻焉

并州学规後序【嘉佑二年作】

天下所以化在於学百官所以治在於法然则学为化原法为治本兹二者又可忽欤前牧韩公既徙学而广之又取法於大学及河南大名京兆府苏州除苛补漏以为新规今牧庞公惧学者寢久而寢忘之也廼命刻着於石呜呼是规也存虽屋不加多食不加丰生徒不加衆犹为学兴也是规也亡虽列屋万区糗粳如陵生徒如云犹为学废也後之人司是学者可不慎与

张共字大成序【嘉佑元年为越州张推官作】

天下之事未尝不败於专而成於共专则隘隘则睽睽则穷共则博博则通通则成故君子修身治心则与人共其道兴事立业则与人共其功道隆功着则与人共其名志得欲从则与人共其利是以道无不明功无不成名无不荣利无不长小人则不然专已之道而不能从善服义以自广也专已之功而不能任贤与能以自大也专已之名而日恐人之胜之也专已之利而不欲人之有之也是以道不免於蔽文不免於槁名不免於辱利不免於亡此二者君子小人之大分也陕郡张君名共才甚美行甚修举进士登上科今从事於浙东光辱与张君为同郡人习其为人固久窃以为古者名於亲而字於朋友字必附名而为义焉光是敢辄广其名之义而字曰大成以勉之异日张君克充其名显裕光大庸可量哉

诸兄子字序【皇佑二年作】

余兄子十四人大抵未字皇佑二年告归过家徧为之字皆附其名以寓训焉京字亢宗京大也孟子曰天爵修而人爵从之尔姑大其德乎然後宗有所亢矣亮字信之孔子称去食去兵而信不可去信者行之本也稟字从之从顺也君子在家则稟於亲出则稟於君无所不用其顺焉夫顺者天之所助也元字茂善元者善之长也勉善不已能无长乎育字之致中和天地位焉万物育焉况其迹者乎良字希祖诗云毋念尔祖聿修厥德君子修德以为祖也可不勉乎富字希道智者富於道愚者富於贿尔其勉於智乎齐字居德齐中也孔子曰中庸之为德其至矣乎居德以中奚适而不利哉方字思之方道也孔子曰道不远人苟思之精行之勤则道何远之有哉爽字成德爽明也明敏辩智天之才也中和正直人之德也天与之才必资人德以成之与其才胜德不若德胜才故愿尔勉於德而已矣袞字补之君子之事上进思尽忠退思补过异日尔仕於朝当以仲山甫为法乎章字晦之君子之道闇然而日章然则欲道之章者其惟晦乎奕字袞美诗云夙兴夜寐毋忝尔所生奕世之美将待尔而袞之可不勉欤裔字承之尔於昆弟中为最幼承祖之美者舍尔尚谁任哉呜呼朝夕不離於口耳者名字而已尔曹苟能言其名求其义闻其字念其道庶几吾宗其犹不为人後乎

序赙礼【元丰六年十一月一日作】

名以位显行由学成此礼之常若夫身处草野未尝从学志在为善不求声利此则尤可尚也近世史氏专取高官为之传故闾阎之善人莫之闻丧礼之废坏久矣而民间为甚至有初丧亲家各具酒肉聚於其家与主人同醉饱者有以鼓乐导丧车者有因丧纳妇者相习为常恬不知怪医助教刘太居亲丧独不饮酒食肉终三年此乃今士大夫所难能也其弟永一尤孝友廉谨过於人熙宁初巫咸水入夏县城民溺死者以百数永一执竿立门首有佗人物流入门者辄撻出之有僧寓钱数万於其室居无何僧自经死永一遽詣县自陈请以钱归其弟子鄉人负其债久不偿者永一辄毁券以愧其心其行事类如此有周文粲者其兄嗜酒仰文粲为生兄或时酗殴文粲其邻人不平而唁之文粲怒曰吾兄未尝殴我汝何离间吾兄弟也有苏庆文者事继母以孝闻尝语其妇曰汝事吾母小不谨必逐汝继母少寡而无子由是安其室终身元丰中朝廷修景灵宫调天下画工詣京师事毕有诏选试其优者留翰林授官禄有台亨者名第一以父老固辞归养於田里此五人与余同县故余得而知之悲夫天下布衣之士刻志厉行而人莫知者可胜数哉始太之丧其父也余兄弟赙以千钱且为书致之曰礼凡有丧佗人助之珠玉曰含车马曰赗货财曰赙衣服曰襚今物虽薄欲人之可继也久之太请刻其书於石曰勸也鄉人不知有赙礼自太父之丧鄉人稍稍行之太欲广其传由吾鄉以及邻县由邻县以達四方使民间皆去弊俗而入於礼岂小补哉余益美其志因谕之曰是书不足刻余窃慕君子乐道人之善请书若兄弟及周文粲苏庆文台亨所为以传於世庶几使为善者不以隐微而自懈焉元丰六年十一月壬寅朔涑水迂叟序

卷七十

钦定四库全书

传家集卷七十 宋 司马光 撰序三

送郎景微序【送同年郎兄景微归会稽荣覲序】

进士此科见重於时久矣自两汉而下选举之盛无与为比迺至贩鬻给役之徒皆知以为美尚是以得之者矜夸满志焜耀於物如谓天下莫已若也亦何惑哉贤者居世会当蹈仁履义以德自显区区外名岂足恃邪郎景微与余周旋甚悉余备知之其为人刚不可校柔不可犯和易以为乐节正以为礼由七品官举进士一上中选可谓美矣然未尝有偃蹇之容自满之意或未识者卒然遇之尚不知其为举人又焉知其有科级邪所谓以德自显者殆无过此乎家君与尊谏议景德中同年登第在朝廷最名相善余又与景微以?籍同官偕举进士送名於天府覆试於南庙以至登第未尝异处古人有言朋友世亲如我比者固不踈矣今将泛舟南下拜亲於越谓余必以文序别余识荒陋非不知辞顾以非余无能纪其实美者故直书以赠之时景佑五年季夏司马光序

送李揆之序

古者朋友将别必有言以相赠与处也近世多为之序序者其亦赠处之道欤然世俗失之往往崇虚辞相叹誉曾无一言以为规是岂昔人赠处之道哉愚以为朋友之道誉其善规其过专誉而不规路人而聚处饮酒於市道者耳光於揆之非直同官而已实朋友也於其行又可无言以赠之揆之名相子孙聰達有美才习於时务观其行能殆无所复择矣然为之友者犹举其毛髮之阙而告之诚欲就其全也夫人非至圣必有短非至愚必有长至愚之难值亦犹至圣之不世出也故短长杂者举世比肩是也是以君子之取人也不求备称其善不计其恶求其工不责其拙如此故人竭其用而悦从之怨憎不至而功业荣焉然则垢面而险眦操耒而胥靡者尚未可轻辱而易视也禹曰知人则哲惟帝其难之尧禹以为难则凡人安得谓之易人事常不可测夫又詎知操耒者不为阿衡而胥靡者不为傅说若之何其可以心目断也窃尝闻之夫智者攘患常於至微着而攘之则无及已昔智伯一会而辱二主一臣以成凿台之祸以智伯之强人莫之害失一言於樽俎之际其祸章章如此况无其势取侮易矣夏书曰一人三失怨岂在明不见是图足下行矣慎之智或召灾敏或贾祸愚不可忽鄙不可侮是皆无损於人不宜於身勉之哉时思鄙言光之赠尽此而已未知足下复何以处我也庆历乙酉岁二月庚戌序

送李子仪序【皇佑三年作】

宝元中光从事在苏子仪侨居州下始得从之游窃尝与僚友议曰人之裕於才者或?於行丰於行者或歉於才要之不能得兼若子仪者才如是行如是佗日吾属其敢望乎间二年子仪升进士第名声暴灼於荐绅间光闻之喜曰所期果不负矣又五年光与子仪俱官太学日夕相从讲道甚乐不幸子仪遭先府君忧去职服除来还则光去迁佗官虽不得亟见然慕重其为人常若在旁也皇佑三年丞相文公出镇许昌士大夫愿从後车以自效於幕下者甚衆公无所取独与子仪俱夫以文公之明且公而子仪独应其选其不轻而重可知矣论者犹谓子仪不当舍中都游外方夫玉巨用之则为璧为圭细用之则为环为玦玉能明洁润泽而已矣璧与圭环与玦唯工者之所为玉岂能自制哉行矣子仪君子之道犹玉也亦乌适而不见贵乎

送孟翱宰宜君序

天之所以赐人贤不肖之分曰心智而已矣故佗可能也心智之叡明强识不肖者竭力无以及焉仲习为夏县尉封域之内山泽之夷险道途之远迩邑落之疎密无不历历详其名数吏卒数百人民踰万室性行之善恶家赀之丰约居处之里困仓之数皆能条例而詮次之凡人居官朞岁不能悉吏卒之名氏而仲习小大毕举如指诸掌抑可谓叡明而强识矣国家谓亲於民事者无若令於三王之世伯子男之职也而以资秩久次为之甚无谓乃诏二千石举明達政事者充其官仲习以是得宜君令夫为政者患於不知民之情伪下之得失上蔽下壅故赏罚纠纷而不治今仲习之精力乃如此以从小邑之政是犹激疾风以振鸿毛委洪波以灭炬火何足言者异日居相府立柱下总天下之图书承明主之顾问应答如响画地成图亦谁得居其右哉戊寅岁仆与仲习同登进士第辛巳岁仆以忧去官归乡里日从仲习游睹其强识未尝不咨嗟骇服故於其行也书以赠之

送丁浦江序

始仆为儿时家於壽之安丰浦江以年少气隽诵书属文闻於县中家之父兄皆祝仆曰佗日得如丁君足矣及壮侍亲之吴浦江为掾於润州州人称曰丁君为治精敏肃给凡州之僚吏无与比者仆乃知丁君非徒以文自高又能以政自力信乎其才之周也谓其去此而升美仕若巨河之决骏马之逸沛然莫之能御也间九年复相遇於京师则犹服故时蓝衫守铨门求一官礧然久之乃得婺之浦江同时辈流及後來者仕宦率居其右仆然後喟然叹曰才乎才乎信不足恃者邪抑又闻之天将降大任於是人也必先空乏其身行拂乱其所为浦江近是乎况浦江齿尚壮志尚銳以斯之才而济之以无倦则德业之涯未易前知也於其行聊序以劝之

送胡完夫序

舜之取士敷纳以言明庶以功车服以庸考其言中於道试之事克有功然後用之故能举十六相恭已不为而天下大治也近世取士不然一决之以文辞噫文辞岂能尽取士之道邪天下病是久矣明天子知之廼诏有司自今进士高第皆先试之小官使知为下之劳而熟於民

之疾苦然後察其功而举之虽置以为卿相无不可者呜呼此谁发哉乃大舜之业也晋陵胡完夫以进士贡於州试於有司覆於天子之庭第其名未尝在一二人之後则完夫之文辞可知矣其试於有司也光不佞尸其事得窃观其论策盖非特文辞之美也廼能发明圣人之渊源叶於古而适於今信乎其言能中於道者邪既中於道矣自今日以往天子将又试之以事异日完夫能扩其道以充其言则天子将引而置之卿相之位庶几乎元凯之功复见於今日矣呜呼天子一更法度复古之道其功业之归廼巍巍如是岂不伟欤噫是道也不难至在完夫勉之而已矣

送通山令郝戴序

通山郝明府年四十余父尝举进士老而无成以其志之不获也虽子登进士第仕至长吏终歉歉不自足明府亦以亲之不怡也不以仕为荣乃诣阙上书请致仕而为其亲徇一官朝廷虽嘉其意以无故事不之许明府将之官戚戚若受谪者且曰通山道险远吾亲必不肯行将留妻子侍吾亲而单车之官至则复请期於成吾志焉明府於光母党也光闻其言瞿然慙曰尝闻古之人仕以为亲非为身也若明府之仕其真无意於身者邪如光者禄既不及於亲而又无补於君役役然耗廩食以饱妻子久留而不能去得不为君子之罪人邪呜呼明府诚可颂而砺世人矣嘉佑八年八月十六日涑水司马光序

送李公明序【东之李相迪之子】

治平四年夏龙图阁直学士工部尚书兼侍读李公公明得谢於朝以太子少保致仕故事告老者不复谢辞径归其家天子谓公明历事四朝清慎公方进退以礼不可与佗臣比特召入对赐之坐慰劳久之又特置饌宴於资善堂唯讲读之官及记起居者凡七人得与焉比终宴天子六遣使者存问劝侑加赐白金御茶给优俸又诏以梓宫在殡不欲自为诗凡与宴之官皆命赋诗以宠其行仍别録一通以闻自前世称告老而荣者莫若汉二疎当是时宣帝不过赐之二十金而已未闻有恩礼若今之盛者也呜呼天子之安养耆寿优崇有德勤厚周密诚古今所未有也公明少为丞相子长为台阁显官迄今老而去位耳目聰明手足轻利诸子为九卿牧守而性皆孝谨洛阳佳园宅此数者又二疎所不能备也然则公明福祿完美显荣光大亦古今所未有也先皇帝时公明数求致仕未之得光尝侍坐从容请曰近年虽七十而康宁如是独不可强为天子少留邪公明曰所贵於致仕者欲及其身之无恙自乐於乡党耳必待不任朝谒輿疾而归是不得已岂止足之谓邪光忻然服其言益知贤者所存固非庸人所能及也昔先子登进士第先相国为举首故光於公明兄弟行也资善之会光以新去经席不得与焉於其行也僚友复设祖道供张於西郊光又以御史之职不得与焉其恨恨可言邪故聊序其事以为别从表弟右谏议大夫权御史中丞涑水司马光序

传家集卷七十

卷七十一

钦定四库全书

传家集卷七十一 宋 司马光 撰记

仁宗赐张公御书记

皇佑初故右谏议大夫张公为翰林侍读学士仁宗皇帝谓侍臣曰朕宅帝位几三十年天下名儒皆率与之游自得张某使我日闻所未闻因书纸为博学字命使者即其家赐之当是时国家中外无事天子方向艺文同侍殿阁者皆名臣之选无不环观愧羨莫敢望云公既没十有六年公之子子瑾字材之将摹着其书於石谓光曰必为之记光曰昔公知滑州光从事於幕下尝闻公之言曰余平生喜书读之不啻数十百过其简编弊矣然每发之必有新获之意焉噫公之笃学如此宜其当明主之知为多闻之友受殊常之宠成不朽之名也使曩也先皇帝赏公以万金於今何有固不若垂一言之褒其为子孙光荣世世无穷也夫知人则哲帝尧之所难仲尼门人以千数独称顔渊为好学今材之所为欲以彰先皇帝之知人而扬先公之好学也夫彰君之明忠也扬父之美孝也惟忠与孝材之两有焉光也虽无文又焉敢无一言以表着其实乎

韩魏公祠堂记【元丰七年作】

没而祠之礼也由汉以来牧守有惠政於民者或为之生祠虽非先王之制皆发於人之去思亦不可废也然年时寢远人寢忘之惟唐狄梁公为魏州刺史属契丹寇河北梁公省彻战守之备抚绥雕弊之民民安而虏自退魏人祠之至今血食熙寧初河北水溢地大震官寺民居荡覆者大半诏以淮南节度使司徒兼侍中韩魏公为河北安抚使判大名府兼北京留守公既爱民如爱子治民如治家去其疾忘已之疾闵其劳忘已之劳未几居者以安流者以还饥者以充乏者以足羣心既和岁则屡丰在魏五年徙判相州魏人泣涕遮止数日乃得去魏人思公而不得见也相与立祠於熙寧禪院壖公像而事之後二年公薨於相州魏人闻之争奔走哭祠下云合而雷动连日乃稍息自是每岁公生及违世之日皆来致祠作佛事未尝少懈噫公之德及一方功施一时者魏人固知之矣至於德及海内功施後世者亦尝知之乎公为宰相十年当仁宗之末英宗之初朝廷多故公临大节处危疑苟利国家知无不为若湍水之赴深壑无所疑惮或谏曰公所为如是诚善万一蹉跌岂惟身不自保恐家无处所殆非明哲之所尚也公叹曰此何言也凡为人臣者尽力以事君死生以之顾事之是非何如耳至於成败天也岂可豫忧其不成遂辍不为哉闻者愧服其忠勇如此故能光辅三后大济艰难使中外之人舖啜嬉游自若曾无惊视倾听窃语之警坐置天下於太宁公之力也呜呼公与狄梁公皆有惠政於魏故魏人祠之然其为远近所尊慕年时虽远而不毁非有大功於社稷为神祇所相佑能如是乎况梁公之功显天下皆知之魏公之功隐天下或未能尽知也然则魏公

不又贤乎宜其与梁公之祠并立於魏享祀无穷公薨後九年魏人以状抵西京俾光为记将刻於石窃惟梁公二记乃李邕冯宿之文光实何人敢不自量顾魏人之美意不可抑又欲以其所未知者谗之故不敢辞

陈氏四令祠堂记

故左谏议大夫赠太师中书令秦国陈公某有三子长曰某国文忠公某官至枢密使同平章事左仆射次曰郑国文惠公某官至户部侍郎平章事太子太师致仕幼曰某国康肃公某官至武寧军节度使皆赠太师尚书令兼中书令始秦公为济源令县西龙潭有延庆佛舍三子相与为学其中既而相继登进士科文忠康肃公仍居羣士之首遂接踵为将相始大其家子孙蕃衍多以才能致美官某布中外故当世称衣冠之盛者推陈氏其後文忠公自枢密出判河阳文惠公与其子主客郎中某孙虞部员外郎某康肃公之子祠部郎中某前後皆为京西转运使主客君之子某复为济源尉济源河阳之属县河阳京西之属郡也四世凡七人莅官於是故济源之人被陈氏之政为多秦公尤有恩於民能使其民既去而思之虞部君尝行部过济源游龙潭佛舍见秦公善政铭真宗皇帝赐文忠公诗主客君题名皆刻於石叹曰吾家所以能显大於世自非曾祖父勤施仁政於民三祖父力学以取富贵何从而致之乎至於今子孙蒙福祿不絕岂可不知其所自邪乃构堂於佛舍之側画四公之像而祠之集三石刻皆置祠下且属光为之记光曰光之文不足以发扬先君之美不敢为虞部曰不然某之建是祠堂非敢自矜奕世之美盖欲来者见之知爱民好学可以大其家有以劝也光曰如君之言其志远其益大矣光何敢辞若夫四公之事业则有国史在光不敢及也

先公遗文记【元丰三年三月十日作】

玉藻曰父没而不能读父之书手泽存焉尔扬子曰书心画也今之人亲没则画像而事之画像外貌也岂若心画手泽之为深切哉今集先公遗文手书及碑志行状共为一棖寘诸影堂子子孙孙永祇保之

谏院题名记【嘉佑八年作】

古者谏无官自公卿大夫至於工商无不得谏者汉兴以来始置官夫以天下之政四海之衆得失利病萃於一官使言之其为任亦重矣居是官者当志其大舍其细先其急後其缓专利国家而不为身谋彼汲汲於名者犹汲汲於利也其间相去何远哉天禧初真宗诏置谏官六员责以职事庆历中钱君始书其名於版光恐久而漫灭嘉佑八年刻着於石後之人将历指其名而议之曰某也忠某也许某也直某也回呜呼可不惧哉

闻喜县修文宣王庙记【嘉佑元年作】

或问太古何如曰不今日如也何以言之曰古之人寒衣而饥食贪生而畏死不殊於今也喜怒哀乐好恶畏欲与民俱生非今有而古无也古之人食鸟兽之肉草木之实而衣其皮鸟兽

日益殫草木日益稀人日益衆物日益寡視此或不足視彼或有余能相與守死而勿爭乎爭而不已相賊傷相滅亡人之類蓋可計日而盡也聖人者愍其然於是作而治之擇其賢智而君長之分其土田而疆域之聚其父子兄弟夫婦而安養之施其禮樂政令而綱紀之明其道德仁義孝慈忠信廉讓而教導之猶有狂愚傲狠之民悖戾而不從者於是鞭朴以威之鈇鉞以戮之甲兵以殄之是以民相與安分而保常養生而送終繁衍而久長也及周之衰先王之道蕩覆崩壞几無余矣其不絕者纖若毫芒自非孔子起而振之廓而引之使閎大顯融以迄于今則生民之衆几何其不淪而為禽夷也今國家所以奉事孔子非輕也廟食於國於州於縣以歲時陳其俎豆鳴其金石以禮饗之自天子之貴親北面而拜焉所以然者非一人之私為道存也然吏於州縣者或以簿領鞭朴為急務視孔子之祠及學校廢為余事置之曾不誰何彼真俗吏無足道者聞喜自前世固搢紳大夫之林藪也縣有孔子廟咸平中武吏慈釋回修之尉李垂為之記厥後繼而為長者其嚴事孔子之心不能及釋回於是廟屋隳頓垣墉圯缺草樹荒樛碑石斷仆況於鄉飲酒之容弦誦之音固不可得而睹聞矣今大夫馬君至而嘆曰嗚呼為川者知防而不知濬則橫潰而不禁為民者知怒而不知教則愁怨而不從故善為川者相高下而導之善為民者明是非而告之是以為者逸而從者易物遂性而功速成也今為吏者不能揭先王之道以教人而曰吾專任刑罰亦足為治者是掩民之耳目而以?羿俟之也不仁孰大焉乃屬邑中之賢士大夫而告之曰今孔子之廟廢而不修士無所講其業民無所承其化斯豈惟令之臯亦二三子之耻也皆曰斯固邑人日夜所不忘而不敢請者也今明府有命是天相聖人之道而以明府賜邑人也敢不奔走而承之乃相與斂材聚工葺屋之隳而壯大之修垣之圯而高厚之去木之樛而改樹之起碑之仆而更刻之民不加賦吏不告勞不日而新廟煥然成矣於是邑中之賢士大夫相與朝夕誦堯舜之書咏商周之詩於其中彬彬然有鄒魯之風矣噫馬君之於學也既正其基矣猶未也今之吏率三歲而更後之人繼而長於斯者宜勿替馬君之功引而伸之學者宜卒成馬君之志而振大之知人所以嚴事孔子者非徒飾其祠誦其文也固將明其道循其法心諭而力行之使近者悅化遠者慕效繇邑及於鄉繇鄉及於家父靡不慈子靡不孝兄靡不友弟靡不恭夫然後知學之成而為益大也夫道之污隆豈有常邪人為之則存不為之則亡非道去人人去道也古者至治之時或耕者推畔行者推塗獄訟不興盜賊不作彼風俗若是之美者豈古則可為而今不可為邪繇教之未至故也今基既正矣其餘則勉之而已矣何憚不及於古邪人之言曰古民淳質故可教今民偽薄故不可教是瞽惑之言不足稽也於廟之成馬君謂光旁縣之人也宜為之記光以不文辭不敢為使者三返而不獲命因直述所聞而書

秀州真如院法堂記【皇佑四年作】

壬辰歲夏四月有僧清辨踵門來告曰清辨秀州真如草堂僧也真如故有講堂庳狹不足以庥學者清辨與同術惠宗治而新之今高顯矣愿得子之文刻諸石以諭來者光謝曰光文不足以辱石刻加平生不習佛書不知所以云者師其請諸佗人曰佗人清辨所不敢請也故惟子之歸而子又何辭光固辭不獲乃言曰師之為是堂也其志何如曰清辨之為是堂也屬堂中之人而告之曰二三子苟能究明吾佛之書為人讲解者吾且南鄉坐而師之或不能則將取於四方之能者皆伏謝不能然後相率抵精嚴寺迎沙門道歡而師之又屬其徒而告之曰凡我二三子肇自今以及於後相與協力同志堂圯則扶之師缺則補之以至於金石可弊

山渊可平而讲肄之声不可絶也光曰师之志则美矣抑光虽不习佛书亦尝剽闻佛之为人也夫佛盖西域之贤者其为人也清俭而寡慾慈惠而爱物故服弊补之衣食蔬粝之食岩居壁处斥妻屏子所以自奉甚约而憚於烦人也虽草木虫鱼不敢妄杀盖欲与物并生而不相害也凡此之道皆以洁其身不为物累盖中国於陵仲子焦光之徒近之矣夫圣人之德周贤者之德偏周者无不覆而未流之人犹不免弃本而背原况其偏者乎故後世之为佛书者日远而日讹莫不侈大其师之言而附益之以淫怪诬罔之辞以骇俗人而取世资厚自丰殖不知餽极故一衣之费或百金不若绮纨之为愈也一饭之直或万钱不若脍炙之为省也高堂鉅室以自奉养佛之志岂如是哉天下事佛者莫不然而吴人为甚师之为是堂将以明佛之道也是必深思於本源而勿放蕩於末流则治斯堂之为益也岂其细哉

竚瞻堂记【元丰六年作】

元丰三年天子大飨明堂召河东节度使守司徒兼侍中潞国文公自北都入覲於京师以相祀事礼成天子以公勋相三后克底隆休泽敷乎烝民功安乎庙祧复命公以太尉留守西都於是公尹洛者三矣将行天子仍赐之诗云西都旧士女白首竚瞻公洛人喜公之来荣天子之言明年相与构堂於资圣佛祠肖公之像於其中名之曰竚瞻又二年河南进士宋师中李彻与其乡里士民之衆以书抵光曰公再为宰相三守洛都虽惠化徧天下靡有不周而在洛为多今吾人日洒扫兹堂而奉事之至於子孙固不忘矣异时远方之人有过兹堂而不知其所以然者亦吾人之耻也子盍为我书其事着於石以传告无穷光谢曰诸君以此属我诚大幸然凡为士者颂一守令且犹秉笔不敢轻为况公之德业位望崇显如是乃使如光者纪之必得罪於识者能无惧乎西都搢绅之渊藪贤而有文者肩随踵接诸君不往求之顾惟不肖之求能无慙乎愿置我而更请於佗衆皆曰子出公之门最久其居洛又久然则记兹堂也子於何避之夫登岱华者固不能尽其高广游沧海者固不能穷其幽深苟身之所至目之所睹皆可得而言矣光既不得辞乃曰光侨居於洛已十有三年日闻士民之誉公者如出一口敢问公之前後治洛其规为施置如何而得民心若是愿条以告我得藉之以书衆皆曰公之为政其大者汪洋溥畅若化工之神膏雨之仁固非吾人之所测也其细者樵夫牧儿皆能道之又不足以尽公之美也姑以吾人之所及者言之其简而有节安而不扰乎抑又闻之昔黄霸为颍川太守治为天下第一及作相时人不谓之贤谢安为吴兴太守在官无当时誉及作宰相名振异域彼皆才有所不赡故用有所不周能兼之者其在公乎光曰诸君知其一未知其二光尝学於史氏观自古为人臣者或得於君而失於民或得於民而失於君君非不悦也如民疾之何民非不爱也如君恶之何若是者殆不可胜算也至於事君以忠养民以仁惻然至诚积於胸中夙夜不倦悠久不渝晦之而益光隐之而益彰逃宠而宠不我舍避名而名常我随若玉之在山珠之在渊击钟鼓於宫种草木在土達于上下而不可掩者弥百千年无几人而已矣诗云乐只君子天子命之言得乎上也岂弟君子民之父母言得乎下也书曰臣为上为德为下为民言其上下得也上下得者其惟禹稷与臯陶乎佐舜禹以臯安斯民君赖之如股肱民依之如父母功盛乎一时名高乎百世公之德其近是乎不然何天子之宠光便蕃而不厌下民之悦服悠久而不忘若此其备乎衆皆曰然光曰然则请书此为之记

独乐园记【熙寧六年作】

孟子曰独乐乐不如与人乐乐与少乐乐不如与众乐乐此王公大人之乐非贫贱者所及也孔子曰饭蔬食饮水曲肱而枕之乐亦在其中矣顏子一簞食一瓢饮不改其乐此圣贤之乐非愚者所及也若夫鷓鴣巢林不过一枝鼯鼠饮河不过满腹各尽其分而安之此乃迂叟之所乐也熙寧四年迂叟始家洛六年买田二十畝於尊贤坊北辟以为园其中为堂聚书出五千卷命之曰读书堂堂南有屋一区引水北流贯宇下中央为沼方深各三尺疏水为五????注沼中状若虎爪自沼北伏流出北阶悬注庭下状若象鼻自是分为二渠绕庭四隅会於西北而出命之曰弄水轩堂北为沼中央有岛岛上植竹圆周三丈状若玉玦揽结其杪如渔人之庐命之曰钓鱼庵沼北横屋六楹厚其墉茨以御烈日开户东出南北列轩牖以延凉颼前後多植美竹为清暑之所命之曰种竹斋沼东治地为百有二十畦杂蒔草药辨其名物而揭之畦北植竹方径丈状若碁局屈其杪交相掩以为屋植竹於其前夹道如步廊皆以蔓药覆之四周植木药为藩援命之曰采药圃圃南为六栏芍药牡丹杂花各居其二每种止植两本识其名状而已不求多也栏北为亭命之曰浇花亭洛城距山不远而林薄茂密常苦不得见乃於园中筑台构屋其上以望万安輶轡至於太室命之曰见山台迂叟平日多处堂中读书上师圣人下友羣贤窥仁义之原探礼乐之绪自未始有形之前暨四達无穷之外事物之理举集目前所病者学之未至夫又何求於人何待於外哉志倦体疲则投竿取鱼执衽采药决渠灌花操斧剖竹濯热盥手临高纵目逍遥徜徉唯意所适明月时至清风自来行无所牵止无所柅耳目肺肠悉为已有踴躍焉洋洋焉不知天壤之间复有何乐可以代此也因合而命之曰独乐园或咎迂叟曰吾闻君子所乐必与人共之今吾子独取足於已不以及人其可乎迂叟谢曰叟愚何得比君子自乐恐不足安能及人况叟之所乐者薄陋鄙野皆世之所弃也虽推以与人人且不取岂得强之乎必也有人肯同此乐则再拜而献之矣安敢专之哉

记历年图後

光顷岁读史患其文繁事广不能得其纲要又诸国分列岁时先後参差不齐乃上采共和以来下讫五代略记国家兴衰大迹集为五图每图为五重每重为六十行每行纪一年之事其年取一国为主而以朱书佗国元年綴於其下盖欲指其元年以推二三四五则从可知矣凡一千八百年命曰历年图其书杂乱无法聊以私便於讨论不敢广布於佗人也不意赵君摹刻於板传之蜀人梁山令孟君得其一通以相示始光率意为此书苟天下非一统则漫以一国主其年固不能辨其正闰而赵君乃易其名曰帝统非光志也赵君颇有所增损仍变其卷秩又所为多脱误今此浅陋之书既不可掩因刊正使复其旧而归之

传家集卷七十一

卷七十二

<集部,别集类,北宋建隆至靖康,传家集>

钦定四库全书

传家集卷七十二 宋 司马光 撰传

范景仁传

范景仁名镇益州华阳人少举进士善文赋场屋师之为人和易修敕故参知政事薛简肃公端明殿学士宋景文公皆器重之补国子监生及贡院奏名皆第一故事殿廷唱第过三人则为奏名之首者必抗声自陈以祈恩虽考校在下天子必擢赏上列以吴春卿欧阳永叔之耿介犹不免从衆景仁独不然左右与并立者屡趣之使自陈景仁不应至七十九人始唱名及之景仁出拜退就列讫无一言衆皆服其安恬自是人始以自陈为耻旧风遂絶释褐新安主簿到官数旬时宋宣献公留守西京不欲使与下吏共劳辱召置国子监使教诸生秩满又荐於朝为东监直讲未几宋景文公奏同修唐书又用参知政事王公荐召试学士院诗用彩霓字学士以沈约郊居赋雌霓连蜷读霓为入声谓景仁为失韵由是除馆阁校勘殊不知约赋但取声律便美非霓不可读为平声也当时有学者皆为景仁愤?而景仁处之晏然不自辨为校勘四年应迁校理丞相庞公荐景仁有美才不汲汲於进取特除直秘阁未几以起居舍人知谏院仁宗性寛仁言事者兢为激讦以采名或缘爱憎污人以帷箔不可明之事景仁独引大体自非关朝廷安危系生民利病皆阔略不言陈恭公为相嬖妾张氏笞杀婢御史劾奏欲逐去之不能得乃诬之云私其女景仁上言朝廷设台谏官使人除谗慝非使之谗慝也审如御史所言则执中可斩如其不然御史亦可斩御史怒共劾景仁以为阿附宰相景仁不顾力为辨其不然深救当时之弊识者韪之仁宗即位三十五年未有继嗣嘉佑初暴得疾旬日不知人中外大小之臣无不寒心而畏避嫌疑相倚仗莫敢发言景仁独奋曰天下事尚有大於此者乎舍此不言顾惟抉擿细微以塞职是真负国吾不忍也即上言太祖舍其子而立太宗周王既薨真宗取宗室子养之宫中陛下宜为宗庙社稷计早择宗室贤者优其礼数试之以政与图天下之事以系天下人心章累上寝不报景仁因阖门家居自求诛谴执政或谕以奈何效干名希进之人景仁上执政书言继嗣不定将有急兵镇义当死朝廷之刑不可死乱兵之下此乃镇择死之时尚安暇顾干名希进之嫌而不为去就之决哉又奏称臣窃原大臣之意恐行之而事有中变故畏避而为容身之计也万一兵起大臣家族首领顾不可保其为身计亦已疎矣就使事有中变而死陛下之职与其死於乱兵不犹愈乎乞陛下以臣此章示大臣使其自择死所闻者为之股栗寻除兼侍御史知杂事景仁固辞不受乞解言职就散地执政复谕以上之不豫诸大臣亦尝建此策今奸言已入为之甚难景仁复上执政书云但当论事之是非不当问其难易况事早则济缓则不及此圣贤所以贵机会也诸公谓今日难於前日安知佗日不难於今日乎谓今日奸言已入不可弭佗日可弭乎凡见上面陈者三奏章

者十有七朝廷不能夺乃罢谏职改集贤殿修撰顷之拜知制诰迁翰林学士英宗即位中书奏请追尊濮安懿王事下两制议以为宜称皇伯高官大国极其尊荣大违执政意更下尚书省集百官议之意朝士必有迎合者既而台谏争上言为人後者为之子不得顾私亲今陛下既为仁宗後若复推尊濮王是贰统也殆非所以报仁宗之盛德衆论鼎沸执政欲缓其事乃下诏罢百官集议曰当令礼官检详典礼以闻景仁时判太常寺即具列为人後之礼及汉魏以来论议得失悉奏之与两制台谏议合执政怒召景仁诘责之曰诏书云当令检详奈何遽列上邪景仁曰有司得诏书不敢稽留即以闻乃其职也奈何更以为罪乎会宰相迁官景仁当草制坐失於考按不合故事改侍读学士出知陈州今上即位复召还翰林王介甫参知政事置三司条例司变更祖宗法令专以聚斂为务斥逐忠直引进奸佞景仁上疏极言其不可朝廷不报景仁时年六十三因上言即不用臣言臣无颜复居位食禄愿听臣致仕章累上语益切直介甫大怒自草制书极口丑诋使以本官户部侍郎致仕凡所应得恩例悉不与之於是当时在位者皆自愧景仁名益重於天下介甫虽诋之深人更以为荣焉景仁既退居有园第在京师专以读书赋诗自娱客至无贵贱皆野服见之不复报谢故人或为具召之虽权贵不拒也不召则不往见之或时乘舆出游则无远近皆往尝乘篮舆归蜀与亲旧乐饮赈施其贫者周览江山穷其胜赏暮年然後返年益老而视听尤聪明支体尤坚强呜呼曩使景仁枉道希世以得富贵蒙屈辱任忧患岂有今日之乐邪然则景仁所失甚少所得殊多矣诗云恺悌君子神所劳矣又曰乐只君子遐不作眉寿景仁有焉客有问今世之勇於迂叟者叟曰有范景仁者其为勇人莫之敌客曰景仁长仅五尺循循如不胜衣奚其勇叟曰何哉而所谓勇者而以瞋目裂眦髮上指冠力曳九牛气陵三军者为勇乎是特匹夫之勇耳勇於外者也若景仁勇於内者也自唐宣宗以来不欲闻人言立嗣万一有言之者辄切齿疾之与背畔无异而景仁独唱言之十余章不已视身与宗族如鸿毛後人见景仁无恙而继为之者则有矣然景仁首冒不测之渊无勇者能之乎人之情孰不畏天子与执政亲爱之至隆者孰若父子执政欲尊天子之父而景仁引古义以争之无勇者能之乎禄与位皆人所贪或老且病前无可冀犹恋恋不忍舍去况景仁身已通显有声望视公相无跬步之远以言不行年六十三即拂衣归终身不复起无勇者能之乎凡人有所不能而人或能之无不服焉如吕献可之先见范景仁之勇决皆余所不及也余心诚服之故作范景仁传

圉人传【庆历五年作】

汧侯有马悍戾不可乘服以为无用将弃之野爱其疾足募有能驯之者禄以百金有圉人叩门而告曰臣能驯之汧侯使养马数月马益调服步骤缓速折还左右唯人所志汧侯喜赏以百金之禄拜为圉师衆驹疾之谒於侯曰侯马今驯矣彼何功而徒费侯金臣请代之侯逐圉人居数月马复悍戾如故侯乃召圉人而谢曰子能使悍马驯子去而马复悍敢问何术也对曰臣贱夫也不知异术而惟养马之知夫马太肥则陆梁太瘠则不能任重策之急则骇而难驯缓则不肯尽力善为圉者渴之饥之饮之秣之视其肥瘠而丰杀其菽粟缓之以尽其材急之以禁其逸鞭策以警其怠恩隐以驯其心使之得其宜适而不劳亦不使有遗力焉其术甚微得於心应於手已不能传之於人人亦不能从已传也如此故马之材在马马之性在我虽悍戾何伤哉汧侯曰善圉人曰是术也岂特养马而已抑治国亦犹是也夫材智之士治国者之悍马也舍之则不能以兴功业御之不以道则不获其利而桀黠不可制故明君者能用材

智之士而以爵禄赏罚御之是以爵太高则骄禄太丰则堕骄堕之臣虽有智力君不得而使也制之急则不得尽其能制之缓则不肯宣其用不任恩渥一驱之以威则愁怨而离心故明君者节其爵禄裁其缓急恩泽足以结其心威严足以服其志则士生死贵贱之命在於君矣虽慄悍何忧哉汧侯悦位为上卿任以国政用其术推而行之汧国大治

张行婆传

行婆张氏潍州昌乐人父为虎翼军校张氏生七年继母潜使佞者鬻之给其父云失之父哭之一日失明由是落军籍为民佞者鬻於故尚书左丞范公家字曰菊花范氏以媵其女适泗州人三班借职金士则张氏勤谨其主家爱之与父别凡二十一年一旦遇之於范氏之门而识之遂辞范氏与父俱归父怒继母欲殴而逐之张氏曰儿非母不得入贵人家母乃有德於儿又何怨焉今赖天之力得复见父若儿归而母逐儿何安焉父乃止父时年且八十无佗子家甚贫鬻薪为业昌乐有故田园为人所据张氏乃与父母归乡里讼於州而得之未几父卒张氏养继母尽子道母老不能行所适稍远则张氏负之母卒张氏嫁为里民王佑妻生一男二女佑早卒诸孤皆幼张氏鞠之不从人既长毕婚嫁乃谓其子曰吾素爱浮屠法里有古寺废已久吾当帅里人修之弃家处其中不复为尔母矣里人闻之争助以财不日立堂殿厨庑塑绘佛像营储皆备每戒其子毋得至寺曰寺有衆人之财将以兴佛事吾一毫不敢私也汝来使吾无以自明金士则之妹余嫂也元丰中张氏自潍之泗省金氏又自泗之陕省余嫂徒步数千里曰吾故时主家不可忘也嫂置诸园门之傍独处一室日一蔬食读佛书每与女仆语专诲以忠勤有不受而诟之者辄拜谢不与校遇劳辱之事则以身先之与之钱刀衣服固辞强之不得已辞多受少见尺薪寸帛不忍弃必拾以归爱之如已物女仆之幼者则为之栉沐纫缝视之如已女至於猴犬饮食以时无不驯服张氏去辄数日悲鸣不食余熟察其所为而异之因谕之曰姬已老幸有子不与之居以终其身而栖栖汲汲周游四方竟何为乎张氏曰凡学佛者先应断爱彼虽吾子久已舍之不复思也呜呼世之服儒衣冠读诗书以君子自名者其忠孝廉让能如张氏者几希岂得以其微贱而忽之邪闻其风者能无作乎曩使生於刘子政之前使子政得而传之虽古烈女何以尚之惜乎为浮屠所蔽不得入於礼义之涂然其处心有可重者余是敢私记之

猫𪚩传【元丰七年作】

仁义天德也天不独施之於人凡物之有性识者咸有之顾所赋与有厚薄耳余家有猫曰𪚩每与衆猫食常退处於後俟衆猫饱尽去然後进食之有复还者又退避之佗猫生子多者𪚩辄分置其栖与已子并乳之爱视踰於已子有顽猫不知其德於已乃食𪚩之子𪚩亦不与校家人以白泽图云畜自食其子不祥见𪚩在旁以为共食之痛箠而斥之以畀僧舍僧饲之不食匿窠中近旬日饿且死家人怜而返之至家然後食家人每得穉猫辄令𪚩母之尝为佗猫子抔犬犬噬之几死人救获免後老且病不复执鼠於家为长物余不忍弃常自饲之及死余命贮籠中瘞於西园时元丰七年十月甲午也自生至死近二十年昔韩文公作猫相乳说以为北平王之德感应召致及余家有𪚩乃知物性各於其类自有善恶韩子之说几於谄耳嗟乎人有不知仁义贪冒争夺病人以利已者闻𪚩所为得无愧哉司马相如称物有同类而殊

能者故力称乌获捷言庆忌人诚有之兽亦宜然昔余通判郢州有猫曰山宾生数月遇鼯得巨鼠方食之前与鼯鬪啮鼯走夺鼠以归後因污余书余以畀都监常鼎始絜之跳掷高数尺不可牵制乃囊盛以授之两廨相距二里许後数日山宾复来归余又囊以授之鼎命婢牢絜之山宾既识路即时归?约满身鼎责羣婢曰汝曹虽为人曾不及彼猫一心於其主余以既畀之不可复留卒囊以授之遂不复归不知其为死为生也山宾非鼯之比余独嘉其不忘旧主故録之附於鼯传之末

传家集卷七十二

卷七十三

钦定四库全书

传家集卷七十三 宋 司马光 撰题跋

题绛州鼓堆祠【嘉佑元年九月作】

鼓堆在州治所西北二十五里樊绍述守居记作古州之图志作鼓鼓者人马践之逢逢如鼓状盖水原充满石下而然云绍述之文其必有据然今以耳目验之则图志亦未可全废也堆之西山白马首其东长陵纚属相传以为晋之九原其北水出泽堂别名清泉堆周围四里高三丈穹隆而圆状如覆釜水原数十环之觥沸杂发汇於南溶为深渊中多鱼鳖鱣鰻水极清洁可监毛髮盛寒不冰大旱不耗霖雨不溢其南酺为三渠一载高地入州城周吏民园沼之用二散布田间灌溉万余顷所余皆归於汾田之所生禾麻稌 肥茂芎甘异佗水所溉堆上有神祠盖以水陰类也故其神为妇人像而祠中石刻乃妄以为尧后及舜之二妃噫是水也有清明之性温厚之德常壹之操润泽之功虽古圣贤无以加其庙食於民也固宜何必假於尧后舜妃然後可祀也嘉佑元年九月壬寅通判并州事司马光以事至绛州从州之诸官尚书比部员外郎薛长儒元卿国子博士刘常守道尹仲舒汉臣判官陈太初寓之同游祠下爱其气象之美登临之乐而又功德及人若此其盛愍流俗之讹不可以莫之正也於是题云

书孙之翰唐史记後【元丰二年作】

孙公昔着此书甚自重惜尝别緘其橐於笥必盥手然後啓之谓家人曰万一有水火兵刃之急佗货财尽弃之此笥不可失也每公私少闲则增损改易未尝去手其在江东为转运使出行部亦以自随过亭传休止辄取修之会宣州有急变乘駟遽往不暇挈以俱既行於後金陵大火延及转运廨舍弟子察亲负其笥避於沼中岛上公在宣州闻之亟还入门问曰唐书在乎察对曰在乃悦余无所问自壮年至於白首乃成亦未以示人文潞公执政尝从公借之公不与但録姚崇宋璟论以与之况佗人固不得见也元丰二年察自阳翟来洛阳以其书授光曰伯父平生之志萃於是书朝廷先尝取之留禁中不出今没二十余年家道益衰大惧是书遂散逸不传於人故録以授子光昔闻公有是书固愿见而未之得得之惊喜曰子之贶我兼金不如顾无以为报请受而藏之遇同好则传之异日或广布於天下使公之志业炜煌於千古庶几亦足以少报乎

书田谏议【锡】碑陰

光自始学未冠闻故谏议大夫田公当真宗践阼之初求治方急公稽古以监今日有献月有纳以赞成咸平盛隆之治私心慕仰想见其为人熙寧中始识公之曾孙偃师尉衍因就求观

公之遗文後十余年衍为武胜军节度推官知沈丘县事以公文集及墓铭相示且命光为神道碑其墓铭乃故参知政事范公所为也范公大贤其言固无所苟今其铭曰呜呼田公天下之正人也虽复使佗人竭其慕仰之心颂公之美累千万言能有过於此乎光於范公无能为役范公恨不得见田公则田公果何如人哉光不惟愚陋不学且不为人作碑铭已久不敢承命然常怪世人论譔其祖称之德业圻中之铭道旁之碑必使二人为之彼其德业一也铭与碑奚以异曷若刻大贤之言既纳诸圻又植於道其为取信於永久岂不无疑乎愿审思之脱或可从请附刻於碑陰之末

书孙之翰墓志後【元丰二年十二月作】

明道中公在华州光始以太庙斋郎得谒见皇佑中幸与公俱在馆阁公於光为前辈而光服公才仰公德不敢以同舍期也然粗能熟公之为人元丰二年十二月公弟子崇信令察示光以欧阳公所譔公墓志光读之恍然如复见公得侍坐於旁也昔蔡伯喈尝言吾为碑铭多矣皆有慙德唯郭有道无愧色耳观欧阳公此文其言公自初仕以美才清德为时所重在谏院言官禁事切直无所避在陕不饰厨传凡当官公论不私其所爱淡然寡所好外和而内劲喜言唐事学者终岁读史不如一日闻公论此皆光亲所睹闻当时士大夫所共知可谓实录而无愧矣公名高於世欧阳公以文雄天下固不待光言而後人信之然岁月益久识公者益寡窃惧後之人见欧阳公之文以为如世俗之铭志但饰虚美以取悦其子孙耳故冒进越之罪嗣书其末譬犹捧土以培泰山刳水以沃大河彼岂赖此以为高深哉盖志在有以益之不自知非其任也

疑孟

伯夷隘柳下惠不恭【元丰五年作】

疑曰孟子称所愿学者孔子然则君子之行孰先於孔子孔子历聘七十余国皆以道不合而去岂非非其君不事乎孺悲欲见孔子孔子辞以疾岂非非其友不友乎阳虎为政於鲁孔子不肯仕岂非不立於恶人之朝乎为定哀之臣岂非不羞污君乎为委吏为乘田岂非不卑小官乎举世莫知之不怨天不尤人岂非遗佚而不怨乎饮水曲肱乐在其中岂非厄穷而不悯乎居乡党恂恂似不能言岂非由由与之偕而不自失乎是故君子邦有道则见邦无道则隐事其大夫之贤者友其士之仁者非隘也和而不同遯世无闷非不恭也苟毋失其中虽孔子由之何得云君子不由乎

陈仲子避兄离母

疑曰仲子以兄之禄为不义之禄盖谓不以其道事君而得之也以兄之室为不义之室盖谓不以其道取於人而成之也仲子盖尝谏其兄矣而兄不用也仲子之志以为吾既知其不义矣然且食而居之是口非之而身享之也故避之居於於陵於陵之室与粟身织屨妻辟纁而得之也非不义也岂当更问其筑与种之者谁邪以所食之鵲兄所受之馈也故哇之岂以母

则不食以妻则食之邪君子之责人当探其情仲子之避兄离母岂所愿邪若仲子者诚非中行亦狷者有所不为也孟子过之何其甚与

孟子将朝王【元丰五年正月二十七日作】

疑曰孔子圣人也定哀庸君也然定哀召孔子孔子不俟驾而行过位色勃如也足躩如也过虚位且不敢不恭况召之有不往而佗适乎孟子学孔子者也其道岂异乎夫君臣之义人之大伦也孟子之德孰与周公其齿之长孰与周公之於成王成王幼周公负之以朝诸侯及长而归政北面稽首畏事之与事文武无异也岂得云彼有爵我有德齿可慢彼哉

孟子谓蚍蜉居其位不可以不言言而不用不可以不去已无官守无言责进退可以有余裕

疑曰孟子居齐齐王师之夫师者导人以善而救其恶者也岂得谓之无官守无言责乎若谓之为贫而仕邪则後车数十乘从者数百人仰食於齐非抱关击柝之比也诗云彼君子兮不素餐兮夫贤者所为百世之法也余惧後之人挟其有以骄其君无所事而贪禄位者皆援孟子以自况故不得不疑

沈同问伐燕【元丰五年正月二十八日作】

疑曰孟子知燕之可伐而必待能行仁政者乃可伐之齐无仁政伐燕非其任也使齐之君臣不谋於孟子孟子勿预知可也沈同既以孟子之言劝王伐燕孟子之言尚有怀而未尽者安得不告王而止之哉夫军旅大事也民之死生国之存亡皆系焉苟动而不得其宜则民残而国危仁者何忍坐视其终委乎

父子之间不责善【元丰五年作】

疑曰经云当不义则子不可不谏於父传云爱子教之以义方孟子云父子之间不责善不责善是不谏不教也而可乎

性犹湍水【元丰八年作】

疑曰告子云性之无分於善不善犹水之无分於东西此告子之言失也水之无分於东西谓平地也使其地东高而西下西高而东下岂决导所能致乎性之无分於善不善谓中人也瞽叟生舜舜生商均岂陶染所能变乎孟子云人无有不善此孟子之言失也丹朱商均自幼及长日所见者尧舜也不能移其恶岂人之性无不善乎

生之谓性【元丰八年作】

疑曰孟子云白羽之白犹白雪之白白雪之白犹白玉之白告子当应之云色则同也性则殊

矣羽性轻雪性弱玉性坚而告子亦皆然之此所以来犬牛人之难也孟子亦可谓以辩胜人矣

齐宣王问卿

疑曰礼君不与同姓同车与异姓同车嫌其偪也为卿者无贵戚异姓皆人臣也人臣之义谏於君而不听去之可也死之可也若之何其以贵戚之故敢易位而处也孟子之言过矣若有大过无若纣纣之卿士莫若王子比干箕子微子之亲且贵也微子去之箕子为之奴比干谏而死孔子曰商有三仁焉夫以纣之过大而三子之贤犹且不敢易位也况过不及纣而贤不及三子者乎必也使後世有贵戚之臣谏其君而不听遂废而代之曰吾用孟子之言也非篡也义也其可乎或曰孟子之志欲以惧齐王也是又不然齐王若闻孟子之言而惧则将愈忌恶其贵戚闻谏而诛之贵戚闻孟子之言又将起而蹈之则孟子之言不足以格骄君之非而适足以为篡乱之资也其可乎

所就三所去三

疑曰君子之仕行其道也非为礼貌与饮食也昔伊尹去汤就桀桀岂能迎之以礼哉孔子栖栖遑遑周游天下佛肸召欲往公山弗扰召欲往彼岂为礼貌与饮食哉急於行道也今孟子之言曰虽未行其言也迎之有礼则就之礼貌衰则去之是为礼貌而仕也又曰朝不食夕不食君曰吾大者不能行其道又不能从其言也使饥饿於我土地吾耻之周之亦可受也是为饮食而仕也必如是是不免於鬻先王之道以售其身也古之君子之仕也殆不如此

尧舜性之也汤武身之也五霸假之也

疑曰所谓性之者天与之也身之者亲行之也假之者外有之而内实亡也尧舜汤武之於仁义也皆性得而身行之也五霸则强焉而已夫仁义者所以治国家而服诸侯也皇帝王霸皆用之顾其所以殊者大小高下远近多寡之间耳假者文具而实不从之谓也文具而实不从其国家且不可保况能霸乎虽久假而不归犹非其有也

瞽叟杀人

疑曰虞书称舜之德曰父顽母嚚象傲克谐以孝烝烝乂不格奸所贵於舜者为其能以孝和谐其亲使其进退以善自治而不至於恶也如是则舜为子瞽叟必不杀人矣若不能止其未然使至於杀人执於有司乃弃天下窃之以逃狂夫且犹不为而谓舜为之乎是特委巷之言也殆非孟子之言也且瞽叟既执於臯陶矣舜恶得而窃之虽负而逃於海滨臯陶犹可执也若曰臯陶外虽执之以正其法而内实纵之以予舜是君臣相与为伪以欺天下也恶得为舜与臯陶哉又舜既为天子矣天下之民戴之如父母虽欲遵海滨而处民岂听之哉是臯陶之执瞽叟得法而亡舜也所亡益多矣故曰是特委巷之言殆非孟子之言也

史剡【并序】

愚观前世之史有存之不如其亡者故作史剡其细琐?荒固不可悉数此言其卓卓为士大夫所信者云

虞舜

尧以二女妻舜百官牛羊事舜於畎亩之中瞽叟与象犹欲杀之使舜涂廩而纵火舜以两笠自扞而下又使舜穿井而实以土舜为匿空出佗人井

剡曰顽嚚之人不入德义则有矣其好利而畏害则与衆不殊也或者舜未为尧知而瞽叟欲杀之则可矣尧已知之四岳举之妻以二女养以百官方且试以百揆而禅天下焉则瞽叟之心岂得不利其子之为天子而尚欲杀之乎虽欲杀之亦不可得已藉使得而杀之瞽叟与象将随踵而诛虽甚愚人必不为之此特闻父里妯之言而孟子信之过矣後世又承以为实岂不过甚矣哉

舜南巡守崩於苍梧之野葬於江南九嶷是为零陵剡曰昔舜命禹曰朕耄期倦于勤汝惟不怠揔朕师是以天子为勤故老而使禹摄也夫天子之职莫勤於巡守而舜犹亲之卒死於外而葬焉恶用使禹摄哉是必不然或曰虞书称舜陟方乃死孔安国以为升道南方巡守而死礼记亦称舜葬於苍梧之野皆如太史公之言予独以为不然何如曰传记之言固不可据以为实藉使有之又安知无中国之苍梧而必在江南邪虞书陟方云者言舜在帝位治天下五十载升於至道然後死耳非谓巡守为陟方也呜呼遂使後世愚悖之人或疑舜禹而非圣人岂非孔安国与太史公之过也哉

夏禹

禹以天下授益益避啓於箕山之阳禹子啓贤天下皆去益而归啓啓遂即天子位

剡曰父之位传归於子自生民以来如是矣尧以朱不肖故授舜舜以均不肖故授禹禹子啓果贤足以任天下而禹授益使天下自择啓而归焉是饰伪也益知啓之贤得天下心已不足以间而受天下於禹是窃位也禹以天下授益啓以违父之命而为天子是不孝也恶有饰伪窃位不孝而谓之圣贤哉此为传者之过明矣

夏桀

桀走鸣条遂放而死桀谓人曰吾悔不遂杀汤於夏台使至此

剡曰是言也存为後世之惩劝其可乎

周文王

崇侯譖西伯於紂曰西伯积善累德诸侯皆向之将不利於帝紂乃囚西伯於羑里【云云】既出乃献洛西之地以请紂去炮烙之刑紂许之

剡曰紂疑文王之得民故囚之既释而又献地以止其虐刑是正信崇侯虎之譖於紂也岂所谓遵养时晦以蒙大难者哉且紂惟不胜其淫虐之心故为炮烙之刑若能自止而不为则不待受西伯之地若不能自止虽受地於西伯而为之如故谁能禁之哉

由余

戎王使由余於秦秦穆公问曰中国以诗书礼乐法度为政然尚时乱今我夷无此何以为治由余笑曰此乃中国所以乱也夫自上圣作为礼乐法度仅以小治及其後世阻法度之威以督责於下下罢极则以仁义怨望於上上下下交争怨而相篡弑夫戎狄不然上含淳德以遇其下下怀忠信以事其上此真圣人之治也穆公以为贤乃离间戎之君臣卒得由余而用之遂霸西戎剡曰所贵乎有贤者为其能治人国家也治人国家舍诗书礼乐法度无由也今由余曰是六者中国之所以乱也不如我戎夷无此六者之为善如此而穆公以为贤而用之则虽亡国无难矣若之何其能霸哉是特老庄之徒设为此言以诋先王之法太史公遂以为实而载之过矣

孔子

齐景公欲以尼谿田封孔子晏婴进曰夫儒者滑稽而不可轨法倨傲自顺不可以为下游说乞贷不可以为国【云云】

剡曰晏婴忠信以有礼爱君而乐善於晋悦叔向於郑悦子皮於吴悦季札岂於孔子独不知而毁之乎楚昭王将以书社地七百里封孔子令尹子西曰文武百里之君卒王天下今孔丘得据土壤贤弟子为佐非楚之福也乃止

剡曰子西楚之贤令尹也楚国赖之亡而复存危而复安其志犹晏婴也其言岂容鄙浅之如是哉

季布

季布闻曹丘生招权顾金钱与窦长君书使絶之曹丘闻之往见布揖曰使仆游扬足下名於天下顾不美乎何拒仆深也布大悦留数月为上客厚遣之

剡曰曹丘与长君善而布与书使絶之是以曹丘为小人也及曹丘见以毁誉动已而已善之是养小人以自利也夫以毁誉动人及养小人以自利皆奸人之道也果如是则布恶得为贤

大夫

萧何营未央宫

萧何作未央宫高祖见宫阙壮甚怒何曰天下方未定故可因遂就宫室且天子以四海为家非壮丽无以重威且无令後世有以加也高祖乃悦

剡曰是必非萧何之言审或有之何恶得为贤相哉天下方未定为之上者拊循煦妪之不暇又安可重为烦费以壮宫室哉古之王者明其德刑而天下服未闻宫室可以重威也创业垂统之君致其恭俭以训子孙子孙犹淫靡而不可禁况示之以骄侈乎孝武卒以宫室靡弊天下恶在其无以加也是皆庸人之所及而谓萧相国肯为此言乎

传家集卷七十三

卷七十四

钦定四库全书

传家集卷七十四 宋 司马光 撰 迺书

迺书序【嘉佑二年作】

余生六龄而父兄教之书虽诵之不能知其义又七年始得稍闻圣人之道朝诵之夕思之至於今二十有七年矣虽其性之昏愚急而不能进然勤亦至矣时有所获书以示人人之论高者则曰子之书庸而无奇衆人所同知也论卑者则曰子之书迺而难用於世无益也嘻我穷我之心以求古之道力之所及者则取之庸与迺惟人之所名也我安得知之故命其书曰庸书亦曰迺书云

释迺

或谓迺夫曰子之言太迺於世无益也迺夫曰子知迺之无益而不知其为益且大也子知迺之有益而不知其为损亦大也子不见夫树木者乎树之一年而伐之则足以给薪苏而已二年而伐之则足以为桷五年而伐之则足以为楹十年而伐之则足以为栋夫岂非收功愈远而为利愈大乎古之人惟其道阔大而不能狭也其志邃奥而不能迺也其言崇高而不能庠也是以所适齟齬而或穷为布衣贫贱困苦以终其身然其遗风余烈数百千年而人犹以为法邇使其人狭道以求容迺志以取合庠言以趋功虽当时贵为卿相利止於其躬荣尽於其生恶得余泽以及後世哉如余者患不能迺而已矣迺何病哉

辨庸

或谓迺夫曰子之言甚庸衆人之所及也恶足贵哉迺夫曰然余学先王之道勤且久矣惟其性之昏也苦心劳神而不自知犹未免夫庸也虽然古之天地有以异於今乎古之万物有以异於今乎古之性情有以异於今乎天地不易也日月无变也万物自若也性情如故也道何为而独变哉子之於道也将厌常而好新譬夫之楚者不之南而之北之齐者不之东而之西信可谓殊於衆人矣得无所适失其所求愈勤而愈远邪呜呼孝慈仁义忠信礼乐自生民以来谈之至今矣安得不庸哉如余者惧不能庸而已矣庸何病哉

士则

或曰为士何如迺夫曰士者事天以顺交人以谨谨司其分不敢失陨而已矣或曰为士者亦事天乎曰是何言也天者万物之父也父之命子不敢逆君之言臣不敢违父曰前子不敢不

前父曰止子不敢不止臣之於君亦然故违君之言臣不顺也逆父之命子不孝也不顺不孝者人得而刑之顺且孝者人得而赏之违天之命者天得而刑之顺天之命者天得而赏之或曰何谓违天之命曰天使汝穷而汝强通之天使汝愚而汝强智之若是者必得天刑或曰何谓天刑曰人之刑赏刑赏其身天之刑赏刑赏其神故天之所赏者其神闲静而佚乐以考终其命天之所刑者其神劳苦而愁困以夭折其生彼虽倮然而白首犹贰负之臣桎梏而处诸石下虽踰千岁恶足称寿哉或曰夫士者当美国家利百姓功施当时泽及後世岂独兢兢然谨司其分不敢失陨而已乎曰非谓其然也智愚勇怯贵贱贫富天之分也君明臣忠父慈子孝人之分也僭天之分必有天灾失人之分必有人殃尧舜禹汤文武勤劳天下周公辅相致太平孔子以诗书礼乐教洙泗顔渊簞食瓢饮安於陋巷虽德业异守出处异趣如此其远也何尝舍其分而妄为哉

言戒

适夫曰言不可不重也子不见钟鼓乎夫钟鼓叩之然後鸣铿訇鎗?人不以为异也若不叩自鸣人孰不谓之祲邪可以言而不言犹叩之而不鸣也亦为废钟鼓矣

?齿

适夫病?齿呻吟之声达於四邻通夕不寐有道士过之问曰子知病之所来乎曰不知也道士曰病来自天天且取子之齿以食食骨之虫而子拒之以违天也夫天者子之所受命也若之何拒之其必与之适叟曰诺於是子以齿与虫惛然而寐一夕而愈

蜚祝

适夫夜立於庭拊树而蜚螫其手捧手吟呼痛彻於心家人呼祝师祝之祝师曰子姑勿以蜚为惨烈以为凡虫而藐之曰是恶能苦我哉则痛已矣从之少选而痛息乃谢祝师曰尔何术而能攘蜚之毒如是其速也祝师曰蜚不汝毒也汝自召之余不汝攘也汝自攘之夫召与攘皆非我术之所能及也子自为之也於是适夫叹曰嘻利害忧乐之毒人也岂直蜚尾而已哉人自召之人自攘之亦若是而已矣

饭车

天雨适夫出见饭车息於高蹊者指谓其徒曰是车也将覆不久矣行未十步闻譟声顾见其车已覆其徒问曰子何由知之适夫曰吾以人事知之夫天雨道泞而蹊独不濡又狭而高是衆人之所趣也而车不量其力固狭擅高久留不去以妨衆人之欲进者其能无覆乎祸有钜於此者奚饭车之足云

拾樵

迂夫见童子拾樵於道约曰见樵先呼者得之後毋得争也皆曰诺既而行相与笑语戏狎至驩也矧然见横芥於道其一先呼而衆童子争之遂相挞击有伤者迂夫惕然亟归而叹曰必天下之利大於横芥者多矣吾不知戒而日与人游恃其驩而信其约一旦有先呼而鬪者能无伤乎

知非【嘉佑三年五月二十五日作】

或曰蘧伯玉五十而知四十九年非信乎曰何啻其然也古之君子好学者有垂死而知其未死之前所为非者况五十乎夫道如山也愈升而愈高如路也愈行而愈远学者亦尽其力而止耳自非圣人有能穷其高远者哉

天人【熙宁七年三月十六日作】

迂叟曰天力之所不及者人也故有耕耘敛藏人力之所不及者天也故有水旱螟蝗

无怪

迂叟曰有兹事必有兹理无兹理必无兹事世人之怪怪所希见由明者视之天下无可怪之事

理性【元丰二年十月二十八日作】

易曰穷理尽性以至於命世之高论者竟为幽僻之语以欺人使人跂悬而不可及愤瞽而不能知则尽而舍之其实奚远哉是不是理也才不才性也遇不遇命也

事亲【元丰四年作】

迂叟事亲无以踰人能不欺而已矣其事君亦然

事神【元丰四年正月十六日作】

或问迂叟事神乎曰事神或曰何神之事曰事其心或曰其事之何如曰至简矣不黍稷不牺牲惟不欺之为用君子上戴天下履地中函心虽欲欺之其可得乎

寬猛【元丰四年十月作】

迂叟曰寬而疾恶严而原情政之善者也

回心

或问子能无心乎迺叟曰不能若夫回心则庶几矣何谓回心曰去恶而从善舍非而从是人或知之而不能徙以为如制驛马如斡礪石之难也静而思之在我而已如转户枢何难之有

无益【元丰六年二月十七日作】

迺叟曰言而无益不若勿言为而无益不若勿为余久知之病未能行也

学要【元丰六年五月二日作】

迺叟曰学者所以求治心也学虽多而心不治安以学为

治心【元丰六年六月二十三日作】

迺叟曰小人治迹君子治心

文害【元丰六年七月十八日作】

或谓迺叟子於道则得其一二矣惜乎无文以发之迺叟曰然君子有文以明道小人有文以发身夫变白以为黑转南以为北非小人有文者孰能之

道大【元丰六年八月一日作】

迺叟曰圣人之道如天地天地之间靡所不有衆人之道如山川如陵谷如鸟兽如草木如虫沙各尽其分不知其外天地则无不包也无不偏也

毋我知

孔子曰殷有三仁焉盖孔子之前为比干者则非微子矣为微子者则非比干矣为箕子者则非比干与微子矣至孔子然後人知三子者皆仁人也孔子曰微管仲吾其被发左衽矣如其仁如其仁孟荀氏之言曰仲尼之门五尺童子羞称五伯以是观之孟荀氏之道槩诸孔子其隘甚矣

道同【元丰六年作】

迺叟曰合天下而君之之谓王王者必立三公三公分天下而治之曰二伯一公处乎内皆王官也周衰二伯之职废齐桓晋文纠合诸侯以尊天子天子因命之为侯伯修旧职也伯之语转而为霸霸之名自是兴自孟荀氏而下皆曰由王道而王由伯道而霸道岂有二哉得之有浅深成功有小大耳譬诸水为畎为浍为谷为谿为川为渎若所鍾则海也大夫士畎浍也诸侯谿谷也州牧川也方伯渎也天子海也小大虽殊水之性奚以异哉

絕四【元丰六年作】

或问子絕四何以始於母意迺叟曰吉凶悔吝未有不生乎事者也事之生未有不本乎意者也意必自欲欲既立於此矣於是乎有从有违从则有喜有乐有爱违则有怒有哀有恶此人之常情也爱实生贪恶实生暴贪暴恶之大者也是以圣人除其萌塞其源恶奚自而至哉或曰母意於恶既闻矣敢问圣人亦母意於善乎曰不然圣人之为善岂有意乎其间哉事至而应之以礼义耳礼者履也循礼则事无不行义者宜也守义则事无不得圣人执礼义以待事不为善而善至矣圣人岂有意乎其间哉或曰然则圣人之心其犹死灰乎曰不然圣人之心如宿火耳夫火宿之则晦发之则光引之则然鼓之则炽既而复掩之则乃晦矣深而不消久而不灭者其宿火乎圣人之心亦然治其心以待物物至而应事至而辨岂若死灰哉灰死则不复然矣奚所用哉或曰母固母必奚以异乎曰在我为固在人为必圣人出处语默惟义所在无可无不可奚其固成败祸福系命所遭谁得而知之奚其必或曰然则何以终於母我曰有意有必有固则有我有我则私私实生蔽是故泰山触额而不见雷霆破柱而不闻无意无必无固则无我无我则公公实生明是故秋毫过目无不见也飞蚊历耳无不闻也其得失岂不远哉

求用【元丰六年作】

或曰士不好富贵则为士者不得其用刑赏不行矣迺叟曰小人有才必求用於世以利其身不赏不劝不刑不惩君子有才亦求用於世以行其道劝不待赏惩不待刑自古乱臣贼子未有不出於好富贵者也为上者亦何利焉

负恩【元丰七年四月二十八日作】

迺叟曰受人恩而不忍负者其为子必孝为臣必忠

美厌【元丰七年三月十五日作】

迺叟曰人情苦厌其所有美其所不可得未得则美已得则厌厌而求新则为恶无不至矣

老释【元丰七年十二月二日作】

或问老释有取乎迺叟曰有或曰何取曰释取其空老取其无为自然舍是无取也或曰空则人不为善无为则人不可治奈何曰非谓其然也空取其无利欲之心善则死而不朽非空矣无为取其因任治则一日万几有为矣

凿龙门辨【元丰七年十二月二日作】

或问禹凿龙门辟伊阙有诸迺叟曰龙门伊阙天所为也禹治之耳非山横其前水壅其流禹

始凿而辟之然後通也或曰何以知之曰孟子云禹之行水行其所无事若凿山以通水不可谓之无事矣

无为赞【元丰八年正月十九日作】

学黄老者以心如死灰形如槁木为无为适叟以为不然作无为赞

治心以正保躬以静进退有义得失有命守道在已成功则天夫复何为莫非自然

圣穷

圣人专以利人为心於术无不知也谷而可辟则不教人耒耜矣死而可违则不教人棺槨矣夫岂非天使民食且死虽圣人不能违乎

讳有

人之情讳有而不讳无离娄之明人谓之瞽不愠矣柳下惠之和人谓之污不怍矣

斥庄

或曰庄子之文人不能为也适夫曰君子之学为道乎为文乎夫唯文胜而道不至者君子恶诸是犹朽屋而涂丹雘不可处也智井而羃绮绩不可履也乌喙而渍饴糖不可尝也而子独嗜之乎或曰庄子之辨虽当世宿学不能自解适夫曰然则佞人也尧之所畏舜之所难孔子之所恶是青蝇之变白黑者也而子独悦之乎

辨扬

或曰扬子之谄也以王莽为可以继周公轶阿衡适夫曰得已哉扬子之为书也品藻当世蜀庄子真仲元靡不及焉莽宰天下而自况於伊周敢遗诸子何鲍之死不可不畏也虽然莽自况伊周则与之况黄虞则不与也其志将曰为伊周而止斯可矣不止而至於篡伊周岂然哉

无党

或曰吾子摈庄而引扬或者为党乎曰无党也使庄为扬书斯与之矣扬为庄言斯拒之矣孰党哉

兼容

或曰甚矣子道之隘也奚容之不兼适夫曰沱潜之於江也榛楛之於山也兼容焉可也莠之

於苗也冰之於火也欲兼得乎哉

指过

或曰有人於此人指其过而告之则喜何如迺夫曰君子也或曰曷若无过而指诸迺夫曰君子履中正而行者也故有过则人得而指诸若夫不中不正之人终日所为皆过也又安得而指之

难能

或曰尧舜之德何以为难能迺夫曰舜自修於畎亩之中而闻於尧此舜之难也舜在畎亩之中而尧知之此尧之难也

三欺

迺夫曰鞠躬便辟不足为恭长号流涕不足为哀弊衣粝食不足为俭三者以之欺人可矣感人则未也君子所以感人者其惟诚乎欺人者不旋踵人必知之感人者益久而人益信之

官失

迺叟曰世之人不以耳视而目食者鲜矣闻者骇曰何谓也迺叟曰衣冠所以为容观也称体斯美矣世人舍其所称闻人所尚而慕之岂非以耳视者乎饮食之物所以为味也适口斯善矣世人取果饵而刻镂之朱绿之以为盘案之玩岂非以目食者乎

天人

迺叟曰天之所不能为而人能之者人也人之所不能为而天能之者天也稼穡人也丰歉天也

传家集卷七十四

卷七十五

<集部,别集类,北宋建隆至靖康,传家集>

钦定四库全书

传家集卷七十五 宋 司马光 撰格

投壶新格【熙宁五年作】

传曰张而不弛文武弗能也弛而不张文武弗为也一张一弛文武之道也君子学道从政勤劳罢倦必从容宴息以养志游神故可久也荡而无度将以自败故圣人制礼以为之节因以合朋友之和饰宾主之欢且寓其教焉夫投壶细事游戏之类而圣人取之以为礼用诸乡党用诸邦国其故何哉郑康成曰投壶射之细也古者君子射以观德为其心平体正端壹审固然後能中故也盖投壶亦犹是矣未审度於此而取中於彼仁道存焉疑畏则疎惰慢则失义方象焉左右前却过分则差中庸着焉得十失二成功尽弃诚慎明焉是故投壶可以治心可以修身可以为国可以观人何以言之夫投壶者不使之过亦不使之不及所以为中也不使之偏颇流散所以为正也中正道之根柢也圣人作礼乐修刑政立教化垂典谟凡所施为不啻万端要在纳民心於中正而已然难得而制者无若人之心也自非大贤守道敦固则放荡倾移无不至求诸少选且不可得是故圣人广为之术以求之投壶与其一焉观夫临壶发矢之际性无羸密莫不耸然恭谨志存中正虽不能久可以习焉岂非治心之道欤一矢之失犹一行之亏也岂非修身之道乎兢兢业业慎终如始岂非为国之道欤君子之为之也确然不动其心俨然不改其容未得之而不慑既得之而不骄小人之为之也俯身引臂挟巧取奇苟得而无愧岂非观人之道欤由是言之圣人取以为礼宜矣彼博奕者以诡譎相高以残贼相胜孔子犹曰饱食终日无所用心为之犹贤乎已况投壶者又可鄙略而轻废哉古者壶矢之制揖让之容今虽阙焉然其遗风余象犹彷彿也世传投壶格图皆以奇雉难得者为右是亦投琼探?之类耳非古礼之本意也余今更定新格增损旧图以精密者为右偶中者为下使夫用机徼幸者无所措其手焉壶口径三寸耳径一寸高一尺实以小豆壶去席二箭半箭十有二枚长二尺有四寸以全壶不失者为贤苟不能全则积算先满百二十者胜後者负俱满则余算多者胜少者负为图列之左方并各释其指意焉

有初箭十算【首箭中者君子作事谋始以其能慎始故赏之第二箭以下连中不絶者皆五算若一箭不中次箭皆为散箭其违中内有贯耳及骁者其箭别计假若有初箭仍贯耳则二十算是也旧图初箭一筹其次每箭加二筹尽四箭而止甚非劝功之道今自二箭以下连中不絶者皆赏之所以勉人於不解也】

全壶无算【无算者不以耦之算数多少皆胜之也若两人俱全则复计其余算以次胜负夫

为山九仞功亏一篑全壶实难故君子贵之】

有终十五算【末箭中也靡不有初鲜克有终故比之有初又加五算也】散箭一算

贯耳十算【耳小於口而能中之是其用心愈精故赏之】

骁箭十算【何谓之骁皆俊猛意也谓投而不中箭激反跃捷而得之复投而中者也为其已失而复得之不远复善补过者也故赏之若复投而贯耳者其算别计复投而不中者废之】

败壶不问已有之算皆负【谓十二箭皆不中大无功也若两人皆败则亦计余算以决胜负】

横耳【谓箭横加耳上旧五十筹】横壶【横加壶口旧四十筹】皆依常算无赏【偶然而横非投者工何足以赏若为後箭所击而坠地者与不中同】

倚竿【箭斜倚壶口中旧十五筹】龙首【倚竿正箭首正向已者旧十八筹】龙尾【倚竿而箭羽正向已者旧十五筹】狼壶【转旋口上而成倚竿者旧十四筹】带劒【贯耳不至地者旧十五筹】耳倚竿【旧十五筹】皆废其算【倾邪险詖不在於善而旧图以为奇箭多与之算甚无谓也今废其算所以罚之然亦异於不中者故於连中全壶皆为通数若为後前所击及自坠壶若耳中者复计其算坠地者与不中同】

倒中【旧百二十筹】倒耳【旧不问筹数并满】壶中之算尽废之【颠倒反覆恶之大者奈何以为上赏今尽废其算所以明逆应之道】

策问

学士院试李清臣等策问一首【熙宁三年三月二十八日王介甫言於上以为天命不足畏祖宗不足法流俗不足恤故因策目以此三事质於所试者范景仁复至曰流俗不足恤一事我已为策目矣遂刊之明日禁中以纸帖其上别出策目试清臣等】

问先王之治盛矣其遗文余事可见於今者诗书而已矣诗曰文王陟降在帝左右书曰面稽天若盖言王者造次动静未尝不考察天心而严畏之也诗曰毋念尔祖聿修厥德书曰有典有则贻厥子孙盖言三代嗣王未有不遵禹汤文武之法而能为政者也诗曰先民有言询於刍蕘书曰有废有兴出入自尔师虞庶言同则绎盖言与衆同欲则令无不行功无不成也今之论者或曰天地与人了不相关薄食震摇皆有常数不足畏忌祖宗之法未必尽善可革则革不足循守庸人之情喜因循而惮改为可与乐成难与虑始纷纭之议不足听采意者古今异宜诗书陈迹不可尽信邪将圣人之言深微高远非常人所能知先儒之解或未得其旨邪愿闻所以辨之

贤良策问一首【为邵兴宗作皇佑四年】

问国家比下诏书以延天下豪俊之士待之以不次之位岂特以学问之富为贤良文辞之丽为方正邪盖思得先古之至道当今之要务施之於事以安元元此主上所以侧席而求寤寐而思者也今子大夫褒然为举首固当有以副所以待之之意而不愧乎其名矣言及之而不言则几於所谓隐者乎昔三代之王也远者八百载近者不減四百後世王天下者鲜能及之陵夷衰微至於五代或四三年敢问前之所以延者岂世有哲王以守其业後之所以蹙者岂继嗣不肖不能享其功欤抑繇祖宗建法垂统明备固密子孙不能败邪至治之世耕者让畔渔者让泽今国家修明礼义以切励天下久矣而退让之风未甚行於朝争夺之俗未尽絶於野秋毫之利捐仁废谊为之而不耻上下病之而不能革也又内外百吏或侵牟细民苟不得其欲则转赏为罚倒直为曲冤痛失职吁嗟满道虽待之以重诛严刑而不能止也兹二者岂世俗浇伪不可复振将教之禁之之道有所未备也汉有天下至於孝文才三十年而帛朽於库粟流於庾国家平定宇内向九十载而公私之积日以凋耗议者推测其故而未能明也忧者虽衆而莫能谋也敢问所以明之谋之亦有其术欤又若韩非之五蠹荀悦之三游此皆先世之患而今犹未息者也将何道以息之至於朝政之善有所未尽黎庶之病有所未闻子大夫其精心致思条析陈之靡有所遗有司将以复於上而行之焉毋悼後害以枉执事苞忠隐知而不自尽以取美禄荣名而已

进士策问十五首

问昔季路冉有公西华曾皙闲居纵言各陈其志赵文子观於九原以为死者可作想慕随会之为人夫材性散殊不可致之於一涂爱尚不同不可纳之於一趣吾子怀材抱器待时而用前言往行心所常存然则志於道者何术慕於古者何人当位得时施於政而何尚修身立行选於德而何从盖闻言不及之而言谓之躁言及之而不言谓之隐今听者虽非昔人之明而亦未为不知已则其言也可无隐焉

问昔者尧遭洪水咨於四岳曰有能俾乂四岳荐鯀尧曰吁咈哉方命圯族则知鯀之不可用亦明矣四岳复荐曰试可乃已尧遂命之治水九年功用不成然後黜之而兴禹焉夫唐尧圣人之盛者举事兴为岂容过差顾後之学者不能辨明耳不然使不善之人任事九年蒸民汎滥所废者大所害者广然後去之仁圣用心固不如此愚智有涯不能测远吾子其辨也

问稽於经传帝王之际玉帛诸侯亡虑万国当是之时声教所被东不踰海西距流沙南不尽荆蛮北不及獯鬻以五服之民养万国之君公有羨积私有余储征代朝贡无岁而无咸出其中未尝匱乏今国家奄有万方囊括禹迹加以兵革不试垂三十年累圣恭俭与民休息宫室不崇苑囿不广衣服不丽饮食不精然比岁以来有事西虜发输滞积以馈一隅乃复财用竭而不继力役困而不给吁嗟之声萧然道路何曩者用民之侈而有余今者用民之狭而不足乎变而通之必有其道此最国家之急而从政者之所欲闻也吾子明於古之道而察於今之故何施何为而得国用舒民力足以及於古之世也仁者之言其利宜溥幸毋让焉

问夏书曰赏延於世小雅裳裳者华刺幽王弃贤者之类絶功臣之世是古有世禄之道也周书数紂之罪则曰官人以世而言春秋者公羊氏亦云讥世卿诗书春秋皆圣人所以仪范後世也今其言乃违戾如是岂圣人之道渊微奥远学者不足以至邪愿闻所以辨之而毋让

问王者受天命临四海上承天之序下正人之统故政治之本莫先於历数历数之纪莫大於正朔正朔者历数之大端而万事之维首也是以圣人重之三代之王视斗招摇建寅建丑建子以为正月仰应三光俯顺三统总象三材备在典策其传详矣正於唐虞以前则历世儒生各为异见孔安国以为建寅为正得天之数自古皆用之汤武放伐以有天下革故鼎新然後有改正朔易人视听之事今据唐虞之前无异正朔之文则似孔说得之然郑康成依尚书纬以为正朔三而改自古皆相变若循环然非至於夏商周而後变也孔子曰行夏之时自古皆用建寅何得谓之夏之时似郑义复为优夫正朔者帝王之盛节国家之大事而古今异论纷纷不决愿吾子辨其得失明究其说使後来学者知其适从

问夫佐天子治四海安万民使诸侯轨道四夷宾服百吏称职万机辨治地平天成风雨和顺者宰相之任也其功烈莫先焉王者封二王後所以存三统重絶先圣之世也而班固汉书采汉兴以来有金革之勤及蛮夷降王受爵邑者为功臣表又采椒房母舅之家徼幸获封者为外戚恩泽侯表而自平津以降由丞相得侯者及商周之後皆不得附於功臣之列而猥编於外戚恩泽之间岂以變理陰阳之重而居贯甲执兵之後先圣苗裔王者宾客而在武夫健将之左邪抑史氏将有深旨非浅识所知乎将不思而已矣愿闻所以辨之问祭典曰法施於民则祀之有功於民则祀之故厉山氏之子曰柱能殖百谷祀以为稷共工氏之子曰勾龙能平水土祀以为社汤既胜夏欲变先王之制以明革命於是乎以弃代而後世无及勾龙者故不易也夫平水土者莫尚於禹禹之功顾不及勾龙邪汤不祀禹以为社而云後世无及勾龙者其旨何哉圣人规为必不妄也子大夫其懋明之

问世之为诗者皆称鲁僖公能遵伯禽之法鲁人尊之而为之颂自孔子删诗存而不去非虚美也今以春秋迹之或违礼而动或作事不时至於修泮宫伐淮夷作新庙皆无闻焉殆若与颂不相应者其故何哉

问孟子称尽信书不如无书吾於武成取二三策而已为其以至仁伐至不仁而有血流漂杵也後之学者皆祖其言乃以书为舛駁非若他经之纯美也呜呼彼孟子者果愈於圣人邪书者果是非相冒中有可信不可信者邪学者病於随风而呼顺流而攘未有能排其门上其堂探其室诘其?而徒披猖横骛乎藩篱之外彼又乌知甘酸之正味邪乃欲信孟子而非书孟子又曰说诗者不以文害辞不以辞害志斯言也岂独可施於诗而不可施於书邪孟子之云书不可尽信者果是欤愿与诸君订之

问关雎麟趾之化王者之风故系之周公鹊巢驹虞之德诸侯之风先王之所以教故系之召公说者以为先王谓太王王季今据二南之诗大抵皆言文王之化或美召伯或美王姬乌在其为太王王季也且如太王王季文王之诗何为不编之雅颂而列於国风又文王之道被於天下何故其中杂有王者诸侯之风复何为系之周公召公皆翫昧所不识也二三君子奥博

於學愿聞所以辨之其說何也

問曲禮曰禮不下庶人刑不上大夫按王制修六禮以節民性冠婚喪祭鄉相見此庶人之禮也舜典五服三就大夫於朝士於市此大夫之刑也夫禮與刑先王所以治羣臣萬民不可斯須偏廢也今曲禮乃云如是必有異旨其可見乎

問子曰侍於君子有三愆言未及之而言謂之躁言及之而不言謂之隱未見顏色而言謂之瞽夫聖人之道正直無隱豈伺人顏色而言邪必有微旨幸為辨之問春秋始隱之說誰氏為通

問春秋不書公即位何以特書王正月杜元凱以朝正於廟解之朝正于廟國家常禮非特行於君之始年也問春秋貴儀父者為其能自通於大國繼好息民也夫小事大者盟不重於朝今犂來名而儀父字其說何也

樂詞

樞密院开启圣节道场排当词

散念

紫電流樞元聖誕膺於丕運妙花雨地輔臣祇奉於仁祠凭不垢之勝因佑無疆之遐算仍修高會共洽多娛宜盡從容式昭慈惠

夔龍滿座集紳紳花雨仍添一日春欲識華胥何處在只應近與醉鄉鄰

作語

德水澄瀾上聖應期而降誕崇邱儲粹大賢名世以挺生蓋精神之會昌若符契之相合必資同德用底太寧恭惟尊號皇帝陛下容覆如天照臨若日躋羣生於富壽之域納庶俗於仁讓之涂雷雨弗迷魚鼈咸若伏惟某官某官丕宣忠力克壯遠猷筦樞機而均四時撫綽鈴而制八狄屬呈祥於里社冀徼福於香城大啓梵筵同祈睿算玉毫珠髻既瞻仰於慈云寶案金觴仍涵濡於湛露肴羞交錯笙磬駢羅仁澤醴於惠風喜色饒於淑氣某謬參樂吏獲對台廷不揆荒才敢獻口號華渚流星表聖期宗工齋祓欵仁祠異花散漫承嚴供妙樂從容奉宴嬉印綬相鮮金錯落佩環交映玉葳蕤乾坤長久南山固此地年年捧羽卮

勾曲

八音繁會七律鈞諧上悅台顏把色合曲

御筵送李宣徽【昭亮】知真定府口号

匈奴旧畏李将军今日重来几代孙
旗尾飘扬山烧裂马蹄腾踏塞尘昏
降王稽颡朝南阙天子垂衣御北门
幕府事闲刁斗静碧潭佳景日开樽

作语

天文垂象贵将陪扈於太微地险流形常山控临於大漠矧圣神之御辨怀荒憬以向风秋尘无惊夜户不闭眷是股肱之郡委於心膂之臣某官武节兼人雄规絶衆元戎十乘董鋭士以啓行清酒百壶命贤王而出餞荣生道路威动塞垣驻大旆於近郊留朱轮於清籞某叨居乐部幸对台光不揆芜才敢献口号

秋风萧瑟引华旌祖宴高张出斗城
玉饌芳菲罗百品铁衣照耀拥千兵
骊歌未阕长杨苑骑吹先临细柳营
雨露醴恩何以报沙场不惜树功名

庆文公八十会口号

某闻三王之盛未有遗年五福之先莫如享寿恭惟开府太师才为人杰位极帝师黑头强仕之时已登廊庙黄发老成之日还赏林泉赞熙洽於三朝保康宁於八十太公望口余两齿犹钓渭滨田千秋身乘小车尚腰相印何曾则始为太宰石鉴则甫拜司空平津之谈论多闻方叔之谋猷克壮独兼具美度越前修留守相公镇抚都畿典司官钥遇唐虞之无事喜稷卨之得朋大啓华筵益祈遐算提举端明惜盛事之难值慕贤者之所为亲邀相车就宴甲第跪斟芳醕仰祝椿龄某不揆荒芜敢献口号

元勲茂德古无伦海内高闲第一人
台席已酬调鼎志磻溪还作钓鱼身
师臣首冠三旌贵岁历行开九帙
新愿过期颐跻上壽飞觞四十有余春

传家集卷七十五

卷七十六

钦定四库全书

传家集卷七十六 宋 司马光 撰志一

太子太保庞公墓志铭【嘉佑八年作】

公讳某字醇之其先出於周之毕公因邑命氏近世自郢徙居单之成武曾祖考讳某赠太师中书令妣何氏封越国太夫人祖考讳某赠太师中书令兼尚书令封秦国公妣陈氏封楚国太夫人考讳某赠太师中书令兼尚书令封魏国公妣邢氏封燕国太夫人自秦公以往仍世不仕魏公始以通春秋仕至国子博士公幼敏达工文辞书无不观举进士上第释褐黄州司理参军秩满居魏公忧服除调江州判官未之官用举者除开封府兵曹参军诸兄欲分魏公遗产公曰吾幸有禄尽以让二兄一钱不取知府事薛公奎素名威严少许可独见公而器之待遇甚厚谓曰君他日必至公辅余不及也仍举为法曹顷之改大理寺丞知襄邑县召还编天圣勅授刑部详覆官会群牧判官缺是时章献太后临朝用中旨求之者以十数执政患之谋曰得孤寒中有声望才节可以服人者与之则中旨可塞矣乃以公名进太后果从之仍改服银绯久之出知秀州事明道中召入为殿中侍御史章献太后崩章惠太后欲踵之临朝公奏燔合门所掌垂帘仪制以沮其谋当时服其敢言先帝始专万机富於春秋左右欲以奇巧自媚後苑珠玉之工颇盛於前日公上言今螽螟为灾民忧转死北有耶律西有拓跋陛下安得不以俭约为师奢靡为戒重惜国用以徇民之急上深纳其言中丞孔公道辅尝谓人曰今之御史多承望要人风指陰为之用独庞君天子御史耳寻授开封府判官尚美人方有宠遣宦者称教旨免工人市繇公上言祖宗以来未有美人敢称教旨干挠府政者上怒扶宦者切责美人仍诏诸官府自今有传宫中之命皆毋得施行龙图阁学士范讽喜放旷不遵礼法士大夫多慕效之又为奸利事公屡奏其状不报会除祠部员外郎广南东路转运使将之官复奏言之且曰苟不惩治则败乱风俗将如西晋之季不可不察有诏置狱以覆其实狱成讽坐贬鄂州行军司马仍下诏戒天下风俗上欲还公御史既而以贬逐大臣之故亦以公为太常博士知临江军至官未百日复授祠部员外郎福建路转运使景佑三年以侍御史召还执政奏拟户部判官上曰庞某止可三司判官邪後九日除刑部员外郎兼侍御史知杂事改服金紫寻判大理寺纠察在京刑狱知审官院在台中二年执政奏拟户部副使上曰庞某岂得以常涂进之遂擢为天章阁待制拓跋元昊僭乱陕右骚动公奉使体量安抚还未几出知汝州事数月徙知同州事寻授陕西都转运使庆历元年延安缺帅以公为龙图阁直学士知延州事寻加鄜延路马步军都部署经略安抚缘边招讨等使明年除延州观察使五辞不受复迁谏议大夫职任如故延安自龙州之败戎落民居焚掠几尽距郭无几悉为寇境人心危惧公至补绽茹漏聚用增备抚民以仁驭军以严戍兵近十万未有壁垒多寄止民家无秋毫敢犯民者诸将欲出兵公必召问方畧取其所长而诲其所短告以赏罚已而必行由是诸将莫敢不尽力出辄有功是时元昊数犯边覆军杀将而独不近鄜延间或小入辄以败去故地为虜

所据者公悉逐之筑十一城於险要其腹中可食之田尽募民耕之延安遂为乐土会朝廷益厌兵欲赦元昊之罪以诏书命公招怀之公曰虜骤胜方骄若中国自遣人说之彼益偃蹇不可与言先是元昊用事之臣野利旺荣遣其牙校李文贵来公留之於边至是召之自从公所谕以逆顺祸福遣还文贵寻以旺荣曹偶四人书来用敌国修好之礼公以其不逊未敢复书请於朝朝廷急於息民命公复之书开延而勿拒称旺荣等为太尉且曰元昊果肯称臣虽仍其僭名可也公上言僭名理不可容臣不敢奉诏太尉天子上公非陪臣所得称今方抑止其僭而称其臣为上公恐虜滋骄不可得臣旺荣等与臣书自称宁令谟宁令此虜中之官中国不能知其义可以无嫌臣辄从而称之朝廷善之旺荣等又请用小国事大之礼公曰此非边帅所敢知也而主若遣使者奉表以来乃敢导致於朝廷耳是时朝廷方修复泾原公恐虜猝犯之败其功乃留连其使数与之讲议虽抑止其僭亦不决然絶也如是踰年元昊乃遣其伊州刺史贺从勛来自称男邦面令国兀卒郎霄上书父大宋皇帝公使谓之曰天子至尊荆王叔父也犹奉表称臣今名体未正不敢以闻从勛曰子事父犹臣事君也使从勛得至京师而天子不许请更归议之公上言虜自背诞以来虽屡战得气然丧私市之利民甚愁困今其辞礼寝顺必诚有改事中国之心愿听从勛诣阙更选使者往至其国以诏旨抑之彼必称臣凡名称礼数及求匄之物当力加裁损必不得已乃少许之若所求不违恐豺狼之心未易盈厌也朝廷皆从其策元昊果称臣册命为夏国主上以西鄙之宁皆公之功乃密诏谕以两府有缺当补之四年遂入为枢密副使公在延州治州城及诸寨皆募禁军为之军行出塞则使因粮於敌马刍皆自刈之还畀其直民无飞挽之劳及去民遮道泣曰公用兵数年未尝以一事烦民虽以一子为香焚之犹不足报也追送数驿乃去公至枢府上言陕西用兵以来用度太广请遣使者减省边费上从之所省逾半八年参知政事皇佑元年以工部侍郎为枢密使公以近世养兵之弊在於多而不精故国用困竭与丞相合议大加简閲於是中外言者鼎沸以为必生大变上亦疑焉公曰万一有一夫狂譁二臣请以百口偿之卒行其策是岁凡省八万余人三司粮赐皆有余矣三年同中书门下平章事兼昭文馆大学士公为相专以公忠便国家为事不以官爵养私交取声誉端明殿学士程公戡知益州将行上俾公谕之曰戡还当处以两府公曰兹事出於上恩臣不敢与闻卒不与程言广源蛮侬智高反毒徧岭南王师数不利诏以枢密副使狄青为宣抚使以讨之言事者以青武人不足专任固请以侍从文臣为之副上以访公公曰属者王师所以屡败皆由大将权轻偏裨人人自用遇敌或进或退力不能制故也今青起於行伍若以侍从之臣副之彼视青无如也青之号令复不可得行是循覆车之轨也青素名善战今以二府将大兵讨贼若又不胜不惟岭南非陛下之有荆湖江南皆可忧矣祸难之兴未见其涯不可不慎青昔在鄜延居臣麾下沈勇有智略若专以智高委之使青先以威齐衆而後用之必能办贼幸陛下勿以为忧也上曰善於是诏岭南用兵皆受青节制处置民事则与枢密直学士孙沔等议之青至岭下斩败军将校数人进击智高於邕州大破之智高奔大理捷书至上喜谓公曰岭南非卿执议之坚不能平今日皆卿功也青还上欲以为枢密使同平章事公曰昔曹彬平江南太祖谓之曰朕欲以卿为使相然今外敌尚多卿为使相安肯为朕尽死力邪赐钱二亿而已今青虽有功未若彬之大若赏以此官则富贵极矣异日复有寇盗青更立功将以何官赏之且青起军中致位二府衆论纷然以为国朝未有此比今幸而立功论者方息若又赏之太过是复使青得罪於衆人也臣所言非徒便於国体亦为青谋也争之累日上乃许之加青检校官迁护国军节度使河中尹仍赐其诸子官既而内外讼青功以为赏薄者多上重於违衆复以青为枢密使其後青卒以官盛为世所疑近世

台官进用太速公举旧制御史秩满以大藩处之内侍省都知王守忠侍上久求领节度使上以问公公曰自宋兴以来未有内臣为节度使者陛下至孝凡祭祀文物事有毫发关于宗庙者未尝不兢兢畏慎况祖宗典法又可隳邪上乃止由是内外怨疾颇多会道士赵清贶与公有瓜葛亲与堂吏通谋受人贿赂许为之求官公闻之奏捕清贶及堂吏系狱穷治其奸杖而流之清贶行数日而毙於是言事者乘此争诋毁公协力排之始以为公私於清贶未言杀以灭口上虽知公无罪欲厌言者之心五年命公以户部侍郎知郢州事兼京东西路安抚使既而深悔之是岁上亲祠南郊前月余谓执政曰庞某可就加观文殿大学士速行之若过大礼是与有罪者无以异也及诏出仍厚加赐赉契丹来求上御容及例外事数条上以问执政皆相视莫能对上怅然久之曰前者出庞某太匆匆盖以公习知夷狄情能断大事故也至和二年除昭德军节度使永兴军路安抚使知永兴军事未行又改河东路经畧安抚使知并州事嘉佑元年上得疾久未瘳中外忧惧公上言比者陛下皇子继天宫坊虚位立嗣之义礼有明文愿陛下深思祖宗统绪之重历选宗室宜为嗣者速决圣志制命一出则群心大安奉承宗庙之孝无大於此臣以寒儒荷陛下大恩位至将相是以冒重祸而不疑不悔年垂七十逼於休退固无他望唯陛下保万世之业怀生蒙无穷之幸乃老臣之大愿後数年上遂定大策如公议麟州屈野水西有田与夏虏相接疆场不明数十年来虏盗耕之麟人不能正也至是诏边吏禁止之边吏颇暴掠其民公曰拓跋氏称臣奉贡未失臣礼今不先以文告而遽暴掠之使归曲而责直非中国所以御夷狄也乃戒边吏谨斥候毋得辄犯虏徐以义理晓之虏不去召使更定疆场又不至公曰虏仰吾私市如婴儿之待乳若絶之虏必自来乃禁边毋与虏为市虏大穷移书於边请遣使更议疆场使者至有日会管勾麟府军马事郭恩恃其勇果与知麟州事武戡走马承受公事黄道元率兵不满千人涉屈野之西至忽里堆不为战备虏怨边吏之暴其民每聚兵万余於境上以待边吏至而击之以复其仇边吏守公约束虏以饥疲罢去者数矣至是或告虏在水西恩等不信虏遂发伏兵以击恩等恩道元皆没於虏戡脱走得归然虏以私市故犹遣使者来请退水西之田二十里公不许先是公命通判并州事司马光之麟州与戡议边事戡请乘虏罢兵之时筑二堡於屈野之西以禁耕者且为州耳目光还以告公从之比往而虏兵已复聚戡不敢兴役及败乃言其日行视堡地为虏所掩以至亡会虏遣道元归朝廷命御史按之御史新拜官欲排击大臣以为名移幕府取文书公以筑堡之议光实与焉恐并获罪乃留徽光之书以其余与之御史遂劾奏公擅筑堡於边以败师徒又匿制狱所取文书坐是解节钺复以观文殿大学士户部侍郎知青州事兼京东路安抚使光慙忤守阙上书具言其状自请斧钺之诛朝廷不许公又上奏引咎自归乞矜免光罪光卒不坐他日光见公无所自容而公待之如故终身不复言始公在并州年甫七十亟欲告老会左迁不敢至青半岁乃上表自陈朝廷不许迁尚书左丞徙知定州事本路安抚使公过京师入见上面陈至诚上曰新进之臣畏怯避事定州兵骄日久藉卿威名以镇之卿勉为朝廷行也公不得已请让还左丞及至定一年而归老上许之如期复请诏召还京师公陈请不已或谓公今精力克壮年少所不及主上注意方厚何遽引去若此之坚公曰必待筋力不支明主厌弃然後乃去是不得已岂止足之谓邪凡上表者九手疏二十余通朝廷不能夺五年听以太子太保致仕公好学出於天性虽耄老家居常读书赋诗未尝闲用此自娱至忘饥渴寒暑子弟虽爱之甚常庄色以诲之闺门燕居人不见其有惰容其为治以爱民为主明练法令以平心处之常曰凡为大臣尤宜祇畏绳墨岂得自恃贵重乱天子法邪唯治军差严有犯辄以便宜从事或断斩刳磔或累笞取毙军中股栗然能察知其劳苦至於庐舍饮食无不尽心为

之区处使皆完美故所至士卒望风耸畏而终无怨心遇僚属谦恭和易有所开白苟可取虽文书已行立为更易无爱吝心八年三月丙午以疾薨于第年七十六时上已不豫闻之震悼不能临奠遣中使吊赙其家未踰月宫车晏驾今上在亮陰故未及赠諡公先娶夫人边氏故枢密直学士肃之女封嘉兴县君再娶刘氏供备库使永崇之女封彭国夫人男五人长曰元鲁登进士第官至大理寺丞早终次元英太常博士次元常内殿崇班次元中大理寺丞次元直大理评事女七人长适冀州支使陈琪封南安县君次适都官员外郎宋充国封德安县君早终次适屯田员外郎程嗣隆封仁壽县君次继适宋充国封永康县君次适大理评事赵彦若封荣德县君次及幼女皆未嫁孤元英将以其年六月壬申葬公于雍邱之东山乃谓光曰公平生知爱莫子如也子当铭公墓光自知不文不敢辞噫光受公恩如此其大灭身不足以报然公之德烈载天下之耳目光不敢以一言私焉铭曰

显允公德柔嘉维则敏而好谋果而不惑函谷以西幼艾嬉游边鄙不耸荷公之休五岭以南复为王土制胜庙堂承公之祐文服武取动皆有成谁克知之维天子明天子爵禄天子法度怨憎孔多公忠乃着膂力未愆辞荣以年子衆而贤受福之全天之生公以佐先帝缀衣在庭公适辞世迹实为文歟石幽泉身毁名传垂之亿年

礼部尚书张公墓志铭【熙宁四年三月作】

熙宁四年三月癸巳礼部尚书致仕张公年八十八薨於冀州私第其孤保孙状公之功行遣使者走洛阳谓光曰公将以八月壬申葬子为我铭公之墓光既哭自惟文辞鄙恶不足发明公事业然婚媾累世庶知公之志於他人为详用不敢辞公讳某字诚之其先家於深州曾祖讳侑祖讳光伟赠太子中允父讳文质赠尚书左仆射母太原郡太君王氏自仆射以上皆不仕而家饶於财太平兴国中契丹屡入塞仆射以深州城恶始徙居冀州明年深州陷公以景德二年登进士第历蜀州赵州司理迁安肃军判官天禧末诏诔司以身言书判取士应诏者五十余人唯二人中选而公与其一由是除著作佐郎知朝城县寇忠愍公尹大名於僚吏中待公独异曰观君器业他日必当远到秩满为开封府司録出知将陵县通判雄州王文康公为御史中丞荐公自屯田员外郎改殿中侍御史迁侍御史弹劾不避贵戚迁兵部员外郎封盐铁勾院明道二年京东大饥选公为转运使賑救有方优诏褒美就赐紫衣金鱼间一岁徙陕西又徙河北举按贪横风迹益显景佑四年入为户部副使宝元元年迁度支副使寻元昊僭乱西鄙骚动诏以公为天章阁待制陕西都转运使诸将争进攻取之策公上言戎狄狂僭自古有之今大兵出征臣恐生民徧受其弊若元昊果有悛悔怀服之心无他邀求虽名号未正臣谓亦可阔略与其责虚名於戎狄曷若拯实弊於生民也朝廷虽不即从其後绥抚元昊亦略如公策康定元年迁龙图阁直学士知延州是时太夫人高年被疾公难於远离而不敢辞朝廷责公不即之官复以待制知泽州明年徙知成德军遭太夫人忧有诏起令视事俄还学士职公上言契丹与元昊为婚恐陰谋相首尾河北城久不治宜留意会契丹聚兵塞上求关南地庆历二年诏以公为河北都转运使悉城河北诸州契丹讲解复知成德军明年自兵部郎中迁右谏议大夫充河北都转运使公辞以河北幸无事愿以故官留成德诏从之明年徙知青州间一岁入知审官院改知开封府明年出知成德军未行改河北都转运使公上言恩州守臣非其人州兵骄悍恐有意外之变不报俄徙陕西都转运使恩州兵王则果作乱公

坐失觉察明年左迁知汀州先是冀州男子李教醉酒妄言涉妖逆事觉自经死教兄馭为公壻其怨家告馭父母因馭私属公得免缘坐事下御史府案验皆无实公犹以婚家落学士自给事中降授左谏议大夫初贬江南寻徙知彬州皇佑元年复以给事中知洪州明年复为学士在洪三年入判流内铨知审官院出知澧州明年徙河北都转运使至和元年徙知相州明年复知审官院嘉佑元年知邢州明年告老以吏部侍郎致仕家居凡十五年遇英宗今上即位及郊礼恩就迁三官为礼部尚书公性孝友始罢蜀州归得蜀中奇缯物入门不以适私室悉布之堂上请太夫人及昆弟姊妹恣择取之常曰兄弟天之所生譬如手足不可离絶妻妾乃外舍之人奈何用外人而断手足乎宗族虽甚疎远其贫窶者无不收恤男女孤嫠者皆为之婚嫁无一人失所者然为人庄重虽家居常自整饬衣冠不具不以见子孙与语或至夜分不命之坐闺门之内肃然如官府事小大皆有条理自始仕至终老凡与宾友相接常垂足危坐或燕饮终日逮夜未尝稍倾倚有倦怠之色他人莫能为也其在官以精敏廉直为朝廷所知故每有边警及灾害处多以公当之事无不集识量高远能甄别人物前後荐举僚吏数百人讫无一人败官为累者翰林郑学士獬屡举进士不中见公於洪州公曰君科名当为天下第一得自有时勿以为忧已而果然家本河北不习舟楫及谪官南方极江湖之险每值风涛家人不胜愁恐公曰吾自省平生处心无可愧者神明必将卫我岂沈溺於此哉怡然不以屑意在南方累年夫人及子孙相继物故者数人知冀州蒋偕尝有憾於公乘公之谪以事残破公家至伐墓中柏以治道路他人谓公罹此忧患必不能济公以道自寛卒无恙而返及偕为依蛭所杀家人或有快之者公辄怒责公既纳政还乡里熙宁初河北地大震往往坏官府民居公方食案上器皆倾坠左右奔散公安坐自如徐曰地震常理何至惊遽如此时河决枣强势逼州城或劝公徙家邢州公曰吾家衆所望也苟轻为举动使一州吏民何以自安卒不徙朝廷优礼旧德五授其子保孙以冀州官保孙欲顺适公意凡居处出入及燕待宾客奉养供张之具皆不减为二千石时故公虽退居不自觉异於昔日也年逾八十耳目手足犹聪明轻利饮食起居壮者或不能及嗜读书老而不衰临终前一日呼门生问西边用兵今何如朝廷法令无复变更否其忠爱之心盖出天性非有为而为之也讣闻太常諡曰恭安夫人永嘉郡君刘氏先公亡二男长曰貽孙大理评事次曰保孙殿中丞五女长适前进士李馭次适供备库副使贾世永次适端明殿学士司马光次适供备库使任永次适历城主簿刘忠辅貽孙及适贾氏刘氏女皆早卒公久在贵位宗族用公补官者凡三十余人铭曰福善之道世或疑之以公而观决无可疑仁不遗亲忠不忘君立身谨严当官恪勤入践台阁出临藩服自少通显逮于纳禄体强无疾资用常充年垂九十荣乐而终章绶累累延于九族归从祖考是谓全福

右谏议大夫吕府君墓志铭【熙宁四年作】

府君讳海字献可其先幽州安次人曾祖父讳琦晋兵部侍郎赠太师中书令尚书令祖讳端相太宗真宗以太子太保薨諡正惠赠太师中书令伯祖讳余庆太祖时参知政事赠镇南军节度使各有功烈记於史官父讳荀国子博士赠兵部侍郎母张氏追封清河郡太君献可幼孤自力为学家于洛阳性沈厚不妄交游洛阳士人往往不之识登进士第调浮梁尉不之官历旌德扶风主簿迁云阳令改著作佐郎知翼城县徙签书定国军节度判官通判梓州事未至官遭母丧服除知大通监兼交城县召入为殿中侍御史弹劾无所避充国公主仁宗之爱女下嫁李玮薄其夫家尝因忿恚夜开禁门入诉於上献可奏宿卫不可不严公主夜叩禁门

門者不當听入并劾奏公主合宦者梁怀古梁全一窜逐之会有新除枢密副使者当时人有疑论献可与其僚直以衆言陈上前谓必不可留章十七上卒与之俱罢献可得知江州久之复召还台英宗即位改起居舍人同知谏院时上有疾太后权同听政内侍都都知任守忠久用事於中上之立非守忠意乘此与其间间构两宫造播恶言中外恟惧献可连上两宫书开陈大义情辞切至由是慈孝益笃谗言不得行上疾久未平献可请早建东宫以安人心既而上小瘳谦默未可否事献可屡乞亲万机揽威福延近臣通下情又请太后间数日一御东殿渐远庶务自谋安佚会小旱因请上亲出祷雨使外疑释然太后既归政献可复言於上今虽专听断太后辅佐先帝久多阅天下事事之大者犹宜关白咨访然後行示不敢专以报盛德任守忠谋不售而惧乃更巧为谄谀求自入於上献可曰是不可使久处左右亟言上数其前後巨恶并其党史昭锡窜於南方因上言大奸已去其余向日凭恃无礼者宜一切纵舍勿念以安反侧顷之以兵部员外郎兼侍御史知杂事执政建言欲如汉氏故事推尊濮安懿王献可率僚属极陈其不可且请治执政之罪积十余章不听仍求自贬又十余章怀知杂御史勅告纳上前曰臣言不效不敢居其位上重违大臣又嘉台官敢直言章留中不下还其勅告屡诏令就职献可与僚属具録所上奏草纳中书称不敢奉诏固请即罪上不得已听以本官出知蕲州已而徙知晋州今上即位加集贤殿修撰知河中府未几召为刑部郎中充盐铁副使上素闻其强直擢为天章阁待制复知谏院迁谏议大夫权御史中丞是时有侍臣弃官家居者朝野称其材以为古今少伦天子引参大政衆皆喜於得人献可独以为不然衆莫不怪之居无何新为政者恃其材弃衆任已厌常为奇多变更祖宗法专汲汲敛民财所爱信引拔时或非其人天下大失望献可屡争不能得乃抗章悉条其过失且曰误天下苍生必此人如久居庙堂必无安静之理又曰天下本无事但庸人扰之上遣使谕解献可执之愈坚乃罢中丞出知邓州献可虽在外遇朝廷有大得失犹言之不置会有疾奏乞闲官归乡里朝旨未许乃乞致仕诏提举西京崇福宫到官又乞致仕许之以熙宁四年五月甲午终於家年五十有八初正惠公薨其家日益贫献可既仕常分俸之半以给宗族之孤嫠者室无余貲所以自奉养至俭薄其治民主於惠利而疾奸暴大抵乐以公平故所至人安之屡为言职其奏草存可见者凡二百八十有九历观古人有能得一二已可载之列传垂示後世在献可曾何足道今特举共事系安危者书之至於进对口陈之语不可得而闻也前後三逐皆以违犯大臣所与敌者莫非秉大权天子所信向气势轧天下献可视之若无所睹正色直辞指数其非不去不已旁侧为之股栗而献可处之自如平居容貌语言恂恂和易使之不得位於朝人不过以谨厚长者名之而已矣及遇事苟义所当为疾趋径前如救焚溺所不当为畏避远去如顾陷穽惟恐坠焉晚年病卧洛阳犹旦夕愤叹以天下事为忧过於在位任其责者曾不念其身之病子孙之贫也呜呼今之世爱君忧民发於诚心无所为而为之可已而不已始终不变有如献可者能几人邪故其没之日天下识不识皆咨嗟痛惜彼其心岂独私於献可哉献可始娶张氏故丞相邓公之孙後娶时氏故侍御史旦之孙封同安县君四男长曰由庚金水主簿次曰由圣将作监主簿次曰由礼由诚皆未仕六女长适罗山令鞠承之次适光禄寺丞吴安诗次适进士姚辉次蚤卒处者二人以其年八月某日葬伊阙先莹献可病亟为手书命光为埋文光往省之至则目且瞑光伏呼曰更有以见属乎张目强视曰无光出门而献可没噫如光者乌足以副献可之所待邪顾义不得辞哭而为铭铭曰

有宋名臣吕正惠公之孙以忠直敢言克绍其门位则不究道则不负年则不寿名则不朽呜

呼为人臣为人嗣始终无愧能底于是可谓备矣

传家集卷七十六

卷七十七

钦定四库全书

传家集卷七十七 宋 司马光 撰志二

龙图阁直学士李公墓志铭【皇佑四年八月作】

公讳某字公素其先唐之宗室避乱入蜀家於邛州之依政曾大父讳穀大父讳辰父讳宪皆不仕大父以才行着乡曲朝廷褒之号静惠处士公生三岁而孤性警敏过人兄絢教之书严其程课而出公遨戏自如比暮兄归公徐取书乘月视之一过立诵数千言兄由是奇之稍长善属文尤工諠诗气格豪迈景佑五年举进士为天下第二除大理评事通判邠州事州人以公少年高科始不以吏事期之公锐精为治所处画皆出人意表吏民大惊会夏虏寇西鄙刘平石元孙战没边人恟惧邠州城恶吏民谋内徙以避之时州无守将公摄州事即发民治州城僚吏固争以事当言上待报公曰虏将至国外何暇顾文法为身计耶且我实为之有罪不尔累乃亲度材庀用赋功董役不三旬而毕仁宗闻而嘉之下诏他州守备当完者视邠为比官满召试除直集贤院历判登闻鼓院吏部南曹开封府推官修起居注失执政意出为京西转运使复还修起居注判三司盐铁勾院时杜祁公为宰相多采拔英?寘之台省不利祁公者指公为其党左迁知润州事徙知洪州事久之谿蛮寇荆湖朝廷议择有材智者以为转运使镇抚之上曰有馆职善饮酒者为谁其材可用今安在宰相不能对上复曰是往岁城邠州者宰相即言公姓名乃除荆湖南路转运使公乘驿至邵陵令诸州皆按兵毋得进讨遣使就蛮居谕以祸福群蛮感悦皆罢兵受约束又召还修起居注纠察在京刑狱遂知制诰判吏部流内铨知审官院以龙图阁直学士权知开封府事京师多老奸宿猾吏不能禽公推迹其物色起居一时录治略尽威令大行坐盗入慈孝寺窃章献皇后御容大珠徙提举在京诸司库务顷之遇疾皇佑四年八月癸未终於家年四十官累迁至起居舍人公为人踈明乐易倜傥不羈饮酒尽数斗不乱视金帛如粪壤厚於交友与之游者久而益亲之为布衣时周游四方识其土风人情故平生喜言为治之体及用兵方略数陈便宜书数十上仁宗春秋?高未有继嗣公因侍祠高禘还奏赋大指言王者修身治国家远嬖宠近柔良则神降之福子孙蕃衍上深嘉纳命内侍石全育宣诏慰抚之公家至贫及病亟自为表言母老不终养以是累陛下上哀之赙恤甚厚时之士大夫无不惜公之志有余而壽不给也夫人张氏封南阳郡君子男三人稷太子中舍秬大理寺丞秬太常寺奉礼郎女四人长适皇城使刘永吉次适进士谢少微次早夭次未嫁光与公同年进士也稷状公之治行命光为之志光不得辞铭曰材气以为实文学以为华孤举秀出以大其家千里之足羈继所不能制百围之木钩矩所不能加功可大施而壽禄不遐呜呼天实使然其又奚嗟

虞部郎中李君墓志铭【熙宁二年作】

君之族出赵郡後家肥鄉今为开封府人曾祖考讳滔洛州团练判官贈中书令妣鲁国夫人苗氏祖考讳炳侍御史贈尚书令妣陈国夫人周氏考讳贇虞部员外郎贈司封员外郎妣扶风县太君宋氏司封之兄沆以清重知治体相真宗弟维以文辞高仁宗初为翰林学士皆有传在国史当世士族咸荣慕之君讳某字汉臣早孤始以相国夫人奏试将作监主簿复以翰林君奏为守主簿初监汝州盐酒税在京茶库西京粮料院?扶风太君忧服除监南京麴院在京丰济仓会久疾以国子博士分司西京寻又掌中岳庙庆历七年七月癸巳終於官舍年五十二君喜为诗有前人风格为人温良清谨睦於族姻厚於朋友故其生也人无与之为怨没也久而思之夫人聂氏秘阁校理震之女封河南县君生六子男攸今为内阁承制女一适右班殿直王喬一适屯田郎中朱处仁余一男二女早卒君之没攸与二处妹皆幼家极贫夫人嫠居二十余年抚育诸孤纲纪家事小大曲尽其宜李氏以复振熙宁二年六月戊午終於京师年七十五先是攸升朝贈君虞部郎中夫人封福昌县太君攸所居官皆有能名异日必将有成者也光於夫人为姊子攸谓光将以今年某月日葬於洛阳贤相鄉之墓子宜为之铭光不辭銘曰

生则人亲之没则人思之誠不尽於中其谁能得之位则不充壽则不融宜其有子以收以祀以终厥祉太常少卿司马府君墓志銘【治平三年作】

兄讳某字昭远曾祖考讳某妣某氏祖考讳某妣某氏考讳某追贈光祿卿妣李氏封永壽县太君兄举进士及第初命威胜军判官又调泾州观察推官寻监渭州酒税改大理寺丞知猗氏县未几簽书保大军节度判官事故丞相庞公为鄜延经略使奏兄通判鄜州事徙知渝州历知庆成军解房二州解房皆未到官徙知商州自商还京师监右厢店宅务丁永壽太君忧服除知乾州以治平三年正月辛酉終於州廨享年六十有九累官至太常少卿兄为人孝友居丧致哀寬厚容物而内守劲直在鄜州州长皆武人多骄恣不法兄平居与之燕游笑语若无可者及临公事则正色力争必当理然後已州长虽甚怒无如之何然知其无害己心亦不深怨也在渝州其佐曰赵寅以傲狠刻暴名於世虽在卑位常行行视天意气如公相兄始至阅狱囚释寅所妄系者近百人寅争之兄一不顾既而词礼倨慢兄亦不与之校久之寅寢自愧悔谢服及寅官满泣涕不忍去兄早孤年过三十乃仕以是周知民间情伪其为政务合民心有悍狡为民害者痛绳以法愚弱不识理者徐为谕解往往晓寤欣悦辍讼而去故所至民爱慕去之久犹思咏不已然其奉上官无过分之礼每罢官入京师多闭户家居未尝及权贵之门视审官缺员榜於壁人久不取者辄受以去惟掌店宅时留京师凡再朞自余率不过数月已去矣以是独所治之民知其才业之美而朝廷终无从知之佗人或仕宦絕在兄後或才能出兄下远甚以熟於时态往往取显官兄处之晏然俱若不见闻者常曰吾幸以寒士积官至二千石自足已久尚何求於人哉司马氏同居累世宗族甚大兄为之长凡二十余年能一施以恩无亲疎贤不肖之间故人人无怨善为诗多为人传诵夫人同郡魏氏封某县君故处士贈著作郎野之女处士名重於真宗朝列传在国史夫人先兄十八年終於渝州享年若干子男二人雍太庙室长应试将作监主簿女三人长适内殿承制雷周佑次适冯翊县尉王淳蚤卒次适郊社斋郎崔穎兄终之岁某月某甲子与夫人合葬於先莹光以葬日之迫不暇請於佗人故忍泣叙而銘之光後兄二十一岁而生加之各从宦四方於兄治行不能得其详姑錄其所知者以传永久不敢以一言私也銘曰壽虽未高不为夭官虽未显不为卑德之和

为衆所慕政之便为民所知仕不苟进兮於道无亏兄今何恨兮生者同悲呜呼哀哉

殿中丞薛府君墓志铭【熙宁五年作】

魏晋之间薛氏始自蜀徙河东有部曲数千家永嘉之乱保河汾以自固历刘石苻氏莫能屈姚秦元魏以来始出仕为公侯卿相者比肩并起入唐尤盛号为甲族然率因游宦去乡里惟府君之先至今留居河东唐袁薛氏中微曾祖考讳昉不仕祖考讳允恭赠谏议大夫考讳田枢密直学士右谏议大夫赠太尉其行义功烈皆见於宋宣献公所为太尉公之碑府君讳仪字式之太尉公之第二子始以父为太庙斋郎又除守将作监主簿太尉公知益州奏府君监凤翔府商税後徙知河东府君年少河东士民皆乡里长老然素严惮府君不敢干以私府君御之亦不失恩义之中以父忧去官服除知鄆县徙知安邑通判渭州州将武人不能谨廉州大吏郝正者把其陰事招权受赇莫敢诘府君至以正罪恶言於将请治之将内窘私以情告府君曰某止欲去恶吏耳必不使及君将亦知府君不欺即移疾以州事属府君府君乃发正私出塞市马收案伏法将不染於辞深德府君且内慙自是悉委事於府君後将知府君贤亦委以事如前将既而某官张君亢除知渭州或谓府君曰君自到渭名虽州佐其实将也张君有材而尚气到必不为君下彼不可以文法拘也君宜於事一无所与庶几自免府君喟然叹曰吾推忠信正直之心以事人岂好犯上而专事邪今张君来吾犹是心也使张君贤必不我怨如其不贤吾获罪亦命而已矣岂可因人而变其守哉及张君至处事有失府君力争如故必当理而後止僚吏皆为之惧张君初无言久之乃於广座谓衆曰亢喜忠义与身俱生遇事辄发不能顾虑故数为小人所陷使为亢佐者皆如薛君亢复何患於是闻者皆服张君之贤而重府君之正是时元昊数寇边覆军杀将朝廷患之乃命范文正公为鄜延招讨使以张君知鄜州为范公之副张公即具奏府君在渭州所以佐已之状乞移通判鄜州朝廷许之而府君母冯翊郡太君党氏春秋高多疾顾恋乡里不肯随诸子之官府君兄弟用太尉公恩得官河中者适皆罢去府君乃固辞鄜州愿监河中盐税以便亲既得请范公遽上奏曰朝廷从薛某之欲於其私固便然甚非张亢求与共事之意乞以薛某还亢仍为徙其兄若弟乡里一官以慰其心朝廷即以府君弟俅知河东县府君鄜州府君不得已之官张君患州城大而处势卑难以待敌欲迁就伏龟山计功数十万时虜乘胜深入而州无役兵欲以战士筑之衆咸以为难府君独以为可张君喜曰薛君谓之可事无不成矣役始兴而张君病失音府君外备寇敌内董役事人不知张君之病也城成民至今赖之岁余徙知深州遭母忧服除知商州庆历八年闰月庚戌终於州廨年五十一先是属县宰有建言商山产铜请置监铸钱朝廷下其议转运使有是之者府君上言朝廷前置阜民监於州境洪崖冶铸铁钱未数年铁已竭其监当废况又益置铜钱监铜产尤薄恐徒劳费无益请以所得铜於旧监铸钱铜竭而止章交上久不决会府君没宰之说遂行县官之费甚广而铜寻竭如府君言宰坐抵罪府君居家孝友自幼能属文始习律赋语意即高奇惊人然不肯从进士举尝着蓼虫赋以刺世之嗜外物而忘其苦者又以为事之当慎者莫若言动交进名乃着五慎文以自儆观是二文足以知其志趣矣初娶唐氏天章阁待制肃之女生一女适殿中丞赵士宁又娶刘氏左谏议大夫综之孙又娶李氏直集贤院建中之孙又娶陈氏司农卿宗元之女生二男长曰昌朝繇太子中允监察御史里行坐正论不阿黜为大理寺丞次曰昌期早卒二女长适秘书省校书郎张煦次早卒昌期将以熙宁五年正月某甲子葬府君於本县赵行村请直龙图阁赵君高状其治行以授

光使为之志昔者先子尝获知於太尉公从兄里佐府君於鄜州幕光亦尝拜府君於兄舍以是颇知府君之为人府君容貌温恭而内守坚正不可夺移语言无机巧蔽匿而明察物情其志常在利民而深疾奸恶故所至上官信之僚友亲之下民爱之今也幸使光志其墓光既取赵君之状詮次之又敢私附其所知云铭曰迂意宜踈而或以之亲阿意宜合而或以之离盖至诚可以待无穷而辞色不过欺一时呜呼允如薛君以忠信正直为心夫又何施而不宜

驾部员外郎司马府君墓志铭【熙宁九年作】

兄讳某字周卿曾大父讳某大父讳某皆不仕父讳某以通毛诗屡应州举名升礼部及兄登朝累赠卫尉卿母某氏封某县太君司马氏累世聚居食口常不减数十卫尉府君为之长兄年十六卫尉即以家事委之衣食均贍宗族无间言卫尉得以优游自适十余年而终兄用从父太尉府君补郊社斋郎太尉以家事非兄不能办未听从宦後数年乃调達州通川尉州有宣汉盐井距州千余里唯一谿仅通小舟可以往来守井吏恃其险远大为奸利州遣兄往按之因为之区处利害凡再往返遂革其弊考满除华州司理参军州将骄贵数用私欲挠公法兄执不听有幕僚性刚戾自将以下皆恶之共文致其罪俾兄鞫之幕僚复上书讼州官皆获罪唯兄不染於辞人以是益知其公平有骠骑十余卒犯罪谋亡去监押捕获之诬云共图不轨欲杀之以求功赏州官信之谓兄必考掠取服兄不从据实鞫之皆止杖罪余囚负冤得直者甚衆既而继母郭氏忧去官直冤者或炷香於顶臂以送之服除授解州闻喜尉用荐者迁大理寺丞知河中府猗氏县徙阆州新井县通判邓均二州先是房州竹山有金谿出金甚多山谷穷僻人迹罕至豪族专其利监司欲命官置场市之皆憚其险辞不行时兄年已踰六十奋曰利其禄而避其劳可乎遂往跻攀崖巘为之经画条目使公私俱利仍每月一按行凡岁余乃还均州秩满徙知梁山军累官至驾部员外郎年甫七十体力尚壮即求致仕诏补子广郊社斋郎广为虢州卢氏主簿迎兄之官以熙宁八年十二月戊子朔暴得疾已丑終於官舍年七十有三兄为人沈厚寛裕喜愠不形於外少时家贫有衣一笥夜遗火比家人觉狼狽救之笥衣已尽兄独卧不起家人尤之曰烧衣荡尽何心尚安卧耶兄曰衣已烧矣起视何益转枕复寝人皆服其度量子孙仆役有过徐训谕之不轻骂辱然当官公直能知小民情伪吏不敢以丝毫欺也虽练习律令而不为峭刻断狱必求厌人心摧抑强猾扶卫愚弱所治职事皆有方略或素号繁剧者兄处之尝有余暇气色不动而衆务修举廷中永昼寂无人声其下皆畏而爱之久犹见思从仕三十余年未尝有过然性恬静不自矜誉故人知之者亦鲜无所超越循常调终身兄亦不憾也其奉养俭素自为布衣至二千石饮啜服用未尝少异与乡人居和易简静故没之日闻者无不叹惜先娶纽氏早终再娶张氏解州助教震之女柔静慈良宜於族姻封清河县君治平四年終於邓州年五十八子男四人曰齐曰庭曰广曰房庭虢州虢略尉女四人长适解人樊景让次适陕人张安仁次二人未嫁皆早夭齐等以熙宁九年二月壬寅奉兄及嫂之丧葬於夏川鄉先茔之西南光以期日之迫不暇请於时之贤士大夫自为之铭曰

廓然有容頽然无争所莅之政不烦而成去久而人益思无求而人莫知年至归休始终无亏

贈都官郎中司马君墓志铭【嘉佑六年作】

君讳某其先出自晋安平献王自周隋之前家涑水之上至唐仕宦陵夷降在畎亩曾祖讳林祖讳政父讳炳累世同食口甚衆父兄以君孝谨自幼以家事委之君昼夜服勤不遗余力专以稼穡畜牧致饶给不事奇衰末业所获悉以奉六亲有余则及乡人身无私焉年三十二以某年月日终某年月日葬於涑水南原先待制府君常叹曰自吾兄之亡而家始贫使天下之民皆若吾兄之为虽古至治之世何以尚诸惜其无位而才不大施也夫人李氏同里人年二十八而寡父母欲夺其志夫家尊章亦遣焉夫人自誓不许恶衣蔬食躬执勤苦教畜二子咏里咏不幸早世里登进士第累迁尚书都官郎中历典数州赠君官至尚书都官郎中夫人封永壽县太君夫人为人孝慈勤俭中外宗族慕仰其德一无间言子为二千石极其荣养年八十二以某年月日终於京师某月日祔於君之墓光不及事君而事夫人久敢书闻见之实而系之以铭铭曰

士不得位善无所施勤俭于躬家道以肥宗族是赖鄉党是师壽之少多命不可移有配有子後无弃基淑慝之效昭然不欺

苏骥驥墓碣铭【为器之作】

苏氏之先出自重黎忿生为周武王司寇封於温世为卿士或谓之温子春秋时苏子为狄所灭子孙以邑为氏历世久远散之四方在洛阳者秦厉代以口辨显战国世在杜陵者建为汉名将子武使匈奴中十九年不屈节在武功者绰仕宇文周以明法令为某官子威隋文帝佐命功臣至唐瓌父子为贤相此其章章尤着者也周衰温为晋邑汉属河内郡隋以河内为怀州维修武之族不弃其故土留怀州不去公其後焉公讳某字某曾大父某大父某皆不仕父某赠左司卫率公幼慷慨有远志自力读书不治家事宗族争笑且怒之曰汝世农家勤治耕桑以丰衣食汝忽弃业为书生穷馁无日矣公曾不顾为学益坚早丧二亲哀毁过礼乡曲称之弱冠举三传科景德中契丹南侵河北盗贼蠭起公於是尽散家财纠合鄉曲子弟结以信义扞御群寇修武由是获全大将军某北征公踵军门上谒延入与语兵事大悦即奏偕行至中山会契丹围城甚急用公之策卒拒却之於是天子曰契丹犯塞河北士子躬被甲胄扞敌有功今天下贡举已毕朕怜夫北方贤士大夫不得以时充贡其皆召试赐第公由是解褐补符离尉县多寇盗吏卒单弱公獎训率厉擒馘七十余人闔境清肃改河清主簿考满吏民羣詣转运使所请留诏听更留成资而去迁遂州録事参军本道论荐召对擢为大理寺丞知大名县事寻除通判州事入朝迁太子中舍国家沿前世故事分文武百官为二涂其迁次任使皆不相参涉有愿相移易者听之以公素善武事加习边务遂改供备库副使知威胜军事继兴岚莫石凤夔五州皆着声绩官历东染院洛苑二副使其在夔州兼夔梓两路兵马都监提举诸州巡检兵甲贼盗事久之上表乞朝因言边防民政诸利害称旨迁右骥驥副使同提点湖南两浙刑狱公事年七十四以庆历二年十月十三日终於长沙官舍公始虽以学术为文吏而性好勇有智略晚年夏寇苦边诸将多败北无功公闻之叹曰吾以布衣起家至方伯承两朝恩渥不可胜纪家近赵魏粗习兵略今狂虏骄慢侵扰疆场而吾老病不得荷戈前驱以报万一非命也夫然卒不得尽其志呜呼哀哉夫人张氏先公即世子四人师古果州团练判官师顔卫州司法参军梦臣获嘉县主簿季子师说及孙孝先曾孙叔元皆三班借职余孙若干人幼未官公之在荆湖也梦臣为三班奉职以公高年多疾求告省侍朝廷以武吏求省侍

无故事不许乞改文职归省方许之行及宛叶间闻丧因号泣昼夜奔赴凡七日行千三百里近世宦远方而没者子孙多焚其柩以烬归葬相习为常无讥诮者梦臣独奋曰为人子孙忍行此岂人心也哉自长沙数千里奉柩以归呜呼其信知义而断不与流俗者夫古人称善人者其身不耀必在子孙岂信然耶某年月日葬於某所先府君之兆夫人张氏祔光鄉邑於公近又久承公之知故其於公之始终治行也於佗人为悉其诸子以碣文为请光何敢辞谨铭曰【铭阙】

传家集卷七十七

卷七十八

<集部,别集类,北宋建隆至靖康,传家集>

钦定四库全书

传家集卷七十八 宋 司马光 撰志三

缙云县尉张君墓志铭

故翰林侍读学士张公有子曰某前公若干年卒殡楚州後若干年与公偕葬襄城时皇佑五年闰月甲申也其弟大理寺丞光以治行来求铭光获事侍读公为日久又与君之兄弟游今也不敢以愚陋辞而不为姑譔次其所闻纳诸圻云君字仲倩其世家鄉党见於侍读公之碑君性嗜学年十五志节已皦皦出人有从母嫠居将从其女於保德军子幼不能自致君奋曰人母子单弱如此於以涉远我独何心坐视之邪即白父母请送父母疑其尚少然闻其言甚悦即遣之君冒盛寒往返数千里曾不为劳人皆叹其仁而有立以?补太庙斋郎及长调缙云尉治有声迹县有淫祠曰五通人严事之岁旱君徧祷群祀不及五通吏民以为请君不得已强往祷且卜之巫曰不吉必无雨比归雨大至君笑曰果然雨不雨非妖鬼事也而敢屡为变怪以惊愚民是不可不除即部吏卒焚灭其祠摔土偶人投江中岁亦大熟官满归道病或请留传舍俟愈而行君曰吾官远方不获侍亲之左右四年於此矣今幸归至舍见吾亲而死吾目瞑矣又何可留趣舟而前及楚州卒年二十八娶袁氏故谏议大夫炜之孙生二男緡试将作监主簿继太常寺太祝二女其幼者早夭初侍读公有五子光知其三人焉而不及识君三人者皆甚才然犹自谓不如也侍读公没兄弟寓居汝颖间食口衆无田宅以自给咸泣曰缙云在吾属岂忧此乎言其知力足赖而不遗其亲也呜呼使显於朝而老所施設岂若是而已哉铭曰

苑彼嘉禾炜炜其华实而未硕孰披之柯人之明果胡壽不遐思而悲者岂伊其家

大理寺丞龐之道墓志铭【嘉佑八年作】

庞之道名元鲁故相国潁公之元子妣曰嘉兴县君边氏其乡里世系见於潁公之志天圣中先君与潁公皆为群牧判官居相近光朝夕与之道游兄事之之道时尚幼性明潁於文辞不待力学而自能读书初如不措意已尽得其精要前辈见之皆惊叹光年不相远自视如土瓦之望珠玉潁公为广南东路转运使奏之道试秘书省校书郎及为知杂御史又奏守将作监主簿景佑五年光与之道同登进士第之道签书怀州判官事未几徙知河南县事县多豪贵家素号难治之道至绳案无所避豪贵为之敛手徙签书河中府判官事後数年光过河南问於野人曰庞君为治何如曰明而有断又问今宰曰不及庞君远矣乃知野人最不可欺而论

议甚公也。穎公为鄜延经略安抚使，奏之道书机宜文字，时方用兵，文书填委，或中宵不得寐。穎公入为枢密副使，欲奏其劳，为之求升资，道辞曰：「将吏有功者，愿大人悉奏之。」元鲁不足言也。穎公喜而从之。久之，以大理寺丞监国子监书库。庆历七年五月戊寅，以疾终，年三十二。殡於荐严佛舍。道事继母刘夫人，抚畜诸弟，始终无间。言及没，哭之皆哀，不自胜。终，穎公之世亲友不敢语及之道。语之，穎公未尝不悲恻。始，光知之道敏於为学，及过河南，又得其为政焉。其没也，益知之道孝友之行深矣。先娶孙氏，故都官员外郎道之女，又娶张氏。今吏部侍郎致仕存之女一，女早卒，遂无子。嘉佑八年六月壬申，弟先英迁之道之柩，葬於雍丘。穎公之墓，侧祔以孙氏光为之铭曰：

学施於治，孝友兼美，官不登朝，没才壮齿。如光何人，荣禄及此，噫！才固不足言，直命而已矣。

右班殿直傅君墓志铭【皇佑五年作】

熙宁二年春，傅钦之遗光书曰：「昔我王考材气过人，宦不遂，以没。尧俞幼鞠於王妣，以至成人，恩隐殊厚。尧俞或以事夜艾未寝，王妣常危坐待之。及仕而之四方，王妣不见，再逾月，则忧念气濇而成痼。逮王妣之亡，竭尧俞之泣，不足以偿痼之血也。今将以某月某日，举吾王考妣之柩，葬於济源。吾尝与子同在谏省，子幸而知我，必为我铭其墓。子苟自谓不能，是爱其少顷之勤，而使我抱终已之恨，非仁人之为也。」光读之愧且惧，复书曰：「子以义责光，光何敢辞？然门内之美，光不得闻也。子为光叙其事，以来光谨条次之，则可矣。」有间，钦之以其状来曰：「君讳某，字宝臣，其先大名内黄人，世为富家。曾祖考讳思进，始读书为儒；祖考讳凝，赠虞部员外郎；考讳世隆，以春秋三传登科，官至驾部员外郎，知邛州事。始家於郛，君少通尚书，屡举不中第，用亲补三班借职，累迁至右班殿直，初监澶州酒税，历齐州、离济、赛酒税、庐州巡检，以事去官。後监赵州仓，知定州新乐县，复以事去官。已而监博州酒税，以疾罢归。明道元年十月十日，终於家，壽六十一。君为人，忼慨方严，家之子弟虽甚爱之，不命坐不敢坐，其当官明敏果断。在新乐，有西山采木卒二百人，谋劫其县，大呼自南门入。君率左右操白挺逆之，至则叱使坐，卒不意，君遽出，皆愕不敢动。君因骂之曰：「饿兵欲奚为？捽其为魁者数人，杖之各数十，而纵之，皆抑首去，不敢出声。然不能与世浮沉，平视贵要，若无人故，所至齟齬。且老益穷，因发狂疾，弃官归，卧一岁，所忽起，召家人与诀，语言如平生人，乃疑其非狂也。故相国王沂公为诸生家居，未与人接，君即以公辅器之，已而果然。人不知其何用知之也。夫人霍氏，国子博士致仕若拙之孙，笃於孝慈，其父亡，夫人未之知，独视云烟草木，皆惨凄变色，泣下不能自止，逾月而讣。至後，君二十二年，年八十一而终。男某，仕至山南东道节度推官，知磁州昭德县事，赠工部郎中；二女，其长者蚤世，幼适杨氏，孙七人，长曰尧俞，字钦之，今为兵部员外郎；次舜俞，郊社斋郎；次君俞，未仕。余皆早世。钦之为谏官，处大议，正直无所顾避，朝廷不能用其言，除知杂御史，钦之固辞不肯，拜必求得罪，以去。知和州，声振天下，呜呼！得非承其祖之风烈邪？钦之以夫人尝至济源，爱其土风，遂葬焉。」铭曰：

气直志刚，难进易伤。善抑不扬，其後必昌。皆理之常。

府州判官杜君墓志铭【嘉佑二年作】

嘉佑二年秋光在京师进士杜知臣涕泣来言曰大人昔以进士得见於先公又与子游?久今不幸而没子为我铭其墓光既吊因辞以不文不敢为知臣固请曰佗人知臣所不敢请也故惟子之归光廼曰然则愿闻子先君世系治行之详知臣退以其状来曰君讳陟字从圣其先自成都徙长江曾大父礼大父鐸皆不仕父昭文遂州长史君少好古学无所不闕着化坊三十一篇言王者以教化坊民之道庆历初天子诏诸州皆立学择其士之贤有行者为之师州人共推上君君屡举进士有司失之卒以三礼释褐选熨道尉考满迁府州军事判官力於吏治转运使提点刑狱交章荐之会属官有以奸赃败者怨恨反诬讼君坐罢官去君诣阙欲自理不果遇疾以八月己巳終於里舍年五十有七娶谭氏生三子男知臣女长适卞宗建幼适姚申皆举进士呜呼杜君观其所学与所为书其志岂欲如是而止哉卒无遇以穷斯可哀矣知臣负其丧归以其年月日葬某地铭曰

学之也勤守之也专仕进迍邐又不永年呜呼孰知其然必归之天

赠太常博士吴君墓志铭【嘉佑五年作】

君之先世家金乡曾大父讳贲不仕大父讳豫赠太常丞始葬洛阳金谷鄉之尹里父讳蒨太平兴国中进士高第以公直材敏立名朝廷数忤权贵由是不得居中连典大州官至侍御史亦葬尹里君讳元亨字子正用御史遗奏补太庙斋郎迁许州司士参军选授永康尉历河中府法曹参军冯翊令冯翊华陰以漆沮为境中间洲上有美田民相与争之五十余年吏不能决君檄华陰令会境上尽案两鄉之籍徧履其田执度以度之皆得其实自是民不敢复争时人称之君为人谨廉专以诚长者处官不能饰智巧以媚上故官久不遂官满集吏部选除邻水令还未至家道疾抵知洛阳县李宋卿延之县舍以天圣九年八月某日终年四十一宋卿主办其丧殡於水安佛室夫人聂氏秘阁校理震之女後君五年长男顥先夫人二年皆不禄独少男几复年未冠及幼女一人相与居家无一金之产几复於孤贫中能自刻意为学取进士第今为太常博士知蓬州事累赠君官至太常博士夫人封仙源县太君嫁其妹於北阳令李鹏嘉佑五年秋蓬州将之官泣谓光曰几复奉先君夫人之遗体常恐不克续承祭祀今幸有禄秩室家苟完矣念先君先夫人之久未葬痛切不少忘於心况又远宦於蜀忍置而去乎将以八月某日葬於梁县之新丰乡西成里子与我皆聂氏之甥也先君治行子皆知之其为我撰铭光曰惧不能堪子之命敢不诺铭曰

御史之贤显大於世及君恂恂清德不坠迨君之终家既相继微蓬州之立吴氏几废呜呼以君之慈良而沈抑不遂宜其有嗣

进士吴君墓志铭

君讳顥字某其先金乡人曾祖某赠太常丞祖某侍御史父某邻水县令赠太常博士邻水府君娶於秘阁校理聂君某於某为从母邻水府君之没也先妣在郑君衰絰来入门哭且拜问故又哭先妣命与光处於是时君年尚未冠为人长大有容观论议慷慨读书属文材敏过人为进士业已完美先妣叹曰吾妹不幸早丧其良人今有是子也吾妹犹有望间二岁君以疾

卒於蒲阪年二十一先妣闻之哭曰吾妹何负于天使至此极也已而弟几复负其丧殡於汝州佛舍後二十六年几复为太常博士乃举其丧葬于梁县从邻水府君之兆时某年月日也铭曰

特苗之秀未实而朽系时之逢无有美丑骨兮有归祭兮有依下从先人夫又奚悲

清逸处士魏君墓志铭【嘉佑八年作】

君讳闲字云夫世家於陕之东郊父讳野真宗皇帝时有大名累召终不能起赠著作郎君少喜为诗学鼓琴不乐仕进一遵著作君之志皇佑二年仁宗皇帝祀明堂诏天下求遗逸草莱年耆德茂者知府直史馆李公昭邁荐君再世有高节上嘉之赐号清逸处士嘉佑八年八月癸未終於家年八十四君自始生至没当国家隆盛偃兵无事之时家有旧田庐君谨守而治之朝廷以著作君之贤复其子孙无有所与以故沛然自足无衣食之累性不嗜酒谨洁守法度然与人和浮沈闾里不自標揭以故其生也人乐与之游其没也无谤言府县之官或时延礼亦与之往来然未尝有毫髮之私以干之其政事失得未尝纳于耳出于口也以故皆爱重之无厌倦少好养生大要用冲澹自守不以一物累其心以故视听步趋能老而不衰呜呼今之名处士者多矣或力为奇譎以盗声名万一辈幸欲欺愚俗取美官或交游有位依其名势乾没射利以侵渔细民若是者虽不仕又足贤乎然则能保其福乐而免於过咎有如君者凡几人耶君三娶曰臧氏曰赵氏曰皇甫氏子男一人曰樵女三人适进士梁軫张震左侍禁张宏孙男二人曰潜曰泽先仆射与著作君相爱如昆弟光拜君於髫髻之年今也其孤将以某年月日葬君於某地来求铭光何敢辞铭曰

天长不息兮地大无疆人寓其中兮细於毫芒夺攘纷纠兮非愚则狂惟君之生兮遭世宁昌依承先德兮晬然有光笥有余衣兮廩有余粮养生以理兮行已有方居不烦人兮游不出乡逍遥自适兮既壽而康视彼公侯兮金朱煌煌忧劳没齿兮或罹咎殃为得孰多兮为谋孰长

郢州处士王君墓志铭【嘉佑六年作】

至和中光从故丞相龐公镇郢州公命光典州学学生王大临通经有行谊光特爱重之後十五年王生来见光於京师曰大临将以今年某月某日葬其亲於须城县长山之麓子为我铭其墓光辞以拙於文生曰大临远来非有佗故唯铭之求朝士大夫以百数大临无所谄唯子之归子何得拒之光愧其言不敢辞因曰然则愿闻先子之行生乃出其邑人试秘书省校书郎梁君焘之状以授光曰君讳惟德字辅之始为童子父行戍於蜀君侍大父母抚诸弟以孝友闻其治家如成人大父母终君亲负土成坟终丧不尝酒肉父自蜀归家益富父好散施君竭力以助之有所与必称父命以致之尝举三礼一试於礼部不中格喟然归不复就举专以养亲治经为事着礼说二十卷性温厚喜导人为善乡里谓之王君子有鬪者君徐以义理辨告皆悦曰君子幸教我我何敢违即解去不复诣吏年若干病亟叹曰死生有命恨不得终为子之道以天圣五年十一月辛亥终再娶皆杨氏其後夫人赠职方员外郎旦之女也能成君之志顺适舅姑使之终身无忧愠之容及老寝疾每祭祀犹强起执事年若干以嘉佑五年十

二月己巳终子男五人长曰大顺今为剡县主簿次未名次大同皆早世次宗道次大临女二人长适大学馆学究刘应祥次亦早世君既没家甚贫大临以善讲解为诸生师月受俸於州学钱二千积而不用满三十万乃举两世之柩而葬之光不及见君知其为人以其子之贤与梁君之言於是乎铭铭曰

孝乎亲友于其弟家有余施及乡里人悦其教称为君子呜呼是亦为政奚必仕

玉城县君杨氏墓志铭

夫人姓杨氏故尚书工部郎中直史馆韩公之配也公之世系事业龙图阁直学士郭公志之矣夫人之先在唐为盛族居靖恭坊五代之乱衣冠之绪零落殆尽唯靖恭杨氏徙家于吴世有显人迄今不絕考讳蛻仕至尚书司封郎中精於吏治所至着声迹始韩公娶夫人之姊生男监铎及二女不幸早世公曰杨氏名族吾既谋於宗而卜於庙矣不可易也廼复请昏於夫人夫人年若干归韩氏生男镇钺初封真定後更封玉城县君为人慈和渊静不喜声味自少及长家人伺其动静语默皆有常度未尝移也其抚视六子衣服饮食无丝毫簿厚六子亦相与亲爱如一虽中外族姪莫知其为异母也年三十九而丧韩公三年不茹荤自是闭合深居日诵佛书不复有自虞乐之意年五十以至和元年三月乙亥终其五月壬申祔于公之墓时监为某官镇为某官铎为某官钺已前卒铎与光游素久因状夫人之行命光为之铭光不得辞曰

允矣夫人德则均一而行有常邪承祖之休宜于夫家而壽不将邪福祿当有余而更不足子孙其昌邪

彭城县君刘氏墓志铭【嘉佑五年作】

嘉佑五年某月日太常博士知蓬州事吴君几复祔其祖妣彭城县君刘氏于祖考御史府君之墓始夫人之没蓬州生二年矣比冠而父母兄皆即世家至贫漂泊汝洛间尝记幼时闻其兄言夫人之殯在京师广济佛寺已而举进士及第乃求所以广济佛寺者凡有二焉在城之东西往问夫人之殯皆莫能知蓬州刻志求之积年不置一旦至西寺有僧老矣忽来讯曰君非邻水令吴君之子邪曰然僧曰去三十载之前吴君殯其母夫人于是某为童子手亲涂之某亦吴姓也故能识之因指视其处蓬州未之敢信周视其涂圯剥且尽所余如掌而邻水府君之题识存焉乃奠而哭之又数年然後得合葬於洛阳之金谷乡自始没至葬四十二年矣噫微是孙也则夫人之柩其复得邪露殯积久而题识独存岂非邻水府君自悼其不幸未葬而天陰相之邪乃知诚孝可以动鬼神信矣御史府君讳某邻水府君讳某夫人平生行事不可复见其先单父人父为尚书郎云铭曰

夫人既终吴氏中微四十余年乃得其归孝孙有立神实告之

程夫人墓志铭【治平三年作】

治平三年夏苏府君終於京师光往吊焉二孤轼辙哭且言曰某将奉先君之柩终葬於蜀蜀人之祔也同塋而异圻日者吾母夫人之葬也未之铭子为我铭其圻光固辞不获命因曰夫人之德非异人所能知也愿闻其略二孤奉其事状拜以授光光拜受退而次之曰夫人姓程氏眉山人大理寺丞文应之女生十八年归苏氏程氏富而苏氏极贫夫人入门执妇职孝恭勤俭族人环视之无丝毫鞅鞅骄倨可讥诃状由是共贤之或谓夫人曰若父母非乏於财以父母之爱若求之宜无不应者何为甘此蔬粝独不可以一发言乎夫人曰然以我求於父母诚无不可万一使人谓吾夫为求於人以活其妻子者将若之何卒不求时祖姑犹在堂老而性严家人过堂下履错然有声已畏获 独夫人能顺适其志祖姑见之必说府君年二十七犹不学一旦慨然谓夫人曰吾自视今犹可学然家待我而生学且废生奈何夫人曰我欲言之久矣恶使子为因我而学者子苟有志以生累我可也即罄出服玩鬻之以治生不数年遂为富家府君由是得专志於学卒成大儒夫人喜读书皆识其大义轼辙之幼也夫人亲教之常戒曰汝读书勿效曹耦止欲以书自名而已每称引古人名节以励之曰汝果能死直道吾无戚焉已而二子同年登进士第又同登贤良方正科目宋兴以来唯故资政殿大学士吴公育与轼制策入三等辙所对语尤切直惊人繇夫人素勸之也若夫人者可谓知爱其子矣始夫人视其家财既有余廼叹曰是岂所谓福哉不已且愚吾子孙因求族姻之孤贫者悉为嫁娶振业之鄉人有急者时亦赙焉比其没家无一年之储夫人以嘉佑二年四月癸丑終於乡里其年十一月庚子葬某地年四十八轼登朝追封武阳县君凡生六子长男景山及三女皆早夭幼女有夫人之风能属文年十九既嫁而卒呜呼妇人柔顺足以睦其族智能足以齐其家斯已贤矣况如夫人能开发辅导成就其夫子使皆以文学显重於天下非识虑高絶能如是乎古之人称有国有家者其兴衰无不本於闺门今於夫人益见古人之可信也铭曰

贫不以污其夫之名富不以为其子之累知力学可以显其门而直道可以荣於世勉夫教子底於光大壽不充德福宜施於後嗣

叙清河郡君【元丰六年作】

清河郡君张氏冀州信都人礼部尚书致仕存之女端明殿学士司马光之妻也年十六适司马氏夫登朝封清河县君及为学士改郡君年六十元丰五年正月壬子晦終於洛阳三月辛巳晦葬涑水先茔君性和柔敦实自始嫁至於瞑目未尝见其有忿懣之色矫妄之言人虽以非意侵加默而受之终不与之辨曲直已亦不复贮於怀也上承舅姑旁接娣姒下抚甥侄莫不悦而安之御婢妾寬而知其劳苦无妬忌心尝夜濯足婢误以汤沃之烂其一足君批其颊数下而止病足月余方愈故其没也自族?至於厮养无亲踈大小哭之极哀久而不衰咸出於惻怛非外饰也内外无一人私议其短者兹岂声音笑貌之所能致邪平居谨於财不妄用自奉甚约及余用之以赙亲戚之急亦未尝吝也始余为学官笥中衣无几一夕盗入室尽卷以去时天向寒衾无纁絮客至无衫以见之余不能不叹嗟君笑曰但愿身安财须复有余贤其言为之释然近世墓皆有志刻石摹其文以遗人余以为妇人无外事有善不出闺门故止叙其事存於家庶使後世为妇者有所矜式耳

华陰侯仲连墓志铭【熙宁二年作】

华陰侯仲连字齐贤魏恭宪王元佐之曾孙郇国公允成之孙遂昭裕公宗顏之长子母曰太原郡君郭氏初除右内率府副率历率府率右千牛卫将军右监门卫大将军英宗即位迁右武卫大将军抚州刺史今上即位迁右羽林军大将军辰州团练使侯幼不好弄长而乐善学尤精於汉书昭裕公素好学喜为诗藏书万卷侯能嗣承其志目其诗曰貽庆集熙宁二年五月戊子以疾终享年三十有六上为之辍视朝一日追赠华州观察使封华陰侯夫人长安县君刘氏男二人长曰士讐蚤卒幼曰士頓右内率府率女六人四早卒二未嫁以某年十一月癸酉葬永安县铭曰

昭裕爱子以诗书教名而藏之志在则傲能守富贵为诸侯孝

右屯卫大将军令邦墓志铭【熙宁二年作】

右千牛卫大将军令邦字安国冀康孝王惟吉之曾孙丹阳僖穆王守节之孙右龙武军大将军陇州防御使世符之子也母曰南阳县君张氏将军生五年除太子内率府副率英宗即位迁右监门率府率今上践阼迁右千牛卫将军熙宁二年五月甲午遇疾卒年十九赠右屯卫大将军治平初英宗诏宗子无幼长皆就学差其年为大中小三品各置师以教之将军时年十二从父南康修孝王爱其才性命为小学録以表率群儿及年十五以新制试孝经论语於太宗正司二宗正以其诵习?精屡称叹之将军起谢不敏拜於牀下衆益美其警悟而不伐遂升中学授左氏春秋将军事亲至孝有疾至焚香於臂以祷请然亲有过未尝不谏争其所为得礼义类皆如此不幸早世识之者无亲疎共惜之二子男未名而卒女尚幼是岁十一月癸酉葬於永安县铭曰

学则敏行则孝志业修宜远到命不融衆所悼

仁和县君潘氏墓志铭【熙宁二年作】

皇从侄右武卫大将军蓬州刺史令超之夫人曰仁和县君潘氏故郑王美之曾孙平州刺史惟熙之孙合门只候仁矩之子生十六年以选归於蓬州使君封仁和县君熙宁二年八月己未疾以卒享年二十有四生五子男子翱右内率府副率次二男未名二女早夭铭曰太勲之门克生令孙归於帝族稟命天昏款文幽石以识莹园

皇从侄右屯卫大将军士虬墓记【熙宁二年作】

右千牛卫将军士虬右武卫大将军果州团练使齐安郡公仲合之子赠安化军节度观察留後高密郡公宗望之孙赠安远军节度使同中书门下平章事密国公允言之曾孙也母曰安康县君李氏将军生五岁以例赐名除右内率府副率明年迁右监门率府率今上践阼迁右千牛卫将军幼而秀慧不嬉戏异於常儿七岁始就学授孝经孜孜不舍昼夜教授刘仲章老儒生尝於广坐问之曰将军诵孝经果有何得对曰事亲孝故忠可移於君居家理故治可移於官此其所得也仲章惊叹曰异日成长必为德器数年愈自修立有成人之风亲亲尊尊动

皆应法问安视膳朝夕无倦不幸遇疾以熙宁二年五月丙戌卒年十二宗室共嗟惜之朝廷
赠右屯卫大将军其年十一月癸酉葬永安县谨记传家集卷七十八

卷七十九

钦定四库全书

传家集卷七十九 宋 司马光 撰碑

河东节度使守太尉开府仪同三司潞国公文公先庙碑【嘉佑二年作】

先王之制自天子至於官师皆有庙君子将营宫室宗庙为先居室为後及秦非笑圣人荡灭典礼务尊君卑臣於是天子之外无敢营宗庙者汉世公卿贵人多建祠堂於墓所在都邑则鲜焉魏晋以降渐复庙制其後遂着於令以官品为所祀世数之差唐侍中王珪不立私庙为执法所纠太宗命有司为之营构以耻之是以唐世贵臣皆有庙及五代荡析士民求生有所未遑礼颓教侈庙制遂絶宋兴夷乱苏疲久而未讲仁宗皇帝闵群臣贵极公相而祖祢食於寝儕於庶人庆历元年因郊祀赦听文武官依旧式立家庙令虽下有司莫之举士大夫亦以耳目久不际往往不知庙之可设於家也皇佑二年天子宗祀礼成平章事宋公奏言有司不能推述先典明谕上仁因循顾望遂踰十载缘偷袭弊殊可嗟悯臣尝因进对屡闻圣言谓诸臣专殖第产不立私庙睿心至意形於叹息盖由古今异宜封爵殊制因疑成憚遂格诏书请下礼官儒臣议定制度於是翰林承旨而下共奏请自平章事以上立四庙东宫少保以上二庙其余器服仪范俟更参酌以闻是岁十二月诏如其请既而在职者违慢相仗迄今庙制卒不立公卿亦安故习常得谗以为辞无肯唱衆为之者独平章事文公首奏乞立庙河南明年七月有诏可之然尚未知筑构之式靡所循依至和初西镇长安访唐庙之存者得杜岐公旧迹止余一堂四室及旁两翼嘉佑元年始仿而营之三年增置前两庑及门东庑以藏祭器西庑以藏家谱斋枋在中门之右省牲展饌视涤濯在中门之左庖厨在其东南其外门再重西折而南出四年秋庙成公以入辅出藩未尝踰时安处於洛元丰三年秋留守西都始衅庙而祀焉一旦授光以家谱曰予欲志族世之所从来及庙之所由立垂示後昆而为我叙其事欵於石光窃惟公追远复古率礼兴化之盛德不可以无传虽自知不文不敢辞谨叙而铭之按谱云文氏之先出陈公子完以諡为氏与翼祖讳同至秦有不丕生河东太守敦始家平阳其後有韶汉末为扬州刺史自韶以来世乃可谱韶之六世孙频为後魏北绛太守频曾孙显儒以别驾从北齐高祖起晋州就霸业武功居多终兖州刺史频之六世孙曰肃曰君洪肃仕隋为颍川郡丞名列循吏以公直抗宇文述老卑秩君洪从高祖起晋阳为右卫将军太子建成余党攻宫门君洪首奋挺出战没频之八世孙曰晖曰播晖相中宗诛张易之夺武后天下归之唐用仇人谗谪死峽南播有史学官至给事中君洪之曾孙羽为御史中丞肃之四世孙括为御史大夫括孙晦为太子宾客晦兄昕为义成节度使皞为散骑常侍荣冠当时自显儒至晦皆有传见於史其家自平阳或迁太平或迁蒲阪或迁实鼎晦之从父昆弟晤为北都留守判官始居介休晤生汾州参军槩槩生馆生泽州录事参军即公之高祖考也讳沼曾祖考讳某仕後唐历晋城天池平城三主簿避晋高祖讳更其氏曰文历崞太谷二令汉高祖即位复旧氏更名某汉失天下其支别者自帝於晋阳复事之终岚州录事参军祖考讳某辟石州

幕府弃官归乡里太宗皇帝平晋阳召之不起以庙讳故复为文氏考讳某以儒学进历十三官所至以强直勤敏振利攘害名闻达不可揜判三司开拆磨勘司终主客郎中河东转运使其治行之详见於故平章事晏公参知政事王公沂譔墓志及碑公贵朝廷褒荣三代赠官皆至太师中书令兼尚书令爵燕周魏三国公庙成泽州府君为第一室夫人某氏配燕公为第二室燕国太夫人宋氏配周公为第三室周国太夫人王氏越国太夫人申氏配魏公居东室魏国太夫人耿氏鲁国太夫人申氏配公以庙制未备不敢作主用晋荀安昌公祠制作神板采唐周元阳议祠以元日寒食秋分冬夏至致斋一日又以或受诏之四方不常其居乃酌古诸侯载迁主之义作车奉神板以行此皆礼之从宜者也其铭曰郁彼乔木茂於苞根浩彼长川发於浚源矧人之先云谁敢援天佑有宋诞生哲臣乃幹枢轴乃秉熔钧克厘克谐允武允文甘陵有妖悖暴纷嚣公往逍遥不日而消仁祖构疾群心震栗公入密勿四海清谧出殿方维为诸侯师以惠以绥不废其威至也民悦去也民思其思如何式谣且歌歌政之和在洛为多谋居之安畴如得民公自汾渚迁於洛汭允乐兹土永燕_{si}处伊水洋洋山木苍苍是抡是劇是断是斷达於有洛是相是虞是卜是諏是筑是球是植是扶是茨是涂作庙渠渠新庙既成室家是营公曰予居风雨是抚勿侈勿崇予躬是容人庠公堂公曰予康人隘公庭公曰予宁人勿予隘维子孙是赖人勿予庠维子孙是利克恭克俭予履予视俾躬之为美匪目之为丽庙堂既辟四室有飶豢牲孔硕导黍及稷豆笾既滌汎扫既备旨酒既沛刳牲为饁乃荐乃陈苾苾芬芬祖考欣欣百嘏来臻天锡公祉强明壽恺帝锡公祿崇荣丰泰天匪公私公德是宜帝匪公优公勲是醺公拜稽首扬天子之休思纯终始式貽孙子子子孙孙勿替勿忘时奉烝尝保公之烈光

户部侍郎周公神道碑【治平四年作】

周以国为氏汉魏以来世有显人公之先家於益都會祖考讳仁贵不仕祖考讳子元举三礼登科为深州司法参军契丹覆深州举室罹祸朝廷哀之赠大理寺丞祖妣田氏追封仙游县太君考讳圭时适在外得免朝廷赐以官终太子中舍累赠尚书左仆射妣李氏累封常山县太君公讳沆字子真举进士一上中第除胶水县主簿初试吏事精敏如素习上下称其能徙诸城主簿用蔡文忠公荐迁镇海军节度推官知勃海县滨州大吏恃府势筑室鄣民居害其出入民诉县以十数前令莫敢直公立表撤室收吏抵罪豪猾惕息岁余召入改著作佐郎县民诣转运使杜祁公请留祁公为奏诏许之会公以母老疾求监青州税寻以忧去职服除知嘉兴县赵元昊扰西陲诏近臣举可通判陕西诸州者富丞相时知制诰以公名闻擢通判凤翔府以权发遣盐铁判官召还改江西转运判官公固辞愿得近乡里一官以谋葬乃改知沂州过京师入对言事仁宗善之赐服银绯到官数月召还为开封府推官俄迁判官会湖南蛮唐盘二族杀掠居民官军讨之数不利有诏本路遣人招抚蛮辄杀之乃以公为转运使委之经画辞行仍服金紫公至上言蛮骤胜方骄未易怀服宜须秋冬进兵击之蛮地险气毒其人骁悍善用鋌盾北军不能与之确请选邕宜融三州澄海忠敢知其山川习其伎艺者三千人入捣巢穴余兵络山足出则猎取之俟其势穷力屈然後可招抚也朝廷用其策二族皆降湖南遂平是时军旅暴兴运路险澁公随宜区处资粮丰给而民不疲病召为度支判官行未至复加直史館知潭州兼荆湖南路安抚使先是北军戍湖南山谿者或期年或再期乃代去再期者多死瘴疠公奏以为不均请皆以期年为断所生全甚衆归朝除河东路转运使自庆历

以来河东行铁钱民多盗铸吏以峻法惩之抵罪者日繁终不能禁公乃命高估铁价盗铸者无利不禁自息入为度支副使依智高寇掠广南既败走诏以公为西路安抚使天子以岭南地恶命公非贼所残州县不必往公曰天子之命至仁也然远民新罹荼毒余敢不究宣天子之泽以面慰之乎遂徧行州县虽穷僻无不到者民避贼多弃田里远去吏以常法满半岁不还者皆听人占佃公曰是岂与凶年逃租役者同乎奏更延期一年召使复业有已为人占佃者皆夺还之仍免其一年租三年役贫者县官贷以种粮由是岭南民复安集又奉使契丹还加天章阁待制为陕西都转运使未几改河北初河自横陇西徙趋德博後十余年又自商胡西徙趋恩冀朝廷皆以功大遂不复塞有李仲昌者建议请自商胡口下凿六塔渠引河东注横陇故道用功省而利大诏遣使者与公行视利害公上言国家近议塞商胡计用薪苏一千六百四十五万役工五百八十三万今仲昌奏塞六塔计用薪苏三百万共是一河其塞之工力不容若是之殊盖仲昌故为小计以求兴役殆非事实又即日河水广二百余步六塔渠广四十余步必不能容且横陇下流自河徙以来填阨成高陆其西堤粗完东堤或在或亡前日六塔水微通分太河之水曾不及十分之三滨水之民丧业者已三万余户就使如仲昌言全河东注必横溃泛滥齐博德棣滨五州之民皆为鱼鼈食矣今自六塔距海不啻千余里若果欲壅河使东宜先治水所过两堤使皆高厚仍备置吏兵分守其地多积薪苏以防冲决乃可为也然其劳费甚大恐未易可办以臣度之六塔实不可塞朝廷卒用仲昌议塞之既塞不终朝复决齐博等州果大被水害朝廷乃窜仲昌於岭南诸阿附其议者亦抵罪衆始知公议为是公又上言民罹水灾皆结庐堤冢粮乏可哀臣欲辄发近仓赈之顾大恩当自上出臣不敢窃取为名愿亟遣使者案视收恤之朝廷从之未几徙河东都转运使踰年迁龙图阁直学士知庆州兼环庆路经略安抚使边民多阑出塞贩青盐抵重法公请损官盐之价犯者稍衰入判三班监兵部太常寺通进银台司仁宗山陵为卤簿使又以遗留物奉使契丹公以二使皆有厚赆不欲专之因托以力不能兼辞使契丹不行士大夫美之英宗初即位契丹遣使贺乾元节公为馆伴诏取书入置枢前使者固请见上曰取书非故典也上以方衰絰不许使者执书不肯授合门公曰昔北朝有丧南使至柳河而还今朝廷重邻好听君前至京师达命於先帝恩礼厚矣奈何更以取书为嫌乎使者立授书是时朝廷未知契丹主之年公从容杂佗语以问使者使者出不意遽以实对既而悔之相顾愕眙曰今复应兄事南朝矣顷之迁枢密直学士知成德军兼真定府路安抚使土俗多弃亲事浮图公案籍阅其不知法者皆斥还其家凡斥数千人真定数人以疾辞位治平四年以户部侍郎致仕其年八月丁未朔薨於公家年六十九公为人庄重动止皆有法不妄笑语居家孝友甚至而当官谨严始终如一鉏奸卫良摧强抚弱去嘉兴二十年人有过其县闻民间犹思咏之以为前後无有罢潭州民遮道不得行公谕解不能却乃旋轡而南曰当与汝归耳衆喜奔呼争先道稍开跃马北去追至境者尚数百人与僚佐议事其言当者立从之不当不面斥其短徐曰某意欲如此为安衆亦不能易也所部官属有罪先以好言谕之不变乃诮责之惧而自改者盖十七八苟尚不变乃案致於法犹为亏除不尽绳也有死於官下其家孤贫不能自归者必为赙敛卫送或无归者则为存处立生业嫁其女诲其子弟视如亲戚故人始望其貌皆慄然畏之久而求其心乃知实仁厚长者也先娶王氏再娶刘氏封彭城郡君皆先公即世三男莘将作监主簿百药大理寺丞常大理评事二女适太常博士荣安道来安令江懋简公薨之岁十月己酉葬於先莹百药暨常欲刻碑临道俾异日郷人皆得瞻公之墓不忘公之德请馆阁校勘梁君焘状公之功行以授光命为之铭光昔通判并州事事公於河东虽自知无文不敢终辞铭曰

古之君子德盛道尊望之俨然即之也温公正衣冠严不可干施之於政乃仁乃寬吏畏而悛民思不谖款铭垂美以告後昆

行狀

故處士贈都官郎中司馬君行狀

曾祖林祖政父炳皆不仕

君諱沂陝州夏縣涑水鄉高堠里人其先出於晉安平獻王至征東大將軍陽始葬於河東安邑涑水之南後魏孝文帝太和中分安邑為夏縣遂為夏縣人自唐以來仕宦陵夷降在畎畝然累世兄弟未嘗異居故家之食口甚衆而生業素薄無以贍之君幼而孝謹諸父兄悉以家事委之君於是治田疇繕園圃修闌笠完囷倉雖有佣保必以身先之使莫敢不盡力者夜則側板而枕之寐不熟輒寤當是時田不加廣而家用饒又未嘗為商賈奇袤之業一出於田畜而已諸父兄皆醉飽安佚而君無故不親酒肉遇鄉人之匱乏者或解衣以濟之年三十二以景德三年十二月丙子終於家某年月日葬於南原待制府君常嘆曰自吾兄之亡而家遂貧豈所以資生之具減於昔日勤惰不同而已矣嗚呼使天下之民皆若吾兄之為雖古治世何以加惜其無位而才不大施也夫人李氏同里人年二十八而寡二男咏里及一女皆幼咏女尋又卒父母欲奪其志夫家尊章亦遣焉夫人自誓不許惡衣蔬食躬執勤苦使里之四方就學姑李氏老且病常卧一榻扶然後起哺然後食夫人左右就養未嘗小失其意如是積年以至於沒無懈倦之色既而里登進士第迎夫人之官夫人自幼未嘗與其母別至是思慕成疾久之方愈里累遷為尚書都官郎中歷典數州贈君官至尚書都官郎中夫人封永壽縣太君夫人为人慈柔勤儉中外宗族咸慕仰之始終無間言子為二千石極其榮養年八十三以嘉佑五年九月甲寅終於京師其年十一月壬寅祔於君之墓光不及事君而及事夫人故得書其聞見之實以請於今之德行文辭為人信者以表其墓庶幾得於不朽而子孫有所法則焉謹狀

墓表

贈比部郎中司馬君墓表【天聖元年三月作】

兄諱某字嘉謨陝州夏縣人其先宗支所自出見於祖墓碣曾祖諱某祖諱某父諱某皆不仕兄為人謹厚孝於親友於兄弟自幼及長無子弟之過不幸生二十八年以天禧四年六月辛卯終於家夫人同縣王氏進士禹之女長男未名而次男京生未踰歲而兄沒夫人年尚少自誓不嫁京既長以叔祖天章府君入官為人強直干敏所至吏民稱之由是累遷尚書駕部員外郎通判潞州軍州事贈兄官至比部郎中夫人享榮祿之養幾三十年封福昌縣太君年七十九以熙寧三年七月壬寅終二女長適鄉人曹中立早卒次適進士宋輔始兄之沒光生二年矣故於兄之材行不能詳知然苟非兄力為善於其身而無祿安能有遺福及其後邪兄以天聖六年三月乙巳葬於先塋及夫人之沒以其年十月辛酉祔於兄墓京懼歲時之久不

可以莫之识也泣请於光为之表

赠卫尉少卿司马府君墓表【庆历二年作】

府君讳浩於司徒公为从父兄其乡里先世见於祖墓碣曾祖讳某祖讳某父讳某皆不仕府君少治诗以学究举凡八上终不遇遂絶意不复自进於有司专以治家为事为人魁?慷慨尚气义於宗族恩尤笃司马氏累世聚居食口衆而田园寡府君竭力营衣食以赠之均一无私孀妇孤儿皆获其所凡数十年始终无私毫怨言家贫祖墓迫隘尊卑长幼前後积若干丧久未之葬府君履行祖墓之西相地为新墓称家之有无一旦悉举而葬之弟子里早孤府君识其偶异自幼教督甚严其後卒以文学取进士第仕至太常少卿所至着名迹前此乡人导涑水以溉田利甚博岁久岸益深峭水不能复上田日硤薄将不足以输租府君帅郷人言县官始请筑塌於下流水乃复行田间为民用至于今赖之天圣八年四月癸巳终于家年六十三庆历二年八月癸酉葬西墓初娶张氏早终生女适解人南公佐公佐举进士得同学究出身再娶苏氏先府君十年终年五十八生男宣又娶郭氏无子後府君十六年终年若干宣用司徒公?补郊社斋郎累官为尚书驾部员外郎知梁山军今致仕居家驾部君寛厚有守练习法令善为政吏民不能欺既升朝累赠府君官至卫尉少卿夫人苏氏追封长安县太君驾部君谓古君子必论譔其先人之美着诸金石故命光直叙其实以表於府君之墓道时熙宁六年五月辛酉也

哀辞

石昌言哀辞

眉山石昌言年十八州举进士伦辈数百人昌言为之首声振西蜀四十三乃及第及第十八年知制诰又三年以疾终呜呼少而秀宜其速成返齟齬不进晚而达宜其壽又未老而终天道幽远真不可得而识邪昌言为人纯素忠谨望之俨然以律度自居即之恂恂温厚善谈笑令人心醉不能舍去光为儿始执卷则闻昌言名已而同年登进士第与昌言游凡二十年自始得见至於永诀其间迭有进退穷通相遇如一日既不可得而亲亦不可得而疎也诗云淑人君子其仪一兮其仪一兮心如结兮昌言之谓邪於未没数日光往见之起居固无恙一旦有人告曰昌言去夜得疾甚急未及问讯又有继至者曰昌言没矣呜呼死者人之常善恶修短固不敢言何夺之之暴也前年光自晋阳归昌言延我於中堂酌滑台暑酿以饮我及往奠於画像之前则依然昔时置酒处也呜呼谁能睹是而不恻也哉廼为之辞曰

呜呼昌言天既赋以纯美兮胡有德而不年荣禄何後兮零落何先几日不见兮邈然九泉士丧师友兮国亡俊贤绿耳颠蹶兮璵璠弃捐冥冥不可求兮杳杳不可追独行过门兮怳焉自疑车马不见兮远行何之忽思长逝兮涕下交颐寒暑回薄兮宿草离离哭也有终兮忘也无时

传家集卷七十九

卷八十

钦定四库全书

传家集卷八十 宋 司马光 撰祭文

豢龙庙祈雨文

年月日宣德郎将作监主簿权知常城县事司马光谨率吏民具清酌庶羞之奠致祭於豢龙之神昔者圣王设官分职畜扰神物以为人用後世丧业神实继之知龙嗜慾服事夏后王嘉神劳胙以此土岁祀超忽庙貌仍存阖县奔走春秋荐献却灾致福保佑斯人今大夏将尽而历时不雨谷苗槁死不可复殖仓廩无储民将何恃民实神主神实民休百姓不粒谁供神役邑长有罪神当罚之百姓无辜神当爱之天有甘泽龙实司之以时宣施神实使之稿者以荣死者以生旱气削除化为丰登然後自迓及远粢盛牲酒以承事神永永无斁伏惟尚飨

祭齐国献穆大长公主文【为两制诸公作】

惟灵袭庆皇家作嫔侯族环佩为节动顾礼文苹藻必亲无违妇职承天以顺教子以慈纯素柔嘉自忘王姬之贵肃雍明智居为里戚之规呜呼遐福未终大期奄及去白日之昭晰归下泉之窈冥宸极惋伤具僚增欷祇陈薄荐庶达菲诚尚飨

祭郭侍读文

维皇佑四年五月壬子尚书屯田员外郎孙琳殿中丞司马光太子左赞善大夫李端卿大理寺丞李杲卿前通州推官楚楷谨致祭於故侍读学士郭公之灵呜呼惟公之德清夷纯白恪慎匪懈勤劬朝夕文为国华行为士则抱牍拱编雍容帝侧贫锡之金坐命之席絶衆逾伦恩辉备极如何不淑奄从窀穸某等庸蔽久泳公恩承乏下僚从公外藩庇其闕遗悔之话言如妖如孽心何敢援今兹相顾失涕来门瞻望灵帷荐其苹蘩凄风肃然髣髴如存呜呼哀哉尚飨

祭范尚书文【以下二篇为两制诸公作】

呜呼天生偶贤为国之纪服休服采以翼天子冠带立朝正色巖巖说言直节奋不顾已廼率西师氏羌率俾廼赞公台缉熙物轨乃牧东夏刑清政理德实光大才则茂矣宜其永龄享有多祉如何不淑远涂中止輶车过都顿舍甚迓奠不手伤僭病何已灵底其衷歆兹馨旨尚飨

祭观文丁尚书文

惟公抱素怀真含忠履厚赋才茂美逢世休嘉降集帝庭回翔禁署羽仪髦雋黼黻训辞登赞机衡进参台鼎物无疵疠民底又安陪侍殿帷雍容风议老成之德中外式瞻宜享永年以毗大业如何不淑陨此哲人日月有时輶车首路兴言僚旧哽涕无从薄荐醪羞式歆哀歎尚飨

诸庙祈雪文

窃以雪霜不时神实职之编室流亡吏当坐之今者自秋徂冬天泽未浹麦既寡又将槁枯意者吏不职欤民无告欤胡为困苦使至此极也惟神哀民之穷寬吏之辜使雪以时降而麦犹有收敢不牲酒鼓舞以承神休尚飨

祭黄石公文

维年月日具官某谨遣某官某敢以香酒告於黄石公之神惟公禀天至灵与圣同契幽赞人杰光启汉家庙食於今千有余祀惟是郢土居神宇下旷冬无雪宿麦将枯旧廩既罄新场无望老穉遑遑滨於沟壑上圣夙夜苦心焦思中外百吏忧愧失图惟神导天之和寬上之虑救民之死赦吏之罪使膏泽下济土脉僨兴回枯为荣变凶成稔敢不只率所部远迩之民以承事神永永无斁尚飨

祭刘大卿文【为始平公作】

维年月日具位某谨以清酌庶羞之奠致祭于同年留台大卿之灵昔与羣雋同登帝庭煜如春葩杂然秀发岁阳四浹零落几尽如何兹者又陨伊人惟君资性纯和雅尚恬漠委远繁要雍容外台维汶之阳寔为故里间者相遇觴咏甚欢华轩西征远送于野辙迹未灭遽以丧归永言痾嗟情何能极荐奠虽簿歆兹至诚尚飨

诸庙祈雨文

间以旱暵病于稼穡得请于神祝之甘泽来麤以登民以粒食荷神之休永久无极今兹禾黍尚穉菽麦未艺土壤已槁霏润无继川泽将涸螟 方炽妇子遑遑忧犹未艾神宜监民之穷悯物之沴沃洒嘉生导迎和气庶几丰穰克终大惠敢不鼓舞以承神事尚飨

诸庙谢雨文

间以旱暵有谒于神神享其衷锡以嘉雨虽高下未浹远迩未均田亩小濡民意差缓蒙神之惠不敢宁居选牲洁酒亟伸报赛惟神嗣降丰泽克终显德尚飨

晋祠祈雨文

盖闻诚通无远神鉴无幽始谓不然迺今知信属者时雨稍乏宿麦未滋躬谒严祠默伸心祷

回輶再宿嘉澍响臻岂悬欸之微克留神听寔元元之幸宜蒙神福然原陆久燥根荄未浹畝喁喁犹有待望谨以清醑嘉荐答扬神惠神当茂布优渥以终大施尚飨

祭晋祠文

维年月日具官某谨遣某官某谨以醪果殽羞恭荐于某神惟神宅晋之原食晋之土凡在晋境皆为神宇今嘉泽虽丰沾润未溥神心无私民靡不抚远迩之间奚有舍取惟神申大前德均锡灵雨实我来甦秀我秣黍穗栖于田粒益于庾为酒为醴永承神祐尚飨

晋祠谢晴文

久雨不止涉于积旬污邪既瀦平原将溢田恐芜秽民忧垫隘有司恐惧谋请于神聪明感通遽已晴霁水返其壑云归於山蔬谷无亏岁则大熟蒙神之休敢爱牲酒尚飨

祭雷道矩文

维年月日陕郡司马光谨致祭于士友雷君道矩之灵呜呼道矩气厚以和行直且方谨畏礼律如循锋鋌临义敢决若挥干将无位於朝忧国遑遑发愤抗言忠鯁激昂远虑万世引之深长家声不陨?然有光西戎骄贪蠹食我疆策马径前挺身战塲敷陈直辞逆折豺狼虜气方沮斂踪退藏如何不淑罹此疾殃微息垂尽遗音琅琅上嗟王事未毕而亡下痛老母皤然在堂言终而絕云谁不伤呜呼道矩短长有时不可推移善恶得失系人施为显晦穷通云胡可期立身如此可以无悲独我友生烦冤涕洟恨此膏泽不沾蒸黎奠以荐诚魂乎有知呜呼哀哉尚飨

祭江隣几文

呜呼佗人之生憎爱纠纷独君不然见之者亲佗人之死议论交集独君不然闻之者泣问君何修乃能致此率其诚心无有表里是宜胡翥光大显融如何不淑星未五终平日之游晨往夕来宛其在目谁能不哀念君素怀於物何有叙兹永违无若卮酒尚飨

三司祭张元常文

惟君寬裕敦笃外和内直秀眉广颡盛气扬休吉德之报宜蒙遐福骨相之符必享永年如何一朝两违所望凡在僚友孰不惋伤奠以荐诚庶几来飨

初除待制祭先公文

光闻祿不及亲古人所叹重茵列鼎适足增悲光弱冠之初幸尘仕籍罪多福鲜继招凶衅顾复之恩阙焉靡报痛毒愁辛无忘夙夜诚不自意蒙荷余休名参侍从身践世职不肖之质何

以似续慙作战兢不遑启处甘旨之养已无所展忠直之风庶几不坠力自黽勉无忝所生备位谏臣不敢自远瞻望邱垄涕泗交横尚飡

祭庞颖公文【嘉佑八年五月作】

维嘉佑八年五月丁巳具官司马光谨以清酌庶羞之奠躬荐於故相国赠司空侍中颖公之灵公茂德丰功布於四海事存石刻不敢重陈念昔先人久同僚案越自童龀得侍坐隅抚首提携爱均子姓甫胜冠弁遽丧所天孤苦蠢愚不能自立长号四望谁复顾哀惟公眷怜过於平日既释纓服还齿簪裾举首朝端繄公是赖爰加振拔俾出泥涂讎校秘文讨论前载逮公出牧两托後车推心不疑言皆见纳立效甚寡为负实多过若邱山咸加掩覆善如丝粟必见褒扬屡荐其名彻闻天听遂尘清贯获备还臣今日所蒙莫非公力言念恩纪终身敢忘承乏谏垣造请有禁不亲杖屨殆将再期岂意一朝忽为永诀仪刑在目训诲如闻奄去华堂长归幽壤心焉陨绝言不成章英灵有知临此薄酌呜呼哀哉尚飡

告题祭版文【治平四年十月作】

治平四年十月辛酉曾孙具官光敢昭告於曾祖考处士府君曾祖妣夫人伏以春秋祭祀思慕无穷宜有屏掇以伸瞻奉谨以良月吉日恭题祭版伏惟尊灵降监昭格是凭是依尚飡

祭张尚书文【熙宁四年作】

维熙宁四年月日女壻具官司马光谨以清酌庶羞祭於故礼部尚书张公之灵公之德业衆所尊仰始终详实已载铭文在昔先公与公同省间来问讯延就中堂光时弁髦立侍左右蒙公一见许以成人不卜不谋遂妻以子自惟童騃齿位殊绝未尝交语从何辱知知己之恩重於姻戚没身衔戢不敢弭忘闻讣之初涕零如雨缀於官守走哭无从远荐醪羞用辞为侑尚飡

祭吕献可文【熙宁四年八月作】

呜呼献可之亡海内叹惜况於亲友惋伤可知忠直敢言人人自许谁如献可始末无亏道不愧心名高於世壽夭不校余复何言知我之深见於临没今兹永诀文不逮情呜呼哀哉尚飡

张尚书葬祭文

维熙宁四年八月日女壻具官司马光谨以清酌庶羞祭於礼部尚书致仕清河恭安公之灵日月徂迁葬期已及承乏西台不敢离局行不执紼奠不操卮引领松楸悲何有极尚飡

祭钱君倚文

维熙宁六年七月己未陕郡司马光谨致祭於君倚舍人之灵呜呼君倚好贤如亲就义若渴非圣不学唯善是为纳忠於君耻後尧舜竭力於友志追陈雷推诚而行不疑不畏屡蹈颠沛终殄悔心甲科荣名西掖清贯君倚之美兹不足言始谓吉人必膺遐福如何雕谢曾未二毛我与君倚南北殊乡哲愚异品中年相值情厚故交饰貌无华发言必尽风迹犹在精爽何之江山阻长醪羞微薄惟期惋怛可以潜通呜呼哀哉尚飨

祭董少卿文

维年月日具位司马光谨致祭於邻几少卿董兄之灵兄昔为夏宰西鄙用师赋调虽烦民不告病生齿虽衆讼庭常虚光实夏民目所亲睹自兄之去继者为谁三十年余屈指无几兄入佐会计出奉简书历守别藩所至称治民怀其惠吏畏其明为时材臣屡当剧任指顾立辨不废笑谈与人游居雍容恺悌引年据礼纳禄辞荣志力精强谓宜遐壽如何不淑奄忽长归光既旧且亲荷知为厚闻讣哀惋始不自胜薄致醪羞维诚是荐尚飨

祭张密学文

惟公幼而孝长而谨以文学从仕以勤力当官入侍禁严誉处台省出敷惠化周流藩宣将漕则蓄积丰衍监边则民夷怀服虑无微而不臻职无烦而不举朝倚器干时推精力壽考而终福祿流厚今兹自宋迁周舍卑就燥卜宅得吉祖载及期光等早厕宾客之末晚陪嗣子之游式陈醪羞用荐衷素尚飨

祭陈彦升文

年月日涑水司马光谨以香酒膳羞致祭于彦升之灵呜呼光平生取友以道相亲如彦升之质直光所心服忽焉弃我惋痛诚深尚飨

奠李夫人文

元丰七年十月乙酉具官司马光谨遣男某官某致祭奠於故李尚书夫人之灵夫人明智而温柔顺而正知古不泥从俗不流礼刑闺门名播乡曲神明保佑壽考令终光忝预族姻素服懿德敢陈薄酌式荐微诚尚飨改葬先令公启殡祭文【以下为丞相作】

某豐恶不天福佑单薄旨甘甫备风树永违日月贸迁松檟未植夙兴夜处心不遑宁是用物土之良諏时之吉改卜宅兆恭启攢涂属以备位宰司任隆责大恳祈退避恩指莫从不得临穴尽哀凭棺取诀永言罪负隕絶复苏叩心长号五内糜沸

令公祖奠文

日月有期灵輶将进远违故壤迁就佳城惟灵澹泊安闲以时就道山川无壅徒御不惊瞻慕

攀号心摧气结

令公到墓祭文

阙塞之阳伊川之浹地形爽垲水脉厚深惟灵去故就新永宁兹宅不蹇不圯保固亿年涕慕之心昊天罔极

令公掩圻祭文

呜呼祿不逮亲古人所叹重茵列鼎谁适为荣掩坎聚坟身不亲在羹门既键长夜无晨瞻望题和於兹永絶兴言念此心爽飞扬触地号天肝肠寸絶

员外启殡祭文

惟灵居家孝慈莅官肃给如何茂德不享遐年爰择令辰肇开旅殓迁就祖域永有依归沃酌不亲倍增悲涕尚飨

员外掩圻祭文

日吉时良已就安宅祖祢咸在如从远归英灵有知足慰冥漠终古永诀临风涕洟尚飨

颍川郡夫人焚黄祭文

夫人胄自德门无祿蚤世久同困约不与显荣朝推恩渥追锡嘉命鱼轩翟茀烛耀重泉灵而有知歆戴天宠尚飨

启殡祭文

旅官飘飏家无常所櫟榘未瘞久寓西郊逢时之良迁就窀穸撤攢云始取道有期抚事怅然益增感悼

祖奠祭文

日月有期輶輿当发川涂寢邈丘垄长归伉俪之心曷胜悲惋

传家集卷八十